Dīghanikāye Pāthikavaggaṭṭhakathāya

Atthavannanābhūtā

Bhadantācariyadhammapālattherena katā

Pāthikavaggatīkā



Buddhavasse 2552 Marammavasse 1370 AD. 2008

Romanized from Myanmar version published in 1961

© Buddhasāsana Society

Ţīkā Series 12

First published in 2008 by Ministry of Religious Affairs
Yangon, Myanmar

THE PĀĻI ALPHABET IN BURMESE AND ROMAN CHARACTERS

ς.	71	T	λ	71	Γ	v
7	7.1	г	v	, ,	ι.	v

						VOW.	ELS						
න <i>ව</i>	ì :	නා ā	တ္တ	i	නු	ī	ը ս	l	දී ū		e e		သ ၀
			CO			TS W			EL "A	,,			
		က	ka	ə k	tha	o ga	ì	ဃ ဥ	ha	c na			
		o (ca	ဆ	cha	е ja		ဈ jh	ıa	ըña			
		•	a	_		ခု da							
						з da				•			
		οĮ	oa	o p	ha	ဗ ba	ì	ဘ b	ha	မ ma	ı		
ω y	a c	ra ra	∾ .	la	o V	'a	သေ S	a	တ h	a	ę ļa	•	ṁ
						IN CO							
_ _ .	_1 = ā	<u> </u>	i .	<u> </u>	τ	-(= u	īL	-[= [[]	Ū a	s- = e	. (ചേ ചീ	= O
თ ka	ကာ ka	ā ကိ	ki	ကိ	kī	ကု k	u	ကူ k	ū	ကေ k	(e	ကော ါ	02
ວ kha	อ์ khā											බේ kh	
				CON	JUN	CT-C	ONSC	NAN	ITS				
റ്റ്റ kka		င်္ဃ ṅgl	ha	a	g nth	na	ဓျ	dhya	l	ც p	la		လ္လ lla
ന്റ kkh	a	g cca		CI	b úqa	a	8	dhva		g p	ba		ભુ lya
നു kya		g cch	a	a	s init	a	နှီ တ	nta		ల్ల b	bha	Į.	လှ lha
ලී kri		g jja		a	ទ nha	a	8	ntva		ဗျ b	oya		9 vha
ස kla		g jjha	l	g	g tta		&	ntha		මු b	ora		ည္က sta
ფ kva		ည ñña	a	g	g ttha	a	8	nda		မွ n	npa		ධූ stra
จุ khya	L	ə ñha		o	g tva		୍ଷ	ndra		ଧୃ 11	npha	a	ગ્રૄ sna
g khva		g ñca		o	ą tya	ı	80	ndha	-	မွ n	nba		သျ sya
g gga		නූ ñch	a	0	g tra		8	nna		မ္တ 11	nbha	a	ဿ ssa
ვ ggha		g ñja		<u> </u>	dda		နျ	nya		မ္မ n	nma	l	သ္မ sma
၅ gya		g ñjha	a	3	ddha	a	ş	nha		မျ 11	nya		သွ sva
ြ gra		ş tta		अ	dya		ပ္ပ	ppa		မှ n	nha		_{ගු} hma
င်္က ṅka		g ttha		િલ	dra			ppha		ယျ	yya		ფ hva
å ṅkha		ð qqa		_ ვ	dva			pya			yha		g ļha
δ ṅga		~		J			•			-			
		Э	J	9	9	9	G	૧	၈	6	0		
		1	2	3	4	5	6	7	8	9	0		

Pāthikavaggaṭīkā

Mātikā		Piț	ṭhaṅka
1. Pāthikasutta			
Sunakkhattavatthuvaṇṇanā			1
Korakhattiyavatthuvaṇṇanā			4
Acelakaļāramaṭṭakavatthuvaṇṇanā			6
Acelakapāthikaputtavatthuvaṇṇanā			7
Iddhipāṭihāriyakathāvaṇṇanā			8
Aggaññapaññattikathāvaṇṇanā			11
2. Udumbarikasutta			
Nigrodhaparibbājakavatthuvaṇṇanā			14
Tapojigucchāvādavaņņanā		•••	17
Upakkilesavaṇṇanā			17
Parisuddhapapațikappattakathāvaṇṇanā			20
Parisuddhatacappattādikathāvaṇṇanā			21
Nigrodhassapajjhāyanavaṇṇanā			22
Brahmacariyapariyosānādivaṇṇanā	•••	•••	22
3. Cakkavattisutta			
Attadīpasaraņatāvaņņanā			24
Daļhanemicakkavattirājakathāvaņņanā			27
Cakkavatti-ariyavattavaṇṇanā			28
Cakkaratanapātubhāvavaṇṇanā			29
Dutiyādicakkavattikathāvaṇṇanā			29
Āyuvaṇṇādiparihānikathāvaṇṇanā			30

Mātikā		Piţ	thaṅka
Dasavassāyukasamayavaņņanā			31
Āyuvaṇṇādivaḍḍhanakathāvaṇṇanā			32
Sankharāja-uppattivannanā			33
Metteyyabuddhuppādavannanā			33
Bhikkhuno āyuvaṇṇādivaḍḍhanakathāvaṇṇanā			34
4. Aggaññasutta			
Vāseṭṭhabhāradvājavaṇṇanā		•••	36
Catuvaṇṇasuddhivaṇṇanā			38
Rasapathavipātubhāvavaņņanā			42
Candimasūriyādipātubhāvavaņņanā			42
Bhūmipappaṭakapātubhāvādivaṇṇanā			45
Itthipurisaliṅgādipātubhāvavaṇṇanā			46
Methunadhammasamācāravaṇṇanā			47
Sālivibhāgavaṇṇanā			47
Mahāsammatarājavaṇṇanā			47
Brāhmaṇamaṇḍalādivaṇṇanā			48
Duccaritādikathāvaņņanā			49
Bodhipakkhiyabhāvanāvaṇṇanā	•••	•••	50
5. Sampasādanīyasutta			
Sāriputtasīhanādavaṇṇanā		•••	52
Kusaladhammadesanāvaņņanā	•••	•••	64
Āyatanapaṇṇattidesanāvaṇṇanā			66
Gabbhāvakkantidesanāvaņņanā	•••	•••	66
Ādesanavidhādesanāvaṇṇanā	•••	•••	67
Dassanasamāpattidesanāvaņņanā	•••	•••	69
Puggalapaṇṇattidesanāvaṇṇanā	•••	•••	72

Mātikā		Piţ	ṭhaṅka
Padhānadesanāvaṇṇanā			74
Paţivadādesanāvaṇṇanā			75
Bhassasamācārādidesanāvaṇṇanā	•••		75
Anusāsanavidhādesanādivaņņanā	•••		77
Aññathāsatthuguṇadassanādivaṇṇanā	•••	•••	79
Anuyogadānappakāravaṇṇanā	•••	•••	81
Tipiṭaka-antaradhānakathāvaṇṇanā			83
Sāsana-antarahitavaṇṇanā	•••		83
Acchariya-abbhutavannanā	•••	•••	86
6. Pāsādikasutta			
Niganthanāṭaputtakālamkiriyavannanā	•••		87
Dhammaratanapūjāvaņņanā			88
$A samm\overline{a} sambuddhappaveditadhammavinayava\underline{n}$	ṇṇanā		88
$Samm\bar{a}sambuddhappaveditadhammavinay\bar{a}divality and the sample of th$	ṇṇanā		89
Saṅgāyitabbadhammādivaṇṇanā			91
Paccayānuññātakāraṇādivaṇṇanā			92
Sukhallikānuyogādivaṇṇanā			92
Pañhabyākaraṇavaṇṇanā			93
Abyākataṭṭhānādivaṇṇanā			96
Pubbantasahagatadiṭṭhinissayavaṇṇanā	•••		97
Diṭṭhinissayappahānavaṇṇanā	•••	•••	99
7. Lakkhaṇasutta			
Dvattimsamahāpurisalakkhaṇavaṇṇanā		•••	100
Suppahiṭṭhitapādatālakkhaṇavaṇṇanā (1)	•••	•••	100
Pādatalacakkalakkhaṇavaṇṇanā (2)	•••	•••	107
Āyatapaṇhitāditilakkhaṇavaṇṇanā (3-4-5)	•••		109

Mātikā		Piţ	ṭhaṅka
Sattussadatālakkhaṇavaṇṇanā (6)			109
Karacaraṇādilakkhaṇavaṇṇanā (7-8)	•••		110
Ussankhapādādilakkhanavannanā (9-10)	•••		111
Eṇijaṅghalakkhaṇavaṇṇanā (11)		•••	112
Sukhumacchavilakkhaṇavaṇṇanā (12)		•••	113
Suvaṇṇavaṇṇalakkhaṇavaṇṇanā (13)		•••	118
Kosohitavatthaguyhalakkhaṇavaṇṇanā (14)			118
Parimaṇḍalādilakkhaṇavaṇṇanā (15-16)			119
Sīhapubbaddhakāyādilakkhaṇavaṇṇanā (17-18-19)			119
Rasaggasaggitālakkhaṇavaṇṇanā (20)			120
Abhinīlanettādilakkhaṇavaṇṇanā (21-22)	•••		120
Uṇhīsasīsalakkhaṇavaṇṇanā (23)	•••		121
Ekekalomatādilakkhaņavaņņanā (24-25)	•••		122
Cattālīsādilakkhaṇavaṇṇanā (26-27)	•••		122
Pahūtajivhādilakkhaṇavaṇṇanā (28-29)			123
Sīhahanulakkhaṇavaṇṇanā (30)	•••		123
Samadantādilakkhaṇavaṇṇanā (31-32)	•••		124
8. Siṅgālasutta			
Nidānavaṇṇanā			127
Chadisādivaṇṇanā			127
Catuṭhānādivaṇṇanā			129
Cha-apāyamukhādivaṇṇanā			130
Surāmerayassa cha ādīnavādivaņņanā			131
Pāpamittatāya cha ādīnavādivaņņanā			133
Mittapatirūpakavaņņanā			134
Suhadamittavaṇṇanā			136
Chaddisāpaţicchādanakaṇḍavaṇṇanā	•••		138

Mātikā		Piţ	ṭhaṅka
9. Āṭānāṭiyasu	tta		
Paṭhamabhāṇavāravaṇṇanā			147
Parittaparikammakathāvaṇṇanā		•••	161
10. Saṅgītisutt	ta		
Ubbhatakanavasandhāgāravaṇṇanā	•••		163
Bhinnanigaṇṭhavatthuvaṇṇanā			166
Ekakavaṇṇanā			166
Dukavaṇṇanā		•••	171
Tikavaṇṇanā			184
Catukkavaṇṇanā			217
Ariyavamsacatukkavannanā	•••		221
Sotāpattiyaṅgādicatukkavaṇṇanā			236
Pañhabyākaraṇādicatukkavaṇṇanā		•••	240
Dakkhiṇāvisuddhādicatukkavaṇṇanā		•••	242
Attantapādicatukkavaṇṇanā			243
Pañcakavaṇṇanā		•••	244
Abhabbaṭṭhānādipañcakavaṇṇanā		•••	246
Padhāniyaṅgapañcakavaṇṇanā		•••	247
Suddhāvāsādipañcakavaṇṇanā		•••	248
Cetokhilapañcakavaṇṇanā		•••	248
Cetasovinibandhādipañcakavaṇṇanā		•••	249
Nissaraṇiyapañcakavaṇṇanā		•••	250
Vimuttāyatanapañcakavaṇṇanā		•••	251
Chakkavaṇṇanā		•••	252
Vivādamūlachakkavaṇṇanā	•••	•••	253
Nissaraṇiyachakkavaṇṇanā		•••	254
Anuttarivādichakkavannanā			255

Mātikā		Piţ	ṭhaṅka
Satatavihārachakkavaṇṇanā		•••	255
Abhijātichakkavaṇṇanā			256
Nibbedhabhāgiyachakkavaṇṇanā		•••	257
Sattakavaṇṇanā			257
Adhikaraṇasamathasattakavaṇṇanā			259
Aṭṭhakavaṇṇanā			261
Navakavaṇṇanā	•••		264
Dasakavaṇṇanā			265
Akusalakammapathadasakavaṇṇanā			268
Kusalakammapathadasakavaṇṇanā	•••		272
Ariyavāsadasakavaņņanā	•••		272
Asekkhadhammadasakavaṇṇanā	•••		273
Pañhasamodhānavaṇṇanā	•••	•••	274
11. Dasuttarasut	ta		
Ekadhammavaṇṇanā	•••		276
Dvedhammavaṇṇanā	•••		280
Tayodhammavaṇṇanā			281
Cattārodhammavaṇṇanā			282
Pañcadhammavaṇṇanā		•••	284
Chadhammavaṇṇanā		•••	285
Sattadhammavaṇṇanā			285
Aṭṭhadhammavaṇṇanā		•••	286
Navadhammavaṇṇanā			287
Dasadhammavaṇṇanā			288
Nigamanakathāvannanā	•••		291

Pāthikavaggaṭīkāya mātikā niṭṭhitā.

Dīghanikāya

Pāthikavaggatīkā

Namo tassa Bhagavato Arahato Sammāsambuddhassa.

1. Pāthikasutta

Sunakkhattavatthuvannanā

- 1. Apubbapadavaṇṇanāti atthasaṁvaṇṇanāvasena heṭṭhā aggahitatāya apubbassa abhinavassa padassa vaṇṇanā atthavibhāvanā. "Hitvā punappunāgatamatthan"ti¹ hi vuttaṁ. Mallesūti ettha yaṁ vattabbaṁ, taṁ heṭṭhā vuttanayameva. Chāyūdakasampanne vanasaṇḍe viharatīti anupiyasāmantā katassa vihārassa abhāvato. Yadi na tāva paviṭṭho, kasmā "pāvisī"ti vuttanti āha "pavisissāmī"ti-ādi, tena avassaṁ bhāvini bhūte viya upacārā hontīti dasseti. Idāni tamatthaṁ upamāya vibhāvento "yathā kin"ti-ādimāha. Etanti etaṁ "atippago kho"ti-ādikaṁ cintanaṁ ahosi. Ativiya pago khoti ativiya pātova. Channakopīnatāya, paribbājakapabbajjupagamena ca channaparibbājakaṁ, na naggaparibbājakaṁ.
- 2. Yasmā bhagavato uccākulappasutatam, mahābhinikkhamananikkhantatam, anaññasādhāraṇadukkaracaraṇam, vivekavāsam, lokasambhāvitatam, ovādānusāsanīhi lokassa bahupakāratam, parappavādamaddanam, mahiddhikatam, mahānubhāvatanti evamādikam tamtamattapaccakkhaguṇavisesam nissāya

yebhuyyena aññatitthiyāpi bhagavantam disvā ādaragāravabahumānam dassentiyeva, tasmā vuttam "bhagavantam disvā mānathaddhatam akatvā"tiādi. Lokasamudācāravasenāti lokopacāravasena. Cirassanti cirakālena. Ādīni vadanti upacāravasena. Tassāti bhaggavagottassa paribbājakassa. Gihisahāyoti gihikālato paṭṭhāya sahāyo. Paccakkhātoti yenākārena paccakkhānā, tam dassetum "paccakkhāmī"ti-ādi vuttam.

3. Uddissāti satthukārabhāvena uddissāti ayamettha adhippāyoti tam dassento "bhagavā me"ti-ādimāha. Yadā sunakkhattassa "bhagavantam paccakkhāmī"ti cittam uppannam, vācā bhinnā, tadā evassa bhagavatā saddhim koci sambandho natthi asakyaputtiyabhāvato sāsanato paribāhirattā. Ayam tāvettha sāsanayutti, sā panāyam thapetvā sāsanayuttikovide aññesam na sammadeva visayoti bhagavā sabbasādhāraṇavasenassa attanā sambandhābhāvam dassetum "api nū"tiādim vatvā sunakkhattam "ko santo kam paccācikkhasī"ti āha. Yasmā mukhāgatoyam sambandho, na pūjāgatādiko, yo ca yācakayācitabbatāvasena hoti, tadubhayañcettha natthīti dassento bhagavā sunakkhattam "ko santo kam paccācikkhasī"ti avoca, tasmā tamattham dassetum "yācako vā"ti-ādi vuttam. Yācitako vā yācakam paccācikkheyyāti sambandho. Tvam pana neva yācako "aham bhante bhagavantam uddissa viharissāmī"ti evam mama santikam anupagatattā. Na yācitako "ehi tvam sunakkhatta mamam uddissa viharāhī"ti evam mayā apatthitattā.

Ko samānoti yācakayācitakesu ko nāma honto. Kanti yācakayācitakesu eva kam nāma hontam mam paccācikkhasi. Tucchapurisāti jhānamaggādiuttarimanussadhammesu kassacipi abhāvā rittapurisa. Nanu cāyam sunakkhatto lokiyajjhānāni, ekaccābhiññañca uppādesīti? Kiñcāpi uppādesi, tato pana bhagavati āghātuppādanena saheva parihīno ahosi. Aparādho nāma suppaṭipattiyā virajjhanahetubhūto kilesuppādoti āha "yattako te aparādho, tattako doso"ti. Yāvañcāti avadhiparicchedabhāvadassanam

"yāvañca tena bhagavatā"ti-ādīsu¹ viya. **Te**ti tayā. **Idan**ti nipātamattam. **Aparaddhan**ti aparajjhitam. Idam vuttam hoti—"paccācikkhāmidānāham bhante bhagavantan"ti-ādīni vadantena tucchapurisa tayā yāvañcidam aparaddham, na tassa aparādhassa pamāṇam atthīti.

- 4. Manussadhammāti bhāvanānuyogena vinā manussehi anuṭṭhātabbadhammā. So hi manussānam cittādhiṭṭhānamattena ijjhanato tesam sambhāvitadhammo viya ṭhito tathā vutto, manussaggahaṇañcettha tesu bahulam pavattanato. Iddhibhūtam pāṭihāriyam, na ādesanānusāsanīpāṭihāriyanti adhippāyo. Kateti pavattite. Niyyātīti niggacchati, vaṭṭadukkhato niggamanavasena pavattatīti attho. Dhamme hi niggacchante tamsamaṅgipuggalo "niggacchatī"ti vuccati, aṭṭhakathāyam pana ni-saddo upasaggamattam, yāti icceva atthoti dassetum gacchatīti attho vutto. Tatrāti padhānabhāvena vuttassa atthassa bhummavasena paṭiniddesoti tasmim dhamme sammā dukkhakkhayāya niyyanteti ayamettha atthoti dassento āha "tasmim -pa- samvattamāne"ti.
- 5. Agganti ñāyatīti **aggaññaṁ. Lokapaññattin**ti lokassa paññāpanaṁ. **Lokassa aggan**ti lokuppattisamaye "idaṁ nāma lokassa aggan"ti evaṁ jānitabbaṁ bujjhitabbaṁ. **Aggamariyādan**²ti ādimariyādaṁ.
- 6. Ettakam vippalapitvāti "na dānāham bhante bhagavantam uddissa viharissāmī"ti, "na hi pana me bhante bhagavā uttarimanussadhammā iddhipāṭihāriyam karotī"ti, "na hi pana me bhante bhagavā aggaññam paññapetī"ti ca ettakam vippalapitvā. Idam kira so bhagavā satthukiccam iddhipāṭihāriyam, aggaññapaññāpanañca kātum na sakkotīti pakāsento kathesi. Tenāha "Sunakkhatto kirā"ti-ādi. Uttaravacanavasena patiṭṭhābhāvato appatiṭṭho. Tato eva niravo nissaddo.

Ādīnavadassanatthanti diṭṭhadhammikassa ādīnavassa dassanattham. Tenāha "sayameva garaham pāpuṇissasī"ti. Samparāyikā pana ādīnavā anekavidhā, te dassento sunakkhatto na saddaheyyāti diṭṭhadhammikasseva gahaṇam. Anekakāraṇenāti "itipi so bhagavā arahan"ti-ādinā¹ anekavidhena vaṇṇakāraṇena. Evam me avaṇṇo na bhavissatīti ajjhāsayena attano bālatāya vaṇṇārahānam avaṇṇam kathetvā. Evam bhagavā makkhibhāve ādīnavam dassetvā puna tassa kathane kāraṇam vibhāvetum "iti kho te"ti-ādimāhāti tam dassetum "tato"ti-ādi vuttam. Evañhi sunakkhattassa appakopi vacanokāso na bhavissatīti. Apakkamīti attanā yathāṭhitā vuṭṭhāya apasakki. Apakkanto sāsanato bhaṭṭho. Tenāha "cuto"ti. Evamevāti apakkamanto ca na yathā tathā apakkami, yathā pana kāyassa bhedā apāye nibbatteyya, evameva apakkami.

Korakhattiyavatthuvannanā

7. **Dvīhi padehī**ti dvīhi vākyehi **āraddhaṁ**² byatirekavasena tadubhayatthaniddesavasena uparidesanāya pavattattā. **Anusandhidassanavasenā**ti yathānusandhisaṅkhāta-anusandhidassanavasena.

Ekam samayanti ca bhummatthe upayogavacananti āha "ekasmim, samaye"ti ca. Thūlū nāma janapadoti janapadīnam rājakumārānam vasena tathāladdhanāmo. Kukkuravatam samādānavasena etasmim atthīti kukkuravatikoti āha "samādinnakukkuravato"ti. Aññampīti "catukkondikasseva vicaranam, tathā katvāva khādanam, bhuñjanam, vāmapādam uddharitvā muttassa vissajjanan"ti evamādikam aññampi sunakhehi kātabbakiriyam. Catūhi sarīrāvayavehi kundanam gamanam catukkondo, so etasmim atthīti catukkondiko. So pana yasmā catūhi sarīrāvayavehi saṅghattitagamano hoti, tasmā vuttaṁ "catusaṅghattito"ti. Tenevāha "dve jannūnī" ti-ādi. Bhakkhasanti vā bhakkhitabbam, asitabbañca. Tenevāha"yam kiñci khādanīyam bhojanīyan"ti. Kāmam khādanañca nāma mukhena kātabbam, hatthena pana tattha upanāmanam nivāretum avadhāraṇam katanti āha "hatthena aparāmasitvā"ti, aggahetvāti attho. Sundararūpoti sundarabhāvo. Vatāti patthanatthe nipāto "aho vatāham lābhī assan"ti-ādīsu viya. "Samanena nāma evarūpena bhavitabbam aho vatāham ediso bhaveyyan"ti evam tassa patthanā ahosi. Tenāha "evam kirā"ti-ādi.

Garahatthe api-kāro "api siñce palaṇḍakan"ti-ādīsu viya. Arahante ca buddhe, buddhasāvake "arahanto khīṇāsavā na hontī"ti evam tassa diṭṭhi uppannā. Yathāha mahāsīhanādasutte "natthi samaṇassa gotamassa uttarimanussadhammā alamariyañāṇadassanavisesā"ti¹. Sattamam divasanti bhummatthe upayogavacanam. Alasakenāti ajīraṇena āmarogena.

Aṭṭhitacamattatāya **purāṇapaṇṇasadiso. Bīraṇatthambakan**ti bīraṇagacchā.

Mattā etassa atthīti **mattam**, bhojanamattavantanti attho. Tenāha **"pamāṇayuttan"**ti. **Mantā mantā**ti mantāya mantāya.

8. Ekadvīhikāya gaṇanāya. Nirāhārova ahosi bhagavato vacanam aññathā kātukāmo, tathābhūtopi sattame divase upaṭṭhākena upanītam bhakkhasam disvā "dhī"ti upaṭṭhāpetum asakkonto bhojanataṇhāya ākaḍḍhiyamānahadayo tam kucchipūram bhuñjitvā bhagavatā vuttaniyāmeneva kālamakāsi. Tena vuttam "athassā"ti-ādi. Sacepi -pacinteyyāti yadi eso acelo "dhī"ti paccupaṭṭhapetvā "ajjapi aham na bhuñjeyyan"ti cinteyya, tathācintane satipi devatāviggahena tam divasam -pa-kareyya. Kasmā? Advejjhavacanā hi tathāgatā, na tesam vacanam vitatham hoti.

Gatagataṭṭhānaṁ aṅgaṇameva hotīti tehi taṁ kaḍḍhitvā gacchantehi gatagatappadeso uttarakasāmantā vivaṭaṅgaṇameva hutvā upaṭṭhāti. Teti titthiyā. Susānaṁyeva gantvāti "bīraṇattambakaṁ atikkamissāmā"ti gacchantāpi anekavāraṁ taṁ anusaṁyāyitvā punapi taṁyeva susānaṁ upagantvā.

9. Idanti idam matasarīram. "Tameva vā sarīram kathāpesīti tam sarīram adhiṭṭhahitvā ṭhitapetena kathāpesī"ti keci. Korakhattiyam vā asurayonito ānetvā kathāpetu aññam vā petam, ko ettha viseso. "Acinteyyo hi buddhavisayo"ti pana vacanato tadeva sarīram sunakkhattena pahatamattam buddhānubhāvena uṭṭhāya tamattham ñāpesīti daṭṭhabbam. Purimoyeva pana attho aṭṭhakathāsu vinicchito. Tathā hi vakkhati "nibbattatthānato"ti-ādi².

10. **Vipākan**ti phalam, atthanibbattīti attho.

Samānetabbānīti sammā ānetabbāni, sarūpato ānetvā dassetabbānīhi attho. Pāṭihāriyānam paṭhamāditā bhagavatā vuttānupubbiyā veditabbā. Keci panettha "paracittavibhāvanam, āyuparicchedavibhāvanam, byādhivibhāvanam, gativibhāvanam, sarīranikhepavibhāvanam, sunakhattena saddhim kathāvibhāvanamcāti cha pāṭihāriyānī"ti vadanti, tam yadi sunakhattassa cittavibhāvanam sandhāya vuttam, evam sati "sattā"ti vattabbam tassa bhāvi-avaṇṇavibhāvanāya saddhim. Atha acelassa maraṇacittavibhāvanam, tam "sattamam divasam kālam karissatī"ti iminā saṅgahitanti visum na vattabbam, tasmā aṭṭhakathāyam vuttanayeneva gahetabbam.

Acelakalaramattakavatthuvannana

- 11. Nikkhantadantamaṭṭakoti nikkhantadanto maṭṭako. So kira acelakabhāvato pubbe maṭṭakito hutvā vicari vivaradanto ca, tena naṁ "koramaṭṭako"ti sañjānanti. Yaṁ kiñci tassa dento "sādhurūpo ayaṁ samaṇo"ti sambhāvento aggaṁ seṭṭhaṁyeva denti. Tena vuttaṁ "lābhaggaṁ patto, aggalābhaṁ patto"ti. bahū acelakā taṁ parivāretvā vicaranti, gahaṭṭhā ca taṁ bahū aḍḍhā vibhavasampannā kālena kālaṁ upasaṅkamitvā payirupāsanti. Tena vuttaṁ "yasaggaṁ aggaparivāraṁ patto"ti. Vatāniyeva pajjitabbato padāni. Aññamaññaṁ asaṅkarato vatakoṭṭhāsā vā. Samattānīti samaṁ attāni gahitāni. Puratthimenāti ena-saddasambandhena "vesālin"ti upayogavacanaṁ, avidūratthe ca ena-saddo pañcamyantoti āha "vesālito avidūre"ti.
- 12. Sāsane paricayavasena tilakkhaṇāhataṁ pañhaṁ pucchi. Na sampāyāsīti nāvabujjhi na sampādesi. Tenāha "sammā ñāṇagatiyā"ti-ādi. Sampāyanaṁ vā sampādanaṁ. Pañhaṁ puṭṭhassa ca sampādanaṁ nāma sammadeva kathananti tadabhāvaṁ dassento "atha vā"ti-ādimāha. Kopavasena tassa akkhīni kampanabhāvaṁ āpajjiṁsūti āha "kampanakkhīnipi¹ parivattetvā"ti. Kopanti kodhaṁ, so pana cittassa pakuppanavasena pavattatīti āha

"kuppanākāran"ti. Dosanti āghātam, so pana ārammaņe dussanavasena pavattīti āha "dussanākāran"ti. Atuṭṭhākāranti tuṭṭhiyā pītiyā paṭipakkhabhūtappavatti-ākāram. Kāyavacīvikārehi pākaṭam akāsi. Mā vata noti ettha māti paṭikkhepo, noti mayhanti atthoti āha "aho vata me na bhaveyyā"ti. Mam vata noti ettha pana noti samsayeti āha "ahosi vata nu mamā"ti.

14. **Pari**pubbo **dahita-**saddo vatthanivāsanam vadatīti āha **"paridahito nivatthavattho"**ti. Yasanimittakatāya lābhassa yasaparihāniyāva lābhaparihāni vuttā hotīti pāļiyam **"yasā nihīno"**ti vuttam.

Acelapāthikaputtavatthuvannanā

- 15. "Aham sabbam jānāmī"ti evam sabbañnutañnāṇam vadati paṭijānātīti ñāṇavādo, tena mayā ñāṇavādena saddhim. Atikkamma gacchatoti upaḍḍhabhāgena paricchinnam padesam atikkamitvā iddhipāṭihāriyam kātum gacchato. Kim panāyam acelo pāthikaputto attano pamāṇam na jānātīti? No na jānāti. Yadi evam kasmā sukkhagajjitam gajjīti? "Evāham loke pāsamso bhavissāmī"ti kohañne katvā sukkhagajjitam gajji. Tena vuttam "nagaravāsino"ti-ādi. Paṭṭhapetvāti yugaggāham ārabhitvā.
- 16. **Hīnajjhāsayattā -pa- udapādi.** Vuttañhetaṁ "hīnādhimuttikā sattā hīnādhimuttike eva satte sevanti bhajanti payirupāsantī"ti¹.

Yasmā tathāvuttā vācā tathārūpacittahetukā, tañca cittaṁ tathārūpadiṭṭhicittahetukaṁ, tasmā "taṁ vācaṁ appahāyā"ti vatvā yathā tassā appahānaṁ hoti, taṁ dassento "taṁ cittaṁ appahāyā"ti āha, tassa ca yathā appahānaṁ hoti, taṁ dassetuṁ "taṁ diṭṭhiṁ appaṭinissajjitvā"ti avoca. Yasmā vā tathārūpā vācā mahāsāvajjā, cittaṁ tato mahāsāvajjataraṁ taṁsamuṭṭhāpakabhāvato, diṭṭhi pana tato mahāsāvajjatamā tadubhayassa mūlabhāvato, tasmā tesaṁ mahāsāvajjatāya imaṁ vibhāgaṁ dassetvā ayamanukkamo ṭhapitoti veditabbo. Tesaṁ

pana yathā pahānam hoti, tam dassetum "ahan"ti-ādi vuttam. "Nāham buddho"ti vadantoti sāṭheyyena vinā ujukameva "aham buddho na homī"ti vadanto. Cittadiṭṭhippahānepi eseva nayo. Vipateyyāti ettha vi-saddo paṭhame vikappe upasaggamattam, dutiye pana visaraṇatthoti¹ āha "sattadhā vā pana phaleyyā"ti.

- 17. **Ekaṁsenā**ti ekantena, ekantikaṁ pana vacanapariyāyavinimuttaṁ hotīti āha "nippariyāyenā"ti. **Odhārikā**ti avadhāritā niyametvā bhāsitā. **Vigatarūpenā**ti apagatasabhāvena. Tenāha "vigacchitasabhāvenā"ti, iddhānubhāvena apanītasakabhāvena. Tena vuttaṁ "attano"ti-ādi.
- 18. Dvayam gacchatīti **dvayagāminī**. Kīdisam dvayanti āha "sarūpenā"ti-ādi. Ayañhi so gaṇḍassupariphoṭṭhabbādosam.
- 19. Ajitassa licchavisenāpatissa mahāniraye nibbattitvā tato āgantvā acelassa pāthikaputtassa santike parodanam. **Abhāvā**ti pubbe vuttappakārassa pāṭihāriyakaraṇassa abhāvā. Bhagavā pana sannipatitaparisāyam pasādajananattham tadanurūpam pāṭihāriyam akāsiyeva. Yathāha "tejodhātum samāpajjitvā"ti-ādi.

Iddhipāţihāriyakathāvannanā

- 20. Nicayanam dhanadhaññānam sañcayanam **nicayo**, tattha niyuttāti **necayikā**, gahapati eva necayikā **gahapatinecayikā**. Ettakāni jaṅghasahassānīti parimāṇābhāvato **sahassehipi aparimāṇagaṇanā**. **Tenevā**ti imassa vasena sannipatitāya evammahatiyā parisāya bandhanamokkham kātum labbhati, eteneva kāraṇena.
- 21. **Cittutrāsabhayan**ti cittassa utrāsanākārena pavattabhayam, na ñāṇabhayam, nāpi "bhāyati etasmā"ti evam vuttam ārammaṇabhayam. **Chambhitattan**ti teneva cittutrāsabhayena sakalasarīrassa chambhitabhāvo. **Lomahamso**ti teneva bhayena, tena ca chambhitattena sakalasarīre

lomānam haṭṭhabhāvo, so pana tesam bhittiyam nāgadantānam viya uddhammukhatāti āha "lomānam uddhaggabhāvo"ti. Antantena āvijjhitvāti attano nisīdanattham nigūļhaṭṭhānam upaparikkhanto paribbājakārāmam pariyantena anusamyāyitvā, kassacideva sunakkhattassa vā sunakkhattasadisassa vā sabbañnupaṭiñnam appahāya satthu sammukhībhāve sattadhā tassa muddhāphalanam dhammatā. Tena vuttam "mā nassatu bālo"ti-ādi.

- 22. **Samsappatī**ti tattheva pāsāṇaphalake bāladārako viya uṭṭhātum asakkonto avasīdanavasena ito cito ca samsappati. Tenāha "osīdatī"ti. **Tattheva sañcaratī**ti tasmimyeva pāsāṇe ānisadupaṭṭhino sañcalanam nisajjavaseneva sañcarati, na uṭṭhāya padasā.
- 23. **Vinaṭṭharūpo**ti sambhāvanāya vināsena, lābhassa vināsena ca vinatthasabhāvo.

Pathamabhāṇavāravaṇṇanā niṭṭhitā.

- 25. Goyuttehīti balavantabalībaddayojitehi.
- 26. **Tassā**ti jāliyassa. Ayañhi maṇḍisena paribbājakena saddhiṁ bhagavantaṁ upasaṅkamitvā dhammaṁ suṇi, tato puretaraṁ bhagavato guṇānaṁ ajānanakāle ayaṁ pavatti. Tenevāha "tiṭṭhatutāva pāṭihāriyaṁ -pa-parājayo bhavissatī"ti.
- 27. Tiṇasīhoti tiṇasadisaharitavaṇṇo sīho. Kāļasīhoti kāļavaṇṇo sīho. Paṇḍusīhoti paṇḍuvaṇṇo sīho. Kesarasīhoti kesaravanto setavaṇṇo, lohitavaṇṇo vā sīho. Migaraññoti ettha miga-saddo kiñcāpi pasadakuruṅgādīsu kesucideva catuppadesu niruļho, idha pana sabbasādhāraṇavasenāti dassento "migaraññoti sabbacatuppadānaṁ rañño"ti vuttaṁ. Āgantvā seti etthāti āsayo, nivāsanaṭṭhānaṁ. Sīhanādanti parissayānaṁ sahanato, paṭipakkhassa ca hananato "sīho"ti laddhanāmassa migādhipassa ghosaṁ, so pana tena yasmā kutocipi abhītabhāvena pavattīyati, tasmā vuttaṁ "abhītanādan"ti. Tattha tattha tāsu tāsu disāsu gantvā

caritabbatāya bhakkhitabbatāya **gocaro** ghāsoti āha "**gocarāyāti āhāratthāyā**"ti. **Varaṁ varan**ti migasaṃghemigasamūhe mudumaṁsatāya varaṁ varaṁ mahiṁsavanavarāhādiṁ vadhitvāti yojanā. Tenāha "**thūlaṁ thūlan**"ti. Varavarabhāvena hi tassa varabhāvo icchito. Sūrabhāvaṁ sannissitaṁ **sūrabhāvasannissitaṁ**, tena. Sūrabhāvenāpi hi "kiṁ ime pāṇake dubbale hantvā"ti appathāmesu pāṇesu kāruññaṁ upatiṭṭhati.

28. **Vighāso**ti parassa bhakkhikasesatāya virūpo ghāso vighāso, ucchiṭṭhaṁ. Tenāha "bhakkhitātirittamaṁsan"ti, tasmiṁ **vighāse**, vighāsanimittanti attho. **Asmimānadosenā**ti asmimānadosahetu, ahaṁkāranimittanti attho. So panassa asmimāno yathā uppajji, taṁ dassetuṁ "tatrāyan"ti-ādi vuttaṁ.

"Segālakamyevā"tipi pāṭho, yathāvuttova attho. Bheraṇḍakamyevāti bheraṇḍasakuṇaravasadisamyeva, bheraṇḍo nāma eko pakkhī dvimukho, tassa kira saddo ativiya virūpo amanāpo. Tenāha "appiya-amanāpasaddamevā"ti. Sammāpaṭipattiyā visesato suṭṭhu gatāti sugatā, sammāsambuddhā. Te apadāyanti sodhenti sattasantānam etehīti sugatāpadānāni, tisso sikkhā. Yasmā tāhi te "sugatā"ti lakkhīyanti, tā ca tesam ovādabhūtā, tasmā "sugatalakkhaṇesū"ti-ādi vuttam. Yadi tā sugatassa lakkhaṇabhūtā, sāsanabhūtā ca, katham panesa pāthikaputto tattha tāsu sikkhāsu jīvati, ko tassa tāhi sambandhoti āha "etassa hī"ti-ādi. Sambuddhānam demāti dentīti buddhasaññāya dentīti adhippāyo. Tena esa -pa- jīvati nāma na sugatanvaya-ajjhupagamanato. "Tathāgate"ti-ādi ekatte puthuvacananti āha "tathāgatan"ti-ādi. Bahuvacanameva garusmim ekasmimpi bahuvacanappayogato ekavacanam viya vuttam vacanavipallāsena.

29. **Samekkhitvā**ti samam katvā micchādassanena apekkhitvā, tam pana apekkhanam tathāmaññanamevāti āha "maññitvā"ti. Pubbe vuttam samekkhanampi maññanamevāti vuttam "amaññīti puna amaññitthā"ti, tena aparāparam tassa maññanappavattim dasseti. Bheraṇḍakaravam kosati vikkosatīti kotthu.

- 30. Te te pāṇe byāpādento ghasatīti byagghoti iminā nibbacanena "byaggho"ti migarājassapi siyā nāmanti āha "byagghoti maññatīti sīhohamasmīti maññatī"ti. Yadipi yathāvuttanibbacanavasena sīhopi "byaggho"ti vattabbatam arahati, byaggha-saddo pana migarāje eva niruļhoti dassento "sīhena vā"ti-ādimāha.
- 31. Sīhena vicaritavane samvaḍḍhattā vuttam "mahāvane suññavane vivaddho"ti.
- 34. **Kilesabandhanā**ti taṇhābandhanato. Taṇhābandhanañhi thiraṁ daḷhabandhanaṁ dummocanīyaṁ. Yathāha—

"Sārattarattā maṇikuṇḍalesu, Puttesu dāresu ca yā apekkhā. Etaṁ daḷhaṁ bandhanamāhu dhīrā, Ohārinaṁ sithilaṁ duppamuñcan"ti¹.

Kilesabandhanāti vā dasavidhasamyojanato. Mahāviduggam nāma cattāro oghā mahantam jalaviduggam viya anupacitakusalasambhārehi duggamaṭṭhena.

Aggaññapaññattikathāvaṇṇanā

36. Imassa padassa. Idam nāma lokassa agganti jānitabbam, tam aggaññam, so pana lokassa uppattikkamo pavattipaveņī cāti āha "lokuppatticariyavamsan"ti. Sammāsambodhito uttaritaram nāma kiñci natthi pajānitabbesu, tam pana koṭim katvā dassento "yāva sabbaññutaññāṇā pajānāmī"ti āha. "Mama pajānanā"ti assādento taṇhāvasena, "aham pajānāmī"ti abhinivisanto diṭṭhivasena, "suṭṭhu pajānāmi sammā pajānāmī"ti paggaṇhanto mānavasena na parāmasāmīti yojanā. "Paccattaññevā"ti padam "nibbuti viditā"ti padadvayenāpi yojetabbam "paccattamyeva uppāditā nibbuti ca paccattamyeva viditā"ti, sayambhuñāṇena nibbattitā nibbuti sayameva viditāti attho. Aṭṭhakathāyam pana "paccattam"ti padam vividhavibhattikam hutvā

āvuttinayena āvattahīti dassetum "attanāyeva attanī"ti vuttam. Aviditanibbānāti appaṭiladdhanibbānā micchāpaṭipannattā. Pajānanampi hi tadadhigamavaseneva veditabbam. Eti iṭṭhabhāvena pavattatīti ayo, sukham. Tappaṭikkhepena anayo, dukkham. Tadeva hitasukhassa byasanato byasanam.

- 37. Taṁ dassentoti bhagavāpi "aññatitthiyo tattha sārasaññī"ti taṁ dassento. Ādhipaccabhāvenāti ādhipaccasabhāvena. Yassa ācariyavādassa vasena puriso "ācariyo"ti vuccati, so ācariyavādo ācariyabhāvoti āha "ācariyabhāvaṁ ācariyavādan"ti. Etthāti ācariyavāde. Iti katvāti iminā kāraṇena. Soti ācariyavādo. "Aggaññan"tveva vutto aggaññavisayattā. Kena vihitanti kena pakārena vihitaṁ. Tenāha "kena vihitaṁ kinti vihitan"ti. Brahmajāleti brahmajālasaṁvaṇṇanāyaṁ¹. Tattha hi vitthārato vuttavidhiṁ idha atidisati, pāḷi pana tattha ceva idha ca ekasadisāvāti.
- 41. Khiḍḍā padosikā mūlabhūtā ettha santīti **khiḍḍāpadosikam**, ācariyakam. Tenevāha **"khiḍḍāpadosikamūlakan"**ti. **Manopadosikan**ti etthāpi eseva nayo.
- 47. Yena vacanena abbhācikkhanti, tassa avijjamānatā nāma atthavasenevāti āha "asamvijjamānaṭṭhenā"ti. Tucchā, musāti ca karaṇatthe paccattavacananti āha "tucchena, musāvādenā"ti. Vacanassa antosāram nāma aviparīto atthoti tadabhāvenāha "antosāravirahitenā"ti. Abhiācikkhantīti abhibhavitvā ghaṭṭentā kathenti, akkosantīti attho. Viparītasaññoti ayāthāvasañño. Subham vimokkhanti "subhan"ti vuttavimokkham. Vaṇṇakasiṇanti sunīlakasupītakādivaṇṇakasiṇam. Sabbanti yam subham, asubhanca vaṇṇakasiṇam, tañca sabbam. Na asubhanti asubhampi "asubhan"ti tasmim samaye na sañjānāti, atha kho "subhan"tveva sañjānātīti attho. Viparītā ayāthāvagāhitāya, ayāthāvavāditāya ca.

48. Yasmā so paribbājako avissaṭṭhamicchāgāhitāya sammā appaṭipajjitukāmo sammāpaṭipannaṁ viya maṁ samaṇo gotamo, bhikkhavo ca sañjānantūti adhippāyena "tathā dhammaṁ desetun"ti-ādimāha, tasmā vuttaṁ "mayā etassa -pa- vaṭṭatī"ti. Mammanti mammappadesaṁ pīļājananaṭṭhānaṁ. Suṭṭhūti sakkaccaṁ. Yathā na vinassati, evaṁ anurakkha.

Vāsanāyāti kilesakkhayāvahāya paṭipattiyā vāsanāya. Sesam suviññeyyamevāti.

Sumangalavilāsiniyā dīghanikāyaṭṭhakathāya Pāthikasuttavaṇṇanāya līnatthappakāsanā.

2. Udumbarikasutta

Nigrodhaparibbajakavatthuvannana

49. Udumbarikāyāti sambandhe sāmivacananti āha "udumbarikāya deviyā santake paribbājakārāme"ti. "Udumbarikāyan"ti vā pāṭho, tathā sati adhikaraņe etam bhummam. Ayañhettha attho udumbarikāya rañño deviyā nibbattito ārāmo udumbarikā, tassam udumbarikāyam. Tenāha "udumbarikāya deviyā santake"ti. Tāya hi nibbattito tassā santako. Varaṇādipāṭhavasena cettha nibbattatthabodhakassa saddassa adassanam. Sandhānoti bhinnānampi tesam sandhāpanena "sandhāno"ti evamladdhanāmo. Samvaṇṇitoti pasamsito. Iriyatīti pavattati. Ariyena ñāṇenāti kilesehi ārakattā ariyena lokuttarena ñāṇena. Ariyāya vimuttiyāti suvisuddhāya lokuttaraphalavimuttiyā.

Divā-saddo dina-saddo viya divasapariyāyo, tassa visesanabhāvena vuccamāno divā-saddo savisesam divasabhāgam dīpetīti āha "divasassa divā"ti-ādi. Yasmā samāpannassa cittam nānārammaṇato paṭisamhatam hoti, jhānasamaṅgī ca pavivekūpagamanena saṅgaṇikābhāvato ekākiyāya nilīno viya hoti, tasmā vuttam "tato tato -pa- gato"ti. Mano bhavanti manaso vivaṭṭanissitam vaḍḍhim āvahantīti manobhāvaniyāti āha "manavaḍḍhakānan"ti-ādi. Unnamati na saṃkucati, alīnañca hotīti attho.

- 51. Yāvatāti yāvantoti ayamettha atthoti āha "yattakā"ti. Tesanti niddhāraņe sāmivacanam. Niddhāraņanca kenaci visesena icchitabbam. Yehi ca guņavisesehi samannāgatā bhagavato sāvakā upāsakā rājagahe paṭivasanti, ayanca tehi samannāgatoti imam visesam dīpetum "tesam abbhantaro"ti vuttam. Tenāha "bhagavato kirā"ti-ādi.
- 52. **Tesan**ti paribbājakānam. **Kathāyā**ti tiracchānakathāya. **Dassanenā**ti diṭṭhidassanena. **Ākappenā**ti vesena. **Kuttenā**ti kiriyāya. **Ācārenā**ti aññamaññasmim ācaritabba-ācārena. **Vihārenā**ti

rattindivam viharitabbaviharanena. Iriyāpathenāti thānādi-iriyāpathena. Aññākāratāya aññatitthe niyuttāti **aññatitthiyā. Saṅgantvā** samāgantvā rāsīhutvā parehi nisinnatthāne. Araññani ca tāni vanapatthāni cāti araññavanapatthāni. Tattha yam araññakanganipphādakam āraññakānam, tam "araññan"ti veditabbam. Vanapatthanti gāmantam atikkamitvā manussānam anupacāratthānam, yattha na kasīyati na vappīyati. Vuttañhetam "vanapatthanti dūrānametam senāsanānam adhivacanan"ti "vanapatthanti vanasandānametam senāsanānam, vanapatthanti bhīsanakānametam, vanapatthanti salomahamsānametam, vanapatthanti pariyantānametam, vanapatthanti na manussūpacārānametam senāsanānam adhivacanan''ti¹. Tena vuttam "gāmūpacārato muttānī''ti-ādi. Pantānīti pariyantāni atidūrāni. Tenāha "dūratarānī" ti-ādi. Vihārūpacārenāti vihārassa upacārappadesena. Addhikajanassāti maggagāmino janassa. Mandasaddānīti uccāsaddamahāsaddābhāvato tanusaddāni. Manussehi samāgamma ekajjham pavattita-saddo **nigghoso**, tassa yasmā attho dubbibhāvito hoti, tasmā vuttam "avibhavitatthena nigghosena"ti. Vigatavatanīti vigatasaddani. "Rahassakaranassa yuttānī"ti imināpi tesam thānānam araññalakkhanayuttatam, janavivittatam, vanavivittameva ca vibhāveti, tathā "ekībhāvassa anurūpānī"ti iminā.

53. **Kenā**ti hetumhi, sahayoge ca karaṇavacananti āha **"kena kāraṇena kena puggalena saddhin"**ti. Ekopi hi vibhattiniddeso anekatthavibhāvano hoti, tathā taddhitatthapadasamāhāreti.

Samsandananti ālāpasallāpavasena kathāsamsandanam. Ñāṇabyattabhāvanti byattañāṇabhāvam, so pana parassa vacane uttaradānavasena, parena vā vutta-uttare paccuttaradānavasena siyāti āha "uttarapaccuttaranayenā"ti. Yo hi parassa vacanam tipukkhalena nayena rūpeti, tathā parassa rūpanavacanam jātibhāvam āpādeti, tassa tādisam vacanasabhāvam ñāṇaveyyattiyam vibhāveti pākaṭam karotīti. Suññāgāresu natthāti suññāgāresu nivāsesu natthā

vinaṭṭhā abhāvaṁ gatā. Nāssa paññā nasseyya tehi tehi katapucchanapaṭipucchananimittaṁ nānāpaṭibhānuppattiyā visāramāpannaṁ pucchitaṁ pañhaṁ vissajjetuṁ asamatthatāya. Orodheyyāmāti nirussāhaṁ viya karontā avarodheyyāma, taṁ parassa orodhanaṁ vādajālena vinandhanaṁ viya hotīti āha "vinandheyyāmā"ti. Tadatthaṁ tena tucchakumbhinidassanaṁ kataṁ, taṁ byatirekamukhena dassetuṁ "pūritaghaṭo hī"ti-ādi vuttaṁ.

Balam dīpentoti abhūtameva attano ñāṇabalam pakāsento.
Asambhinnanti jātisambhedābhāvena asambhinnam. Aññajātisambhede sati assatarassa assassa jātabhāvo¹ viya sīhassapi sīhathāmābhāvo siyāti āha "asambhinnakesarasīhan"ti. Ṭhānasovāti taṅkhaṇe eva.

54. "Sumāgadhā nāma nadī"ti keci, tam micchātidassento "sumāgadhā nāma pokkharanī"ti vatvā tassā pokkharanibhāvassa suttantare āgatatam dassetum "vassā tīre"ti-ādi vuttam. Morānam nivāpo etthāti moranivāpo. Byadhikaranānampi hi padānam bāhiratthasamāso hotiyeva yathā "urasilomo"ti. Atha vā nivutthametthāti **nivāpo**, morānam nivāpo moranivāpo, morānam nivāpadinnatthānam. Tenāha "yattha morānan" ti-ādi. Yasmā nigrodho tapojigucchavādo, sāsane ca bhikkhū attakilamathānuyogam vajjetvā bhāvanānuyogena paramassāsappatte viharante passati, tasmā "katham nu kho samano gotamo kāyakilamathena vināva sāvake vinetī"ti sañjātasandeho "ko nāma so"ti-ādinā bhagavantam pucchi. Assasati anusankitaparisankito hoti etenati assaso, pitisomanassanti āha "assāsappattāti tutthippattā somanassappattā"ti. Adhiko settho āsayo nissayo ajjhāsayoti āha "uttamanissayabhūtan"ti. Ādibhūtam purātanam setthacariyam **ādibrahmacariyam**, lokuttaramagganti attho. Tathā hesa sabbabuddhapaccekabuddhasāvakehi teneva ākārena adhigato. Tenāha "purāṇa -pa- ariyamaggan"ti. Tathā hi tam bhagavā "addasa purāṇam maggam purānamanjasan"ti avoca. **Pūretvā** bhāvanāpāripūrivasena. "Pūretvā"ti vā idam "ajjhāsayam ādibrahmacariyan"ti ettha

pāṭhasesoti vadanti. "Ajjhāsayaṁ ādibrahmacariyaṁ paṭijānanti assāsappattā"ti evaṁ vā ettha yojanā.

Tapojigucchāvādavannanā

- 55. Pakatā hutvā vicchinnā vippakatāti āha "anitthitāva hutvā thitā"ti.
- 56. Vīriyena pāpajigucchanavādoti lūkhapaṭipattisādhanena vīriyena attataṇhāvinodanavasena pāpakassa jigucchanavādo. Jigucchatīti jiguccho, tabbhāvo jeguccham, adhikam jeguccham adhijeguccham, ativiya pāpajigucchanam, tasmim adhijegucche. Kāyadaļhībahulam tapatīti tapo, attakilamathānuyogavasena pavattam vīriyam, tena kāyadaļhībahulatānimittassa pāpassa jigucchanam, virajjanampi tapojigucchāti āha "vīriyena pāpajigucchā"ti.

Ghāsacchādanasenāsanataṇhāvinodanamukhena attasnehavirajjananti attho. Upari vuccamānesu nānākāresu acelakādivatesu ekajjhaṁ samādinnānaṁ parisodhanamevettha **pāripūraṇaṁ**, na sabbesaṁ anavasesato samādānaṁ tassa asambhavatoti āha "paripuṇṇāti parisuddhā"ti. Parisodhanañca nesaṁ sakasamayasiddhena nayena paṭipajjanameva. Vipariyāyena aparisuddhatā veditabbā.

57. "Ekam pañhampi na kathetī" ti paṭhamam attanā pucchitapañhassa akathitattā vuttam.

Tapanissitakoti attakilamathānuyogasaṅkhātaṁ tapaṁ nissāya samādāya vattanako. Sīhanādeti sīhanādasuttavaṇṇanāyaṁ¹. Yasmā tattha vitthāritanayena veditabbāni, tasmā tassā atthappakāsanāya vuttanayenapi veditabbāni.

Upakkilesavannanā

58. "Sammā ādiyatī"ti vatvā **sammā ādiyana**ñjassa daļhaggāho evāti āha "daļham gaṇhātī"ti. "Sāsanāvacarenāpi dīpetabban"ti

vatvā tam dassetum "ekacco hī"ti-ādi vuttam, tena dhutangadharatāmattena attamanatā, paripuṇṇasankappatā sammāpaṭipattiyā upakkilesoti imamattham dasseti, na yathāvuttatapasamādānadhutangadharatānam satipi aniyyānikatte sadisatanti daṭṭhabbam.

"Duvidhassāpīti 'attamano hoti paripuṇṇasaṅkappo'ti ca evaṁ upakkilesabhedena vuttassa duvidhassāpi tapassino'ti keci. Yasmā pana aṭṭhakathāyaṁ sāsanikavasenāpi attho dīpito, tasmā bāhirakassa, sāsanikassa cāti evaṁ duvidhassāpi tapassinoti attho veditabbo. Tathā ceva hi uparipi atthavaṇṇanaṁ vakkhatīti. Ettāvatāti yadidaṁ "ko añño mayā sadiso''ti evaṁ atimānassa, aniṭṭhitakiccasseva ca "alamettāvatā''ti evaṁ atimānassa ca uppādanaṁ, ettāvatā.

Ukkamsatīti ukkaṭṭham karoti. **Ukkhipatī**ti aññesam upari khipati, paggaṇhātīti attho. **Param samhāretī**ti param samharam nihīnam karoti. **Avakkhipatī**ti adho khipati, avamaññatīti attho.

Mānamadakaraņenāti mānasankhātassa madassa karaņena uppādanena. Mucchito hotīti mucchāpanno hoti, sā pana mucchāpatti abhijjhāsīlabbataparāmāsakāyaganthehi gadhitacittatā, tattha ca atilaggabhāvoti āha "gadhito ajjhosanno"ti. Pamajjanancettha¹ pamajjanamevāti āha "pamādamāpajjatī"ti. Kevalam dhutangasuddhiko hutvā kammaṭṭhānam ananuyunjanto tāya eva dhutangasuddhikatāya attukkamsanādivasena pavatteyyāti dassetum "sāsane"ti-ādi vuttam. Tenāha "dhutangameva -pa- paccetī"ti.

- 59. **Teyeva** paccayā. **Suṭṭhu katvā paṭisaṅkharitvā laddhā**ti ādaragāravayogena sakkaccaṁ abhisaṅkharitvā dānavasena upanayavasena laddhā. **Vaṇṇabhaṇanan**ti guṇakittanaṁ. **Assā**ti tapassino.
- 60. **Vodāsan**ti byāsanam, vibhajjanami attho. Tam panettha vibhajjanam dvidhā icchitanti āha "dvebhāgam āpajjatī"ti. **Dve bhāge karoti**

ruccanāruccanavasena. **Gedhajāto**ti sañjātagedho. **Mucchanaṁ** nāma sativippavāseneva hoti, na satiyā satīti āha "samuṭṭhassatī"ti.

Ādīnavamattampīti gadhitādibhāvena paribhoge ādīnavamattampi na passati. Mattaññutāti paribhoge mattaññutā.

Paccavekkhaṇaparibhogamattampīti paccavekkhaṇamattena paribhogampi ekavāram paccavekkhitvāpi paribhuñjanampi na karoti.

- 61. **Vicakkasaṇṭhānā**ti vipulatamacakkasaṇṭhānā. Sabbassa bhuñjanato ayokūṭasadisā dantā eva **dantakūṭaṁ. Apasādetī**ti pasādeti. **Acelakādivasenā**ti acelakavatādivasena. **Lūkhājīvin**ti sallekhapaṭipattiyā lūkhajīvikaṁ.
- 62. **Tapaṁ karotī**ti bhāvanāmanasikāralakkhaṇaṁ tapaṁ carati caranto viya hoti. **Caṅkamaṁ otarati** bhāvanaṁ anuyuñjanto viya. **Vihāraṅgaṇaṁ sammajjati** vattapaṭipattiṁ pūrento viya.

"Ādassayamāno"ti vā pāṭho.

Kiñci vajjanti kiñci kāyikam vā vācasikam vā dosam. Diṭṭhigatanti viparītadassanam. Aruccamānanti attano siddhante paṭikkhittabhāvena aruccamānam. Ruccati meti "kappati me"ti vadati. Anujānitabbanti tacchāviparītabhūtabhāvena "evametan"ti anujānitabbam. Savanamanohāritāya "sādhu suṭṭhū"ti anumoditabbam.

63. Kujjhanasīlatāya **kodhano**. Vuttalakkhaņo upanāho etassa atthīti **upanāhī**. Evambhūto ca tamsamangī hotīti **"samannāgato hotī"**ti vuttam. Esa nayo ito paresupi.

Ayam pana viseso—issati usūyatīti ussukī. Saṭhanam asantaguṇasambhāvanam saṭho, so etassa atthīti saṭho.
Santadosapaṭicchādanasabhāvā māyā, māyā etassa atthīti māyāvī.
Garuṭṭhāniyānampi paṇipātākaraṇalakkhaṇam thambhanam thaddham, tam ettha atthīti thaddho, guṇehi samānam, adhikañca atikkamitvā nihīnam katvā mañānansīlatāya atimānī. Asantaguṇasambhāvanatthikatāsankhātā pāpā lāmakā icchā etassāti pāpiccho. Micchā viparītā diṭṭhi etassāti micchādiṭṭhiko. "Idameva saccam,

moghamaññan"ti¹ evaṁ attanā attābhiniviṭṭhatāya satā diṭṭhi **sandiṭṭhi**, tameva parāmasatīti **sandiṭṭhiparāmāsī**. Aṭṭhakathāyaṁ pana "sayaṁ diṭṭhi sandiṭṭhī"ti vatthuvasena attho vutto. Ā bāļhaṁ viya dhīyatīti **ādhānan**ti āha "daļhaṁ suṭṭhu ṭhapitan"ti. Yathāgahitaṁ gāhaṁ paṭinissajjanasīlo paṭinissaggī, tappaṭikkhepena duppaṭinissaggī. Paṭisedhattho hi ayaṁ dusaddo yathā "duppañño², dussīlo"ti³ ca.

Parisuddhapapațikappattakathāvaṇṇanā

- 64. Idha nigrodha tapassīti yathānukkantam purimapāļim nigamanavasena ekadesena dasseti. Tenāha "evam bhagavā"ti-ādi. Gahitaladdhinti "acelakādibhāvo seyyo, tena ca samsārasuddhi hotī"ti evam gahitaladdhim. Rakkhitam tapanti tāya laddhiyā samādiyitvā rakkhitam acelakavatāditapam. "Sabbameva samkiliṭṭhan"ti iminā yam vakkhati parisuddhapāļivaṇṇanāyam "lūkhatapassino ceva dhutangadharassa ca vasena yojanā veditabbā"ti⁴, tassa parikappitarūpassa lūkhassa tapassinoti ayamettha adhippāyoti dasseti. "Parisuddhapāļidassanatthan"ti ca iminā titthiyānam vasena pāļiyevettha labbhati, na pana tadatthoti dasseti. Vuttavipakkhavasenāti vuttassa atthassa paṭipakkhavasena, paṭikkhepavasenāti attho. Tasmim ṭhāneti hetu-atthe bhummanti tassa hetu-atthena karaṇavacanena attham dassento "evam so tenā"ti-ādimāha. Uttari vāyamamānoti yathāsamādinnehi dhutadhammehi aparituṭṭho, apariyositasaṅkappo ca hutvā upari bhāvanānuyogavasena sammāvāyāmam karonto.
- 69. Ito paranti ito yathāvuttanayato param. Aggabhāvam vā sārabhāvam vāti tapojigucchāya aggabhāvam vā sārabhāvam vā ajānanto. "Ayamevassa aggabhāvo sārabhāvo"ti maññamāno "aggappattā, sārappattā cā"ti āha.

^{1.} Ma 2. 150, 166, 381; Ma 3. 22, 23; Khu 1. 162; Khu 7. 57; Khu 10. 80 pitthesu.

^{2.} Ma 1. 366 pitthe. 3. Am 2. 221; Am 3. 367; Vi 1. 116; Khu 1. 57 pitthesu.

^{4.} Dī-Ttha 3. 23 pitthe.

Parisuddhatacappattādikathāvannanā

70. Yamanam samyamanam yāmo, himsādīnam akaraņavasena catubbidho yāmova cātuyāmo, so eva samvaro, tena samvuto guttasabbadvāro cātuyāmasamvarasamvuto. Tenāha "catubbidhena samvarena pihito"ti. Atipātanam himsananti āha "pāṇam na hanatī"ti¹. Lobhacittena bhāvitam sambhāvitanti katvā bhāvitam nāma pañca kāmaguṇā. Ayañca tesu tesamyeva samudācāro maggoṭṭhāpakam viyāti āha "tesam saññāyā"ti.

Etanti abhiharaṇam, hīnāya anāvattanañca. Tenāha "so abhiharatīti-ādilakkhaṇan"ti. Abhiharatīti abhibuddhim neti. Tenāha "uparūpari vaḍḍhetī"ti. Cakkavattināpi pabbajitassa abhivādanādi karīyatevāti pabbajjā seṭṭhā guṇavisesayogato, dosavirahitato ca, yato sā paṇḍitapaññattā vuttā. Gihibhāvo pana nihīno tadubhayābhāvatoti āha "hīnāya gihibhāvatthāyā"ti.

- 71. **Tacappattā**ti tacam patt \bar{a}^2 , tacasadis \bar{a} hotīti attho.
- 74. **Titthiyānaṁ vasenā**ti titthiyānaṁ samayavasena. **Nesan**ti titthiyānaṁ. **Tan**ti dibbacakkhuṁ. **Sīlasampadā**ti sabbākārasampannaṁ catupārisuddhisīlaṁ. **Tacasārasampattito**ti tacatapojigucchāyāsārasampattito³. **Visesabhāvan**ti visesasabhāvaṁ.

Acelakapāļimattampīti acelakapāļi-āgatatthamattampi natthi, tasmā mayam anassāma vinaṭṭhāti attho. A-kāro vā nipātamattam, nassāmāti vinassāma. Kuto parisuddhapāļīti kuto eva amhesu parisuddhapāļi-āgatapaṭipatti. Esa nayo sesesupi. Sutivasenāpīti sotapathāgamanamattenāpi na jānāma.

^{1.} Na pāṇam atipātetīti (Ka)

^{2.} Tacappattā viya (Ka)

^{3.} Tapojigucchāya tacasārasampattito (?)

Nigrodhassapajjhāyanavannanā

- 75. **Assā**ti sandhānassa gahapatissa. **Kakkhaļan**ti pharusam. **Durāsadavacanan**ti avattabbavacanam. Yasmā pharusavacanam yam uddissa payuttam, tasmim khamāpite khamāpakassa paṭipākatikam hoti, tasmā "ayam mayī"ti-ādi vuttam.
- 76. Bodhatthāyadhammaṁ deseti, na attano buddhabhāvaghosanatthāya. Vādatthāyāti paravādabhañjanavādatthāya. Rāgādisamanatthāya dhammaṁ deseti na antevāsikamyatāya. Oghanittharaṇatthāyāti caturoghanittharaṇatthāya dhammaṁ deseti sabbaso orapārātiṇṇamāvahattā desanāya. Sabbakilesaparinibbānatthāya dhammaṁ deseti kilesānaṁ lesenapi desanāya aparāmatthabhāvato.

Brahmacariyapariyosānādivannanā

- 77. Idam sabbampīti sattavassato paṭṭhāya yāva "sattāhan"ti padam, idam sabbampi vacanam. Asaṭho pana amāyāvī ujujātiko tikkhapañño ugghaṭitaññūti adhippāyo. So hi tammuhutteneva arahattam pattum sakkhissatīti. Vaṅkavaṅkoti kāyavaṅkādīhipi vaṅkehi vaṅko jimho kuṭilo. "Saṭhaṁ panāhaṁ anusāsituṁ na sakkomī"ti na idaṁ bhagavā kilāsubhāveneva vadati, atha kho tassa abhājanabhāveneva.
- 78. Pakatiyā ācariyoti yo eva tumhākam ito pubbe pakatiyā ācariyo ahosi, so eva idānipi pubbāciņņavasena ācariyo hotu, na mayam tumhe antevāsike kātukāmāti adhippāyo. Na mayam tumhākam uddesena atthikā, dhammatantimeva pana tumhe ñāpetukāmamhāti adhippāyo. Ājīvatoti jīvikāya vuttito. Akusalāti koṭṭhāsam pattāti akusalāti tam tam koṭṭhāsatamyeva upagatā. Kilesadarathasampayuttāti kilesadarathasahitā tamsambandhanato. Jātijarāmaraṇānam hitāti jātijarāmaraṇiyā. Samkileso ettha atthi, samkilese vā niyuttāti samkilesikā. Vodānam vuccati visuddhi, tassa paccayabhūtattā vodāniyā. Tathābhūtā cete vodāpentīti āha "satte vodāpentī"ti. Sikhāppattā paññāya pāripūrivepullatā maggaphalavaseneva

icchitabbāti āha "maggapaññā -pa- vepullatan"ti. Ubhopi vā etāni pāripūrivepullāni. Yā hi tassa pāripūrī, sā eva vepullatāti. Tatoti samkilesadhammappahānavodānadhammābhibuddhihetu.

79. "Yathā mārenā"ti nayidam nidassanavasena vuttam, atha kho tathābhāvakathanamevāti dassetum "māro kirā"ti-ādi vuttam. Athāti mārena tesam pariyuṭṭhānappattito pacchā aññāsīti yojanā. Kasmā pana bhagavā pageva na aññāsīti? Anāvajjitattā. Māram paṭibāhitvāti mārena tesu katam pariyuṭṭhānam vidhametvā, na tesam sati payojane buddhānam dukkaram. Soti maggaphaluppattihetu. Tesam paribbājakānam.

Phuṭṭhāti pariyuṭṭhānavasena phuṭṭhā. Yatrāti niddhāraṇe bhummanti āha "yesū"ti. Aññāṇatthanti ājānanattham, upasaggamattañcettha ā-kāroti āha "jānanatthan"ti, vīmaṁsanatthanti attho. Cittaṁ nuppannanti "jānāma tāvassa dhamman"ti ājānanatthaṁ "brahmacariyaṁ carissāmā"ti ekasmiṁ divase ekavārampi tesaṁ cittaṁ nuppannaṁ. Sattāho pana vuccamāno etesaṁ kiṁ karissatīti yojanā. Sattāhaṁ pūretunti sattāhaṁ brahmacariyaṁ pūretuṁ, brahmacariyavasena vā sattāhaṁ pūretunti attho.

Paravādabhindananti paravādamaddanam. Sakavādasamussāpananti sakavādapagganhanam. Vāsanāyāti saccasampaṭivedhavāsanāya. Nesanti ca pakaraṇavasena vuttam. Tadaññesampi hi bhagavato sammukhā, paramparāya ca devamanussānam suṇantānam vāsanāya paccayo evāti. Yam panettha atthato na vibhattam, tam suviññeyyamevāti.

Sumangalavilāsiniyā dīghanikāyaṭṭhakathāya Udumbarikasuttavaṇṇanāya līnatthappakāsanā.

3. Cakkavattisutta

Attadīpasaraņatāvaņņanā

80. Uttānam vuccati pākaṭam, tappaṭikkhepena anuttānam apākaṭam, paṭicchannam, apacuram, duviñneyyanca. Anuttānam padānam vaṇṇanā anuttānapadavaṇṇanā. Uttānapadavaṇṇanāya payojanābhāvato anuttānaggahaṇam. "Mātulā"ti itthilingavasena laddhanāmo eko rukkho, tassā āsannappadese māpitattā nagarampi "mātulā"tveva pañnāyittha. Tena vuttam "mātulāyanti evamnāmake nagare"ti. Avidūreti tassa nagarassa avidūre.

Kāmañcettha sutte "bhūtapubbaṁ bhikkhave Rājā Daļhanemi nāma ahosī"ti-ādinā atītavaṁsadīpikā kathā ādito paṭṭhāya āgatā, "aḍḍheteyyavassasatāyukānaṁ manussānaṁ vassasatāyukā puttā bhavissantī"ti-ādinā pana savisesaṁ anāgatatthapaṭisaṁyuttā kathā āgatāti vuttaṁ "anāgatavaṁsadīpikāya suttantakathāyā"ti. Anāgatatthadīpanañhi acchariyaṁ, tatthāpi anāgatassa sammāsambuddhassa paṭipattikittanaṁ acchariyatamaṁ. Samāgamenāti sannipātena.

"Bhattaggam amanāpan"ti-ādi kevalam tesam parivitakkamattam. Amanāpanti amanuñām. Buddhesu kato appakopi aparādho appako kāro viya garutaravipākoti āha "buddhehi saddhim -pa- sadisam hotī"ti. Tatrāti tasmim mātulanagarassa samīpe, tassam vā parisāyam.

Attadīpāti ettha kāmam yo paro na hoti, so attāti sasantāno "attā"ti vuccati, hitasukhesibhāvena pana attanibbisesattā dhammo idha "attā"ti adhippeto. Tenāha "attā nāma lokiyalokuttaro dhammo"ti. Dvidhā āpo gato etthāti dīpo, oghena anajjhotthato bhūmibhāgo. Idha pana kāmoghādīhi anajjhottharaṇīyattā dīpo viyāti dīpo, attā dīpo patiṭṭhā etesanti attadīpā. Tenāha "attānam dīpan"ti-ādi. Dīpabhāvo cettha paṭisaraṇatāti āha "idam tasseva vevacanan"ti. Aññasaraṇapaṭikkhepavacananti aññasaraṇabhāvapaṭikkhepavacanam. Idañhi na aññam saraṇam

katvā viharaņasseva paṭikkhepavacanam, atha kho aññassa saraṇasabhāvasseva paṭikkhepavacanam tappaṭikkhepe ca tena itarassāpi paṭikkhepasiddhito. Tenāha "na hī"ti-ādi. Idāni tamevattham suttantarena¹ sādhetum "vuttampi cetan"ti-ādi. Yadi ettha pākatiko attā icchito, katham tassa dīpasaraṇabhāvo, tasmā adhippāyiko ettha attā bhaveyyāti pucchati "ko panettha attā nāmā"ti. Itaro yathādhippetam attānam dassento "lokiyalokuttaro dhammo"ti. Dutiyavāropi paṭhamavārasseva pariyāyabhāvena desitoti dassetum "tenāhā"ti-ādi vuttam.

Gocareti bhikkhūnam gocaraṭṭhānabhūte. Tenāha "caritum yuttaṭṭhāne"ti. Saketi katham panāyam bhikkhūnam sakoti āha "pettike visaye"ti. Pitito sammāsambuddhato āgatattā "ayam tumhākam gocaro"ti tena uddiṭṭhattā pettike visayeti. Carantanti sāmi-atthe upayogavacananti āha "ayamevattho"ti, carantānanti ca attho, tenāyam vibhattivipallāsenapi vacanavipallāsenapīti dasseti. Kilesamārassa otārālābheneva itaramārānampi otārālābho veditabbo. Ayam panatthoti gocare caraṇam sandhāyāha, vatthu pana byatirekamukhena āgatam.

Sakuņe hantīti **sakuņagghi,** mahāsenasakuņo. **Ajjhappattā**ti abhibhavanavasena pattā upagatā. **Na myāyan**ti me ayam sakuņagghi nālam **abhavissa. Naṅgalakaṭṭhakaraṇan**ti naṅgalena kasitappadeso. **Leḍḍuṭṭhānan**ti leḍḍūnam uṭṭhapitaṭṭhānam. **Sake bale**ti attano balahetu. **Apatthaddhā**ti avagālhatthambhā sañjātatthambhā. **Assaramānā**ti² avhāyantī.

Mahantam leḍḍunti naṅgalena bhinnaṭṭhāne sukkhatāya tikhiṇasiṅga-ayoghanasadisam mahantam leḍḍum. Abhiruhitvāti tassa adhobhāgena attanā pavisitvā nilīnayoggappadesam sallakkhetvā tassupari caṅkamanto assaramāno aṭṭhāsi. "Ehi kho"ti-ādi tassa assāramānākāradassanam. Sannayhāti vātaggahaṇavasena ubho pakkhe samam ṭhapetvā. Paccupādīti pāvisi. Tatthevāti yattha pubbe lāpo ṭhito, tattheva

leddumhi. **Uran**ti attano urappadesam. **Paccatāļesī**ti pati atāļesi sārambhavasena vegena gantvā paharaṇato vidhārentī patāļesi. **Ārammanan**ti paccayam. "Avasaran"ti keci.

"Kusalānan"ti evam pavattāya desanāya ko anusandhi? Yathāanusandhi eva. Ādito hi "attadīpā bhikkhave viharathā"ti-ādinā¹ yeva attadhammapariyāyena lokiyalokuttaradhammā gahitā, teyevettha kusalaggahanena gahitāti. **Anavajjalakkhanānan**ti avajjapatipakkhasabhāvānam. "Avajjarahitasabhāvānan"ti keci. Tattha purime atthavikappe vipākadhammadhammā eva gahitā, dutiye pana vipākadhammāpi. Yadi evam katham tesam samādāya vattananti? Na kho panetam evam datthabbam "vipākadhammā sīlādi viya samādāya vattitabbā"ti. **Samādānan**ti pana attano santāne sammā ādānam paccayavasena pavattiyevāti datthabbam. Vipākadhammā hi paccayavisesehi sattasantāne sammadeva āhitā āyu-ādisampattivisesabhūtā uparūparikusalavisesuppattiyā upanissayā hontīti vadanti. **Puññaṁ** pavaddhatīti ettha puññanti uttarapadalopenāyam niddesoti āha "puññaphalam vaddhatī"ti. Puññaphalanti ca ekadesasarūpekasesena vuttam "puññañca puññaphalañca puññaphalan"ti āha "uparūpari puññampi puññavipākopi veditabbo"ti.

"Mātāpitūnan"ti-ādi nidassanamattam, tasmā aññampi evarūpam hetūpanissayam kusalam daṭṭhabbam. Sinehavasenāti upanissayabhūtassa sinehassa vasena, na sampayuttassa. Na hi sinehasampayuttam nāma kusalam atthi. Mudumaddavacittanti mettāvasena ativiya maddavantam cittam. Yathā matthakappattam vaṭṭagāmikusalam dassetum "mātāpitūnam -pa- mudumaddavacittan"ti vuttam, evam matthakappattameva vivaṭṭagāmikusalam dassetum "cattāro sati -pa- bodhipakkhiyadhammā"ti vuttam. Tadaññepi pana dānasīlādidhammā vaṭṭassa upanissayabhūtā vaṭṭagāmikusalam. Vivaṭṭassa upanissayabhūtā vivaṭṭagāmikusalanti veditabbā. Pariyosānanti phalavisesāvahatāya phaladāya koṭi sikhāppatti, devaloke ca pavattisirivibhavoti pariyosānam "manussaloke"ti visesitam, manussalokavaseneva

cāyam desanā āgatāti. Maggaphalanibbānasampatti pariyosānanti yojanā. **Vivaṭṭagāmikusalassa vipākam suttapariyosāne dassissati** "atha kho bhikkhave Saṅkho nāma rājā"ti-ādinā¹.

Dalhanemicakkavattirājakathāvannanā

- 81. Idhāti imasmim "kusalānam bhikkhave dhammānan"ti-ādinā² suttadesanāya āraddhaṭṭhāne vaṭṭavivaṭṭagāmibhāvena sādhāraṇe kusalaggahaṇe. Tattha vaṭṭagāmikusalānusandhivasena "bhūtapubbam bhikkhave"ti desanam ārabhi, ārabhanto ca desiyamānamattam. Dhammapaṭiggāhakānam bhikkhūnam saṅkhepato evam dīpetvā ārabhīti dassetum "bhikkhave"ti-ādi vuttam, paṭhamam tathā adīpentopi bhagavā atthato dīpeti viyāti adhippāyo.
- 82. **Īsakampī**ti appamattakampi. **Avasakkitan**ti ogatabhaṭṭhaṁ. **Nemiabhimukhan**ti nemippadesassa sammukhā. **Bandhiṁsu** cakkaratanassa osakkitānosakkitabhāvaṁ jānituṁ. **Tadetan**ti yathāvuttaṭṭhānā cavanaṁ. **Atibalavadose**ti rañño balavati anatthe upaṭṭhite **sati.**

Appamattoti rañño āṇāya pamādam akaronto.

Ekasamuddapariyantamevāti jambudīpameva sandhāya vadati. So uttarato assakaṇṇapabbatena paricchinnam hutvā attānam parikkhipitvā ṭhita-ekasamuddapariyanto. **Puññiddhivasenā**ti cakkavattibhāvāvahāya puññiddhiyā vasena.

83. **Evaṁ katvā**ti kāsāyāni vatthāni acchādetvā. **Sukataṁ kamman**ti dasakusalakammapathameva vadati.

"Dasavidham, dvādasavidhan"ti ca vuttavibhāgo parato āgamissati. Pūrentenevāti pūretvā thiteneva. Niddoseti cakkavattivattassa paṭipakkhabhūtānam dosānam apagamane niddose. Cakkavattīnam vatteti cakkavattirājūhi vattitabbavatte. Bhāvini bhūte viya hi upacāro yathā "agamā rājagaham buddho"ti³. Adhigatacakkavattibhāvāpi hi te tattha vattantevāti tathā vuttam.

Cakkavatti-ariyavattavannanā

84. Aññathā vattitum adento so dhammo adhitthānam etassāti tadadhitthānam, tena tadadhitthānena cetasā. Sakkarontoti ādarakiriyāvasena karonto. Tenāha "yathā" ti-ādi. Garum karontoti pāsānacchattam viya garukaranavasena garum karonto. Tenevāha "tasmim gāravuppattiyā"ti. **Mānento**ti sambhāvanāvasena manena piyāyanto. Tenāha "tamevā" ti-ādi. Evam pūjayato apacāyato evanca yathāvuttasakkārādisambhavoti tam dassetum "tam apadisitva"ti-adi vuttam. "Dhammadhipatibhuto āgatabhāvenā"ti iminā yathāvuttadhammassa jetthakabhāvena purimapurimatara-attabhāvesu sakkacca samupacitabhāvam dasseti. "Dhammavaseneva sabbakiriyānam karanenā"ti etena thānanisajjādīsu yathāvuttadhammaninnaponapabbhārabhāvam dasseti. Assāti rakkhāvaranaguttiyā. **Param rakkhanto** aññam ditthadhammikādi-anatthato rakkhanto teneva paratthasādhanena khanti-ādiguņena attānam tato eva rakkhati. Mettacittatāti mettacittatāya. Nivāsanapārupanagehādīnam sītunhādipatibāhanena **āvaranam**¹. **Anto janasmin**ti abbhantarabhūte puttadārādijane.

"Sīlasamvare patiṭṭhāpehī"ti iminā rakkham dasseti,
"vatthagandhamālādīni dehī"ti iminā āvaraṇam, itarena guttim.
Bhattavetanasampadānenapīti pi-saddena sīlasamvare patiṭṭhāpanādīni sampiṇḍeti. Eseva nayo ito paresupi pi-saddaggahaṇesu. Nigamo nivāso etesanti negamā, evam jānapadāti āha "nigamavāsino"ti-ādi.

Nivavidhā mānamadāti "seyyohamasmī"ti-ādi² nayappavattiyā navavidhā mānasaṅkhātā madā. Māno eva hettha pamajjanākārena pavattiyā mānamado. Sobhane kāyikavācasikakamme ratoti sūrato ukārassa dīghaṁ katvā, tassa bhāvo soraccaṁ, kāyikavācasiko avītikkamo, sabbaṁ vā kāyavacīsucaritaṁ. Suṭṭhu oratoti sorato, tassa bhāvo soraccaṁ, yathāvuttameva sucaritaṁ. Rāgādīnanti rāgadosamohamānādīnaṁ. Damanādīhīti damanasamanaparinibbāpanehi.

^{1.} Nivāraņā āvaraņam (?)

^{2.} Sam 2. 308; Abhi 1. 225; Abhi 2. 366 Khu 7. 61, 336 piṭṭhesu.

Ekamatthānanti ekam cittam, ekaccam attano cittanti attho. Rāgādīnañhi pubbabhāgiyam damanādi paccekam icchitabbam, na maggakkhane viya ekajjham paṭisankhānamukhena pajahanato. **Ekamattānan**ti vā vivekavasena ekam ekātinam attānam. **Kāle kāle**ti tesam santikam upasankamitabbe kāle kāle.

Idha ṭhatvāti "idam kho tāta tan"ti evam nigamanavasena vuttaṭṭhāne ṭhatvā. Vattanti ariyacakkavattivattam. Samānetabbanti "dasavidham, dvādasavidham"ti ca heṭṭhā vuttagaṇanāya ca samānam kātabbam anūnam anadhikam katvā dassetabbam. Adhammarāgassāti ayuttaṭṭhāne rāgassa. Visamalobhassāti yuttaṭṭhānepi ativiya balavabhāvena pavattalobhassa.

Cakkaratanapātubhāvavannanā

85. **Vattamānassā**ti paripuņņe cakkavattivatte vattamānassa, no aparipuņņeti āha "pūretvā vattamānassā"ti. Kittāvatā panassa pāripūrī hotīti? Tattha "katādhikārassa tāva heṭṭhimaparicchedena dvādasahipi saṁvaccharehi pūrati, pañcavīsatiyā, paññāsāya vā saṁvaccharehi. Ayañca bhedo dhammacchandassapi tikkhamajjhamudutāvasena, itarassa tato bhiyyopī"ti vadanti.

Dutiyādicakkavattikathāvannanā

90. **Attano matiyā**ti paramparāgatam purāṇam tantim paveṇim laṅghitvā attano icchitākārena. Tenāha "**porāṇakan**"ti-ādi.

Na pabbantīti samiddhiyā na pūrenti, phītā na hontīti attho. Tenāha "na vaḍḍhantī"ti. Tathā cāha "katthaci suññā hontī"ti. Tatha tattha rājakicce raññā amā saha vattantīti amaccā, yehi vinā rājakiccam nappavattati. Paramparāgatā hutvā rañño parisāya bhavāti pārisajjā. Tenāha "parisāvacarā"ti. Tasmim ṭhānantare ṭhapitā hutvā rañño āyam, vayañca yāthāvato gaṇentīti gaṇakā. Jātikulasutācārādivasena puthuttam gatattā mahatī mattā etesanti mahāmattā, te pana mahānubhāvā amaccā evāti āha "mahā-amaccā"ti. Ye rañño hatthānīkādīsu avatthitā, te anīkatthāti āha

"hatthi-ācariyādayo"ti. Mantam paññam asitā hutvā jīvantīti mantassājīvino, matisajīvāti attho, ye tattha tattha rājakicce upadesadāyino. Tenāha "mantā vuccati paññā"ti-ādi.

Āyuvaṇṇādiparihānikathāvaṇṇanā

- 91. Balavalobhattāti "imasmim loke idāni daliddamanussā nāma bahū, tesam sabbesam dhane anuppadiyamāne mayham kosassa parikkhayo hotī"ti evam uppannabalavalobhattā. Uparūparibhūmīsūti chakāmasaggasankhātāsu uparūparikāmabhūmīsu. Kammassa phalam aggam nāma, tam panettha uddhagāmīti āha "uddhamaggamassā"ti. Sagge niyuttā, saggappayojanāti vā sovaggikā. Dasannam visesānanti dibba-āyuvaṇṇayasasukha-ādhipateyyānanceva dibbarūpādīnanca phalavisesānam. Vaṇṇaggahaṇena cettha sako attabhāvavaṇṇo gahito, rūpaggahaṇena bahiddhā rūpārammaṇam.
- 92. Suṭṭhu **nisiddhan**ti yathāyaṁ iminā attabhāvena adinnaṁ ādātuṁ na sakkoti, evaṁ sammadeva tato nisedhitaṁ katvā. **Mūlahatan**ti jīvitā voropanena mūle eva hataṁ.
- 96. Rāgavasena caraṇaṁ **carittaṁ**, carittameva **cārittaṁ**, methunanti adhippāyo, taṁ pana "paresaṁ dāresū"ti vuttattā "**micchācāran**"ti āha.
- 100. **Paccanīkadiṭṭhī**ti "atthi dinnan"ti-ādikāya¹ sammādiṭṭhiyā paṭipakkhabhūtā diṭṭhi.
- 101. **Mātucchā**dikā upari sayameva vakkhati. **Atibalavalobho**ti ativiya balavā bahalakileso, yena akāle, adese ca pavattati. **Micchādhammo**ti micchā viparīto avisabhāgavatthuko lobhadhammo. Tenāha "purisānan"tiādi.

Tassa bhāvoti yena mettākaruņāpubbaṅgamena cittena puggalo "matteyyo"ti vuccati, so tassa yathāvuttacittuppādo, taṁsamuṭṭhānā ca kiriyā matteyyatā. Tenāha "mātari sammā paṭipattiyā etaṁ

nāman"ti. Yā sammā pajjitabbe sammā appaṭipatti, sopi doso agāravakiriyādibhāvato. Vippaṭipattiyam pana vattabbameva natthīti āha "tassā abhāvo ceva tappaṭipakkhatā ca amatteyyatā"ti. Kulejeṭṭhānanti attano kule vuddhānam mahāpitucūļapitujeṭṭhakabhātikādīnam.

Dasavassāyukasamayavannanā

103. "Yan"ti iminā samayo āmaṭṭho, bhummatthe cetaṁ paccattavacananti āha "yasmiṁ samaye"ti. Alaṁ patinoti alaṁpateyyā. Tassā pariyattatā bhariyābhāvenāti āha "dātuṁ yuttā"ti. Aggarasānīti madhurabhāvena, bhesajjabhāvena ca aggabhūtarasāni.

Dippissantīti paṭipakkhabhāvena samujjalissanti. Tenāha "kusalantipi na bhavissatī"ti. **Aho puriso**ti mātādīsupi īdiso, aññesaṁ kesaṁ kiṁ vissajjessati, aho tejavapurisoti.

Gehe mātugāmam viyāti attano gehe dāsibhariyābhūtamātugāmam viya. Missībhāvanti mātādīsu bhariyāya viya cārittasankaram.

Balavakopoti hantukāmatāvasena uppattiyā balavakopo. Āghātetīti āhanati, attano kakkhaļapharusabhāvena cittaṁ vibādhatīti attho. Nissayadahanaraso hi doso. Byāpādetīti vināseti, manopadūsanato manassa pakopanato. Tibbanti tikkhaṁ, sā panassa tikkhatā sarīre avahantepi sinehavatthuṁ laṅghitvāpi pavattiyā veditabbāti āha "piyamānassapī"ti-ādi.

104. Kappavināso **kappo** uttarapadalopena, antarāva kappo antarakappo. Taṇhādibhedo kappo etassa atthīti **kappo**, sattalokoti āha "antarāva lokavināso"ti. Svāyam antarakappo katividho, kathañcassa sambhavo, kim gatikoti antogadham codanam sandhāyāha "antarakappo ca nāmā"ti-ādi. Lobhussadāyāti lobhādhikāya pajāya vattamānāya.

Evam cintayimsūti pubbe yathānussavānussaraņena, attano ca āyuvisesassa labhanato. Gumbalatādīhi gahanam ṭhānanti gumbalatādīhi sanchannatāya gahanabhūtam ṭhānam. Rukkhehi gahananti rukkhehi nirantaranicitehi gahanabhūtam. Nadīvidugganti chinnataṭāhi nadīhi orato, pārato ca viduggam. Tenāha "nadīnan"ti-ādi. Pabbatehi visamam pabbatantaram. Pabbatesu vā chinnataṭesu durāroham visamaṭṭhānam. Sabhāgeti jīvanavasena samānabhāge sadise karissanti.

Āyuvaṇṇādivaḍḍhanakathāvaṇṇanā

105. **Āyatan**ti vā dīgham cirakālikam. Maranavasena hi ñātikkhayo

āyato apunarāvattanato, na rājabhayādinā ukkamanavasena punarāvattiyāpi tassa labbhanato. **Osakkeyyāmā**ti orameyyāma. Viramaṇampi atthato pajahanameva pariccajanabhāvatoti āha "pajaheyyāmāti attho"ti. Sīlagabbhe vaddhitattāti mātu, pitu ca sīlavantatāya tadavayavabhūte gabbhe vaddhi "sīlagabbhe vaddhitā"ti vuttā, etena utu-āhārassa viya tadaññassāpi bāhirassa paccayassa vasena sattasantānassa visesādhānam hotīti dasseti. Yam panettha vattabbam, tam **brahmajālaṭīkāyam**¹ vuttameva. Khettavisuddhiyāti adhitthānabhūtavatthuvisuddhiyā. Nanu ca tam visesādhānam jāyamānam rūpasantatiyā eva bhaveyyāti? Saccametam, rūpasantatiyā pana tathā āhitavisesāya arūpasantatipi laddhūpakārā eva hoti tappatibaddhavuttibhavato. Yatha kabalikaraharena upatthambhite rupakaye sabbopi attabhāvo anuggahito eva nāma hoti, yathā pana rañño cakkavattino puññavisesam upanissāya tassa itthiratanādīnam anaññasādhāraņā te te visesā sambhavanti tabbhāve bhāvato, tadabhāve ca abhāvato, evameva tasmim kāle mātāpitūnam vathāvuttapuññavisesam upanissāya tesam puttānam jāyamānam dīghāyukatā khettavisuddhiyāva hotīti veditabbā samvegadhammachandādisamupabrūhitāya tadā tesam kusalacetanāya tathā uļārabhāvena samuppajjanato. Etthāti imasmim manussaloke, tatthāti² yathāvuttam kusaladhammam samādāya vattamāne sattanikāye. **Tatthevā**ti tasmimyeva sattanikāye. "Attanova sīlasampattiyā"ti vuttam sasantatipariyāpannassa dhammassa tattha visesappaccayabhāvato. Khettavisuddhipi pana idhāpi paţikkhipitum na sakkā.

Koṭṭhāsāti cattārīsavassāyukāti-ādayo asītivassasahassāyukapariyosānā ekādasa koṭṭhāsā. **Adinnādānādīhī**ti **ādi**-saddena kule jetthāpacāyikāpariyosānānam dasannam pāpakotthāsānam gahanam.

Sankharāja-uppattivannanā

106. Evam uppajjanakatanhāti evam vacībhedam pāpanavasena pavattā bhunjitukāmatā. Anasananti kāyikakiriyā asamatthatāhetubhūto sarīrasankoco. Tenāha "avipphārikabhāvo"ti-ādi. Ghananivāsatanti gāmanigamarājadhānīnam ghananiviṭṭhatam annamannassa nātidūravattitam. Nirantarapūritoti nirantaram viya punno tatrupagānam sattānam bahubhāvato.

Metteyyabuddhuppādavannanā

- 107. Kiñcāpi pubbe vaḍḍhamānakavasena desanā āgatā, idam pana na vaḍḍhamānakavasena vuttam. Kasmāti ce āha "na hī"ti-ādi. Sattānam vaḍḍhamānāyukakāle buddhā na nibbattanti samsāre samvegassa dubbibhāvanīyattā. Tato vassasatasahassato orameva buddhuppādakālo.
- 108. Samussitaṭṭhena yūpo viyāti yūpo, yūpanti ettha sattā anekabhūmikūṭāgārovarakādivantatāyāti yūpo, pāsādo. Rañño hetubhūtenāti hetu-atthe karaṇavacananti dasseti. Ussāhasampatti-ādinā mahatā rājānubhāvena, mahatā ca kittisaddena samannāgatattā catūhi saṅgahavatthūhi mahājanassa rañjanato mahāpanādo nāma rājā jāto. Jātaketi mahāpanādajātake¹.

Panādo nāma so rājāti "atīte panādo nāma so rājā assosī"ti attabhāvantaratāya attānam param viya niddisati. Āyasmā hi bhaddajitthero attanā ajjhāvutthapubbam suvaņņapāsādam dassetvā evamāha. Yassa yūpo suvaņņayoti yassa rañno ayam yūpo pāsādo suvaņņayo suvaņņamayo. Tiriyam soļasubbedhoti vitthārato soļasasarapātappamāņo, so pana addhayojanappamāno hoti.

Ubbhamāhu sahassadhāti¹ ubbham uccabhāvamassa pāsādassa sahassadhā sahassakaṇḍappamāṇamāhu, so pana yojanato pañcavīsatiyojanappamāṇo hoti. Keci panettha gāthāsukhattham "āhū"ti dīgham katam, ahu ahosīti attham vadanti.

Sahassakaṇḍoti sahassabhūmiko, "sahassakhaṇḍo"tipi pāṭho, so eva attho. Satageṇḍūti anekasataniyūhako. Dhajālūti tattha tattha niyūhasikharādīsu patiṭṭhapitehi sattidhajavīraṅgadhajādīhi dhajehi sampanno. Haritāmayoti cāmīkarasuvaṇṇamayo. Keci pana "haritāmayoti haritamaṇiparikkhaṭo"ti vadanti. Gandhabbāti naṭā. Chasahassāni sattadhāti chamattāni gandhabbasahassāni sattadhā tassa pāsādassa sattasu ṭhānesu rañño abhiramāpanatthaṁ nacciṁsūti attho. Te evaṁ naccantāpi kira rājānaṁ hāsetuṁ nāsakkhiṁsu. Atha sakko devarājā devanaṭaṁ pesetvā samajjaṁ kāresi, tadā rājā hasīti.

Koṭigāmo nāma māpito. Vatthūti bhaddajittherassa vatthu. Taṁ Theragāthāvaṇṇanāyaṁ² vitthārato āgatameva. Itarassāti naļakāradevaputtassa. Ānubhāvāti puññānubhāvanimittaṁ.

Dānavasena datvāti tam pāsādam attano pariggahabhāvaviyojanena dānamukhe niyojetvā. Vissajjetvāti citteneva pariccajanavasena datvā puna dakkhiņeyyānam santakabhāvakaraņena nirapekkhapariccāgavasena vissajjetvā. Ettakenāti "bhūtapubbam bhikkhave"ti-ādim katvā yāva "pabbajissatī"ti padam ettakena desanāmaggena.

Bhikkhuno āyuvannādivaddhanakathāvannanā

110. **Idam bhikkhuno āyusmi**nti āyusmim sādhetabbe idam bhikkhuno icchitabbam cirajīvitāya hetubhāvatoti. Tenāha "idam āyukāraņan"ti.

Sampannasīlassa avippaṭisārapāmojjapītimassaddhisukhasamādhiyathābhūtañāṇādisambhavat o taṁsamutthānapanītarūpehi kāyassa phutattā sarīre vaṇṇadhātu vippasannā hoti, kalyāṇo ca kittisaddo abbhuggacchatīti āha "sīlavato hī"ti-ādi.

Vivekajam pītisukhādīti **ādi-**saddena samādhijam pītisukham, apītijam kāyasukham, satipārisuddhijam upekkhāsukhanca sanganhāti.

Appaṭikkūlatāvahoti appamāṇānaṁ sattānaṁ, attano ca tesu appaṭikkūlabhāvato. Hitūpasaṁhārādivasena pavattiyā sabbadisāsu pharaṇa-appamāṇavasena sabbadisāsu vipphārikatā.

"Arahattaphalasankhātam balan"ti vuttam tassa akuppadhammatāya kenaci anabhibhavanīyabhāvato.

"Loke"ti idam yathā "ekabalampī"ti iminā sambandhīyati, evam "duppasaham durabhisambhavan"ti imehipi sambandhitabbam.

Lokapariyāpanneheva hi dhammehi tesam balassa duppasahatā, durabhisambhavatā, na lokuttarehīti. Etthevāti etasmim arahattaphale eva, tadatthanti attho.

Lokuttarapuññampīti lokuttarapuññampi puññaphalampi. Yāva āsavakkhayā pavaḍḍhati vivaṭṭagāmikusaladhammānaṁ samādānahetūti yojanā. Amatapānaṁ piviṁsu heṭṭhimamaggaphalasamadhigamavasenāti adhippāyo.

Sumangalavilāsiniyā dīghanikāyaṭṭhakathāya

Cakkavattisuttavannanāya līnatthappakāsanā.

4. Aggaññasutta

Vāsetthabhāradvājavannanā

111. Etthāti "pubbārāme, migāramātupāsāde"ti etasmim padadvaye. Koyam pubbārāmo, kathañca pubbārāmo, kā ca migāramātā, kathañcassā pāsādo ahosīti etasmim antolīne anuyoge. Ayam idāni vuccamānā anupubbikathā ādito paṭṭhāya saṅkhepeneva anupubbikathā. Padumuttaram bhagavantam ekam upāsikam aggupaṭṭhāyikaṭṭhāne ṭhapentim disvāna tattha sañjātagāravabahumānā tamevattham purakkhatvā bhagavantam nimantetvā. Meṇḍakaputtassā¹ meṇḍakaseṭṭhiputtassa. Sotāpannā ahosi tathā katādhikārattā.

Mātuṭṭhāne ṭhapesi attano sīlācārasampattiyā garuṭṭhāniyattā. Upayoganti tattha tattha appetabbaṭṭhāne appanāvasena viniyogam agamamsu. Aññehi ca veļuriyalohitankamasāragallādīhi. Bhassatīti otarati. Suddhapāsādova na sobhatīti kevalo ekapāsādo eva vihāro na sobhati. Niyūhāni bahūni nīharitvā kattabbasenāsanāni "duvaḍḍhagehānī"ti vadanti. Majjhe gabbho samantato anupariyāyatoti evam dvikkhattum vaḍḍhetvā katasenāsanāni duvaḍḍhagehāni. Cūļapāsādāti khuddakapāsādā.

Uttaradevīvihāro nāma nagarassa pācīnadvārasamīpe katavihāro.

Titthiyalingassa aggahitattā neva titthiyaparivāsam vasanti. Anupasampannabhāvato āpattiyā āpannāya abhāvato na āpattiparivāsam vasanti. Bhikkhubhāvanti upasampadam. Tevijjasuttanti imasmim dīghanikāye tevijjasuttam² sutvā.

113. Anuvattamānā caṅkamiṁsu ananucaṅkamane yathādhippetassa atthassa pucchānādīnaṁ asakkuṇeyyattā. Tesanti tesaṁ dvinnaṁ. Tenāha "paṇḍitataro"ti. Atthāti bhavattha. Kulasampannāti sampannakulā uditodite brāhmaṇakule uppannā. Brāhmaṇakulāti kenaci pārijuññena

anupaddutā eva brāhmaṇakulā. Tenāha "bhogādisampannan"ti-ādi. Ime brāhmaṇā uccā hutvā "imaṁ vasalaṁ pabbajjaṁ pabbajiṁsū"ti-ādinā jātiādīni ghaṭṭentā akkosanti. Paribhāsantīti paribhavitvā bhāsanti. Attano anurūpāyāti attano ajjhāsayassa anurūpāya. Antarantarā vicchijja pavattiyamānā paribhāsā paripuṇṇā nāma na hoti khaṇḍabhāvato, tabbipariyāyato paripuṇṇā nāma hotīti āha "antarā"ti-ādi.

Appatiţthatāyāti apassayarahitattā. Vibhinnoti¹ vinattho.

Itare tayo vaṇṇāti khattiyādayo vaṇṇā hīnā. Nanu khattiyāva seṭṭhā vaṇṇā yathā buddhā etarahi khattiyakule eva uppannāti? Saccametaṁ, te pana attano micchābhimānena, micchāgāhena ca "brāhmaṇova seṭṭho vaṇṇo"ti vadanti, taṁ tesaṁ vacanamattaṁ. "Sujjhantīti suddhā honti, na nindaṁ garahaṁ pāpuṇantī"ti vadanti. Sujjhanti vā saṁsārato sujjhanti, na sesā vaṇṇā asukkajātikattā, mantajjhenābhāvato cāti. Brahmuno mukhato jātā vedavacanato jātāti mukhato jātā. Tato eva brahmuno mahābrahmuno vedavacanato vijātāti brahmajā. Tena duvidhenāpi nimmitāti brahmanimmitā. Vedavedaṅgādibrahmadāyajjamarahantīti brahmadāyādā. Muṇḍhake samaṇaketi ettha ka-kāro garahāyanti āha "nindantā jigucchantā vadantī"ti. Ibbheti sudde, te pana gharabandhanena baddhā nihīnatarāti āha "gahapatike"ti. Kaṇheti kaṇhajātike. Bandhanaṭṭhena bandhu, kassa pana bandhūti āha "mārassa bandhubhūte"ti. Pādāpacceti pādato jātāpacce. Ayaṁ kira brāhmaṇānaṁ laddhi "brāhmaṇā brahmuno mukhato jātā, khattiyā urato, ūrūhi vessā, pādato suddā"ti.

114. Yasmā paṭhamakappikakāle catuvaṇṇavavatthānaṁ natthi, sabbeva sattā ekasadisā, aparabhāge pana tesaṁ payogabhedavasena ahosi, tasmā vuttaṁ "porāṇaṁ -pa- ajānantā"ti. Laddhibhindanatthāyāti "brāhmaṇā brahmano puttā orasā mukhato jātā"ti evaṁ pavattāya laddhiyā vinivethanatthaṁ. Puttappatilābhatthāyāti "evaṁ mayaṁ pettikaṁ

iṇaṁ sodhessāmā"ti laddhiyaṁ ṭhatvā puttappaṭilābhāya. Ayañhettha dhammikānaṁ brāhmaṇānaṁ ajjhāsayo. Sañjātapupphāti rajassalā. Itthīnañhi kumāribhāvappattito paṭṭhāya pacchimavayato oraṁ asati vibandhe aṭṭhame aṭṭhame sattāhe gabbhāsayasaññite tatiye āvatte katipayā lohitapīļakā saṇṭhahitvā aggahitapupphā eva bhijjanti, tato lohitaṁ paggharati, tattha utusamaññā, pupphasamaññā ca. Nesanti brāhmaṇānaṁ. Saccavacanaṁ siyāti "brahmuno puttā"ti-ādivacanaṁ saccaṁ yadi siyā, brāhmaṇīnaṁ -pa- mukhaṁ bhaveyya, na cetaṁ atthi.

Catuvannasuddhivannanā

115. **Mukhacchedakavādan**ti "brāhmaṇā mahābrahmuno mukhato jātā"ti vādassa chedakavādam. **Ariyabhāve asamatthā**ti anariyabhāvāvahā. **Pakatikāļakā**ti sabhāveneva na suddhā. **Kaṇho**ti kiliṭṭho upatāpako. Tenāha "dukkhoti attho"ti.

Sukkabhāvo nāma parisuddhatāti āha "nikkilesabhāvena paṇḍarā"ti. Sukkoti na kilittho anupatāpakoti vuttam "sukhoti attho"ti.

vokiṇṇesū"ti. Missībhūtesūti "kadāci kaṇhā dhammā, kadāci sukkā dhammā"ti evaṁ ekasmiṁ santāne, ekasmiṁyeva ca attabhāve pavattiyā missībhūtesu, na pana ekajjhaṁ pavattiyā. Etthāti anantaravuttadhammāva anvādhiṭṭhāti āha "kaṇhasukkadhammesū"ti. Yasmā ca te brāhmaṇā na ceva te dhamme atikkantā, yāya ca paṭipadāya atikkameyyuṁ, sāpi tesaṁ paṭipadā natthi, tasmā vuttaṁ "vattamānāpī"ti. Nānujānanti ayathābhuccavādabhāvato. Anujānanañca nāma abbhanumodananti tadabhāvaṁ dassentena "nānumodanti, na pasaṁsantī"ti vuttaṁ. Catunnaṁ vaṇṇānanti niddhāraṇe sāmivacanaṁ. Tesanti pana sambandhepi vā sāmivacanaṁ. Te ca brāhmaṇā na evarūpā na edisā, yādiso arahā ekadesenāpi tena tesaṁ sadisatābhāvato, tasmā tena kāraṇena nesaṁ brāhmaṇānaṁ

"brāhmaņova seṭṭho vaṇṇo"ti vādam viññū yathābhūtavādino buddhādayo ariyā nānujānanti.

Ārakattādīhīti ettha kilesānam ārakattā pahīnabhāvato dūrattā araham, kilesārīnam hatattā araham, samsāracakkassa arānam hatattā araham, paccayādīnam arahattā araham, pāpakaraņe rahābhāvena arahamti evamattho veditabbo. Ayamettha sankhepo, vitthāro pana visuddhimagge,¹ tamsamvaṇṇanāsu² ca vuttanayena veditabbo. Āsavānam khīṇattāti catunnampi āsavānam anavasesato pahīnattā. Brahmacariyavāsanti maggabrahmacariyavāsam. Tassa vāsassa pariyositattā vutthavāso, dasannampi vā ariyavāsānam vutthattā vutthavāso. Vuttañhetam—

"Dasayime bhikkhave ariyāvāsā, yadariyā āvasimsu vā āvasanti vā āvasissanti vā, katame dasa? Idha bhikkhave bhikkhu pañcaṅgavippahīno hoti chaļaṅgasamannāgato ekārakkho caturāpasseno panuṇṇapaccekasacco samavayasaṭhesano anāvilasaṅkappo passaddhakāyasaṅkhāro suvimuttacitto suvimuttapañño. Ime kho bhikkhave dasa ariyāvāsā''ti³.

Vussatīti vā vusitam, ariyamaggo, ariyaphalanca, tam etassa atthīti atisayavacanicchāvasena arahā "vusitavā"ti vutto. Karanīyam nāma parinnāpahānasacchikiriyābhāvanā dukkhassantam kātukāmehi ekantato kattabbattā, tam pana yasmā catūhi maggehi paccekam catūsu saccesu kātabbam katam, tasmā vuttam "catūhi -pa- katakaranīyo"ti. Osīdāpanaṭṭhena bhārā viyāti bhārā, kilesā, khandhā ca. Vuttanhi "bhārā have pancakkhandhā"ti⁴. Ohāritoti apanīto. Sako attho sadatthoti ettha dakāro padasandhikaro. Kāmam diṭṭhi-ādayopi samyojanāni eva, tathāpi taṇhāya bhavasamyojanaṭṭho sātisayo. Yathāha "avijjānīvaraṇānam sattānam taṇhāsamyojanānan"ti⁵. Tato sā eva sutte⁶ samudayasaccabhāvena vuttā, tasmā vuttam "bhavasamyojanam vuccati taṇhā"ti. Sammadanānā vimuttoti sammā annāya jānanabhūtāya

^{1.} Visuddhi 1. 192 pitthe.

^{2.} Visuddhi-Tī 1. 219 pitthe.

^{3.} Am 3. 279 pitthe.

^{4.} Sam 2. 22 pitthe.

^{5.} Sam 1. 387, 388, 389, 392, 393, 394, 396; Sam 3. 199; Abhi 4. 30 pitthe.

^{6.} Dī 2. 246; Ma 1. 60, 84; Ma 3. 293; Sam 3. 369; Khu 9. 39, 330 pitthesu.

aggamaggapaññāya sammā yathābhūtaṁ yaṁ yathā jānitabbaṁ, taṁ tathā jānitvā vimutto. **Imasmiṁ loke**ti imasmiṁ sattaloke. **Idhattabhāve**ti imasmiṁ attabhāve, parattabhāveti parasmiṁ attabhāve, idhaloke, paraloke cāti attho.

- 117. **Antaravirahitā**ti vibhāgavirahitā. Tenāha "attano kulena sadisā"ti. Anuyantīti anuyantā, anuyantā eva **ānuyantā**, anuvattakā. Tenāha "vasavattino"ti.
- 118. **Niviṭṭhā**ti saddheyyavatthusmim anupavisanavasena niviṭṭhā. Tato eva tasmim adhikam nivisanato **abhiniviṭṭhā. Acalaṭṭhitā**ti acalabhāve ṭhitā.

Yanti yam kathetabbadhammam anupadhāretvā, tadatthanca appaccakkham katvā kathanam, etam aṭṭhānam akāraṇam tassa bodhimūleyeva samucchinnattā. Vicchindajananatthanti ratanattayasaddhāya vicchindassa uppādanattham, añnathattāyāti attho. Soti māro. Musāvādam kātum nāsakkhīti āgataphalassa ariyasāvakassa purato musā vattum na visahi, tasmā āma mārosmīti paṭijāni. Silāpathaviyanti ratanamayasilāpathaviyam. Sinerum kira parivāretvā ṭhito bhūmippadeso sattaratanamayo, "suvaṇṇamayo"ti keci, sā vitthārato, ubbedhato anekayojanasahassaparimāṇā ativiya niccalā. Kim tvam etthāti kimkāraṇā tvam ettha. "Ṭhito"ti accharam pahari. Ṭhātum asakkontoti ariyasāvakassa purato ṭhātum asakkonto. Ayañhi ariyadhammādhigamassa ānubhāvo, yam māropi nāma mahānubhāvo ujukam paṭipparitum¹ na sakkoti.

Maggo eva mūlam maggamūlam, tassa. Sañjātattā uppannattā. Tena maggamūlena patiṭṭhitasantāne laddhapatiṭṭhā. Bhagavato desanādhammam nissāya ariyāya jātiyā jāto "bhagavantam nissāya ariyabhūmiyam jāto"ti vutto. "Ure vasitvā"ti idam dhammaghosassa urato samuṭṭhānatāya vuttam. Ure vāyāmajanitābhijātitāya vā oraso. Mukhato jātena jāto "mukhato jāto"ti vutto. Kāraṇakāraṇepi hi kāraṇe viya vohāro hoti "tiṇehi bhattam siddhan"ti. Keci pana "vimokkhamukhassa

vasena jātattā mukhato jāto"ti vadanti, tatthāpi vuttanayeneva attho veditabbo. Purimenatthena vonijo, sedajo, mukhajoti tīsu sambandhesu mukhajena sambandhena bhagavato puttabhāvo vibhāvito. Atthadvayenāpi dhammajabhāvoyeva dīpito. Ariyadhammappattito laddhaviseso hutvā pavatto taduttarakāliko khandhasantāno "ariyadhammato jāto"ti veditabbo, ariyadhammam vā maggaphalam nissāya, upanissāya ca jāto sabbopi dhammappabandho "ariyadhammato jāto"ti gahetabbo. Tesam pana ariyadhammānam apariyositakiccatāya ariyabhāvena abhinibbattimattam upādāya "ariyadhammato jātattā" ti vuttam. Pariyositakiccatāya tathā nibbattipāripūrim upādāya "nimmitattā" ti vuttam, yato "dhammajo dhammanimmito''ti vuttam. "Navalokuttaradhammadayam adiyatīti dhammadāyādo"tipi pātho. Assāti "bhagavatomhi putto"ti-ādinā vuttassa vākvassa. **Attham dassento**ti bhāvattham pakāsento. Tathāgathassa anaññasādhāranasīlādidhammakkhandhassa samūhanivesavasena dhammakāyatāya na kiñci vattabbam atthi, satthutthāniyassa pana dhammakāyatam dassetum "kasmā Tathāgato dhammakāyoti vutto"ti sayameva puccham samutthapetva "tathagato hi"ti-adina tamattham vissajjeti. **Hadayena cintetvā**ti "imam dhammam imassa desessāmī"'ti tassa upagatassa veneyyajanassa bodhanattham cittena cintetvā. Vācāya abhinīharīti saddhammadesanāvācāya karavīkarutamañjunā brahmassarena veneyyasantānābhimukham tadajjhāsayānurūpam hitamattham nīhari upanesi. Tenāti tena kāranena evamsaddhammādhimuttibhāvena. Assāti tathāgatassa. **Dhammamayattā**ti dhammabhūtattā. Idhādhippetadhammo setthatthena brahmabhūtoti āha "dhammakāyattā eva brahmakāyo"ti. Sabbaso adhammam pajahitvā anavasesato dhammo eva bhūtoti dhammabhūto. Tathārūpo ca yasmā sabhāvato dhammo evāti vattabbatam arahatīti āha "dhammasabhāvo"ti.

119. Seṭṭhacchedakavādanti "brāhmaṇova seṭṭho vaṇṇo"ti¹ evaṁ vuttaseṭṭhabhāvacchedakavādaṁ. Aparenapi nayenāti yathāvuttaseṭṭhacchedakavādato aparenapi porāṇakalokuppattidassananayena. Seṭṭhaccheda -pa- dassetunti sopi hi "brāhmaṇova seṭṭho vaṇṇo, hīnā

aññe vaṇṇā"ti, "brāhmaṇā brahmuno puttā orasā mukhato jātā brahmajā"ti¹ ca evaṁ pavattāya micchādiṭṭhiyā viniveṭhano jātibrāhmaṇānaṁ seṭṭhabhāvassa chedanato seṭṭhachedanavādo nāma hotīti dassetunti attho.

Itthabhāvanti imam pakāratam manussabhāvam. Sāmaññajotanā hi visese avatiṭṭhati, pakaraṇavasena vā ayamattho avacchinno² daṭṭhabbo. Maneneva nibbattāti bāhirapaccayena vinā kevalam upacārajhānamanasāva nibbattā. Yāya upacārajjhānacetanāya te tattha nibbattā, nīvaraṇavikkhambhanādinā uļāro tassā pavattiviseso, tasmā jhānaphalakappo tassā phalavisesoti āha "brahmaloke viyā"ti-ādi. "Sayampabhā"ti padānam tattha sūriyālokādīhi vinā andhakāram vidhamantā sayameva pabhāsantīti sayampabhā, antalikkha ākāse carantīti antalikkhacarā, tadaññakāmāvacarasattānam viya sarīrassa vicaraṇaṭṭhānassa asubhatābhāvato subham, subheva tiṭṭhantīti subhaṭṭhāyinoti attho veditabbo.

Rasapathavipātubhāvavaņņanā

120. Sabbam cakkavāļanti anavasesam koţisatasahassam cakkavāļam. Samatanīti sanchādentī vipphari, sā pana tasmim udake patiṭṭhitā ahosīti āha "patiṭṭhahī"ti. Vaṇṇena sampannāti sampannavaṇṇā. Makkhikandakarahitanti makkhikāhi ca tāsam andakehi ca rahitam.

Atītānantarepi kappe loloyeva. Kasmā? Evaṁ ciraparicitalolatāvasena sabbapaṭhamaṁ tathā akāsīti dasseti. Kimevidanti "vaṇṇatom, gandhato ca tāva ñātaṁ, rasato pana kimevidaṁ bhavissatī"ti saṁsayajāto vadati. Tiṭṭhatīti³ aṭṭhāsi.

Candimasūriyādipātubhāvavaņņanā

121. **Āluppakārakan**ti ettha ālopapariyāyo **āluppa**saddoti āha "**ālopaṁ** katvā"ti.

^{1.} Dī 3. 67 pitthe.

Paccakkhabhūtānampi candimasūriyānam pavattiyam lokiyānam sammoho hoti, tam vidhamitum "ko pana tesan"ti-ādinā aṭṭha pañhāvissajjanāni gahitāni. Tattha tesanti candimasūriyānam. Kasminti kasmim ṭhāne. "Ko uparī"ti eteneva ko heṭṭhāti ayamattho vuttoyeva. Tathā "ko sīgham gacchatī"ti iminā ko saṇikam gacchatīti ayampi attho vuttoyeva. Vīthiyoti gamanavīthiyo. Ekatoti ekasmim khaṇe pātubhavanti. Sūriyamaṇḍale pana atthaṅgate candamaṇḍalam paññāyittha. Chandam ñatvāvāti rucim ñatvā viya.

Ubhayanti anto, bahi ca.

Ujukanti āyāmato, vitthārato, ubbedhato ca. **Parimaṇḍalato**ti parikkhepato.

Ujukam sanikam gacchati amāvāsiyam sūriyena saddhim gacchanto divase divase thokam thokam ohīyanto punnamāsiyam upaddhamaggameva ohīyanato. **Tiriyam sīgham** gacchati ekasmimpi māse kadāci dakkhinato, kadāci uttarato dassanato. "Dvīsu passesū"ti idam yebhuyyavasena vuttam. Candassa purato, pacchato, samañca tārakā gacchantiyeva. Attano thānanti attano gamanatthānam. Na vijahanti attano vīthiyāva gacchanato. Sūriyassa ujukam gamanassa sīghatā candassa gamanam upādāya veditabbā. Tiriyam gamanam dakkhinadisato uttaradisaya, uttaradisato ca dakkhinadisaya gamanam dandham chahi chahi māsehi ijjhanato. Soti sūriyo. Kāļapakkhauposathatoti kālapakkhe uposathe candena saheva gantvā tato param. Pātipadadivaseti sukkapakkhapātipadadivase. Ohāya gacchati attano sīghagāmitāya, tassa ca dandhagāmitāya. Lekhā viya paññāyati pacchimadisāyam. Yāva uposathadivasāti yāva sukkapakkhauposathadivasā. "Cando anukkamena vaddhitvā" ti idam uparibhāgato patitasūriyālokatāya hetthato pavattāya sūriyassa dūrabhāvena divase divase anukkamena parihayamanaya attano chayaya vasena anukkamena candamandalappadesassa vaddhamānassa viya dissamānatāya vuttam, tasmā anukkamena vaddhitvā viya. Uposathadivase punnamāyam paripunno hoti, paripunnamandalo hutvā dissatīti attho. Dhāvitvā ganhāti candassa dandhagatitāya, attano ca sīghagatitāya.

Anukkamena hāyitvāti ettha "anukkamena vaḍḍhitvā"ti ettha vuttanayena attho veditabbo. Tattha pana chāyāya hāyamānatāya maṇḍalaṁ vaḍḍhamānaṁ viya dissati, idha chāyāya vaḍḍhamānatāya maṇḍalaṁ hāyamānaṁ viya dissati.

Yāya vīthiyā sūriye gacchante vassavalāhakā devaputtā sūriyābhitāpasantattā attano vimānato na nikkhamanti, kīlāpasutā hutvā na vicaranti, tadā kira sūriyassa vimānam pakatimaggato adho otaritvā vicarati, tassa oruyha caraneneva candavimānampi adho oruyha carati taggatikattā, tasmā sā vīthi udakābhāvena ajānurūpatāya "ajavīthī"ti samaññam gatā. Yāya pana vīthiyā sūriye gacchante vassavalāhakā devaputtā sūriyābhitāpābhāvato abhinham attano vimānato bahi nikkhamitvā kīlāpasutā ito cito ca vicaranti, tadā kira sūriyavimānam pakatimaggato uddham āruhitvā vicarati, tassa uddham āruyha caraneneva candavimānampi uddham āruyha carati taggatikattā, taggatikatā ca samānagatinā vātamandalena vimānassa phellitabbattā, tasmā sā vīthi udakabahubhāvena nāgānurūpatāya "nāgavīthī"ti samañnam gatā. Yadā sūriyo uddhamanāruhanto, adho ca anotaranto pakatimaggeneva gacchati, tadā vassavalāhakā yathākālam, yathāruci ca vimānato nikkhamitvā sukhena vicaranti, tena kālena kālam vassanato loke utusamatā hoti, tāya utusamatāya hetubhūtāya sā candimasūriyānam gati gavānurūpatāya "govīthī"ti samaññam gatā. Tena vuttam "ajavīthī"ti-ādi.

Evam "kati nesam vīthiyo"ti pañham vissajjetvā "katham vicarantī"ti pañham vissajjetum "candimasūriyā"ti-ādi vuttam. Tattha sinerutobahinikkhamantīti sinerusamīpena tam padakkhiṇam katvā gacchantā tato gamanavīthito bahi attano tiriyagamanena cakkavāļābhimukhā nikkhamanti. Anto vicarantīti evam cha māse khaņe khaņe sineruto apasakkanavasena tato nikkhamitvā cakkavāļasamīpam pattā, tatopi cha māse khaņe khaņe apasakkanavasena nikkhamitvā sinerusamīpam pāpuṇantā anto vicaranti. Idāni tamevattham sankhepena vuttam vivaritum "tehī"ti-ādi vuttam. Sinerussa, cakkavāļassa ca yam ṭhānam vemajjham, tassa, sinerussa ca yam thānam vemajjham, tena gacchantā

"sinerusamīpena vicarantī"ti vuttā, na sinerussa aggāļinda-allīnā. Cakkavāļasamīpena caritvāti etthāpi eseva nayo. Majjhenāti sinerussa, cakkavāļassa ca ujukam vemajjhena maggena. Citramāse majjhenāti etthāpi eseva nayo.

Ekappahārenāti ekavelāya, ekeneva vā attano ekappahārena. **Majjhanhiko**ti ṭhitamajjhanhiko kālo **hoti.** Tadā hi sūriyamaṇḍalaṁ uggacchantaṁ hutvāpi imasmiṁ dīpe ṭhitassa upaḍḍhameva dissati, uttarakurūsu ṭhitassa ogacchantaṁ hutvā. Evañhi ekavelāyameva tīsu dīpesu ālokakaranaṁ.

Yesu kattikādinakkhattasamaññā, tānipi tārakarūpāniyevāti vuttam "sesatārakarūpāni cā"ti, nakkhattasaññitatārakarūpato avasiṭṭhatārakarūpānīti attho. Ubhayānipi tāni devatānam vasanakavimānānīti veditabbāni. Rā-saddo tiyati chijjati etthāti ratti, sattānam saddassa vūpasamanakāloti attho. Dibbanti sattā kīļanti jotanti etthāti divā. Sattānam āyum minanto viya siyati antam karotīti māso. Tam tam kiriyam arati vattetīti utu. Tam tam sattam, dhammappavattinca sangamma vadanto viya sarati vattetīti samvaccharo.

122. Vivajjanam vivajjo, so eva vevajjam, vaņņassa vevajjam vaņņavevajjam, vaņņasampattiyā vigamo, tassa pana atthitā "vaņņavevajjatā"ti¹ vuttā. Tenāha "vivajjabhāvo"ti². Tesanti vaņņavantānam sattānam. Atimānappaccayāti dubbaņņavambhanavasena atikkamma attano vaṇṇam paṭicca mānapaccayā, mānasampaggaṇhananimittanti attho. Sātisayo raso etissā atthīti rasāti laddhamānāya, anubhāsimsūti anurodhavasena bhāsimsu. Lokuppattivamsakathanti lokuppattivamsajam paveṇīkatham, ādikāle uppannam paveṇī-āgatakathanti attho. "Anupatantī"tipi pāṭho, so evattho.

Bhūmipappaṭakapātubhāvādivannanā

123. Ediso hutvāti ahicchattakasadiso hutvā.

^{1.} Vannavevannatā (Pāliyam, Atthakathāyanca) 2. Vivannabhāvo (Atthakathāyam)

- 124. **Padālatā**ti **"padā"**ti evamnāmā ekālatā, sā pana yasmā sampannavaṇṇagandharasā, tasmā **"bhaddalatā"**ti vuttā. **Nāļikā**ti nāļivalli. **Ahāyī**ti nassi.
- 125. Akaṭṭhapākoti akaṭṭheyeva ṭhāne uppajjitvā paccanako, nīvāro viya sañjāto hutvā nippajjanakoti attho. Kaņo "kuṇḍakan"ti ca vuccati. Thusanti taṇḍulaṁ pariyonandhitvā ṭhitattaco, tadabhāvato "akaņo, athuso"ti sāli vutto. "Paṭivirūṭhan"ti idaṁ pakkabhāvassa kāraṇavacanaṁ. Paṭivirūṭhato hi taṁ pakkanti. Yasmiṁ ṭhāne sāyaṁ pakko sāli gahito, tadeva ṭhānaṁ dutiyadivase pāto pakkena sālinā paripuṇṇaṁ hutvā tiṭṭhatīti āha "sāyaṁ gahitaṭṭhānaṁ pāto pakkaṁ hotī"ti-ādi. Alāyitanti lāyitaṭṭhānaṃpi tesaṁ kammappaccayā alāyitameva hutvā anūnaṁ paripuṇṇameva paññāyati, na kevalaṁ paññāyanameva, atha kho tathābhūtameva hutvā tiṭṭhati.

Itthipurisalingādipātubhāvavannanā

126. "Manussakāle" ti idam pubbe manussabhūtānamyeva tattha idāni nikantivasena uppatti hotīti katvā vuttam, devatānampi purimajātivam itthibhāve thitānam tattha virāgādipurisattappaccaye asati tadā itthilingameva pātubhavati. Purisattapaccayeti "attanopi anissaratā, sabbakālam parāvattavuttitā, rajassalatā vañcatā, gabbhadhāranam, pathamāya pakatiyā nihīnapakatitā, sūravīratābhāvo, 'appakā janā'ti hīletabbatā'ti evamādi-ādīnavapaccavekkhaṇapubbakampi itthibhāve¹ 'alam itthibhavena, na hi itthibhave thatva cakkavattisirim, na sakkamārabrahmasiriyo paccanubhavitum, na paccekabodhim, na sammāsambodhim adhigantum sakkā'ti evam itthibhāvavirajjanam, 'yathāvutta-ādīnavavirahato uttamapakatibhāvato sampadamidam purisattam nāma settham uttamam, ettha thatvā sakkā etā sampattiyo sampāpunitun'ti evam purisattabhave sambhavanapubbakam patthanathapanam, 'tattha ninnaponapabbhāracittatā'ti" evamādike purisabhāvassa paccayabhūte dhamme. Pūretvā vaddhetvā. Paccakkham bhūtam, sadisanca ditthadhammikam, samparāyikanca suvipulam anattham acintetvā purisassa kāmesu micchācaranam kevalam itthiyam

āsāpatti phalenevāti āsā āpatti itthibhāvāvahāpi hotiyeva tanninnapoṇapabbhārabhāvena tannikantiyā nimittabhāvāpattitoti vuttaṁ "puriso itthattabhāvaṁ labhanto kāmesu micchācāraṁ nissāya labhatī"ti. Tadāti yathāvutte paṭhamakappikakāle. Pakatiyāti sabhāvena. Mātugāmassāti purimattabhāve mātugāmabhūtassa. Purisassāti etthāpi "pakatiyā"ti padaṁ ānetvā sambandhitabbaṁ. Upanijjhāyatanti upecca nijjhāyantānaṁ. Yathā aññamaññasmiṁ sārāgo uppajjati, evaṁ sāpekkhabhāvena olokentānaṁ. Rāgaparilāhoti rāgajo parilāho.

Nibbuyhamānāyāti parinatā hutvā niyyamānāya.

Methunadhammasamācāravannanā

127. Gomayapiṇḍamattampi nālatthāti sammadeva vivāhakammam nālatthāti adhippāyena vadanti. Pātabyatanti tasmim asaddhamme kilesakāmena pivitabbatam kiñci pivitabbavatthum pivantā viya ativiya tosetvā paribhuñjitabbatam āpajjimsu, pātabyatanti vā paribhuñjanakatam āpajjimsu upagacchimsu. Paribhogattho hi ayam pā-saddo, kattusādhano ca tabya-saddo, yathāruci paribhuñjimsūti attho.

Sannidhikārakanti sannidhikāram, ka-kāro padavaḍḍhanamattanti āha "sannidhim katvā"ti. Apadānanti avakhaṇḍanam. Ekekasmim ṭhāneti yattha yattha vahitam, tasmim tasmim ekekasmim ṭhāne. Gumbagumbāti puñjapuñjā.

Sālivibhāgavannanā

128. **Sīmaṁ ṭhapeyyāmā**ti "ayaṁ bhūmibhāgo asukassa, ayaṁ bhūmibhāgo asukassā"ti evaṁ paricchedaṁ kareyyāma. **Taṁ aggaṁ katvā**ti taṁ ādiṁ katvā.

Mahāsammatarājavannanā

130. **Pakāsetabban**ti dosavasena pakāsetabbam. **Khipitabban**ti khepam kātabbam. Tenāha "hāretabban"ti, sattanikāyato nīharitabbam.

Nesanti niddhāraņe sāmivacanam.

131. Akkharanti niruttim. Sā hi mahājanena sammatoti niddhāretvā vattabbato nirutti, tasmimyeva nirūļhabhāvato, aññattha asañcaraṇato akkharanti ca vuccati, tathā saṅkhātabbato saṅkhā, samaññāyatīti samaññā, paññāpanato paññatti, voharaṇato vohāro. Uppannoti pavatto. Na kevalaṁ akkharamevāti na kevalaṁ samaññākaraṇameva. Khettasāminoti taṁ taṁ bhūmibhāgaṁ pariggahetvā ṭhitasattā. Tīhi saṅkhehīti tividhakiriyābhisaṅkhatehi tīhi saṅkhehi khattiyādīhi tīhi vaṇṇehi pariggahitehi. "Khattiyānuyantabrāhmaṇagahapatikanegamajānapadehi tīhi gahapatīhi pariggahitehī"ti ca vadanti. Agganti ñātenāti aggaṁ kulanti ñātena. Khattiyakulañhi loke sabbaseṭṭhaṁ. Yathāha "khattiyo seṭṭho janetasmiṁ, ye gottapaṭisārino"ti¹, abhedopacārena pana akkharassa khattiyasaddassapi seṭṭhatāti pāḷiyaṁ "aggaññena akkharenā"ti vuttaṁ. Idāni abhedopacārena vinā eva atthaṁ dassetuṁ "agge vā"ti-ādi vuttaṁ.

Brāhmaṇamaṇḍalādivaṇṇanā

- 132. Yena anārambhabhāvena bāhitākusalā "brāhmaṇā"ti vuttā, tameva tāva dassetum pāļiyam "vītaṅgārā"ti-ādi vuttanti tadattham dassento "pacitvā"ti-ādimāha. Tamenanti vacanavipallāsena niddesoti āha "te ete"ti. Abhisaṅkharontāti cittamantabhāvena aññamaññam abhivisiṭṭhe karontā, brāhmaṇākappabhāvena saṅkharontā ca. Vācentāti paresam kathentā, ye tathā ganthe kātum na jānanti. Acchantīti āsanti, upavisantīti attho. Tenāha "vasantī"ti. Acchentīti kālam khepenti. Hīnasammatam jātam "vedadharā sottiyā subrāhmaṇāti evam seṭṭhasammatam jātam.
- 133. **Methunadhammam samādiyitvā**ti jāyāpatikabhāvena dvayam dvayam nivāsam ajjhupagantvā. **Vāņijakammādike**ti **ādi-**saddena kasikammādim sanganhāti.

134. Luddācārakammakhuddācārakammunāti

paraviheṭhanādiluddācārakammunā, naļakāradārukammādikhuddācārakammunā ca. **Suddan**ti ettha **su**-iti sīghatthe nipāto. **Dā**-iti garahaṇattheti āha "**suddaṁ suddaṁ lahuṁ lahuṁ kucchitaṁ gacchantī**"ti.

135. Ahūti kālavipallāsavasena vuttanti dassento "hoti kho"ti āha. Imināti "imehi kho vāseṭṭha catūhi maṇḍalehi samaṇamaṇḍalassa abhinibbatti hotī"ti iminā vacanena. Imaṁ dassetīti samaṇamaṇḍalaṁ nāma -pa- suddhiṁ pāpuṇantīti imaṁ atthajātaṁ dasseti. Yadi imehi -pa- abhinibbatti hoti, evaṁ sante imāneva cattāri maṇḍalāni padhānāni, samaṇamaṇḍalaṁ appadhānaṁ tato abhinibbattattāti? Nayidamevanti dassetuṁ "imānī"ti-ādi vuttaṁ. Samaṇamaṇḍalaṁ anuvattanti guṇehi visiṭṭhabhāvato. Guṇo hi viññūnaṁ anuvattanahetu, na kolaputtiyaṁ, vaṇṇapokkharatā, vākkaraṇamattaṁ vā. Tenāha "dhammeneva anuvattanti, no adhammenā"ti. So dhammo ca lokuttarova adhippeto, yena saṁsārato visujjhati, tasmā samaṇamaṇḍalanti ca sāsanikameva samaṇagaṇaṁ vadatīti daṭṭhabbaṁ. Tenāha "samaṇamaṇḍalañhī"ti-ādi.

Duccaritādikathāvaņņanā

- 136. Micchādiṭṭhivasena samādinnakammaṁ nāma "ko anubandhitabbo. Ajotaggisoṭṭhimiso"ti-ādinā yaññavidhānādivasena pavattitaṁ hiṁsādipāpakammaṁ. Micchādiṭṭhikammassāti "esa saddhādhigato devayāno, yena yanti puttino visokā"ti-ādinā pavattitassa micchādiṭṭhisahagatakammassa. Samādānaṁ tassa tathā pavattanaṁ, tassā vā diṭṭhiyā upagamanaṁ.
- 137. **Dvayakārī**ti kusalākusaladvayassa kattā. Tayidam dvayam yasmā ekajjham nappavattati, tasmā āha "kālenā"ti-ādi. **Ekakkhaņe ubhayavipākadānaṭṭhānam nāma natthi** ekasmim khaņe cittadvayūpasañhitāya sattasantatiyā abhāvato. Yathā pana dvayakārino sukhadukkhapaṭisamveditā sambhavati, tam dassetum "yena panā"ti-ādi vuttam. **Evambhūto**ti vikalāvayavo. Dvepi hi kusalākusalakammāni katūpacitāni sabhāvato balavantāneva honti, tasmā maraṇakāle

upatthahanti. Tesu akusalam balavataram hoti paccayalabhato. Nikantiādayo hi paccayavisesā akusalasseva sabhāgā, na kusalassa, tasmā katūpacitabhāvena samānabalesupi kusalākusalesu paccayalābhena vipaccitum laddhokāsatāya kusalato akusalam balavataram hotīti, tathābhūtampi tam yathā vipākadāne laddhokāsassa kusalassāpi avasaro hoti, tathā laddhapaccayam patisandhidānābhimukham kusalam patibāhitvā patisandhim dentam tiracchānayoniyam nibbattāpetīti (apare)¹. "Akusalam balavataram hotī"ti ettha "akusalam ce balavataram hoti, tam kusalam patibāhitvā"ti vuttanayeneva attham vatvā tesu kusalam ce balavataram hoti, tañca akusalam patibāhitvā manussayoniyam nibbattāpeti, akusalam pavattivedanīyam hoti, atha nam tam kānampi karoti khujjampi pīthasappimpi kucchirogādīhi vā upaddutam. Evam so pavattiyam nānappakāram dukkham paccanubhavatīti idam sandhāya vuttam "sukhadukkhappatisamvedī hotī"ti. Tatrāyam vinicchayo—vuttakāle vā $k\bar{a}rena^2$ samānabalesu kusalākusalakammesu upaṭṭhahantesu maraṇassa āsannavelāyam yadi balavatarāni kusalajavanāni javanti, yathā-upatthitam akusalam patibahitva kusalam vuttanayena patisandhim deti. Atha balavatarāni akusalajavanāni javanti, yathā-upatthitam kusalam patibāhitvā akusalam vuttanayeneva patisandhim deti. Tam kissa hetu? Ubhinnam kammānam samānabalavabhāvato, paccayantarasāpekkhato cāti, sabbam vīmamsitvā gahetabbam.

Bodhipakkhiyabhāvanāvaṇṇanā

138. **Bodhi** vuccati maggasammādiṭṭhi cattāri ariyasaccāni bujjhatīti katvā, sabhāvato, taṁsabhāvato ca tassā pakkhe bhavāti bodhipakkhiyā, sativīriyādayo dhammā, tesaṁ **bodhipakkhiyānaṁ**. **Paṭipāṭiyā**ti bodhipakkhiyadesanāpaṭipāṭiyā. **Bhāvanaṁ anugantvāti anukkamena** pavattaṁ bhāvanaṁ patvā. Tenāha "paṭipajjitvā"ti. Sa-upādisesāya nibbānadhātuyā vasena khīṇāsavassa seṭṭhabhāvaṁ lokassa pākaṭaṁ katvā dassetuṁ sakkā, na itarāya sabbaso apaññattibhāvūpagamane³

^{1.} Adhiko viya dissati.

^{2.} Vuttakāle tenevākārena (?)

^{3. ...}gamena (Ka)

tassa adassanatoti vuttam "parinibbātīti kilesaparinibbānena parinibbāyatī"ti. Vinivattetvāti tato catuvannato nīharitvā.

140. **Tamevatthan**ti "khīṇāsavova devamanussesu seṭṭho"ti vuttamevatthaṁ.

Seṭṭhacchedakavādamevāti jātibrāhmaṇānam seṭṭhabhāvasamucchedakameva katham. Dassetvā bhāsitvā. Suttantam vinivattetvāti pubbe lokiyadhammasandassanavasena pavattam aggaññasuttam "sattannam bodhipakkhiyānam dhammānam bhāvanamanvāyā"ti-ādinā tato vinivattetvā nīharitvā tena asamsaṭṭham katvā. Āvajjantāti samannāharantā. Anumajjantāti pubbenāparam atthato vicarantāti.

Sumangalavilāsiniyā dīghanikāyaṭṭhakathāya Aggaññasuttavaṇṇanāya līnatthappakāsanā.

5. Sampasādanīyasutta

Sāriputtasīhanādavaņņanā

141. Pāvārenti sañchādenti sarīram etenāti pāvāro, vattham. Pāvaraṇam vā pāvāro, "vattham dussan"ti pariyāyasaddā eteti dussameva pāvāro, so etassa bahuvidho anekakoṭippabhedo bhaṇḍabhūto atthīti dussapāvāriko. So kira pubbe daharakāle dussapāvārabhaṇḍameva bahum pariggahetvā vāṇijjam akāsi, tena nam seṭṭhiṭṭhāne ṭhitampi "pāvāriko"tveva sañjānanti. Bhagavatīti iti-saddo ādi-attho, pakārattho vā, tena bhagavantam upasaṅkamitvā therena vuttavacanam sabbam saṅgaṇhāti. "Kasmā evam avocā"ti tathāvacane kāraṇam pucchitvā "somanassapavedanatthan"ti kasmā payojanam vissajjitam, tayidam ambam puṭṭhassa labujam byākaraṇasadisanti? Nayidamevam cintetabbam. Yā hissa therassa tadā bhagavati somanassuppatti, sā niddhāritarūpā kāraṇabhāvena coditā, tasmā evam avocāti, sā eva ca yasmā niddhāritarūpā pavedanavasena bhagavato sammukhā tathāvacanam payojeti, tasmā "attano uppannasomanassapavedanatthan"ti payojanabhāvena vissajjitam.

Tatrāti tasmim somanassapavedane. Vihāre nivāsaparivattanavasena **sunivatthanivāsano. Ābhujitvā**ti ābandhitvā.

Samāpattito vuṭṭhāya "aho santo vatāyaṁ ariyavihāro"ti samāpattisukhapaccavekkhaṇamukhena attano guṇe anussarituṁ āraddho, ārabhitvā ca nesaṁ taṁ taṁ sāmaññavisesavibhāgavasena anussari. Tathā hi "samādhī"ti sāmaññato gahitasseva "paṭhamaṁ jhānan"ti-ādinā visesavibhāgo, "paññā"ti sāmaññato ca gahitasseva "vipassanāñāṇan"ti-ādinā visesavibhāgo uddhaṭo. "Lokiyābhiññāsu dibbacakkhuñāṇasseva gahaṇaṁ therassa itarehi sātisayanti dassetun"ti vadanti, pubbenivāsañāṇampi pana "kappasatasahassādhikassā"ti-ādinā kiccavasena dassitameva, lakkhaṇahāravasena vā itaresampettha gahitatā veditabbā.

Atthappabhedassa sallakkhaṇavibhāvanavavatthānakaraṇasamatthaṁ atthe pabhedagataṁ ñāṇaṁ atthapaṭisambhidā. Tathā dhammappabhedassa sallakkhaṇavibhāvanavavatthānakaraṇasamatthaṁ dhamme pabhedagataṁ ñāṇaṁ dhammapaṭisambhidā. Niruttipabhedassa sallakkhaṇavibhāvanavavatthānakaraṇasamatthaṁ niruttiyaṁ pabhedagataṁ ñāṇaṁ niruttipaṭisambhidā. Paṭibhānappabhedassa sallakkhaṇavibhāvanavavatthānakaraṇasamatthaṁ paṭibhāne pabhedagataṁ ñāṇaṁ paṭibhānapaṭisambhidā. Ayamettha saṅkhepo, vitthāro pana Visuddhimagge¹ taṁsaṁvaṇṇanāsu² vuttanayeneva veditabbo. Sāvakavisaye paramukkaṁsagataṁ ñāṇaṁ sāvakapāramiñāṇaṁ sabbaññutaññāṇaṁ viya sabbañeyyadhammesu. Tassāpi hi visuṁ parikammaṁ nāma natthi, sāvakapāramiyā pana sammadeva paripūritattā aggamaggasamadhigamenevassa samadhigamo hoti. Sabbaññutaññāṇasseva sammāsambuddhānaṁ yāva nisinnapallaṅkā anussaratoti yojanā.

Bhagavato sīlam nissāya guņe anussaritumāraddhoti yojanā. Yasmā guņānam bahubhāvato nesam ekajjham āpāthāgamanam natthi, sati ca tasmim anirūpitarūpeneva anussaraņena bhavitabbam, tasmā thero savisaye thatvā te anupadam sarūpato anussari, anussaranto ca sabbapaṭhamam sīlam anussari, tam dassento "bhagavato sīlam nissāyā"ti āha, sīlam ārabbhāti attho. Sesapadesupi eseva nayo. Yasmā cettha thero ekekavasena bhagavato guņe anussaritvā tato param catukkapancakādivasena anussari, tasmā "cattāro iddhipāde"ti vatvā tato param bojjhangabhāvanāsāmannena indriyesu vattabbesu tāni aggahetvā "cattāro magge"ti-ādi vuttam. Catuyoniparicchedakanāṇam mahāsīhanādasutte³ āgatanayeneva veditabbam. Cattāro ariyavamsā Ariyavamsasutte⁴ āgatanayeneva veditabbā.

Padhāniyaṅgādayo saṅgīti⁵dasuttarasuttesu⁶ āgamissanti. **Cha** sāraṇīyadhammā parinibbānasutte⁷ āgatā eva. Sukhaṁ supanādayo⁸ ekādasa

^{1.} Visuddhi 2. 70 pitthe.

^{2.} Visuddhi-Ţī 2. 81 piṭṭhe.

^{3.} Ma 1. 105 pitthe.

^{4.} Am 1. 336 pitthe.

^{5.} Dī 3. 198 pitthādīsu.

^{6.} Dī 3. 232 piṭṭhādīsu.

^{7.} Dī 2. 68 piṭṭhe tasmim sutte aparihāniyabhāvena vuttā atthato samānāyeva.

^{8.} Am 3. 1, 542; Khu 9. 314 piṭṭhesu.

mettānisamsā. "Idam dukkham ariyasaccan"ti-ādinā¹ catūsu ariyasaccesu tiparivattavasena āgatā dvādasa dhammacakkākārā. Maggaphalesu pavattāni aṭṭha ñāṇāni, cha asādhāraṇañāṇāni cāti cuddasa buddhañāṇāni.

Pañcadasavimuttiparipācaniyā dhammā meghiyasuttavaṇṇanāyam² gahetabbā, soļasavidhā ānāpānassati Ānāpānassatisutte³. Aṭṭhārasa buddhadhammā⁴ evam veditabbā—

Atītamse buddhassa bhagavato appaṭihatam ñāṇam, anāgatamse, paccuppannamse buddhassa bhagavato appaṭihatam ñāṇam. Imehi tīhi dhammehi samannāgatassa buddhassa bhagavato sabbam kāyakammam ñāṇapubbangamam ñāṇānuparivatti, sabbam vacīkammam, sabbam manokammam ñāṇapubbangamam ñāṇānuparivatti. Imehi chahi dhammehi samannāgatassa buddhassa bhagavato natthi chandassa hāni, natthi dhammadesanāya hāni, natthi vīriyassa hāni, natthi samādhissa hāni, natthi paññāya hāni, natthi vimuttiyā hāni. Imehi dvādasahi dhammehi samannāgatassa buddhassa bhagavato natthi davā, natthi ravā, natthi apphuṭam, natthi vegāyitattam, natthi abyāvaṭamano, natthi appaṭisankhānupekkhāti.

Tattha "natthi davāti khiḍḍādhippāyena kiriyā natthi. Natthi ravāti sahasā kiriyā natthī"ti vadanti. Sahasā pana kiriyā davā, "aññaṁ karissāmī"ti aññassa karaṇaṁ ravā. Natthi apphuṭanti ñāṇena aphusitaṁ natthi. Natthi vegāyitattanti turitakiriyā natthi. Natthi abyāvaṭamanoti niratthakacittasamudācāro natthi. Natthi appaṭisaṅkhānupekkhāti aññāṇupekkhā natthi. Keci pana "natthi dhammadesanāya hānī"ti apaṭhitvā "natthi chandassa hāni, natthi vīriyassa hāni, natthi satiyā hānī"ti paṭhanti.

Jarāmaraṇādīsu ekādasasu paṭiccasamuppādaṅgesu paccekaṁ catusaccayojanāvasena pavattāni catucattālīsa ñāṇāniyeva⁶ sukhavisesānaṁ adhiṭṭhānabhāvato ñāṇavatthūni. Vuttañhetaṁ—

^{1.} Sam 3. 369; Vi 3. 15; Khu 9. 330 pitthesu.

^{2.} Udāna-Ttha 199 pitthe.

^{3.} Ma 3. 125 pitthe.

^{4.} Khu 7. 139, 278; Khu 8. 175; Khu 9. 376; Khu 10. 16; Dī-Ṭṭha 3. 176; Mūlaṭī 2. 2 piṭṭhesupi passitabbam.

^{5.} Sattiyā (Mūlatī 2. 2 pitthe.)

^{6.} Sam 1. 288 pitthe vittharo.

"Yato kho bhikkhave ariyasāvako evam jarāmaraṇam pajānāti, evam jarāmaraṇasamudayam pajānāti, evam jarāmaraṇanirodham pajānāti, evam jarāmaraṇanirodhagāminim paṭipadam pajānātī"ti-ādi¹.

Jarāmaraṇasamudayoti cettha jāti adhippetā. Sesapadesu bhavādayo veditabbā.

Kusalacittuppādesu phassādayo paropannāsa kusaladhammā.

"Jātipaccayā jarāmaranan"ti ñānam, "asati jātiyā natthi jarāmaranan"ti ñānam, atītampi addhānam "jātipaccayā jarāmaranan"ti ñānam, "asahi jātiyā natthi jarāmaranan"ti ñānam, anāgatampi addhānam "jātipaccayā jarāmaranan"ti ñānam, "asati jātivā natthi jarāmaranan"ti ñānam. "Yampidam dhammatthitiñānam, tampi khayadhammam vayadhammam virāgadhammam nirodhadhamman"ti ñānanti evam jarāmaranādīsu ekādasasu paticcasamuppādangesu paccekam satta satta katvā sattasattati ñānavatthūni² veditabbāni. Tattha yampīti chabbidhampi paccavekkhanañānam vipassanārammana bhāvena ekajjham gahetvā vuttam. Dhammatthitiñānanti chapi ñāṇāni sankhipitvā vuttam ñāṇam. "Khayadhamman"ti-ādinā pana pakārena pavattañānassa dassanam, vipassanādassanato vipassanā pativipassanādassanamattamevāti na tam "aṅgan"ti vadanti, pāliyaṁ³ pana sabbattha ñāṇavasena aṅgānaṁ uttattā "nirodhadhammanti ñānan"ti iti-saddena pakāsetvā vuttam vipassanāñānam sattamam ñananti ayamattho dissati. Na hi yampidam dhammatthitiñanam, tampi ñānanti sambandho hoti ñānaggahanena etasmim ñānabhāvadassanassa anadhippetattā, "khayadhammam -panirodhadhamman"ti etesam sambandhabhavappasango cati. Catuvisati -pavajirañānanti ettha keci tāva āhu "bhagavā devasikam dvādasakoţisatasahassakkhattum mahākarunāsamāpattim samāpajjati, dvādasakotisatasahassakkhattumeva ca arahattaphalasamāpattim samāpajjati, tāsam purecaram, sahavacaranca nānam patipakkhehi abhejjatam, mahattañca upādāya **mahāvajirañāṇaṁ** nāma. Vuttañhetaṁ bhagavatā—

^{1.} Sam 1. 289 pitthe.

^{2.} Sam 1. 298 pitthe dutiyañāṇavatthusuttam passitabbam.

^{3.} Sam 1. 290 pitthe.

'Tathāgatam bhikkhave Arahantam Sammāsambuddham dve vitakkā bahulam samudācaranti khemo ca vitakko, paviveko ca vitakko'ti¹.

Khemavitakko hi bhagavato mahākaruṇāsamāpattim pūretvā ṭhito, pavivekavitakko arahattaphalasamāpattim. Buddhānañhi bhavaṅgaparivāso lahuko, matthakappatto samāpattīsu vasībhāvo, tasmā samāpajjanavuṭṭhānāni katipayacittakkhaṇeheva ijjhanti. Pañca rūpāvacarasamāpattiyo catasso arūpasamāpattiyo appamaññāsamāpattiyā saddhim dasa, nirodhasamāpatti, arahattaphalasamāpatti cāti dvādasetā samāpattiyo bhagavā paccekam divase divase koṭisatasahassakkhattum purebhattam samāpajjati, tathā pacchābhattan"ti. "Evam samāpajjitabbasamāpattisañcāritañānam mahāvajirañānam nāmā"ti keci.

Apare pana "yaṁ taṁ bhagavatā abhisambodhidivase pacchimayāme paṭiccasamuppādamukhena paṭilomanayena jarāmaraṇato paṭṭhāya ñāṇaṁ otāretvā anupadadhammavipassanaṁ ārabhantena yathā nāma puriso suviduggaṁ mahāgahanaṁ mahāvanaṁ chindanto antarantarā nisānasilāyaṁ pharasuṁ sunisitaṁ karoti, evameva nisānasilāsadisiyo samāpattiyo antarantarā samāpajjitvā ñāṇassa² tikkhavisadasūrabhāvaṁ sampādetuṁ anulomapaṭilomato paccekaṁ paṭiccasamuppādaṅgavasena sammasanto divase divase lakkhakoṭilakkhakoṭilhalasamāpattiyo samāpajjati, taṁ sandhāya vuttaṁ 'catuvīsati -pa- mahāvajirañāṇaṁ nissāyā'ti". Nanu bhagavato samāpattisamāpajjane parikamme payojanaṁ natthīti? Nayidaṁ ekantikaṁ. Tathā hi vedanāpaṭippaṇāmanādīsu savisesaṁ parikammapubbaṅgamena samāpattiyo samāpajji. Apare pana "lokiyasamāpattisamāpajjane parikammena payojanaṁ natthi. Lokuttarasamāpattisamāpajjane tajjaṁ parikammaṁ icchitabbamevā"ti vadanti.

"Aparamparā"ti padam yesam desanāya atthi, te **aparampariyāva. Kusalapaññattiyan**ti kusaladhammānam paññāpane. **Anuttaro**ti uttamo. **Upanissaye ṭhatvā**ti ñāṇūpanissaye ṭhatvā yādiso pubbūpanissayo pubbayogo,

tattha patiṭṭhāya. Mahantato saddahati paṭipakkhavigamena ñāṇassa viya saddhāyapi tikkhavisadabhāvāpattito. Avasesa-arahantehīti pakatisāvakehi. Asīti mahātherā Paramatthadīpaniyam theragāthāvaṇṇanāyam¹ nāmato uddhaṭā. Cattāro mahātherāti Mahākassapa Anuruddha Mahākaccāna Mahākoṭṭhikattherā. Tesupi aggasāvakesu Sāriputtatthero paññāya visiṭṭhabhāvato. Sāriputtattheratopi eko Paccekabuddho tikkhavisadañāṇo abhinīhāramahantatāya sambhatañāṇasambhārattā. Satipi paccekabodhiyā avisesesu bahūsu ekajjham sannipatitesu pubbayogavasena lokiye visaye siyā kassaci ñāṇassa visiṭṭhatāti dassetum "sace panā"ti-ādi vuttam. "Sabbaññubuddhova buddhaguṇe mahantato saddahatī"ti idam heṭṭhā āgatadesanāsotavasena vuttam. Buddhā hi buddhaguṇe mahattam paccakkhatova passanti, na saddahanavasena.

Idāni yathāvuttamattham upamāya vibhāvetum "seyyathāpi nāmā"ti-ādi āraddham. Gambhīro uttānoti gambhīro vā uttāno vāti jānanattham. "Evameva"ti-ādi yathādassitāya upamāya upameyyena samsandanam. Buddhagunesu appamattavisayampi lokiyamahājanassa ñānam apavattitarūpeneva pavattati anavattitasabhāvattāti vuttam "ekabyāma -paveditabbā"ti. Tattha ñāta-udakam viyāti pamānato ñāta-udakam viya. Ariyānam pana tattha attano visaye pavattanakañānam pavattitarūpeneva pavattati attano pativedhānurūpam, abhinīhārānurūpamca avattitasabhāvattāti dassento "dasabyāmayottenā" ti-ādimāha. Tattha patividdhasaccānampi patipakkhavidhamanapubbayogavisesavasena ñānam sātisayam, mahānubhāvañca hotīti imamattham dassetum sotāpannañānassa dasabyāma-udakam opammabhāvena dassetvā tato paresam dasuttaradigunadasaguna-asītigunavisittham udakam opammam katvā dassitam. Nanu evam sante buddhagunā parimitaparicchinnā, therena ca te paricchijja ñātāti āpajjatīti? Nāpajjatīti dassento "tattha yathā so puriso"tiādimāha. Tattha so purisoti so caturāsītibyāmasahassappamānena yottena caturāsītibyāmasahassatthāne mahāsamudde udakam minitvā thito puriso. So hi therassa upamābhāvena gahito.

Dhammanvayenāti anumānañāṇena. Tañhi siddham dhammam anugantvā pavattanato "dhammanvayo"ti vuccati, tathā anvayavasena atthassa bujjhanato anvayabuddhi, anumeyyam anuminotīti anumānam, nidassane diṭṭhanayena anumeyyam gaṇhātīti "nayaggāho"ti ca vuccati. Tenāha "dhammanvayenā"ti-ādi. Svāyam dhammanvayo na yassa kassaci hoti, atha kho tathārūpassa aggasāvakassevāti āha "sāvakapāramiñāṇe ṭhatvā"ti. Yadi thero buddhaguṇe ekadesato paccakkhe katvā tadaññe nayaggāhena gaṇhi, nanu evam sante buddhaguṇā parimitaparicchinnā āpannāti? Nayidamevanti dassento "anantā aparimāṇā"ti.

"Saddahatī"ti vatvā puna tamevattham vibhāvento "therena hi -pa-bahutarā"ti āha. Katham panāyamattho evam daṭṭhabboti evam adhippāyabhedakam upamāya saññāpetum "yathā katham viyā"ti-ādi vuttam "upamāya midhekacce viññū purisā bhāsitassa attham ājānantī"ti¹. Ito nava ito navāti ito majjhaṭṭhānato yāva dakkhiṇatīrā nava, ito majjhaṭṭhānato yāva uttaratīrā nava. Idāni yathāvuttamattham suttena samatthetum "Buddhopī"ti gāthamāha.

Yamakayugalamahānadīmahogho viyāti dvinnam ekato samāgatattā yugalabhūtānam mahānadīnam mahogho viya.

Anucchavikam katvāti yoyam mama pasādo buddhaguņe ārabbha ogāļho hutvā uppanno, tam anucchavikam anurūpam katvā. Paṭiggahetum sampaṭicchitum añño koci na sakkhissati yāthāvato anavabujjhanato. Paṭiggahetum sakkoti tassa hetuto, paccayato, sabhāvato, kiccato, phalato sammadeva paṭivijjhanato. Pūrattanti puṇṇabhāvo. Paggharaṇakāleti vikiraṇakāle, patanakāleti attho. "Pasanno"ti iminā pasādassa vattamānatā dīpitāti "uppannasaddho"ti imināpi saddhāya paccuppannatā pakāsitāti āha "evam saddahāmīti attho"ti. Abhiñnāyatīti abhiñno, adhiko abhiñno bhiyyobhiñno, so eva atisayavacanicchāvasena "bhiyyobhiñnataro"ti vuttoti āha "bhiyyataro abhiñnāto"ti. Dutiyavikappe pana abhijānātīti abhiñnā, abhivisiṭṭhā pañnā, bhiyyo

abhiññā etassāti bhiyyobhiñño, so eva atisayavacanicchāvasena bhiyyobhiññataro, svāyamassa atisayo abhiññāya bhiyyobhāvakatoti āha "bhiyyatarābhiñño vā"ti. Sambujjhati etāyāti sambodhi, sabbañnutañnānam, aggamaggañānañca. Sabbaññutaññānapadatthānañhi aggamaggañānam, aggamaggañānapadatthānañca sabbaññutaññānam sambodhi nāma. Tattha padhānavasena tadatthadassane pathamavikappo, padatthānavasena dutiyavikappo. Kasmā panettha arahattamaggañānasseva gahanam, nanu hetthimānipi bhagavato maggañānāni savāsanameva yathāsakam patipakkhavidhamanavasena pavattāni. Savāsanappahānañhi ñeyyāvaranappahānanti? Saccametam, tam pana aparipunnam patipakkhavidhamanassa vippakatabhāvatoti āha "arahattamaggañāne vā"ti. Aggamaggavasena cettha ariyānam bodhittayapāripūrīti dassetum "arahattamaggeneva hī"ti-ādi vuttam. Nippadesāti anavasesā. Gahitā hontīti arahattamaggena gahitena adhigatena gahitā adhigatā honti. Sabbanti tehi adhigantabbam. **Tenā**ti sambodhinā sabbaññutaññānapadatthānena arahattamaggañanena.

142. Khādanīyānam ulāratā sātarāsānubhāvenāti āha "madhure āgacchatī"ti. Pasamsāya uļāratā visitthabhāvenāti āha "setthe"ti, obhāsassa uļāratā mahantabhāvenāti vuttam "vipule"ti. Usabhassa ayanti āsabhī, idha pana āsatī viyāti **āsabhī**. Tenāha "usabhassa vācāsadisī"ti. Yena pana gunenassā tamsadisatā, tam dassetum "acalā asampavedhī"ti vuttam. Yato kutoci anussavanam anussavo. Vijjātthānesu kataparicayānam ācariyānam tam tam attham viññapenti paveni acariyaparampara. Kevalam attano matiyā "itikira evamkirā" ti parikappanā **itikira**. Pitakassa ganthassa sampadānato sayam sampadānabhāvena gahanam pitakasampadānam. Yathāsutānam atthānam ākārassa parivitakkanam **ākāraparivitakko.** Tatheva "evametan"ti ditthiyā nijjhānakkhamanam ditthinijihānakkhanti. Āgamādhigamehi vinā takkamaggam nissāya takkanam takko. Anumānavidhim nissāya **nayaggāho**. Yasmā buddhavisaye thatvā bhagavato ayam therassa codanā, therassa ca so avisayo, tasmā "paccakkhato ñāņena paţivijjhitvā viyā"ti vuttam. Sīhanādo viyāti sīhanādo, tamsadisatā cassa setthabhāvena,

so cettha evam veditabboti dassento "sīhanādo"ti-ādimāha. Neva dandhāyantenāti na mandāyantena. Na bhaggarāyantenāti¹ aparisaṅkantena.

Anuyogadāpanatthanti anuyogam sodhāpetum. Vimaddakkhamañhi sīhanādam nadanto atthato tattha anuyogam sodheti nāma. Anuyuñjanto ca nam sodhāpeti nāma. Dātunti sodhetum. Keci "dānatthan"ti attham vadanti, tadayuttam. Na hi yo sīhanādam nadati, so eva tattha anuyogam detīti yujjati. Nighamsananti vimaddanam. Dhamamānanti tāpayamānam, tāpanancettha gaggariyā dhamāpanasīsena vadati. Sabbe teti sabbe te atīte niruddhe Sammāsambuddhe, tenetam dasseti—ye te ahesum atītamaddhānam tava abhinīhārato oram Sammāsambuddhā, tesam tāva sāvakañāṇagocare dhamme paricchindanto mārādayo viya buddhānam lokiyacittacāram tvam jāneyyāsi. Ye pana te abbhatītā tato parato chinnavaṭumā chinnapapañcā pariyādiṇṇavaṭṭā sabbadukkhavītivattā sammāsambuddhā, tesam sabbesampi sāvakañāṇassa avisayabhūte dhamme katham jānissasīti.

Anāgatabuddhānaṁ panāti pana-saddo visesatthajotano, tena atītesu tāva khandhānaṁ bhūtapubbattā tattha siyā ñāṇassa savisaye gati, anāgatesu pana sabbaso asañjātesu kathanti imamatthaṁ joteti. Tenāha "anāgatāpī"tiādi. "Cittena paricchinditvā viditā"ti kasmā vuttaṁ, nanu abhītānāgate sattāhe eva pavattaṁ cittaṁ cetopariyañāṇassa visayo, na tato paranti? Nayidaṁ cetopariyañāṇakiccavasena vuttaṁ, atha kho pubbenivāsanāgataṁsañānavasena vuttaṁ, tasmā nāyaṁ doso.

Viditaṭṭhāne nakaroti sikkhāpadeneva tādisassa paṭikkhepassa paṭikkhittattā, setughātato ca. Kathaṁ pana thero dvayasambhave paṭikkhepameva akāsi, na vibhajja byākāsīti āha "thero kirā"ti-ādi. Pāraṁ pariyantaṁ minotīti pāramī, sā eva ñāṇanti pāramiñāṇaṁ, sāvakānaṁ pāramiñāṇaṁ sāvakapāramiñāṇaṁ, tasmiṁ. Sāvakānaṁ ukkaṁsapariyantagate jānane nāyamanuyogo, atha kho sabbaññutaññāṇe sabbaññutāya jānane. Keci pana "sāvakapāramiñāṇeti sāvakapāramiñāṇavisaye"ti atthaṁ vadanti. Tathā sesapadesupi. Sīla -pasamatthanti

sīlasamādhipaññāvimuttisaṅkhātakāraṇānaṁ jānanasamatthaṁ. Buddhasīlādayo hi buddhānaṁ buddhakiccassa, parehi "buddhā"ti jānanassa ca kāranaṁ.

143. Anumānañānam viya samsayapitthikam ahutvā "idamidan"ti yathāsabhāvato ñeyyam dhāreti nicchinotīti dhammo, paccakkhañānanti āha "dhammassa paccakkhato ñānassā"ti. Anu-etīti anvayoti āha "anuyogam anugantvā"ti. Paccakkhasiddhañhi attham anugantvā anumānañānassa pavatti ditthena aditthassa anumānanti veditabbo. Vidite vedakampi ñānam atthato viditameva hotīti "anumānañānam nayaggāho vidito" ti vuttam. Viditoti viddho patiladdho, adhigatoti attho. Appamānoti aparimāno mahāvisayattā. Tenāha "apariyanto"ti. Tenāti apariyantattā, tena vā apariyantena ñanena, eteneva thero yam yam anumeyyamattham ñatukamo hoti, tattha tatthassa asangamappatihata-anumānanānam pavattatīti dasseti. Tenāha "so iminā" ti-ādi. Tattha imināti iminā kāranena. Pākārassa thirabhāvam uddhamuddham āpetīti **uddhāpam**, pākāramūlam. Ādi-saddena pākāradvārabandhaparikhādīnam sangaho veditabbo. Paccante bhavam paccantimam. Panditadovārikatthāniyam katvā thero attānam dassetīti dassento "ekadvāranti kasmā āhā" ti codanam samutthāpesi. Yassā paññāya vasena puriso "pandito"ti vuccati, tam pandiccanti aha "pandiccena samannāgato"ti. Tamtamitikattabbatāsu chekabhāvo byattabhāvo veyyattiyam. Medhati sammosam himsati vidhametīti medhā, sā etassa atthīti **medhāvī**. Thāne thāne uppatti etissā atthīti **thānuppattikā**, thānaso uppajjanakapaññā. Anupariyāyanti etenāti **anupariyāyo**, so eva pathoti anupariyāyapatho, parito pākārassa anusamyāyanamaggo. Pākārabhāgā sandhātabbā etthāti **pākārasandhi**, pākārassa phullitappadeso. So pana hetthimantena dvinnampi itthakānam vigamena evam vuccatīti āha "dvinnam itthakānam apagatatthānan"ti. Chinnatthānanti chinnabhinnappadeso, chinnatthānam vā. Tañhi "vivaran"ti vuccati.

Kiliṭṭhanti malīnam. Upatāpentīti kilesapariļāhena santāpenti. Vibādhentīti pīļenti. Uppannāya paññāya nīvaraņehi na kiñci kātum sakkāti āha "anuppannāya paññāya uppajjitum na dentī"ti. Tasmāti paccayūpaghātena uppajjitum appadānato. **Catūsu satipaṭṭhānesu suṭṭhu ṭhapitacittā**ti catubbidhāyapi satipaṭṭhānabhāvanāya sammadeva ṭhapitacittā. **Yathāsabhāvena bhāvetvā**ti aviparītasabhāvena yathā paṭipakkhā samucchijjanti, evam bhāvetvā.

Purimanaye satipaṭṭhānāni, bojjhaṅgā ca missakā adhippetāti tato aññathā vattuṁ "apicetthā"ti-ādi vuttaṁ. Missakāti samathavipassanāmaggavasena missakā. "Catūsu satipaṭṭhānesu suppatiṭṭhitacittā"ti-ādito vuttattā "satipaṭṭhāne vipassanāti gahetvā "satta bojjhaṅge yathābhūtaṁ bhāvetvā"ti vuttattā, maggapariyāpannānaṁyeva ca nesaṁ nippariyāyabojjhaṅgabhāvato, tesu ca sabbaso adhigatesu lokanāthena sabbaññutaññāṇampi adhigatameva hotīti "bojjhaṅge maggo, sabbaññutaññāṇañcāti gahite sundaro pañho bhaveyyā"ti mahāsivatthero āha, na panevaṁ gahitaṁ porāṇehīti adhippāyo. Itīti vuttappakāraparāmasanaṁ. Theroti sāriputtatthero.

Tatthāti tesu paccantanagarādīsu. Nagaram viya nibbānam tadatthikehi upavantabbato, upagatānanca parissayarahitasukhādhigamanaṭṭhānato. Pākāro viya sīlam tadupagatānam parito ārakkhabhāvato. Pariyāyapatho viya hirī sīlapākārassa adhiṭṭhānabhāvato. Vuttanhetam "pariyāyapathoti kho bhikkhu hiriyā etam adhivacanan"ti. Dvāram viya ariyamaggo nibbānanagarappavesana-anjasabhāvato. Paṇḍitadovāriko viya dhammasenāpati nibbānanagarapaviṭṭhapavisanakānam sattānam sallakkhaṇato. Dinnoti dāpito, sodhitoti attho.

144. Nipphattidassanatthanti siddhidassanattham,

adhigamadassanatthanti attho. "Pañcanavutipāsaṇḍe"ti idam yasmā thero paribbājako hutvā tato pubbeva nibbānapariyesanam caramāno te te pāsaṇḍino upasaṅkamitvā nibbānam pucchi, te nāssa cittam ārādhesum, tam sandhāya vuttam. Te pana pāsaṇḍā heṭṭhā vuttā eva. Tatthevāti tassayeva bhāgineyyassa desiyamānāya desanāya. Parassa vaḍḍhitam bhattam bhuñjanto viya sāvakapāramiñāṇam hatthagatam akāsi adhigacchi. Uttaruttaranti heṭṭhimassa uttaraṇato atikkamanato uttaruttaram, tato eva padhānabhāvam

pāpitatāya paṇītapaṇītam. Uttaruttaranti vā uparūpari. Paṇītapaṇītanti paṇītataram, paṇītatamañcāti attho. Kaṇhanti kāļakam samkilesadhammam. Sukkanti odātam vodānadhammam. Savipakkham katvāti pahātabbapahāyakabhāvadassanavasena yathākkamam ubhayam savipakkham katvā. "Ayam kaṇhadhammo, imassa ayam pahāyako"ti evam kaṇham paṭibāhitvā desanāvasena nīharitvā sukkam, "ayam sukkadhammo, iminā ayam pahātabbo"ti evam sukkam paṭibāhitvā kaṇham. Sa-ussāhanti phaluppādanasamatthatāvasena sabyāpāram. Tenāha "savipākan"ti. Vipākadhammanti hi attho.

Tasmim desite dhammeti tasmim vuttanayena bhagavā tumhehi desite dhamme ekaccam dhammam nāma sāvakapāramiñānam jānitvā¹ pativijihitvā. Tamiānane hi vutte catusaccadhammajānanam avuttasiddhanti. "Catusaccadhammesū"ti idam porānatthakathāyam vuttākāradassanam. Vipakkho pana parato āgamissati. Etthāti "dhammesu nitthamagaman"ti² etasmim pade. Therasallāpoti therānam sallāpasadiso vinicchayavādo. Kālavallavāsīti kālavallavihāravāsī. Idānīti etarahi "idāham bhante"tiādivacanakāle. Imasmim pana thāneti "dhammesu nitthamagaman"ti imasmim padese, imasmim vā nitthānakāranabhūte voniso parivitakkane. "Imasmim pana thane buddhagunesu nitthangato" ti³ kasma vuttam, nanu sāvakapāramiñānasamadhigatakāle eva thero buddhagunesu nitthaṅgatoti? Saccametam, idani pana tam pakatam jatanti evam vuttam. **Sabban**ti "catusaccadhammesū"ti-ādi sumattherena vuttam sabbam. Arahatte niţthangatoti etthapi vuttanayeneva anuyogaparihara veditabba. Yadipi dhammasenāpati "sāvakapāramiñānam mayā samadhigatan"ti ito pubbepi jānātiyeva, idāni pana asankhyeyyāparimeyyabhede buddhaguņe nayaggāhavasena pariggahetvā kiccasiddhiyā tasmim ñāne nitthangato ahosīti dassento "mahāsivatthero -pa- dhammesūti sāvakapāramiñāņe nitthangato"ti avoca.

Buddhaguṇā pana nayato āgatā, te nayaggāhato yāthāvato jānanto sāvakapāramiñāṇe tathājānanavasena niṭṭhaṅgatattā sāvakapāramiñāṇameva tassa aparāparuppattivasena, tena tena bhāvetabbakiccabahutāvasena ca "dhammesū"ti puthuvacanena vuttami. Anantāparimeyyānam

^{1.} Sañjānitvā (Atthakathāyam) 2. Niggamananti (Ka) 3. Nitthamgato (Atthakathāyam)

anaññavisayānam buddhaguṇānam nayato pariggaṇhanena therassa sātisayo bhagavati pasādo uppajjatīti āha "bhiyyoso mattāyā"ti-ādi. "Suṭṭhu akkhāto"ti vatvā tamevassa suṭṭhu akkhātatam dassetum "niyyāniko maggo"ti vuttam. Svākkhātatā hi dhammassa yadattham desito, tadatthasādhanena veditabbā. Phalatthāya niyyātīti anantaravipākattā, attano uppattisamanantarameva phalanipphādanavasena pavattatīti attho. Vattacārakato niyyātīti vā niyyāniko, niyyānasīloti vā.

Rāgadosamohanimmadanasamatthoti idhāpi "pasannosmi bhagavatīti dassetī"ti ānetvā sambandho. Vaṅkādīti ādi-saddena jimhakuṭile, aññe ca paṭipattidose saṅgaṇhāti. Bhagavā tumhākaṁ buddhasubuddhatā viya dhammasudhammatā, Saṁghasuppaṭipatti ca dhammesu niṭṭhaṅgamanena sāvakapāramiñāṇe niṭṭhaṅgatattā mayhaṁ suṭṭhu vibhūtā supākaṭā jātāti dassento thero "svākkhāto bhagavatā dhammo, suppaṭipanno saṁghoti pasīdin"ti avoca.

Kusaladhammadesanāvannanā

145. Anuttarabhāvoti seṭṭhabhāvo. Anuttaro bhagavā yena guṇena, so anuttarabhāvo, taṁ anuttariyaṁ. Yasmā tassāpi guṇassa kiñci uttaritaraṁ natthi eva, tasmā vuttaṁ "sā tumhākaṁ desanā anuttarāti vadatī"ti. Kusalesu dhammesūti kusaladhammanimittaṁ. Nimittatthe hi etaṁ bhummaṁ, tasmā kusaladhammadesanāhetupi bhagavāva anuttaroti attho. Bhūmiṁ dassentoti visayaṁ dassento. Kusaladhammadesanāya hi kusalā dhammā visayo. Vuttapadeti "kusalesu dhammesū"ti evaṁ vuttavākye, evaṁ vā vuttadhammakoṭṭhāse. "Pañcadhā"ti kasmā vuttaṁ, nanu chekaṭṭhenapi kusalaṁ icchitabbaṁ "kusalo tvaṁ rathassa aṅgapaccaṅgānan"ti-ādīsū¹ti? Saccametaṁ, so pana chekaṭṭho kosallasambhūtaṭṭheneva saṅgahitoti visuṁ na gahito. "Kacci nu bhoto kusalaṁ, kacci bhoto anāmayan"ti² jātake āgatattā "jātakapariyāyaṁ patvā ārogyaṭṭhena kusalaṁ vaṭṭatī"ti vuttaṁ. "Taṁ kiṁ maññatha gahapatayo, ime dhammā kusalā vā akusalā vā sāvajjā vā anavajjā vā"ti-ādīsu suttapadesesu "kusalā"ti vuttadhammā eva "anavajjā"ti

vuttāti āha "suttantapariyāyam patvā anavajjaṭṭhena kusalam vaṭṭatī"ti. Abhidhamme¹ "kosallan"ti paññā āgatāti yonisomanasikārahetukassa kusalassa kosallasambhūtaṭṭho, darathābhāvadīpanato niddarathaṭṭho, "kusalassa katattā upacitattā"ti vatvā iṭṭhavipākaniddisanato sukhavipākaṭṭho ca abhidhammanayasiddhoti āha "abhidhamma -pa- vipākaṭṭhenā"ti. Bāhitikasutte² bhagavato kāyasamācārādike vaṇṇentena dhammabhaṇḍāgārikena "yo kho mahārāja kāyasamācāro anavajjo"ti kusalo kāyasamācāro rañño pasenadissa vutto. Na hi bhagavato sukhavipākakammam atthīti sabbasāvajjarahitā kāyasamācārādayo "kusalā"ti vuttā, idha pana "kusalesu dhammesū"ti bodhipakkhiyadhammā "kusalā"ti vuttā, te ca samathavipassanā maggasampayuttā ekantena sukhavipākā evāti avajjarahitatāmattam upādāya anavajjattho kusala-saddoti āha "imasmim pana -pa- daṭṭhabban"ti. Evañca katvā "phalasatipaṭṭhānam pana idha anadhippetan"ti idañca vacanam samatthitam hoti savipākasseva gahananti katvā.

"Cuddasavidhenā" ti-ādi satipaṭṭhāne³ vuttanayena veditabbam. Paggahaṭṭhenāti kusalapakkhassa paggaṇhanasabhāvena. Kiccavasenāti anuppannākusalānuppādanādikiccavasena. Tato eva cassa catubbidhatā. Ijjhanaṭṭhenāti nippajjanasabhāvena. Chandādayo eva iddhipādesu visiṭṭhasabhāvā, itare avisiṭṭhā, tesampi viseso chandādikatoti āha "chandādivasena nānāsabhāvā"ti.

Adhimokkhādisabhāvavasenāti pasādādhimokkhādisalakkhaṇavasena. Upatthambhanaṭṭhenāti sampayuttadhammānam upatthambhanakabhāvena. Akampiyaṭṭhenāti paṭipakkhehi akampiyasabhāvena. Salakkhaṇenāti adhimokkhādisabhāvena. Niyyānaṭṭhenāti samkilesapakkhato, vaṭṭacārakato ca niggamanaṭṭhena. Upaṭṭhānādināti upaṭṭhānadhammavicayapaggahasampiyāyana passambhanasamādhāna-ajjhupekkhanasaṅkhātena attano sabhāvena. Hetuṭṭhenāti nibbānassa sampāpakahetubhāvena. Dassanādināti dassanābhiniropanapariggahasamuṭṭhāpanavodāpanapaggahupaṭṭhāna samādhānasaṅkhātena attano sabhāvena.

Sāsanassa pariyosānadassanatthanti sāsanam nāma nippariyāyato sattatimsa bodhipakkhiyadhammā. Tattha ye samathavipassanāsahagatā, te sāsanassa ādi, maggapariyāpannā majjhe, phalabhūtā pariyosānam, tamdassanattham. Tenāha "sāsanassa hī"ti-ādi.

Puna etadānuttariyam bhanteti yathāraddhāya desanāya nigamanam. Vuttasseva atthassa puna vacanañhi nigamanam vuttam. Tam desananti tam kusalesu dhammesu desanāppakāram, desanāvidhim, desetabbañca, sakalam vā sampuṇṇam anavasesam abhijānāti abhivisiṭṭhena ñāṇena jānāti, asesam abhijānanato eva uttari upari abhiññeyyam natthi. Itoti bhagavatā abhiññātato. Añño paramatthavasena dhammo vā paññattivasena puggalo vā ayam nāma yam bhagavā na jānātīti idam natthi na upalabbhati sabbasseva sammadeva tumhehi abhiññātattā. Kusalesu dhammesu abhijānane, desanāyañca bhagavato¹ uttaritaro natthi.

Āyatanapaṇṇattidesanāvaṇṇanā

146. **Āyatanapaññāpanāsū**ti cakkhādīnam, rūpādīnañca āyatanānam sambodhanesu, tesam ajjhattikabāhiravibhāgato, sabhāgavibhāgato, samudayato, atthangamato, āhārato, ādīnavato, nissaraṇato ca desanāyanti attho.

Gabbhāvakkantidesanāvaņņanā

147. **Gabbhokkamanesū**ti gabbhabhāvena mātukucchiyam avakkamanesu anuppavesesu, gabbhe vā mātukucchismim avakkamanesu. **Pavisatī**ti paccayavasena tattha nibbattento pavisanto viya hotīti katvā vuttam. **Ṭhātī**ti santānaṭṭhitiyā pavattati, tathābhūto ca tattha vasanto viya hotīti āha "vasatī"ti. **Pakatilokiyamanussānam paṭhamā gabbhāvakkantī**ti pacuramanussānam gabbhāvakkanti desanāvasena idha paṭhamā. "**Dutiyā gabbhāvakkantī**"ti-ādīsupi evam yojanā veditabbā.

Alamevāti yuttameva.

Khipitum na sakkontīti tathā vātānam anuppajjanameva vadati. Sesanti puna "etadānuttariyan" ti-ādipāthappadesam vadati.

Ādesanavidhādesanāvannanā

148. Parassacittam ādisati etehīti **ādesanāni**, yathā-upatthitanimittādīni, tāni eva aññamaññassa asamkinnarūpena thitattā ādesanavidhā, ādesanābhāgā, tāsu ādesanavidhāsu. Tenāha "ādesanakotthāsesū"ti. Āgatanimittenāti yassa ādisati, tassa, attano ca upagatanimittena, nimittappattassa lābhālābhādi-ādisanavidhidassanassa pavattattā "idam nāma bhavissatī"ti vuttam. Pāļiyam pana "evampi te mano"ti-ādinā parassa cittādisanameva āgatam, tam nidassanamattam katanti datthabbam. Tathā hi "idam nāma bhavissatī"ti vuttasseva atthassa vibhāvanavasena vatthu āgatam. **Gatanimittam** nāma gamananimittam¹. **Thitanimittam** nāma attano samīpe thānanimittam, parassa gamanavasena, thānavasena ca gahetabbanimittam. Manussānam paracittavidūnam, itaresampi vā savanavasena parassa cittam ñatvā kathentānam saddam sutvā. Yakkhapisācādīnanti hinkārayakkhānañceva² kannapisācādipisācānam, kumbhandanāgādīnañca.

Vitakkavipphāravasenāti vipphārikabhāvena pavattavitakkassa vasena. Uppannanti tato samutthitam. Vippalapantananti kassaci atthassa abodhanato virūpam, vividham vā palapantānam. Suttapamattādīnanti ādisaddena vedanāttakhittacittādīnam sangaho. Mahā-atthakathāyam pana "idam vakkhāmi, evam vakkhāmīti vitakkayato vitakkavipphārasaddo nāma uppajjatī"ti³ āgatattā jāgarantānam pakatiyam thitānam avippalapantānam vitakkavipphārasaddo kadāci uppajjatīti viññāyati, yo loke "mantajappo"ti vuccati. Yassa mahā-atthakathāyam asotaviññeyyatā vuttā. Tādisañhi sandhāya viññattisahajameva "jivhātālucalanādikaravitakkasamutthitam sukhumasaddam dibbasotena sutvā ādisatīti sutte vuttan"ti4 ānandācariyo avoca. Vuttalakkhano eva pana nātisukhumo attano, accāsannappadese thitassa ca mamsasotassāpi āpātham gacchatīti sakkā viññātum.

^{1.} Pakkamananimittam (Ka)

^{3.} Abhi-Ttha 1. 128 pitthepi.

^{2.} Kiṅkārayakkhānañceva (Ka)

^{4.} Mūlatī 1. 75 pitthe.

Tassāti tassa puggalassa. Tassa vasenāti tassa vitakkassa vasena. Evamayampi ādesanavidhā cetopariyañāṇavaseneva āgatāti veditabbā. Keci pana "tassa vasenāti tassa saddassa vasenā"ti atthaṁvadanti, taṁ ayutthaṁ. Na hi saddaggahaṇena taṁsamuṭṭhāpakacittaṁ gayhati, saddaggahaṇānusārenapi tadatthasseva gahaṇaṁ hoti, na cittassa. Eteneva yadeke "yaṁ vitakkayatoti yaṁ atthaṁ vitakkayato"ti vatvā "tassa vasenāti tassa atthassa vasenā"ti vannenti, tampi patikkhittaṁ.

Manasā saṅkharīyantīti manosaṅkhārā, vedanāsaññā. Paṇihitāti purimaparibandhavinayena padhānabhāvena nihitā ṭhapitā. Tenāha "cittasaṅkhārā suṭṭhapitā"ti. Vitakkassa vitakkanaṁ nāma uppādanamevāti āha "pavattessatī"ti. "Pajānātī"ti pubbe vuttapadasambandhadassanavasena āneti. Āgamanenāti jhānassa āgamanaṭṭhānavasena. Pubbabhāgenāti maggassa sabbapubbabhāgena vipassanārambhena. Ubhayampetaṁ yo sayaṁ jhānalābhī, adhigatamaggo ca aññaṁ tadatthāya paṭipajjantaṁ disvā "ayaṁ iminā nīhārena paṭipajjanto addhā jhānaṁ labhissati, maggaṁ adhigamissatī"ti abhiññāya vinā anumānavasena jānāti, taṁ dassetuṁ vuttaṁ. Tenāha "āgamanena jānāti nāmā"ti-ādi. Anantarāti vuṭṭhitakālaṁ sandhāyāha. Tadā hi pavattavitakkapajānaneneva jhānassa hānabhāgiyatādivisesapajānanaṁ.

Kim panidam cetopariyanāṇam parassa cittam paricchijja jānantam iddhicittabhāvato avisesato sabbesampi cittam jānātīti? Noti dassento "tatthā"ti-ādimāha. Na ariyānanti yena cittena te ariyā nāma jātā, tam lokuttaracittam na jānāti appaṭividdhabhāvato. Yathā hi puthujjano sabbesampi ariyānam lokuttaracittam na jānāti appaṭividdhattā, evamariyopi heṭṭhimo uparimassa lokuttaracittam na jānāti appaṭividdhattā eva. Yathā pana uparimo heṭṭhimam phalasamāpattim na samāpajjati, kimevam so tassa lokuttaracittam na jānātīti codanam sandhāyāha "uparimo pana heṭṭhimassa jānātī"ti, paṭividdhattāti adhippāyo. "Uparimo heṭṭhimam na samāpajjatī"ti vatvā tattha kāraṇamāha "tesañhī"ti-ādi. Tesanti ariyānam. Heṭṭhimā heṭṭhimā samāpatti bhūmantarappattiyā paṭippassaddhikappā. Tenāha "tatrupapattiyeva hotī"ti,

na uparibhūmipatti. Nimittādivasena ñātassa kadāci byabhicāropi siyā, na pana abhiññāñāṇena ñātassāti āha "ceto -pa- natthī"ti. "Taṁ bhagavā"ti-ādi sesaṁ nāma.

Dassanasamāpattidesanāvannanā

149. **Brahmajāle**ti brahmajālasuttavaṇṇanāyaṁ¹. Uttarapadalopena hesa niddeso. **Ātappanti vīriyaṁ** ātappati kosajjaṁ sabbampi saṁkilesapakkhanti. Kusalavīriyasseva hettha gahaṇaṁ appamādādipadantarasannidhānato. **Padahitabbato**ti padahanato, bhāvanaṁ uddissa vāyamanatoti attho. **Anuyuñjitabbato**ti anuyuñjanato. Īdisānaṁ padānaṁ bahulaṁkattuvisayatāya icchitabbattā ātappapadassa viya itaresampi kattusādhanatā daṭṭhabbā. Paṭipattiyaṁ nappamajjati etenāti **appamādo**, satiavippavāso. Sammā manasi karoti etenāti **sammāmanasikāro**, tathāpavatto kusalacittuppādo. Bhāvanānuyogameva tathā vadati. Desanākkamena **paṭhamā**, dassanasamāpatti nāma karajakāye paṭikkūlākārassa sammadeva dassanavasena pavattasamāpattibhāvato. **Nippariyāyenevā**ti vuttalakkhaṇadassanasamāpattisannissayattā, dassanamaggaphalabhāvato ca paṭhamasāmañāphalaṁ pariyāyena vinā dassanasamāpatti.

Atikkamma chavimamsalohitam aṭṭhim paccavekkhatīti tāni apaccavekkhitvā aṭṭhimeva paccavekkhati. Aṭṭhi-ārammaṇā dibbacakkhupādakajjhānasamāpattīti vuttanayena aṭṭhi-ārammaṇā dibbacakkhu-adhiṭṭhānā paṭhamajjhānasamāpatti. Yo hi bhikkhu ālokakasiṇe catutthajjhānam nibbattetvā tam pādakam katvā adhigatadibbacakkhuñāṇo hutvā saviññāṇake kāye aṭṭhim pariggahetvā tattha paṭikkūlamanasikāravasena paṭhamam jhānam nibbatteti, tassāyam paṭhamajjhānasamāpatti dutiyā dassanasamāpatti. Tena vuttam "aṭṭhi aṭṭhī"ti-ādi. Yo panettha pāṭiyam dvattimsākāramanasikāro vutto, so maggasodhanavasena vutto. Tattha vā kataparicayassasukheneva vuttanayā aṭṭhipaccavekkhaṇā samijjhatīti. Tenevettha "imañcevā"ti² "atikkamma cā"ti ca-saddo samuccayattho vutto. Tam jhānanti

^{1.} Dī-Ttha 1. 97 pitthe. 2. Imameva cāti (?) Ayameva pāliyam mūlapātho viya dissati.

yathāvuttam paṭhamajjhānam. **Ayan**ti ayam sakadāgāmiphalasamāpatti. Sātisayam catusaccadassanāgamanato pariyāyena vinā mukhyā **dutiyā dassanasamāpatti. Yāva tatiyamaggā vattatīti āha** "khīṇāsavassa vasena catutthā dassanasamāpatti kathitā"ti.

Pāļiyam purisassa cāti ca-saddo byatireke, tena yathāvuttasamāpattidvayato vuccamānamyeva imassa visesam joteti. Avicchedena pavattiyā sotasadisatāya viññāṇameva viññāṇasotam, tadetam viññāṇam purimato anantarapaccayam labhitvā pacchimassa anantarapaccayo hutvā pavattatīti ayamassa sotāgatatāya sotasadisatā, tasmā pajānitabbabhāvena vuttam ekameva cettha viññāṇam, tasmā aṭṭhakathāyam "viññāṇasotanti viññāṇamevā"ti vuttam. Dvīhipi bhāgehīti orabhāgaparabhāgehi. Idhaloko hissa orabhāgo, paraloko parabhāgo dvinnampi vasenetam sambandhanti. Tenāha "idhaloke patiṭṭhitan"ti-ādi. Viññāṇassa khaṇe khaṇe bhijjantassa kāmam natthi kassaci patiṭṭhitatā, taṇhāvasena pana tam "patiṭṭhitan"ti vuccatīti āha "chandarāgavasenā"ti. Vuttañhetam—

"Kabaļīkāre ce bhikkhave āhāre atthi rāgo, atthi nandī, atthi taṇhā, patiṭṭhitaṁ tattha viññāṇaṁ viruļhaṁ. Yattha patiṭṭhitaṁ viññāṇaṁ viruļhaṁ -pa- atthi tattha āyatiṁ punabbhavābhinibbattī"ti-ādi¹.

Kammanti kusalākusalakammam, upayogavacanametam. Kammato upagacchantanti kammabhāvena upagacchantam, viññāṇanti adhippāyo. Abhisankhāraviññāṇañhi yena kammunā sahagatam, aññadatthu tabbhāvameva upagatam hutvā pavattati. Idhaloke patiṭṭḥitam nāma idha katūpacitakammabhāvūpagamanato. Kammabhavam ākaḍḍhantanti kammaviññāṇam attanā sampayuttakammam javāpetvā paṭisandhinibbattanena tadabhimukham ākaḍḍhantam. Teneva paṭisandhinibbattanasāmatthiyena paraloke patiṭṭhitam nāma attano phalassa tattha patiṭṭhāpanena. Keci pana "abhisankhāraviññāṇam parato vipākam dātum asamattham idhaloke patiṭṭhitam nāma, dātum samattham pana paraloke

patiṭṭhitaṁ nāmā"ti vadanti, taṁ tesaṁ matimattaṁ "ubhayato abbo cchinnan"ti vuttattā. Yañca tehi "paraloke patiṭṭhitan"ti vuttaṁ, taṁ idhalokepi patiṭṭhitameva. Na hi tassa idhaloke patiṭṭhitabhāvena vinā paraloke patiṭṭhitabhāvo sambhavati. Sekkha puthujjanānaṁ cetopariyañāṇanti sekkhānaṁ, puthujjanānañca cetaso paricchindanakañāṇaṁ. Kathitaṁ paricchinditabbassa cetaso chandarāgavasena patiṭṭhitabhāvajotanato.

Catutthāya dassanasamāpattiyā tatiyadassanasamāpattiyam vuttappaṭikkhepena attho veditabbo.

Purimānam dvinnam samāpattīnam pubbe samathavasena atthassa vuttattā idāni vipassanāvasena dassetum "apicā"ti-ādi vuttam. Niccalameva pubbe vuttassa atthassa apanetabbato. Atthantaratthatāya dassiyamānāya padam calitam nāma hoti. Aparo nayoti ettha pathamajjhānassa pathamadassanasamāpattibhāve apubbam natthi. Dutiyajihānam dutiyāti ettha pana "atthikavannakasinavasena patiladdhadutiyajjhanam dutiya dassanasamāpattī"ti vadanti, tatiyajjhānampi tatheva paţiladdham. Dassanasamāpattibhāvo pana yo bhikkhu ālokakasine catutthajjhānam nibbattetvā tam pādakam katvā adhigatadibbacakkhuko hutvā saviññānake atthim pariggahetvā tattha vannakasinavasena hetthimāni tīni jhānāni nibbatteti, tassa. **Tatiyajihānam tatiyā** dassanasamāpatti adhitthānabhūtassa dibbacakkhuñānassa vasena. Catutthajjhānam catutthāti rūpāvacaracatutthajjhānam nibbattetvā tam pādakam katvā adhigatadibbacakkhuñānassa tam catutthajjhānam catutthā dassanasamāpatti. Idhāpi sekkhaputhujjanānam cetaso paricchindanena tatiyā dassanasamāpatti, arahato cittassa paricchindanena catutthā dassanasamāpatti veditabbā. Evañhesā atthavannanā pāļiyā samsandeyya. "Pathamamaggo"ti-ādīsu aṭṭhi-ārammaṇapaṭhamajjhānapādako pathamamaggo pathamādassanasamāpatti. Atthiārammanadutiyajjhānapādako dutiyamaggo dutiyā dassanasamāpatti. Paracittañānasahagatā catutthajjhānapādakā tatiyacatutthamaggā tatiyacatutthadassanasamāpattiyoti. Purisassa viññānapajānanam panettha asammohavasena datthabbam.

Puggalapannattidesanāvannanā

150. Puggalapaṇṇattīsūti puggalānam paññāpanesu. Guṇavisesavasena aññamañnam asaṅkarato ṭhapanesu. Lokavohāravasenāti lokasammutivasena. Lokavohāro hesa, yadidam "satto puggalo"ti-ādi. Rūpādīsu sattavisattatāya satto. Tassa tassa sattanikāyassa pūraṇato galanato, maraṇavasena patanato ca puggalo. Santatiyā nayanato naro. Attabhāvassa posanato poso. Evam paññāpetabbāsu voharitabbāsu. "Sabbametam puggalo"ti imissā sādhāraṇapaññattiyā vibhāvanavasena vuttam, na idhādhippeta-asādhāraṇapaññattiyā, tasmā lokapaññattīsūti sattalokagatapaññattīsu. Anuttaro hoti anaññasādhāraṇattā tassa paññāpanassa.

Dvīhi bhāgehīti kārane, nissakke cetam puthuvacanam, āvutti-ādivasena cāyamattho veditabboti āha "arūpasamāpattiyā" ti-ādi, etena "samāpattiyā vikkhambhanavimokkhena, maggena samucchedavimokkhena vimuttattā ubhato bhagavimutto"ti evam pavatto Tipitakaculanagattheravado, "nāmakāyato, rūpakāyato ca vimuttattā ubhatobhāgavimutto"ti evam pavatto tipitakamahādhammarakkhitattheravādo, "samāpattiyā vikkhambhanavimokkhena ekavāram vimuttova maggena samucchedavimokkhena ekavāram vimuttattā ubhatobhāgavimutto"ti evam pavatto tipitakacūlābhayattheravādo cāti imesam tinnampi theravādānam ekajjham sangaho katoti datthabbam. Vimuttoti kilesehi vimutto, kilesavikkhambhanasamucchedanehi vā kāyadvayato vimuttoti attho. Arūpasamāpattīnanti niddhāraņe sāmivacanam. Arahattappatta-anāgāminoti bhūtapubbagatiyā vuttam. Na hi arahattappatto anāgāmī nāma hoti. Pāļīti Puggalapaññattipāli¹. **Attha vimokkhe kāyena phusitvā**ti attha samāpattiyo sahajātanāmakāyena patilabhitvā. **Paññāya cassa disvā āsavā parikkhīnā** hontīti vipassanāpaññāya sankhāragatam, maggapaññāya cattāri saccāni passitvā cattāropi āsavā parikkhīņā honti. **Disvā**ti dassanahetu. Na hi āsave paññaya passanti, dassanakarana

pana parikkhīṇā "disvā parikkhīṇā"ti vuttā dassanāyattaparikkhīṇattā. Evañhi dassanam āsavānam khayassa purimakiriyābhāvena vuttam.

Paññāya visesato muttoti paññāvimutto anavasesato āsavānam parikkhīṇattā. Aṭṭhavimokkhapaṭikkhepavaseneva, na tadekadesabhūtarūpajjhānapaṭikkhepavasena. Evañhi arūpajjhānekadesābhāvepi aṭṭhavimokkhapaṭikkhepo na hotīti siddham hoti. Arūpāvacarajjhānesu hi ekasmimpi sati ubhatobhāgavimuttoyeva nāma hoti, na paññāvimuttoti.

Phuṭṭhantaṁ sacchikarotīti phuṭṭhānaṁ anto phuṭṭhanto, phuṭṭhānaṁ arūpajjhānānaṁ anantaro kāloti adhippāyo, accantasaṁyoge cetaṁ upayogavacanaṁ, phuṭṭhānantarakālameva sacchikātabbaṁ, sacchikato sacchikaraṇūpāyenāti vuttaṁ hoti. Tenāha "so jhānaphassan"ti-ādi. Ekacce āsavāti heṭṭhimamaggattayavajjhā āsavā. Yo hi arūpajjhānena rūpakāyato, nāmakāyekadesato ca vikkhambhanavimokhena vimutto, tena nirodhasaṅkhāto vimokkho ālocito pakāsito viya hoti, na pana kāyena sacchikato. Nirodhaṁ pana ārammaṇaṁ katvā ekaccesu āsavesu khepitesu tena sacchikato hoti, tasmā so sacchikātabbaṁ nirodhaṁ yathālocitaṁ nāmakāyena sacchikarotīti kāyasakkhīti vuccati, na tu vimuttoti ekaccānaṁ āsavānaṁ aparikkhīṇattā.

Diṭṭhantaṁ pattoti dassanasaṅkhātassa sotāpattimaggañāṇassa anantaraṁ pattoti attho. "Diṭṭhattā patto"tipi pāṭho, tena catusaccadassanasaṅkhātāya diṭṭhiyā nirodhassa pattataṁ dīpeti. Tenāha "dukkhāsaṅkhārā"ti-ādi. Paṭhamaphalato paṭṭhāya yāva aggamaggā diṭṭhippattoti āha "esopi kāyasakkhī viya chabbidho hotī"ti. Idaṁ dukkhanti "idaṁ dukkhaṁ, ettakaṁ dukkhaṁ, na ito uddhaṁ dukkhan"ti yathābhūtaṁ pajānāti. Yasmā idaṁ yāthāvasarasato pajānāti, pajānanto ca ṭhapetvā taṇhaṁ pañcupādānakkhandhe "dukkhasaccan"ti pajānāti. Taṇhaṁ pana idaṁ dukkhaṁ ito samudeti, tasmā "ayaṁ dukkhasamudayo"ti yathābhūtaṁ pajānāti. Yasmā idaṁ dukkhañca samudayo ca nibbānaṁ patvā nirujjhanti vūpasamanti appavattiṁ gacchanti, tasmā taṁ "ayaṁ dukkhanirodho"ti yathābhūtaṁ pajānāti. Ariyo pana aṭṭhaṅgiko

maggotam dukkhanirodham gacchati, tena tam "ayam dukkhanirodhagāminī paṭipadā"ti yathābhūtam pajānāti. Ettāvatā nānakkhaņe saccavavatthānam dassitam. Idāni tam ekakkhaņe dassetum "tathāgatappaveditā"ti-ādi vuttam. Tathāgatappaveditāti Tathāgatena bodhimaņde paṭividdhā viditā pākaṭā katā. Dhammāti catusaccadhammā. Vodiṭṭhā hontīti sudiṭṭhā honti. Vocaritāti sucaritā, tesu tena paññā suṭṭhu carāpitāti attho. Ayanti ayam evarūpo puggalo "diṭṭhippatto"ti vuccati.

Saddhāya vimuttoti saddahanavasena vimutto, etena sabbathā avimuttassapi saddhāmattena vimuttabhāvam dasseti. Saddhāvimuttoti vā saddhāya adhimuttoti attho. Vuttanayenevāti kāyasakkhimhi vuttanayeneva. No ca kho yathā diṭṭhippattassāti yathā diṭṭhippattassa āsavā parikkhīṇā, na evam saddhāya vimuttassāti attho. Kim pana nesam kilesappahāne nānattam atthīti? Natthi. Atha kasmā saddhāvimutto diṭṭhippattam na pāpuṇātīti? Āgamanīyanānattena. Diṭṭhippatto hi āgamanamhi kilese vikkhambhento appadukkhena, akilamanto ca sakkoti vikkhambhetum, saddhāvimutto dukkhena kilamanto vikkhambheti, tasmā diṭṭhippattam na pāpuṇāti. Tenāha "etesu hī"ti-ādi.

Ārammaṇam yāthāvato dhāreti avadhāretīti **dhammo**, paññā. **Paññāpubbaṅgaman**ti paññāpadhānam. Paññam vāhetīti **paññāvāhī**, paññam sātisayam pavattetīti attho, paññā vā imam puggalam vāheti, nibbānābhimukham gametīti attho. **Saddhānusāri**niddesepi eseva nayo.

Tasmāti **vimuddhimagge**¹ vuttattā, tato eva visuddhimagge, taṁsaṁvannanāsu² vuttanayenettha attho veditabbo.

Padhānadesanāvaņņanā

151. **Padahanavasenā**ti bhāvanānuyogavasena. **Satta bojjhaṅgā padhānāti vuttā** vivekanissitādibhāvena padahitabbato bhāvetabbato.

Patipadādesanāvannanā

152. Dukkhena kasirena samādhim uppādentassāti pubbabhāge āgamanakāle kicchena dukkhena sasankhārena sappayogena kilamantassa kilese vikkhambhetvā lokuttarasamādhim uppādentassa. Dandham tam thānam abhijānantassāti vikkhambhitesu kilesesu vipassanāparivāse ciram vasitvā tam lokuttarasamādhisankhātam thānam dandham sanikam abhijānantassa paṭivijjhantassa, sacchikarontassa pāpuṇantassāti attho. Ayam vuccatīti yā esā evam uppajjati, ayam kilesavikkhambhanapaṭipadāya dukkhattā, vipassanāparivāsapaññāya ca dandhattā maggakāle ekacittakkhane uppannāpi paññā āgamanavasena "dukkhapaṭipadā dandhābhiññā nāmā"ti vuccati. Upari tīsu padesupi imināva nayena attho veditabbo.

Bhassasamācārādidesanāvannanā

153. Bhassasamācāreti vacīsamācāre. Thitoti yathāraddham tam avicchedavasena kathento. Tenāha "kathāmaggam anupacchinditvā kathento"ti. Musāvādūpasañhitanti antarantarā pavattena musāvādena upasamhitam. Vibhūti vuccati visumbhāvo, tattha niyuttanti vebhūtikam, tadeva vebhūtiyam, pesuñnam. Tenāha "bhedakaravācan"ti. Karanuttariyalakkhanato sārambhato jātāti sārambhajā. Tassā pavattiākāradassanattham "tvam dussīlo"ti-ādi vuttam. Bahiddhākathā amanāpā, manāpāpi parassa cittavighātāvahattā karanuttariyapakkhiyamevāti dassento "tuyhan"ti-ādimāha. Vikkhepakathāpavattanti vikkhepakathāvasena pavattam. Jayapurekkhāro hutvāti attano jayam purakkhatvā. Yam kiñci na bhāsatīti yojanā. "Mantā"ti vuccati paññā, mantanam jānananti katvā. "Manta"ti idam "mantetva"ti imina samanattham nipatapadanti aha "upaparikkhitvā" ti. Yuttakathamevāti attano, suņantassa ca yuttarūpameva katham. Hadaye nidahitabbayuttanti atthasampattiya, byañjanasampattiya atthavedādipatilābhanimittattā citte thapetabbam, vimuttāyatanabhāvena manasi kātabbanti attho. Sabbangasampannāpi vācā akāle bhāsitā abhājane bhāsitā viya na atthāvahāti āha "yuttapattakālenā"ti. Ayañca caturangasamannagata

subhāsitavācā saccasambodhāvahāditāya sattānam mahiddhikā mahānisamsāti dassetum "evam bhāsitā hī"ti-ādi vuttam.

Sīlācāreti sīle ca ācāre ca parisuddhasīle ceva parisuddhamanosamācāre ca. Ṭhitoti patiṭṭhahanto. Saccaṁ etassa atthīti saccoti āha "saccakatho"ti. Esa nayo saddhoti etthāpi. Tenāha "saddhāsampanno"ti. "Nanu ca¹ heṭṭhā saccaṁ kathitamevā"ti kasmā vuttaṁ? Heṭṭhā hi vacīsamācāraṁ kathentena saccaṁ kathitaṁ, paṭipakkhapaṭikkhepavasena idha sīlaṁ kathentena taṁ paripuṇṇaṁ katvā dassetuṁ saccaṁ sarūpeneva kathitaṁ. "Puggalādhiṭṭhānāya kathāya ārabbhantarañcetaṁ, tathāpi saccaṁ vatvā anantarameva saccassa kathanaṁ punaruttaṁ hotīti parassa codanāvasaro mā hotū"ti tattha parihāraṁ dātukāmo "idha kasmā puna vuttan"ti āha. Heṭṭhā vācāsaccaṁ kathitaṁ caturaṅgasamannāgataṁ subhāsitavācaṁ dassentena. Antamaso -pa- dassetuṁ idha vuttaṁ "evaṁ sīlaṁ suparisuddhaṁ hotī"ti. Imasmiṁ panatthe "evaṁ parittakaṁ kho rāhula tesaṁ sāmaññaṁ, yesaṁ natthi sampajānamusāvāde lajjā"ti-ādi² nayappavattaṁ rāhulovādasuttaṁ dassetabbaṁ.

Guttā satikavāṭena pidahitā dvārā etenāti guttadvāroti āha "chasu indriyesū"ti-ādi. Pariyesanapaṭiggaṇhanaparibhogavissajjanavasena bhojane mattaṁ jānātīti bhojane mattaffiū. Samanti avisamaṁ. Samacāritā hi kāyavisamādīni pahāya kāyasamādipūraṇaṁ. Nisajjāyāti ettha iti-saddo ādiattho, tena "āvaraṇīyehi dhammehi cittaṁ parisodhetī"ti evamādiṁ saṅgaṇhāti. Bhāvanāya cittaparisodhanañhi jāgariyānuyogo, na niddāvinodanamattaṁ. Nittandīti vigatathinamiddho. Sā pana nittanditā kāyālasiyavigamane pākaṭā hotīti vuttaṁ "kāyālasiyavirahito"ti. "Āraddhavīriyo"ti iminā duvidhopi vīriyārambho gahitoti taṁ vibhajitvā dassetuṁ "kāyikavīriyenāpī"ti-ādi vuttaṁ. Saṅgamma gaṇavihāro sahavāso saṅgaṇikā, sā pana kilesehipi evaṁ hotīti tato visesetuṁ "gaṇasaṅgaṇikan"ti vuttaṁ gaṇena saṅgaṇikaṁ gaṇasaṅgaṇikanti. Ārambhavatthuvasenāti anadhigatavisesādhigamakāraṇavasena ekavihārī, na kevalaṁ ekībhāvavasena.

Kilesasaṅgaṇikanti kilesasahitacittataṁ. **Yathā tathā**tivipassanāvasena, paṭisaṅkhānavasena vā. Samathavasena **ārammaṇūpanijjhānaṁ.** Vipassanāvasena **lakkhaṇūpanijjhānaṁ.**

Kalyānapatibhānoti sundarapatibhāno, sā panassa patibhānasampadā vacanacāturiyasahitāva iechitāti āha "vākkarana -pa- sampanno cā"ti. "Patibhānan"ti hi ñānampi vuccati ñānassa upatthitavacanampi. Tattha atthayuttam kāranayuttam patibhānamassāti yuttapatibhāno. Pucchitānantarameva sīgham byākātum asamatthatāya no muttapatibhānamassāti nomuttapatibhāno. Idha pana vikinnavāco muttapaţibhāno adhippetoti adhippāyena "sīlasamācārasmim hi thitabhikkhu muttapatibhāno na hotī'ti vuttam. Gamanasamatthāyāti assutam dhammam gametum samatthāya. **Dhāranasamatthāyā**ti sātisayam sativīriyasahitatāya yathāsutam yathāpariyattam dhammam dhāretum samatthāya. Munanato anuminanato mutīti anumānapaññāya nāmam. Tīhi padehīti "gatimā dhitimā mutimā"ti tīhi padehi. **Hetthā**ti hetthā "āraddhavīriyo"ti vuttatthāne. **Idhā**ti "dhitimā"ti vuttatthāne. Vīriyampi hetthā gunabhūtam gahitanti vutto vāyamattho. **Hetthā**ti "jāgariyānuyogamanuyutto, jhāyī"ti ettha vipassanāpaññā kathitā. Idhāti "dhitimā mutimā"ti ettha buddhavacanaganhanapaññā kathitā karaṇapubbāparakosallapaññādīpanato. Kilesakāmopi vatthukāmo viya yathāpavatto assādīyatīti vuttam "vatthukāmakilesakāmesu agiddho"ti.

Anusāsanavidhādesanādivannanā

- 154. **Attano upāyamanasikārenā**ti attani sambhūtena pathamanasikārena bhāvanāmanasikārena. **Paṭipajjamāno**ti visuddhim paṭipajjamāno.
 - 155. Kilesavimuttiñāņeti kilesappahānajānane.
- 156. **Pariyādiyamāno**ti paricchijja gaņhantoti attho. **Suddhakkhandheyeva anussarati** nāmagottam pariyādiyitum asakkonto. Vuttamevattham vivaritum **"eko hī"**ti-ādi vuttam. **Sakkoti** pariyādiyitum.

Asakkontassa vasena gahitam, "amutrāsim evamnāmo"ti-ādi vuttanti attho. Asakkontassāti ca ārohane asakkontassa, orohane pana ñāṇassa thirabhūtattā¹. Tenāha "suddhakkhandheyeva anussaranto"ti-ādi. Etanti pubbāparavirodham. Na sallakkhesi diṭṭhābhinivesena kuṇṭhañāṇattā. Tenāha "diṭṭhigatikattā"ti. Ṭhānanti ekasmim pakkhe avaṭṭhānam. Niyamoti vādaniyamo patiniyatavādatā. Tenāha "imam gahetvā"ti-ādi.

- 157. Piṇḍagaṇanāyāti "ekaṁ dve"ti-ādinā agaṇetvā saṅkalanapaduppādanādinā piṇḍanavasena gaṇanāya. Acchiddakavasenāti avicchindakagaṇanāvasena gaṇanā kamagaṇanaṁ muñcitvā "imasmiṁ rukkhe ettakāni paṇṇānī"ti vā "imasmiṁ jalāsaye ettakāni udakāļhakānī"ti vā evaṁ gaṇetabbassa ekajjhampi piṇḍetvā gaṇanā. Kamagaṇanā hi antarantarā vicchijjapavattiyā pacchindikā. Sā panesā gaṇanā savanantaraṁ anapekkhitvā manasāva gaṇetabbato "manogaṇanā"tipi vuccatīti āha "manogaṇanāyā"ti. Piṇḍagaṇanameva dasseti, na vibhāgagaṇanaṁ. Saṅkhātuṁ na sakkā aññehi asaṅkhyeyyābhāvato. Paññāpāramiyā pūritabhāvaṁ dassento itarāsaṁ pūraṇena vinā tassā pūraṇaṁ natthīti "dasannaṁ pāramīnaṁ pūritattā"ti āha. Tenāha "sabbaññutaññāṇassa suppaṭividdhattā"ti. Ettakanti dassethāti dīpeti thero. Yaṁ pana pāḷiyaṁ "sākāraṁ sa-uddesaṁ anussaratī"ti vuttaṁ, taṁ tassa anussaraṇamattaṁ sandhāya vuttaṁ, na āyuno vassādigaṇanāya paricchindanaṁ tassa avisayabhāvato.
- 158. **Tumhākaṁ** sammāsambuddhānaṁ**yeva anuttarā** anaññasādhāraṇattā. Idāni tassā desanāya majjhe bhinnasuvaṇṇassa viya vibhāgābhāvaṁ dassetuṁ "atītabuddhāpī"ti-ādi vuttaṁ. **Imināpi kāraṇenā**ti anuttarabhāvena, aññehi buddhehi ekasadisabhāvena ca.
- 159. Āsavānam ārammaṇabhāvūpagamanena sāsavā. Upecca ādhīyantīti **upādhī**, dosāropanāni, saha upādhīhīti **sa-upādhikā**. Anariyiddhiyañhi attano cittadosena ekacce upārambham dadanti, svāyamattho **kevaṭṭasuttena** dīpetabbo. **No "ariyā"ti vuccati** sāsavabhāvato.

niddosehi khīṇāsavehi pavattetabbato **niddosā** dosehi saha appavattanato. Tato eva **anupārambhā**. Ariyānaṁ iddhīti **ariyiddhīti vuccati**.

Appaţikkūlasaññīti iṭṭhasaññī iṭṭhākārena pavattacitto. Paţikkūleti amanuññe aniṭṭhe. Dhātusaññanti "dhātuyo"ti saññam. Upasaṁharatīti upaneti pavatteti. Aniṭṭhasmiṁ vatthusminti aniṭṭhe sattasaññite ārammaṇe. Mettāya vā pharatīti mettaṁ hitesitaṁ upasaṁharanto sabbatthakameva taṁ tattha pharati. Dhātuto vā upasaṁharatīti dhammasabhāvacintanena dhātuso, paccavekkhaṇāya dhātumanasikāraṁ vā tattha pavatteti. Appaṭikkūlesatte ñātimittādike yāthāvato dhammasabhāvacintanena aniccasaññāya visabhāgabhūte "kesādi asucikoṭṭhāsamevā"ti asubhasaññaṁ pharati asubhamanasikāraṁ pavatteti. Chaṭaṅgupekkhāyāti iṭṭhāniṭṭhachaṭārammaṇāpāthe parisuddhapakatibhāvāvijahanalakkhaṇāya chasu dvāresu pavattanato "chaṭaṅgupekkhā"ti laddhanāmāya tatramajṭhattupekkhāya.

Taṁ desananti taṁ dvīsu iddhividhāsu desanappakāraṁ desanāvidhiṁ. Asesaṁ sakalanti asesaṁ niravasesaṁ sampuṇṇaṁ abhivisiṭṭhena ñāṇena jānāti. Asesaṁ abhijānato tato uttari abhiññeyyaṁ natthi. Itoti bhagavato abhiññātato. Añño paramatthavasena dhammo vā paññattivasena puggalo vā ayaṁ nāma yaṁ bhagavā na jānātīti idaṁ natthi na upalabbhati sabbasseva sammadeva tumhehi abhiññātattā. Dvīsu iddhividhāsu abhijānane, desanāyañca bhagavato uttaritaro natthi. Imināpīti pi-saddo na kevalaṁ vuttatthasamuccayattho, atha kho avuttatthasamuccayatthopi daṭṭhabbo. Yaṁ taṁ bhanteti-ādināpi hi bhagavato guṇadassanaṁ tasseva pasādassa kāraṇavibhāvanaṁ.

Aññathāsatthuguṇadassanādivaṇṇanā

160. Pubbe "etadānuttariyam bhante"ti-ādinā yathāvuttabuddhaguņā dassitā, tato añño evāyam pakāro "yam tam bhante"ti-ādinā āraddhoti āha "aparenāpi ākārenā"ti. Buddhānam sammāsambodhiyā saddahanato visesato saddhā kulaputtā nāma bodhisattā, mahābodhisattāti adhippāyo. Te hi mahābhinīhārato

paṭṭhāya mahābodhiyaṁ sattā āsattā laggā niyatabhāvūpagamanena kenaci asaṁhāriyabhāvato. Yato nesaṁ na kathañci tattha saddhāya aññathattaṁ hoti, eteneva tesaṁ kammaphalaṁ saddhāyapi aññathattābhāvo dīpito daṭṭhabbo. **Tasmā**ti yasmā atisayavacanicchāvasena, "anuppattaṁ taṁ bhagavatā"ti saddantarasannidhānena ca visiṭṭhavisayaṁ "saddhena kulaputtenā"ti idaṁ padaṁ, tasmā.

Lokuttaradhammasamadhigamamūlakattā sabbabuddhaguṇasamadhigamassa "nava lokuttaradhammā"ti vuttam. "Āraddhavīriyenā"ti-ādīsu samāsapadesu "vīriyam thāmo"ti ādīni avayavapadāni. Ādi-saddena parakkamapadam sangaṇhāti, na dhorayhapadam. Na hi tam vīriyavevacanam, atha kho vīriyavantavācakam. Dhurāya niyuttoti hi dhorayho. Tenāha "tam dhuram vahanasamatthena mahāpurisenā"ti. Paggahitavīriyenāti asithilavīriyena. Thiravīriyenāti ussoļhībhāvūpagamanena thirabhāvappattavīriyena. Asamadhurehīti anaññasādhāraṇadhurehi. Paresam asayhasahanā hi lokanāthā. Tam sabbam acinteyyāparimeyyabhedam buddhānam guṇajātam. Pāramitā, buddhaguṇā, veneyyasattāti yasmā idam tayam sabbesampi buddhānam samānameva, tasmā āha "atītānāgata -pa- ūno natthī"ti.

Kāmasukhallikānuyoganti kāmasukhe allīnā hutvā anuyuñjanam. Ko jānāti paralokam "atthī"ti, ettha "ko ekavisayoyam indriyagocaro"ti evamdiṭṭhi hutvāti adhippāyo. Sukhoti iṭṭho sukhāvaho. Paribbājikāyāti tāpasaparibbājikāya taruṇiyā. Mudukāyāti sukhumālāya. Lomasāyāti taruṇamudulomavatiyā. Moļibandhāhīti moļim katvā bandhakesāhi. Paricārentīti attano pāricārikam karonti, indriyāni vā tattha parito cārenti. Lāmakanti paṭikiliṭṭham. Gāmavāsīnam bālānam dhammam. Puthujjanānam idanti pothujjanikam. Yathā pana tam "puthujjanānam idan"ti vattabbatam labhati, tam dassetum "puthujjanehi sevitabban"ti āha. Anariyehi sevitabbanti vā anariyam. Yasmā pana niddosattho ariyattho, tasmā "anariyanti na niddosan"ti vuttam. Anatthasamyuttanti diṭṭhadhammikasamparāyikādivividhavipulānatthasañhitam. Attakilamathānuyoganti attano kilamathassa khedanassa anuyuñjana. Dukkham etassa atthīti dukkham. Dukkhamanam etassāti dukkhamam.

Ābhicetasikānanti abhiceto vuccati abhikkantam visuddham cittam, adhicittam vā, tasmim abhicetasi jātānīti ābhicetasikāni, abhicetosannissitāni vā. Ditthadhammasukhavihārānanti ditthadhamme sukhavihārānam, ditthadhammo vuccati paccakkho attabhāvo, tattha sukhavihārabhūtānanti attho, rūpāvacarajhānānametam adhivacanam. Tāni hi appetvā nisinnā jhāyino imasmimyeva attabhāve asamkilittham nekkhammasukham vindanti, tasmā "ditthadhammasukhavihārānī"ti vuccantīti. Kathitā "ditthadhammasukhavihāro"ti sappītikattā, lokuttaravipākasukhumasañhitattā ca. Saha maggena vipassanāpādakajihānam katitam "cattārome cunda sukhallikānuyogā ekantanibbidāyā"ti-ādinā¹. **Catutthajjhānikaphalasamāpattī**ti catutthajjhānikā phalasamāpatti ditthadhammasukhavihārabhāvena kathitā. Cattāri rūpāvacarāni "ditthadhammasukhavihārajjhānānī"ti kathitānīti attho. Nikāmalābhīti nikāmena lābhī attano icchāvasena lābhī. Icchiticchitakkhane samāpajjitum samatthoti attho. Tenāha "yathākāmalābhī"ti. Adukkhalābhīti sukheneva paccanīkadhammānam samucchinnattā samāpajjitum samattho. Akasiralābhīti akasirānam vipulānam lābhī, yathāparicchedeneva vutthātum samattho. Ekacco hi lābhīyeva hoti, na pana sakkoti icchiticchitakkhane samāpajjitum. Ekacco tathā samāpajjitum sakkoti, pāribandhake pana kicchena vikkhambheti. Ekacco tathā ca samāpajjati, paribandhake ca akiccheneva vikkhambheti, na sakkoti nālikayantam viya yathāparicchede vutthātum. Bhagavā pana sabbaso samucchinnapāribandhakattā vasibhāvassa sammadeva samadhigatattā sabbametam sammadeva sakkoti.

Anuyogadānappakāravaṇṇanā

161. **Dasasahassilokadhātuyā**ti imāya lokadhātuyā saddhim imam lokadhātum parivāretvā ṭhitāya dasasahassilokadhātuyā. Jātikhettabhāvena hi tam ekajjham gahetvā "ekissā lokadhātuyā"ti vuttam, tattakāya eva jātikhettabhāvo dhammatāvasena veditabbo. "Pariggahavasenā"ti keci. Sabbesampi buddhānam tattakam

eva jātikhettam. "Tannivāsīnamyeva ca devānam dhammābhisamayo"ti vadanti. Pakampanadevatūpasankamanādinā jātacakkavāļena samānayogakkhamaṭṭhānam **jātikhettam**. Saraseneva āṇāpavattanaṭṭhānam **āṇākhettam**. Buddhañāṇassa visayabhūtam ṭhānam **visaya khettam**. Okkamanādīnam channam eva gahaṇam nidassanamattam mahābhinīhārādikālepi tassa pakampanalabhanato. Āṇākhettam nāma, yam ekaccam samvaṭṭati, vivaṭṭati ca. Āṇā vattati tannivāsidevatānam sirasā sampaṭicchanena, tañca kho kevalam buddhānam ānubhāveneva, na adhippāyavasena. "yāvatā pana ākankheyyā"ti¹ vacanato tato parampi āṇā pavatteyyeva.

Nuppajjantīti pana atthīti "na me ācariyo atthi, sadiso me na vijjatī"ti² imissā lokadhātuyā ṭhatvā vadantena bhagavatā, imasmimyeva sutte "kim panāvuso Sāriputta atthetarahi añño samaņo vā brāhmaņo vā bhagavatā samasamo sambodhiyan"ti³ evam puṭṭho "aham bhante noti vadeyyan"ti³ vatvā tassa kāraṇam dassetum "aṭṭhānametam anavakāso, yam ekissā lokadhātuyā dve arahanto sammāsambuddhā"ti⁴ imam suttam dassentena dhammasenāpatinā ca buddhakhettabhūtam imam lokadhātum ṭhapetvā aññattha anuppatti vuttā hotīti adhippāyo.

Ekatoti saha, ekasmim kāleti attho. So pana kālo katham paricchinnoti? Carimabhave paṭisandhiggahaṇato paṭṭhāya yāva dhātuparinibbānanti dassento "tattha bodhipallaṅke"ti-ādimāha. Nisinnakālato paṭṭhāyāti paṭilomakkamena vadati. Khettapariggaho katova hoti "idam buddhānam jātikhettan"ti. Kena pana pariggaho kato? Uppajjamānena bodhisattena. Parinibbānato paṭṭhāyāti anupādisesāya nibbānadhātuyā parinibbānato paṭṭhāya. Etthantareti carimabhave bodhisattassa paṭisandhiggahaṇam, dhātuparinibbānanti imehi dvīhi paricchinne etasmim antare.

^{1.} Am 1. 229 pitthe.

^{2.} Ma 1. 227; Ma 2. 295; Vi 3. 12; Abhi 4. 218; Khu 11. 228, 230 pitthesu.

^{3.} Dī 3. 94 pitthe.

^{4.} Dī 3. 95; Ma 3. 110; Am 1. 29; Abhi 2. 348; Khu 10. 78; Khu 11. 231 pitthesu.

Tipiṭaka-antaradhānakathāvaṇṇanā

"Na nivāritā"ti vatvā tattha kāraṇam dassetum "tīṇi hī"ti-ādi vuttam. Paṭipatti-antaradhānena sāsanassa osakkitattā aparassa uppatti laddhāvasarā hoti. Paṭipadāti paṭivedhāvahā pubbabhāgapaṭipadā.

"Pariyatti pamāṇan"ti vatvā tamattham bodhisattam nidassanam katvā dassetum "yathā"ti-ādi vuttam. Tayidam hīnam nidassanam katanti daṭṭhabbam. Niyyānikadhammassa hi ṭhitim dassento aniyyānikadhammam nidasseti.

Mātikāya antarahitāyāti "yo pana bhikkhū"ti-ādi nayappavattāya sikkhāpadapāļimātikāya antarahitāya. Nidānuddesasankhāte pātimokkhe, pabbajjā-upasampadākammesu ca sāsanam tiṭṭhati, yathā vā pātimokkhe dharante eva pabbajjā, upasampadā ca, evam sati eva tadubhaye pātimokkham tadubhayābhāve pātimokkhābhāvato. Tasmā tayidam tayam sāsanassa ṭhitihetūti āha "pātimokkhapabbajjā-upasampadāsu ṭhitāsu sāsanam tiṭṭhatī"ti. Yasmā vā upasampadādhīnam pātimokkham anupasampannassa anicchitattā, upasampadā ca pabbajjādhīnā, tasmā pātimokkhe, tamsiddhiyā siddhāsu pabbajjupasampadāsu ca sāsanam tiṭṭhati. Osakkitam nāmāti pacchimakapaṭivedhasīlabhedadvayam ekato katvā tato param vinaṭṭham nāma hoti, pacchimakapaṭivedhato param paṭipattisāsanam vinaṭṭham nāma hotīti attho.

Sāsana-antarahitavannanā

Etena kāmam "sāsanaṭṭhitiyā pariyatti pamāṇan"ti vuttam, pariyatti pana paṭipattihetukāti paṭipattiyā asati sā appatiṭṭhā hoti paṭivedho viya, tasmā paṭipatti-antaradhānam sāsanosakkanassa visesakāraṇanti dassetvā tayidam sāsanosakkanam dhātuparinibbānosānanti dassetum "tīṇi parinibbānānī"ti-ādi vuttam. Dhātūnam sannipātanādi buddhānam adhitthānenevāti veditabbam.

Tāti rasmiyo. Kāruññanti paridevanakāruññam. Jambudīpe, dīpantaresu, devanāgabrahmalokesu ca vippakiritvā ṭhitānam dhātūnam mahābodhipallamkaṭṭhāne ekajjham sannipātanam, rasmivissajjanam, tattha tejodhātuyā uṭṭhānam, ekajālibhāvo cāti sabbametam Satthu adhiṭṭhānavasenevāti veditabbam.

Anacchariyattāti dvīsupi uppajjamānesu acchariyattābhāvadosatoti attho. Buddhā nāma majjhe bhinnasuvaṇṇam viya ekasadisāti tesam desanāpi ekarasā evāti āha "desanāya ca visesābhāvato"ti, etena ca anacchariyattameva sādheti. "Vivādabhāvato"ti etena vivādābhāvattham dve ekato na uppajjantīti dasseti.

Tatthāti milindapañhe¹. **Ekuddeso**ti² eko ekavidho abhinno uddeso. Sesapadesupi eseva nayo.

Ekam eva buddham dhāretīti ekabuddhadhāranī, etena evamsabhāvā ete buddhagunā, yena dutiyam buddhagunam dhāretum asamatthā ayam lokadhātūti dasseti. Paccayavisesanipphannānañhi dhammānam sabhāvaviseso na sakkā nivāretunti. "Na dhāreyyā"ti vatvā tameva adhāraṇam pariyāyehi pakāsento "caleyyā"ti-ādimāha. Tattha caleyyāti paripphandeyya. Kampeyyāti pavedheyya. Nameyyāti ekapassena natā bhaveyya. Oṇameyyāti osīdeyya. Vinameyyāti vividhā ito cito ca nameyya. Vikireyyāti vātena bhusamuṭṭhi viya vippakireyya. Vidhameyyāti vinasseyya. Viddhamseyyāti sabbaso viddhastā bhaveyya. Tathābhūtā ca na katthaci tiṭṭheyyāti āha "na ṭhānamupagaccheyyā"ti.

Idāni tattha nidassanam dassento "yathā mahārājā"ti-ādimāha. Tattha samupādikāti samam uddham pajjati pavattatīti samupādikā, udakassa upari samam gāminīti attho. Vaṇṇenāti saṇṭhānena. Pamāṇenāti ārohena. Kisathūlenāti kisathūlabhāvena, pariṇāhenāti attho. Dvinnampīti dvepi, dvinnampi vā sarīrabhāram.

Chādentanti rocentam rucim uppādentam. **Tandīkato**ti tena bhojanena tandībhūto. **Anonamitadandajāto**ti yāvadatthabhojanena onamitum

asamatthatāya anoṇamitadaṇḍo viya jāto. Sakiṁ bhuttovāti ekaṁ vaḍḍhitakaṁ bhuttamattova mareyyāti. Atidhammabhārenāti dhammena nāma pathavī tiṭṭheyya, sa kiṁ teneva calati vinassatīti adhippāyena pucchati. Puna thero ratanaṁ nāma loke kuṭumbaṁ sandhārentaṁ, abhimatañca lokena, taṁ attano garusabhāvatāya sakaṭabhaṅgassa kāraṇaṁ atibhārabhūtaṁ diṭṭhaṁ, evaṁ dhammo ca hitasukhavisesehi taṁsamaṅginaṁ dhārento, abhimato ca viññūnaṁ gambhīrappameyyabhāvena garusabhāvattā atibhārabhūto pathavicalanassa kāraṇaṁ hotīti dassento "idha mahārāja dve sakaṭā"ti-ādimāha, eteneva tathāgatassa mātukucchi-okkamanādikāle pathavikampanakāraṇaṁ saṁvaṇṇitanti daṭṭhabbaṁ. Ekassāti¹ ekasmā, ekassa vā sakaṭassa ratanaṁ tasmā sakaṭato gahetvāti attho.

Osāritanti uccāritam, kathitanti attho.

Aggoti sabbasattehi aggo.

Sabhāvapakatikāti sabhāvabhūtā akittimā pakatikā. Kāraṇamahantattāti kāraṇānam mahantatāya, mahantehi buddhakaradhammehi pāramisankhātehi kāraṇehi buddhaguṇānam nibbattitoti vuttam hoti. Pathavi ādīni mahantāni vatthūni, mahantā ca sakkabhāvādayo attano attano visaye ekekāva, evam sammāsambuddhopi mahanto attano visaye eko eva. Ko ca tassa visayo? Buddhabhūmi, yāvatakam vā ñeyyam. Evam "ākāso viya anantavisayo bhagavā eko eva hotī"ti vadanto "ekissā lokadhātuyā"ti vuttalokadhātuto aññesupi cakkavāļesu aparassa buddhassa abhāvam dasseti.

"Sammukhā metan"ti-ādinā pavattitam attano byākaraṇam aviparītatthatāya satthari pasāduppādanena sammāpaṭipajjamānassa anukkamena lokuttaradhammāvahampi hotīti āha "dhammassa -papaṭipadan"ti. Vādassa anupatanam anuppavatti vādānupātoti² āha "vādoyevā"ti.

^{1.} Ekasmāti (Atthakathāyam)

Acchariya-abbhutavannanā

162. **Udāyī**ti nāmam, mahāsarīratāya pana thero **mahā-udāyī**ti paññāyittha, yassa vasena vinaye nisīdanassa dasā anuññātā. **Pañcavaṇṇā**ti khuddikādibhedato pañcappakārā. Pītisamuṭṭhānehi paṇītarūpehi atibyāpitadeho "nirantaram pītiyā phuṭasarīro"ti vutto, tato evassā pariyāyato pharaṇalakkhaṇampi vuttam. **Appa**-saddo "appakasirenevā"tiādīsu¹ viya idha abhāvatthoti āha "appicchatāti nittaṇhatā"ti. **Tīhākārehī**ti yathālābhayathābalayathāsāruppappakārehi.

Na na katheti kathetiyeva. Cīvarādihetunti cīvaruppādādihetubhūtam payuttakatham na katheti. Veneyyavasenāti vinetabbapuggalavasena. Katheti "evamayam vinayam upagacchatī"ti. "Sabbābhibhū sabbavidūhamasmī"ti-ādikā² gāthāpi "dasabalasamannāgato bhikkhave tathāgato"ti-ādikā³ suttantāpi.

163. **Abhikkhaṇan**ti abhiṇhaṁ. **Niggāthakattā**, pucchanavissajjanavasena pavattitattā ca "**veyyākaraṇan**"ti vuttaṁ. Sesaṁ sabbaṁ suviññeyyamevāti.

Sumaṅgalavilāsiniyā dīghanikāyaṭṭhakathāya Sampasādanīyasuttavannanāya līnatthappakāsanā.

^{1.} Sam 2. 126; Sam 3. 47; Am 2. 494 pitthesu.

^{2.} Ma 1. 227; Ma 2. 295; Vi 3. 12; Abhi 4. 218; Khu 1. 64 pitthesu.

^{3.} Sam 1. 265, 266 pitthesu.

6. Pāsādikasutta

Niganthanātaputtakālamkiriyavannanā

164. Lakkhassa saravedham avirajjhitvāna vijjhanavidhim jānantīti vedhaññā. Tenāha "dhanumhi katasikkhā"ti. Sippam uggahaṇatthāyāti¹ dhanusippādisippassa uggahaṇatthāya. Majjhimena pamāṇena sarapātayogyatāvasena katattā dīghapāsādo.

Sampati kālam katoti acirakālam kato. Dvedhikajātāti jātadvedhikā sañjātabhedā. **Dvejjhajātā**ti duvidhabhāvappattā. Bhandanti paribhāsanti etenāti bhandanam, viruddhacittam. Tanti bhandanam. "Idam nahānādi na kattabban"ti paññattavattam pannatti. Dhammavinayanti pavacanam siddhantam. Vijihantā mukhasattīhi. Sahitam meti mayham vacanam sahitam silittham pubbaparasambandham atthayuttam karanayuttam. Tenaha "atthasañhitan"ti. Adhicinnanti ācinnam. Viparāvattanti virodhadassanavasena parāvattitam, parāvattam dūsitanti attho. Tenāha "cirakālavasena pagunam, tam mama vādam āgamma nivattan"ti. Pariyesamāno vicara tattha gantvā sikkhāti attho. Sace sakkosi, idāniyeva mayā vethitam dosam nibbethehi. **Maranamevā**ti aññamaññaghātanavasena maraņameva. Nāţaputtassa imeti nāṭaputtiyā, te pana tassa sissāti āha "antevāsikesū"ti. Purimapatipattito patinivattanam pativānam, tam rūpam sabhāvo etesanti pativānarūpā. Tenāha "nivattanasabhāvā"ti. Kathanam atthassa ācikkhanam. **Pavedanam** hetudāharanāni āharitvā bodhanam. Tenāha "duppavediteti duviññāpite"ti. Na upasamāya samvattatīti anupasamasamvattanam, tadeva anupasamasamvattanikam, tasmim. Samussitam hutvā patithāhetubhāvato thūpam, patithāti āha "bhinnathūpeti bhinnapatitthe"ti, thūpoti vā dhammassa niyyānabhāvo veditabbo aññe dhamme abhibhuyya samussitatthena, so niganthassa samaye. Kehici abhinnasammatopi bhinno vinattho eva sabbena sabbam abhāvatoti so bhinnathūpo, so eva niyyānabhāvo vattadukkhato muccitukāmānam patisaranam, tam ettha natthīti

appațisaraņo, tasmim bhinnathūpe appațisaraņeti evamettha attho veditabbo.

Ācariyappamāṇanti ācariyamuṭṭhi hutvā pamāṇabhūtam. Nānānīhārenāti nānākārena.

165. **Tatheva samudācarimsu** bhūtapubbagatiyā. **Sāmākānan**ti sāmākadhaññānam.

"Yenassa upajjhāyo"ti vatvā yathāssa āyasmato cundassa dhammabhaṇḍāgāriko upajjhāyo ahosi, taṁ vitthārena dassetuṁ "Buddhakāle kirā"ti-ādi vuttaṁ. Tattha buddhakāleti bhūtakathanametaṁ, na visesanaṁ. Satthu parinibbānato puretarameva hi dhammasenāpati parinibbuto.

Dhammaratanapūjāvannanā

Saddhivihārikam adāsīti saddhivihārikam katvā adāsi.

Kathāya mūlanti bhagavato santikā labhitabbadhammakathāya kāraṇaṁ. Samuṭṭhāpetīti uṭṭhāpeti, dāliddiyapaṅkato uddharatīti adhippāyo. Sandhamanti sammadeva dhamanto. Ekekasmiṁ pahāreyeva tayo tayo vāre katvā divā navavāre rattiṁ navavāre. Upaṭṭhānameva gacchati buddhupaṭṭhānavasena, pañhāpucchanādivasena pana antarantarāpi gacchateva, gacchanto ca divasassa -pa- gacchati. Ñātuṁ icchitassa atthassa uddharaṇabhāvato pañhova pañhuddhāro, taṁ gahetvāva gacchati attano mahāpaññatāya, satthu ca dhammadesanāyaṁ akilāsubhāvato.

$A samm \overline{a} sambuddhappaveditadhammavinayava \underline{n} \underline{n} a \underline{n} \overline{a}$

166. Ārocitepi tasmim atthe. Sāmiko hoti, tassa sāmikabhāvam dassetum "sova tassā ādimajjhapariyosānam jānātī"ti āha. Evanti vacanasampaṭicchanam. Cundattherena hi ānītam kathāpābhatam bhagavā sampaṭicchanto "evan"ti āha. "Evan"ti durakkhāte dhammavinaye sāvakānam dvedhikādibhāvena viharaṇakiriyāparāmasanañhetam.

Yasmā -pa- pākaṭaṁ hoti byatirekamukhena ca neyyassa atthassa vibhūtabhāvāpattito. Atha vā yasmā -pa- pākaṭaṁ hoti dosesu ādīnavadassanena tappaṭipakkhesu guṇesu ānisasassa vibhūtabhāvāpattito. Vokkammāti apasakketvā. Āmeḍitalopena cāyaṁ niddeso, vokkamma vokkammāti vuttaṁ hoti, tena tassa vokkamanassa antarantarāti ayamattho labbhatīti āha "na nirantaran"ti-ādi. Dhammānudhammapaṭipatti-ādayoti tena satthārā vuttamuttidhammassa anudhammaṁ appaṭipajjanādayo. Ādisaddena pāḷiyaṁ āgatā asāmīcipaṭipadādayo ca saṅgayhanti. Manussattampīti pi-saddena "vicāraṇapaññāya asambhavo, dosesu anabhinivesitā, asandiṭṭhiparāmāsitā"ti evamādīnaṁ saṅgaho daṭṭhabbo. "Tathā evan"ti padehi yathākkamaṁ pakārassa kāmaṁ tirokkhatā, paccakkhatā vuccati, tathāpi yathā "tathā paṭipajjatū"ti padena paṭipajjanākāro niyametvā vihito, tathā "evaṁ paṭipajjatū"ti imināpīti idaṁ tassa atthadassanabhāvena vuttaṁ. Samādapitattā micchāpaṭipadāya apuññaṁ pasavati.

167. Ñāyati muttidhammo etenāti **ñāyo**, tena satthārā vutto dhammānudhammo, tam paṭipannoti **ñāyappaṭipanno**, so pana yasmā tassa muttidhammassa adhigame kāraṇasammato, tasmā vuttam **"kāraṇappaṭipanno"**ti. **Nipphādessatī**ti sādhessati, siddhim gamissatīti vuttam hoti. **Dukkhanibbattakan**ti sampati, āyatiñca dukkhassa nibbattakam. **Vīriyam karoti** micchāpaṭipannattā.

Sammāsambuddhappaveditadhammavinayādivannanā

- 168. Niyyātīti vattati, samvattatīti vā attho.
- 170. Idha sāvakassa sammāpaṭipattiyā ekantika-apassayadassanatthaṁ Satthu Sammāsambuddhatā, dhammassa ca svākkhātatā kittitāti "sammāpaṭipannassa kulaputtassa pasaṁsaṁ dassetvā"ti vuttaṁ. Evañhi imissā desanāya saṁkilesabhāgiyabhāvena uṭṭhitāya vodānabhāgiyabhāvena yathānusandhinā pavatti dīpitā hoti. Abodhitatthāti appaveditatthā, paramatthaṁ catutthasaccapaṭivedhaṁ apāpitāti attho. Pāḷiyaṁ "assā"ti padaṁ "sāvakā

saddhamme"ti dvīhi padehi yojetabbam "assa Sammāsambuddhassa sāvakā, assa saddhamme"ti. Sabbasangahapadehi katanti sabbassa sāsanatthassa sanganhanapadehi ekajiham katam. Tenaha "sabbasangahikam katam na hotīti attho"ti. Pubbenāparam sambandhatthabhāvena sangahetabbatāya vā sangahāni padāni katāni etassāti sangahapadakatam, brahmacariyam. Tappatikkhepena na ca sangahapadakatanti yojanā. Rāgādipatipakkhaharanam, yathānusittham vā patipajjamānānam vattadukkhato patiharanam nibbānapāpanam patihāro, so eva ākārassa ikāram katvā patihiro, patihiro eva pātihiro, saha pātihirenāti sappātihiram, tathā suppaveditatāya sappātihiram katanti sappātihirakatam¹. Tādisam pana vattato niyyāne niyuttam, niyyānappayojananca hotīti āha "niyyānikan"ti. Devalokatoti devalokato patthāya rūpīdevanikāyato pabhuti. Suppakāsitanti sutthu pakāsitam. Yāva devamanussehīti vā yāva devamanussehi yattakā devā, manussā ca, tāva te sabbe abhibyāpetvā suppakāsitam. Anutāpāya hotīti anutappo, so pana anutāpam karonto viya hotīti vuttam "anutāpakaro hotī"ti.

- 172. **Thiro**ti ṭhitadhammo kenaci asamhāriyo, asekkhā sīlakkhandhādayo therakārakā dhammā.
- 173. **Yogehi khemattā**ti yogehi anupaddutattā. **Saddhammassā**ti assa saddhammassa. **Assā**ti ca assa satthuno.
- 174. Upāsakā brahmacārino nāma visesato anāgāmino. Sotāpannasakadāgāminopi tādisā tathā vuccantīti "brahmacariyavāsam vasamānā ariyasāvakā" icceva vuttam.
- 176. **Sabbakāraņasampannan**ti yattakehi kāraņehi sampannam nāma hoti, tehi sabbehi kāraņehi sampannam sampattam upagatam paripuņņam, samannāgatam vā. **Imameva dhamman**ti imameva sāsanadhammam.

Udakena padesaññunā attano paññāveyyattiyataṁ dassetuṁ aniyyānike atthe payuttaṁ paheļikasadisaṁ vacanaṁ, bhagavatā attano Sabbaññutāya niyyānike atthe yojetvā dassetuṁ "udako sudan"ti-ādi vuttanti taṁ dassetuṁ "so kirā"ti-ādimāha.

Sangāyitabbadhammādivannanā

- 177. Saṅgamma samāgammāti tasmimyeva ṭhāne labbhamānānam gativasena saṅgamma ṭhānantarato pakkosanena samāgatānam vasena samāgamma. Tenāha "saṅgantvā samāgantvā"ti. Atthena atthanti padantare āgata-atthena saha tattha tattha āgatam attha. Byañjanena byañjananti etthāpi eseva nayo. Samānentehīti samānam karontehi, opammam vā ānentehi. Saṅgāyitabbanti sammadeva gāyitabbam kathetabbam, tam pana saṅgāyanam vācanāmaggoti āha "vācetabban"ti.
- 178. Tassa vā bhāsiteti tassa bhikkhuno bhāsite atthe ceva byañjane ca. Atthamicchāgahaṇaropanāni yathā honti, taṁ dassetuṁ "cattāro satipaṭṭhānā"ti-ādi vuttaṁ. Ārammaṇaṁ "satipaṭṭhānan"ti gaṇhāti, na satiyeva "satipaṭṭhānan"ti. "Satipaṭṭhānānī"ti byañjanaṁ ropeti tasmiṁ atthe, na "satipaṭṭhānā"ti. Upapannatarānīti yuttatarāni. Allīnatarānīti siliṭṭhatarāni. Yā cevāti liṅgavipallāsena vuttaṁ, vibhattilopena vā. Puna yā cevāti liṅgavipallāseneva niddeso. Neva ussādetabboti na ukkaṁsetabbo virajjhitvā vuttattā. Na apasādetabboti na santajjetabbo vivādapariharaṇatthaṁ. Dhāraṇatthanti upadhāraṇatthaṁ sallakkhaṇatthaṁ.
- 181. Atthena upetanti aviparītena atthena upetam tam "ayamettha attho"ti upecca paṭijānitvā ṭhitam. Tathārūpo ca tassa bujjhitā nāma hotīti āha "atthassa viññātāran"ti. Evam etam bhikkhum pasamsathāti vuttanayena dhammabhāṇakam amum bhikkhum "evam lābhā no āvuso"ti-ādi ākārena pasamsatha. Idānissa pasamsabhāvam dassetum "eso hī"ti-ādi vuttam. Esāti pariyattidhammassa satthukiccakaraṇato, tattha cassa sammadeva avaṭṭhikabhāvato "Buddho nāma

esā"ti vutto. "Lābhā no"ti-ādinā cassa bhikkhūnam piyagarubhāvam vibhāvento satthā tam attano ṭhāne ṭhapesīti vutto.

Paccayānuññātakāraṇādivaṇṇanā

182. **Tatopi uttaritaran**ti yā pubbe sammāpatipannassa bhikkhuno pasamsanavasena "idha pana cunda satthā ca hoti Sammāsambuddho"tiādinā¹ pavattitadesanāya upari "idha cunda satthā ca loke udapādī"ti-ādinā² desanā vaddhitā. Tatopi uttaritaram savisesam desanam vaddhento "paccaya hetū"ti-ādimāha. Tattha paccayahetūti paccayasamvattanahetu. Uppajjanakā **āsavā**ti paccayānam pariyesanahetu ceva paribhogahetu ca uppajjanakā kāmāsavādayo. tesam ditthadhammikānam āsavānam "idha bhikkhave ariyasāvako micchā-ājīvam pahāya sammā-ājīvena jīvitam kappetī"ti³, "idha bhikkhave bhikkhu patisankhā yoniso cīvaram patisevatī''ti-ādinā⁴ ca sammāpatipattim upadisanto bhagavā patighātāya dhammam deseti nāma. "Yo tumhesu pāliyā atthabyanjanāni micchā ganhāti, so neva ussādetabbo, na apasādetabbo, sādhukam saññāpetabbo tasseva atthassa nisantiyā"ti evam pariyattidhamme micchāpatipanne sammāpatipattiyam bhikkhū niyojento bhagavā bhandanahetu uppajjanakānam samparāyikānam āsavānam patighātāya dhammam deseti nāma. Yathā te na pavisantīti te āsavā attano cittasantānam yathā na otaranti. Mūlaghātena paţihananāyāti yathā mūlaghāto hoti, evam mūlaghātavasena pajahanāya. Tanti cīvaram. Yathā cīvaram idamatthikatam eva upādāya anuññātam, evam pindapātādayopi.

Sukhallikānuyogādivannanā

183. **Sukhitan**ti sañjātasukham. **Pīṇitan**ti dhātam suhitam. Tathābhūto pana yasmā thūlasarīro hoti, tasmā "thūlam karotī"ti vuttam.

^{1.} Dī 3. 99, 100 pitthesu.

^{3.} Sam 3. 8 pitthe.

^{2.} Dī 3. 100, 101 piṭṭhesu.

^{4.} Ma 1. 12; Am 2. 341 pitthesu.

anavaṭṭhānabhāvāti anavaṭṭhitasabhāvā, evarūpāya kathāya anavaṭṭhānabhāvato sabhāvopi tesaṁ anavaṭṭhitoti adhippāyo. Tenāha "jivhā no atthī"ti-ādi. Kāmaṁ "pañcahi cakkhūhī"ti vuttaṁ, aggahitaggahaṇena pana cattāri cakkhūni veditabbāni. Sabbaññutaññāṇañhi samantacakkhūti. Tassa vā ñeyyadhammesu jānanavasena pavattiṁ upādāya "jānatā"ti vuttaṁ. Hatthāmalakaṁ viya paccakkhato dassanavasena pavattiṁ upādāya "passatā"ti vuttaṁ. Nemaṁ vuccati thambhādīhi anupaviṭṭhabhūmippadesoti āha "gambhīrabhūmiṁ anupaviṭṭho"ti. Suṭṭhu nikhātoti bhūmiṁ nikhanitvā sammadeva ṭhapito. Tasminti khīṇāsave. Anajjhācāro acalo asampavedhī, yasmā ajjhācāro setughāto khīṇāsavānaṁ. Sotāpannādayoti ettha ādisaddena gahitesu anāgāmino tāva navasupi ṭhānesu khīṇāsavā viya abhabbā, sotāpannasakadāgāmino pana "tatiyapañcamaṭṭhānesu abhabbā"ti na vattabbā, itaresu sattasu ṭhānesu abhabbāva.

Pañhabyākaraņavannanā

187. Gihibyañjanenāti gihilingena. Khīṇāsavo pana gihibyañjanena arahattam pattopi na tiṭṭhati vivekaṭṭhānassa abhāvāti adhippāyo. Tassa vasenāti bhummadevattabhāve ṭhatvā arahattappattassa vasena. Ayam pañhoti "abhabbo so nava ṭhānāni ajjhācaritun"ti ayam pañho āgato itarassa pabbajjāya, parinibbānena vā abhabbatāya avuttasiddhattā. Yadi evam katham bhikkhu gahaṇanti āha "bhinnadosattā"ti-ādi. Aparicchedanti apariyantam, tayidam suvipulanti āha "mahantan"ti. Ñeyyassa hi vipulatāya ñāṇassa vipulatā veditabbā, etena "aparicchedan"ti vuccamānampi ñeyyam satthu ñāṇassa vasena paricchedamevāti dassitam hoti. Vuttañhetam "ñāṇapariyantikam neyyan"ti¹. Anāgate apaññāpananti anāgate visaye ñāṇassa apaññāpanam. "Paccakkham viya katvā"ti kasmā viyasaddaggahaṇam katam, nanu buddhānam sabbampi ñāṇam attano visayam paccakkhameva katvā pavattati ekappamāṇabhāvatoti? Saccametam, "akkhan"ti pana cakkhādi-indriyam vuccati, tam akkham pati vattatīti cakkhādinissitam viññāṇam,

tassa ca ārammaṇam "paccakkhan"ti loke niruļhametanti tam nidassanam katvā dassento "paccakkham viya katvā"ti avoca, na pana bhagavato ñāṇassa appaccakkhākārena pavattanato. Tathā hi vadanti—

"Āvibhūtam pakāsanam, anupaddutacetasam. Atītānāgate ñāṇam, paccakkhānam vasissatī"ti.

Aññattha vihitakenāti aññasmim visaye pavattitena. Saṅgāhetabbanti samam katvā kathayitabbam, kathanam pana paññāpanam nāma hotīti paññāpetabbanti attho vutto. Tādisanti satatam samitam pavattakam. Ñāṇam nāma natthīti āvajjanena vinā ñāṇuppattiyā asambhavato. Ekākārena ca ñāṇe pavattamāne nānākārassa visayassa avabodho na siyā. Athāpi siyā, anirupitarūpeneva avabodho siyā, tena ca ñāṇam ñeyyam aññātasadisameva siyā. Na hi "idam tan"ti vivekena anavabuddho attho ñāto nāma hoti, tasmā "carato ca tiṭṭhato cā"ti-ādi bālalāpanamattam. Tenāha "yathariva bālā abyattā, evam maññantī"ti.

Satim anussaratīti **satānusāri**, sativānuvattanavasena pavattañānam. Tenāha "pubbenivāsānussatisampavuttakan"ti. Nanam pesesīti nanam pavattesi. Sabbatthakameva ñeyyāvaranassa suppahīnattā appatihatam anivāritam nāṇam gacchati pavattaticceva attho. "Bodhi vuccati catūsu maggesu ñānan"ti¹ vacanato catumaggañānam **bodhi**, tato tassa adhigatattā uppajjanakam paccavekkhanañānam "bodhijam ñānam uppajjatī"ti vuttam. Bodhijam Bodhimule jatam catumaggañanam, tañca kho anagatam arabbha uddissa tassa appavatti-attham tathagatassa uppajjati tassa uppannatta āyatim punabbhavābhāvato. Katham Tathāgato anāgatamaddhānam ārabbha atīrakam nānadassanam pannāpetīti? Atītassa pana addhuno mahantatāya atīrakam² ñāṇadassanam tattha paññāpetīti ko ettha virodho. Titthiyā pana imamattham yathavato ajananta "tayidam kimsu, tayidam kathamsu"ti attano aññanameva pakatam karonti, tasma bhagavata sasantatipariyāpannadhammappavattim sandhāya "aññavihitakam ñāṇadassanan"ti-ādi vuttam. Itaram pana sandhāya vuccamāne sati tathārūpe payojane anagatampi

addhānam ārabbha atīrakameva ñāṇadassanam paññāpeyya bhagavāti anatthasamhitanti ayamettha atthoti āha "na idhalokattham vā paralokattham vā nissitan"ti. Yam pana sattānam anatthāvahattā anatthasañhitam, tattha setughāto tathāgatassa.

"Bhāratayuddhasītāharaṇasadisan" ti iminā tassā kathāya yebhuyyena abhūtatthatam dīpeti. Sahetukanti ñāpakena hetunā sahetukam. So pana hetu yena nidassanena sādhīyati, tam tassa kāraṇanti tena sakāraṇam katvā. Yathā hi paṭiññātatthasādhanato hetu, evam sādhakam nidassananti. Yuttapattakāleyevāti yuttānam pattakāle eva. Ye hi veneyyā tassā kathāya yuttā anucchavikā, tesamyeva yojane sandhāya vā kathāya patto upakārāvaho kālo, tadā eva kathetīti attho.

188. "Tathā tatheva gadanato" ti iminā "tathāgato" ti āmeditalopenāyam niddesoti dasseti, tathā tathevāti ca dhamma-atthasabhāvānurūpam, veneyyajjhāsayānurūpamcāti adhippāyo. Diṭṭhanti rūpāyatanam daṭṭhabbato, tena yam diṭṭham, yam dissati, yam dakkhati, yam sati samavāye passeyyam, tam sabbam "diṭṭhan" tveva gahitam kālavisesassa anāmaṭṭhabhāvato. "Sutan" ti-ādīsupi eseva nayo. Sutanti saddāyatanam sotabbato. Mutanti sanissayena ghānādi-indriyena sayam patvā pāpuṇitvā gahetabbam. Tenāha "patvā gahetabbato" ti. Viññātanti vijānitabbam, tam pana diṭṭhādivinimuttam viññeyyanti āha

"sukhadukkhādidhammāyatanan"ti. Pattanti yathā tathā pattam, hatthagatam adhigatanti attho. Tenāha "pariyesitvā vā apariyesitvā vā"ti. Pariyesitanti pattiyā attham pariyiṭṭham, tam pana pattam vā siyā appattam vā ubhayathāpi pariyesitamevāti āha "pattam vā appattam vā"ti. Padadvayenāpi dvippakārampi pattam, dvippakārampi pariyesitam, tena tena pakārena tathāgatena abhisambuddhanti dasseti. Cittena anusancaritanti copanam apāpetvā citteneva anusamcaritam, pari vitakkitanti attho. Pītakanti-ādīti ādi-saddena lohitaka-odātādisabbam rūpārammaṇavibhāgam saṅgaṇhāti. Sumanoti rāgavasena, lobhavasenak, saddhādivasena vā sumano. Dummanoti byāpādavitakkavasena, vihimsāvitakkavasena vā dummano. Majihattoti aññānavasena vā

ñāṇavasena vā majjhatto. Eseva nayo sabbattha. Tattha tattha **ādi-**saddena saṅkhasaddo paṇavasaddo, pattagandho pupphagandho, pattaraso phalaraso, upādinnaṁ anupādinnaṁ, majjhattavedanā kusalakammaṁ akusalakammanti evamādīnaṁ saṅgaho datthabbo.

Appattanti ñāṇena asampattaṁ, aviditanti attho. Tenāha "ñāṇena asacchikatan"ti. Tatheva gatattāti tatheva ñātattā abhisambuddhattā. Gatasaddena ekatthaṁ buddhi-atthanti attho. "Gati-atthā hi dhātavo buddhi-atthā bhavantī"ti akkharacintakā.

Abyākatatthānādivannanā

189. "Asamatam kathetvā"ti vatvā samopi nāma koci natthi, kuto uttaritaroti dassetum "anuttaratan"ti vuttam. Sā panāyam asamatā, anuttaratā ca sabbañnutam pūretvā thitāti dassetum "sabbañnutam"ti vutam. Sā sabbañnutā saddhammavaracakkavattibhāvena loke pākaṭā jātāti dassetum "dhammarājabhāvam kathetvā"ti vuttam. Tathā sabbannubhāvena ca satthā imesu diṭṭhigatavipallāsesu evam paṭipajjatīti dassento "idānī"ti-ādimāha. Tattha sīhanādamti abhītanādam seṭṭhanādam. Seṭṭhanādo hesa, yadidam ṭhapanīyassa pañhassa ṭhapanīyabhāvadassanam. Ṭhapanīyatā cassa pāṭiāruļhā eva "na hetan"ti-ādinā. Yathā upacitakammakilesena itthattam āgantabbam, tathā nam āgatoti Tathāgato, satto. Tathā hi so rūpādīsu satto visattoti katvā "satto"ti ca vuccati. Itthattanti ca paṭiladdhattā tathā paccakkhabhūto attabhāvoti veditabbo.

"Atthasamhitam na hotī"ti iminā ubhayattha vidhuratādassanena niratthakavippalāpatam tassa vādassa vibhāveti, ubhayalokatthavidhurampi samānam "kim nu kho vivaṭṭanissitan"ti koci āsankeyyāti tadāsankānivattanattham "na ca dhammasamhitan"ti vuttam. Tenāha "navalokuttaradhammanissitam na hotī"ti. Yadipi tam na vivaṭṭogatam hoti, vivaṭṭassa pana adhiṭṭhānabhūtam nu khoti koci āsankeyyāti tadāsankānivattanattham "na ādibrahmacariyakan"ti-ādi vuttam.

190. Kāmam tanhāpi dukkhasabhāvattā "dukkhan"ti byākātabbā, pabhavabhāvena pana sā tato visum kātabbāti "tanham thapetvā"ti vuttam. Tenāha "tasseva dukkhassa pabhāvikā"ti-ādi. Nanu ca avijjādayopi dukkhassa samudayoti? Saccam samudayo, tassa pana kammassa vicittabhāvahetuto, dukkhuppādane visesapaccayabhāvato ca sātisayo samudayatthoti sā eva suttesu tathā vuttā. Tenāha "tanhā dukkhasamudayoti byākatan"ti. Ubhinnam appavattīti dukkhasamudayānam appavattinimittam. "Dukkhaparijānano" ti-ādi maggakiccadassanam, tena maggassa bhāvanatthopi atthato dassitovāti datthabbam. Na hi bhāvanābhisamayena vinā pariññābhisamayādayo sambhavantīti. Saccavavatthāpanam appamādapatipattibhāvato asammohakalyānakittisaddādinimittatāya yathā sātisayam idhalokatthāvaham, evam yāva ñānassa tikkhavisadabhāvappattiyā abhāvena navalokuttaradhammasampāpakam na hoti, tāva tattha tattha sampattibhave abbhudayasampatti anugatameva siyāti vuttam "etam idhalokaparalokatthanissitan"ti. Navalokuttaradhammanissitanti navavidhampi lokuttaradhammam nissaya pavattam tadadhigamūpāyabhāvato. Yasmā saccasambodham uddissa sāsanabrahmacariyam vussati, na aññadattham, tasmā etam saccavavatthāpanam "ādi padhānan"ti vuttam pathamataram citte ādātabbato.

Pubbantasahagatadiṭṭhinissayavaṇṇanā

191. Taṁ mayā byākatamevāti taṁ mayā tathā byākatameva, byākātabbaṁ nāma mayā abyākataṁ natthīti byākaraṇāvekallena attano dhammasudhammatāya buddhasubuddhataṁ vibhāveti. Tenāha "sīhanādaṁ nadanto"ti. Purimuppannā diṭṭhiyo aparāparuppannānaṁ diṭṭhīnaṁ avassayā hontīti "diṭṭhiyova diṭṭhinissayā"ti vuttaṁ. Diṭṭhigatikāti diṭṭhigatiyo, diṭṭhippavattiyoti attho. Idameva dassanaṁ saccanti "sassato attā ca loko cā"ti idameva dassanaṁ saccaṁ amoghaṁ aviparītaṁ. Aññesaṁ vacanaṁ moghanti "asassato attā ca loko cā"ti evamādikaṁ aññesaṁ samaṇabrāhmaṇānaṁ vacanaṁ moghaṁ tucchaṁ, micchāti attho. Na sayaṁ kātabboti asayaṁkāroti āha "asayaṁkato"ti, yādicchikattāti adhippāyo.

192. **Atthi kho**ti¹ ettha **kho**-saddo pucchāyam, atthi nūti ayamettha atthoti āha "atthi kho¹ idam āvuso vuccatī"ti-ādi. Āvuso vam tumhehi "sassato attā ca loko cā"ti vuccati, idamatthi kho idam vācāmattam, no natthi, tasmā vācāvatthumattato tassa yam kho te evamāhamsu "idameva saccam moghamaññan"ti, tam tesam nānujānāmīti evamettha attho ca yojanā ca veditabbā. Yam panettha vattabbam, tam **Brahmajālatīkāyam**² vuttameva. Ditthipaññattiyāti ditthiyā paññāpane "evamesā ditthi uppannā"ti tassā ditthiyā samudayato, atthangamato, assādato, ādīnavato, nissaranato ca yāthāvato paññāpane. Aviparītavuttiyā samena ñānena samam kañci neva samanupassāmi. Adhipaññattīti abhiññeyyadhammapaññāpanā. Yam ajānantā bāhirakā ditthipaññattiyeva allīnāti tañca paññattito ajānantā thāmasā parāmāsā abhinivissa voharanti. Ettha ca yāyam "ditthipaññatti nāmā"ti vuttā ditthiyā ditthigatikehi evam gahitatāya vibhāvanā³, tattha ca bhagavato uttaritaro nāma koci natthi, svāyamattho **brahmajāle**⁴ vibhāvito eva. "Adhipaññattī"ti vuttā pana vibhāviyamānā lokassa nibbidāhetubhāvena bahulīkārāti tassā vasena bhagavā anuttarabhāvam pavedento 'neva attanā samasamam samanupassāmī'ti sīhanādam nadī''ti keci. Atthakathāyam⁵ pana "yañca vuttam 'paññattiya'ti yañca 'adhipaññattī'ti, ubhayametam atthato ekan"ti "idha pana paññattiyāti etthāpi paññatti ceva adhipaññatti ca adhippetā, adhipaññattīti etthāpī"ti ca vuttā, ubhayassapi vasenettha bhagavā sīhanādam nadīti viññāyati. Ubhayampetam atthato ekanti ca paññattibhāvasāmaññam sandhāya vuttam, na bhedābhāvato. Tenāha "bhedato hī"ti-ādi. Khandhapaññattīti khandhānam "khandhā"ti paññāpanā dassanā pakāsanā thapanā nikkhipanā. "Ācikkhati dasseti paññāpeti paṭṭhapetī''ti⁶ āgataṭṭhāne hi paññāpanā dassanā pakāsanā **paññatti** nāma, "supaññattam mañcapīthan"ti⁷ āgatatthāne thapanā nikkhipanā **paññatti** nāma idha ubhayampi yujjati.

^{1.} Atthi nu kho (Pāliyam, Atthakathāyanca)

^{3.} Gahitākāravibhāvanā (Ka) 4. Dī-Ţtha 1. 97 pitthe.

^{6.} Sam 1. 264, 367 pitthesu.

^{2.} Dī-Tī 1. 142 pitthe.

^{5.} Dī-Ttha 3. 100 pitthe.

^{7.} Vi 1. 172 pitthe.

Diţţhinissayappahānavannanā

196. Pajahanatthanti accantāya paṭinissajjanattham. Yasmā tena pajahanena sabbe diṭṭhinissayā sammadeva atikkantā honti vītikkantā, tasmā "samatikkamāyāti tasseva vevacanan"ti avoca. Na kevalam satipaṭṭhānā kathitamattā, atha kho veneyyasantāne patiṭṭhāpitāti dassetum "desitā"ti vatvā "paññattā"ti vuttanti āha "desitāti kathitā. Paññattāti ṭhapitā"ti. Idāni satipaṭṭhānadesanāya diṭṭhinissayānam ekantikam pahānāvahabhāvam dassetum "satipaṭṭhānabhāvanāya hī"ti-ādi vuttam. Tattha "satipaṭṭhānabhāvanāyā"ti iminā tesam bhāvanāya eva nesam pahānam, desanā pana tadupanissayabhāvato tathā vuttāti dasseti. Sesam sabbam suviññeyyamevāti.

Sumangalavilāsiniyā dīghanikāyaṭṭhakathāya Pāsādikasuttavaṇṇanāya līnatthappakāsanā.

7. Lakkhanasutta

Dvattimsamahāpurisalakkhaṇavaṇṇanā

- 199. Abhinīhārādiguņamahattena mahanto purisoti **mahāpuriso**, so lakkhīyati etehīti **mahāpurisalakkhaṇāni**. Tam mahāpurisam byañjayanti pakāsentīti **mahāpurisabyañjanāni**. Mahāpuriso nimīyati anumīyati etehīti **mahāpurisanimittāni**. Tenāha "ayam -pa- kāraṇānī"ti.
- 200. **Dhārentī**ti lakkhaṇapāṭhaṁ dhārenti, tena lakkhaṇāni te sarūpato jānanti, na pana samuṭṭhānatoti dasseti. Tenāha "no ca kho"ti-ādi, tena anaññasādhāraṇametaṁ, yadidaṁ mahāpurisalakkhaṇānaṁ kāraṇavibhāvananti dasseti. **Kasmā āhā**ti yathāvuttassa suttassa samuṭṭhānakāraṇaṁ pucchati, ācariyo "aṭṭhuppattiyā anurūpattā"ti vatvā tamevassa aṭṭhuppattiṁ vitthārato dassetuṁ "sā panā"ti-ādimāha. **Sabbapāliphullo**ti sabbaso samantato vikasitapuppho. Vikasanameva hi pupphassa nipphatti. **Pāricchattako viyā**ti anussavaladdhamattaṁ gahetvā vadanti. **Uppajjatī**ti labbhati, nibbattatīti attho.

Yena kammenāti yena kusalakammunā. Yaṁ nibbattanti yaṁ yaṁ lakkhaṇaṁ nibbattaṁ. Dassanatthanti tassa tassa kusalakammassa sarūpato, kiccato, pavatti-ākāravisesato, paccayato, phalavisesato ca dassanatthaṁ eteneva paṭipāṭiyā uddiṭṭhānaṁ lakkhaṇānaṁ asamuddesakāraṇavibhāvanāya kāraṇaṁ dīpitaṁ hoti samānakāraṇānaṁ lakkhaṇānaṁ ekajjhaṁ kāraṇadassanavasenassa pavattattā. Evamāhāti "bāhirakāpi isayo dhārentī"tiādinā iminā iminā pakārena āha.

Suppatițțhitapādatālakkhaṇavaṇṇanā (1)

201. "Purimam jātinti purimāyam jātiyam, bhummatthe etam upayogavacanan" ti vadanti. "Pubbe nivutthakkhandhasantāne ṭhito" ti vacanato accantasamyoge vā upayogavacanam. Yattha yattha hi jātiyam mahāsatto

puññakammaṁ kātuṁ ārabhati, ārabhato paṭṭhāya accantameva tattha puññakammappasuto hoti. Tenāha "daṭhasamādāno"ti-ādi. Sesapadadvayepi eseva nayo. Nivutthakkhandhā "jātī"ti vuttā khandhavinimuttāya jātiyā abhāvato, nibbattilakkhaṇassa ca vikārassa idha anupayujjanato. Jātavasenāti jāyanavasena. "Tathā"ti iminā "pubbe nivutthakkhandhā"ti imaṁ padaṁ upasaṁharati. Bhavanavasenāti paccayako nibbattanavasena. Nivūtthavasenāti nivusitatāvasena. Ālayatthenāti āvasitabhāvena. Nivāsattho

hi niketattho.

Tatthāti devalokādimhi. Ādi-saddena ekaccam tiracchānayonim sanganhāti. **Na sukaran**ti devagatiyā ekantasukhatāya, duggatiyā ekantadukkhatāya, dukkhabahulatāya ca puññakiriyāya okāso na sulabharūpo paccayasamavāyassa dullabhabhāvato, uppajjamānā ca sā ulārā, vipulā ca na hotīti gativasenāpi khettavisesatā icchitabbā "tiracchānagate dānam datvā satagunā dakkhinā pātikankhitabbā, puthujjanadussīle dānam datvā sahassagunā dakkhinā pātikankhitabbā"ti¹ vacanato. Manussagatiyā pana sukhabahulatāya, puññakiriyāya okāso sulabharūpo paccayasamavāyassa ca yebhuyyena sulabhabhāvato. Yañca tattha dukkham uppajjati, tampi visesato puññakiriyāya upanissayo hoti, dukkhūpanisā saddhāti. Yathā hi ayoghanena satthake nipphādiyamāne tassa ekantato aggimhi tāpanam, udakena vā temanam chedanakiriyāsamatthatāya na visesapaccayo, tāpetvā pana samānayogato udakatemanam tassā visesapaccayo, evameva sattasantānassa ekantadukkhasamangitā dukkhabahulatā, ekantasukhasamangitā sukhabahulatā ca puññakriyāsamatthatāya na visesapaccayo. Sati pana samānayogato dukkhasantāpane sukhumabrūhane ca laddhūpanissayā puññakiriyā samatthatāya sambhavati. Tathā sati uppajjamānā puññakiriyā mahājutikā mahāvipphārā patipakkhacchedanasamatthā hoti. Tasmā manussabhāvo puññakiriyāya visesapaccayo. Tena vuttam "tattha na sukaram, manussabhūtasseva sukaran"ti.

Atha "manussabhūtassā"ti ettha ko vacanattho? "Manassa ussannatāya manussāti, sūrabhāvasatimantatābrahmacariyayogyatādiguņavasena upacitamanakā ukkaṭṭhaguṇacittāti attho. Ke pana te? Jambudīpavāsino sattavisesā. Tenāha bhagavā—

'Tīhi bhikkhave ṭhānehi jambudīpakā manussā uttarakuruke ca manusse adhiggaṇhanti deve ca Tāvatimse. Katamehi tīhi? Sūrā satimanto idha brahmacariyavāso'ti¹.

Tathā hi buddhā bhagavanto, paccekabuddhā, aggasāvakā, mahāsāvakā, cakkavattino, aññe ca mahānubhāvā sattā tattheva uppajjanti. Te hi samānarūpāditāya pana saddhim parittadīpavāsīhi itaramahādīpavāsinopi 'manussa'tveva paññayimsu"ti keci. Apare pana bhananti "lobhadīhi alobhādīhi ca sahitassa manassa ussannatāya **manussā**. Ye hi sattā manussajātikā, tesu visesato lobhādayo, alobhādayo ca ussannā, te lobhādiussannatāya apāyamaggam, alobhādi-ussannatāya sugatimaggam, nibbānagāmimaggañca paripūrenti. Tasmā lobhādīhi alobhādīhi ca sahitassa manassa ussannatāya parittadīpavāsīhi saddhim catudīpavāsino sattavisesā manussāti vuccantī"ti. Lokiyā pana "manuno apaccabhāvena manussā"ti vadanti. **Manu** nāma pathamakappiko lokamariyādāya ādibhūto sattānam hitāhitavidhāyako kattabbākattabbatāsu niyojanatāvasena pitutthāniyo, yo sāsane "mahāsammato" ti vuccati amhākam mahābodhisatto, paccakkhato, paramparā ca tassa ovādānusāsaniyam thitā sattā puttasadisatāya "manussā, mānusā"ti ca vuccanti. Tato eva hi te "mānavā, manujā"ti ca voharīyanti. Manussabhūtassāti manussesu bhūtassa jātassa, manussabhāvam vā pattassāti attho, ayañca nayo lokiyamahājanassa vasena vutto, mahābodhisattānam pana santānassa mahābhinīhārato patthāya kusaladhammapatipattiyam sammadeva abhisankhatattā tesam sugatiyam, attano uppajjanaduggatiyañca nibbattānam kusalakammam garutaramevāti dassetum "akāranam vā etan"ti-ādi vuttam.

Evarūpe attabhāveti hatthi-ādi-attabhāve. Ṭhitena katakammaṁ na sakkā sukhena dīpetuṁ loke appaññātarūpattā. Sukhena dīpetuṁ "asukasmiṁ dese asukasmiṁ nagare asuko nāma rājā, brāhmaṇo hutvā imaṁ kusalakammaṁ akāsī'ti evaṁ suviññāpayabhāvato. Thiraggahaṇoti asithilaggāhī thāmappattaggahaṇo. Niccalaggahaṇoti acañcalaggāhī tattha kenacipi asaṁhāriyo. Paṭikuṭatīti saṁkuṭati, jigucchanavasena vivaṭṭati vā. Pasāriyatīti vitthataṁ hoti vepullaṁ pāpuṇāti.

Taveso mahāsamuddasadisoti eso udakogho teva mahāsamuddasadiso.

Dīyati etenāti **dānam**, pariccāgacetanā. **Diyyanavasenā**ti deyyadhammassa pariyattam katvā pariccajanavasena dānam. Samvibhāgakaranavasenāti tasseva attanā saddhim parassa samvibhajanavasena samvibhāgo, tathāpavattā cetanā. Sīlasamādāneti sīlassa sammadeva ādāne, gahane pavattaneti attho. Tam pavattikālena dassento "pūraṇakāle"ti āha. Mātu hito matteyyo, yassa pana dhammassa vasena so "matteyyo"ti vuccati, sā matteyyatāti āha "mātukātabbavatte"ti. Eseva nayo "petteyyatāyā" ti-ādīsu. Añnatarannataresūti aññamaññavisitthesu aññesu, te pana kusalabhāvena vuttā kusalāti āha "evarūpesū"ti. Adhikusalesūti abhivisitthesu kusalesu, sā pana abhivisitthatā upādāyupādāya hoti. Yam panettha ukkamsagatam adhikusalam, tadukkamsanayena idhadhippetanti tam dassetum "atthi kusala, atthi adhikusalā"ti-ādi vuttam. Nanu paññāpāramisangahañānasambhārabhūtā kusalā dhammā nippariyāyena sabbaññutaññānapatilābhapaccayā kusalā nāma, ime pana mahāpurisalakkhananibbattakā puññasambhārabhūtā kasmā tathā vuttāti? Sabbesampi mahābodhisattasantānagatānam pāramidhammānam sabbañnutannānapatilābhapaccayabhāvato. Mahābhinīhārato patthāya hi mahāpuriso yam kinci punnam karoti, sabbam tam sammāsambodhisamadhigamāyeva pariņāmeti. Tathā hi sasambhārābyāso, dīghakālābyāso, nirantarābyāso, sakkaccābyāsoti cattāro abyāsā caturadhitthānaparipūritasambandhā anupubbena mahābodhitthānā sampajjanti.

Sakimpīti pi-saddena anekavārampi katam vijātiyena antaritam saṅgaṇhāti. Abhiṇhakaraṇenāti bahulīkārena. Upacitanti uparūpari vaḍḍhitam. Piṇḍīkatanti piṇḍaso katam. Rāsīkatanti rāsibhāvena katam. Anekakkhattum hi pavattiyamānam kusalakammam santāne tathāladdhaparibhāvanam piṇḍībhūtam viya, rāsībhūtam viya ca hoti. Vipākam pati samhaccakāribhāvattā cakkavāļam atisambādham bhavaggam atinīcam, sace panetam rūpam siyāti adhippāyo. Vipulattāti mahantattā. Yasmā pana tam kammam mettākaruṇāsatisampajaññāhi pariggahitatāya durasamussāritam pamāṇakaraṇadhammanti pamāṇarahitatāya "appamāṇan"ti vattabbatam arahati tasmā "appamāṇattā"ti vuttam.

Adhibhayatīti phalassa ulārabhāvena abhibhuyya titthati. Atthato panītapanītānam bhogānam patilābho evāti āha "atirekam labhatī"ti. Adhigacchatīti vindati, nibbattamānova tena samannāgato hotīti attho. Ekadesena aphusitvā sabbappadesehi phusanato sabbappadesehi phusantiyo¹ etesam pādatalānam santīti "sabbāvantehi pādatalehī"ti vuttam. Yathā nikkhipane sabbe pādatalappadesā samhaccakārino aninnatāya samabhāvato, evam uddharanepīti vuttam "samam phusati, samam uddharatī"ti. Idani imassa mahāpurisalakkhaņassa samadhigamena laddhabbanissandaphalavibhāvanamukhena ānubhāvam vibhāvetum "sacepi hī"ti-ādi vuttam. Tattha narakanti āvātam. Antopavisati samabhāvāpattiyā. "Cakkalakkhanena patitthatabbatthanan"ti idam yam bhumippadesam pādatalam phusati, tattha cakkalakkhanampi phusanavasena patitthātīti katvā vuttam. Tassa pana tathā patitthānam suppatitthitapādatāya evāti suppatitthitapādatāya ānubhāvakittane "lakkhanantarānayanam kimatthiyan"ti na cintetabbam. **Sīlatejenā**ti sīlappabhāvena. **Puññatejenā**ti kusalappabhāvena. **Dhammatejenā**ti ñānappabhāvena. Tīhipi padehi bhagavato buddhabhūtassa dhammā gahitā, "dasannam pāramīnan"ti iminā buddhakaradhammā gahitā.

202. **Mahāsamuddova sīmā** sabbabhūmissarabhāvato. "**Akhilamanimittamakanṭakan**"ti tīhipi padehi theyyābhāvova vuttoti āha

"niccoran"ti-ādi. Kharasamphassaṭṭhenāti ghaṭṭanena dukkhasamphassabhāvena khilāti. Upaddavapaccayaṭṭhenāti anatthahetutāya nimittāti. "Akhilan"ti-ādinā ekacārīhi corābhāvo vutto, "nirabbudan"ti iminā pana gaṇabandhavasena vicaraṇacorābhāvo vuttoti dassetum "gumbam gumbam hutvā"ti-ādi vuttam. Avikkhambhanīyoti na vibandhanīyo kenaci appaṭibāhanīyo ṭhānato anikkaḍḍhanīyo. Paṭipakkham aniṭṭham atthetīti paccatthiko, etena pākaṭabhāvena virodham akaronto veripuggalo vutto. Paṭiviruddho amitto paccāmitto, etena pākaṭabhāvena virodham karonto veripuggalo vutto. Vikkhambhetum nāsakkhimsu, aññadatthu sayameva vighātabyasanam pāpuṇimsu ceva sāvakattañca pavedesum.

"Kamman"ti-ādīsu kammam nāma buddhabhāvam uddissa katūpacito lakkhanasamvattaniyo puññasambhāro. Tenāha "satasahassakappādhikānī"ti-ādi. Kammasarikkhakam nāma tasseva puññasambhārassa karaṇakāle kenaci akampanīyassa daļhāvatthitabhāvassa anucchaviko suppatitthitapādatāsankhātassa lakkhanassa parehi avikkhambhanīyatāya ñāpakanimittabhāvo, svāyam nimittabhāvo tasseva lakkhanassāti atthakathāyam "kammasarikkhakam nāma -pamahāpurisalakkhaṇan"ti vuttam. Thānagamanesu pādānam dalhāvatthitabhāvo lakkhanam nāma. Pādānam bhūmiyam samam nikkhipanam, pādatalānam sabbabhāgehi phusanam, samameva uddharanam, tasmā sutthu samam sabbabhāgehi patitthitā pādā etassāti suppatitthitapādo, tassa bhāvo suppatitthitapādatāti vuccati lakkhanam. Suṭṭhu samam bhūmiyā phusaneneva hi nesam tattha daļhāvatthitabhāvo siddho, yam "kammasarikkhakan"ti vuttam. Lakkhanānisamsoti lakkhanapatilabhassa udrayo, lakkhanasamvattaniyassa kammassa ānisamsaphalanti attho. Nissandaphalam pana hetthābhāvitameva.

203. Kammādibhedeti

kammakammasarikkhakalakkhaṇalakkhaṇānisaṁsa visaññite vibhāge. **Gāthābandhaṁ sandhāya vuttaṁ,** attho pana apubbaṁ natthīti adhippāyo. **Porāṇakattherā**ti aṭṭhakathācariyā. **Vaṇṇanāgāthā**ti thomanāgāthā vuttamevatthaṁ gahetvā thomanāvasena pavattattā.

Aparabhāge therā nāma pāļim aṭṭhakathañca potthakāropanavasena samāgatā mahātherā, ye sāṭṭhakathaṁ piṭakattayaṁ potthakāruļhaṁ katvā saddhammaṁ addhaniyaciraṭṭhitikaṁ akaṁsu. Ekapadikoti "daļhasamādāno ahosī"ti-ādipāṭhe ekekapadagāhī. Atthuddhāroti tadatthassa sukhaggahaṇatthaṁ gāthābandhavasena uddharaṇato atthuddhārabhūto, tayidaṁ pāḷiyaṁ āgatapadāni gahetvā gāthābandhavasena tadatthavicāraṇabhāvadassanaṁ, na pana dhammabhaṇḍāgārikena thapitabhāvapatikkhipananti datthabbaṁ.

Kusaladhammānam vacīsaccassa bahukāratam, tappatipakkhassa ca

musāvādassa mahāsāvajjatam dassetum anantarameva kusalakammapathadhamme vadantopi tato vacīsaccam nīharitvā katheti. Sacceti vā sannidhāneva "dhamme"ti vuccamānā kusalakammapathadhammā eva yuttāti vuttam "dhammeti dasakusalakammapathadhamme"ti. Gobalībaddañāyena vā ettha attho veditabbo. Indriyadamaneti indriyasamvare. Kusalakammapathaggahanenassa vārittasīlameva gahitanti itarampi sangahetvā dassetum samyamasseva gahanam katanti "samyameti sīlasamyame"ti vuttam. Suci vuccati puggalo yassa dhammassa vasena, tam soceyyam, kāyasucaritādi. Etasseva hi vibhāgassa dassanattham vuttampi cetam puna vuttam, manosoceyyaggahanena vā jhānādiuttarimanussadhammānampi sanganhanattham soceyyaggahanam. Ālayabhūtanti samathavipassanānam adhitthānabhūtam. Uposathakammanti uposathadivase samādivitvā samācaritabbam puññakammam uposatho sahacaraṇañāyena. "Avihimsāyāti sattānam aviheṭhanāyā"ti vadanti, tam pana sīlaggahaņeneva gahitam. Tasmā avihimsāyāti karuņāyāti attho. Avihimsāggahaņeneva cettha appamaññāsāmaññena cattāropi brahmavihārā upacārāvatthā gahitā lakkhanahāranayena. Sakalanti anavasesam paripunnam. Evamettha kāmāvacarattabhāvapariyāpannattā lakkhanassa tamsamvattanikakāmāvacarakusaladhammā eva pāramitāsangahapuñnasambhārabhūtakāyasucaritādīhi dvādasadhā vibhattā eva. Gāthāyam "sacce"ti-ādinā dasadhā sangayha dassitā. Esa nayo sesalakkhanepi.

Aṁnubhīti¹ gāthāsukhatthaṁ akāraṁ sānunāsikaṁ katvā vuttaṁ. Byañjanāni lakkhaṇāni ācikkhantīti **veyañjanikā. Vikkhambhetabban**ti paṭibāhitabbaṁ.

Tassāti mahāpurisassa, **tassa** vā mahāpurisalakkhaṇassa. Lakkhaṇasīsena cettha taṁsaṁvattanikapuññasambhāro vuccati.

Pādatalacakkalakkhanavannanā (2)

204. Bhayam nāma bhīti, tam pana ubbijjanākārena, uttasanākārena ca pavattiyā duvidhanti āha "ubbegabhayanceva uttāsabhayancā"ti. Tadubhayampi bhayam vibhāgena dassetum "tatthā"ti-ādi vuttam. Apanūditāti yathā corādayo viluppanabandhanādīni parassa na karonti, katanca paccāharaṇādinā paṭipākatikam hoti, evam yathā ca caṇḍahatthiādayo dūrato parivajjitā honti, aparivajjite tassa yathāṭhāne ṭhitehi abhibhavo na hoti, evam apanūditā. Ativāhetīti atikkāmeti. Tam ṭhānanti tam sāsankaṭṭhānam. Asakkontānanti upayogatthe sāmivacanam, asakkonteti attho. Asakkontānanti vā anādare sāmivacanam. Saha parivārenāti saparivāram. Tattha kinci deyyadhammam dento yadā tassa parivārabhāvena annama hoti.

Tamattham vitthārena dassetum "tattha annan" ti-ādi vuttam. Tattha yathā deyyadhammam tassa annadānassa parivāro, evam tassa sakkaccakaraṇampīti dassento "atha kho" ti-ādimāha. Yāgubhattam datvāva adāsīti yojanā. Esa nayo ito paratopi. Suttam vaṭṭetīti cīvarassa sibbanasuttakam duvaṭṭativaṭṭādivasena vaṭṭitam akāsi. Rajananti alliādirajanavatthum. Paṇdupalāsanti rajanupagameva panduvannam palāsam.

Heṭṭhimānīti annādīni cattāri. Nisadaggahaṇeneva nisadapotopi gahito. Cīnapiṭṭhaṁ sindhurakacuṇṇaṁ. Kojavanti uddalomi-ekantalomi-ādikojavattharaṇaṁ. Suvibhatta-antarānīti suṭṭhu vibhatta-antarāni, etena cakkāvayavaṭṭhānānaṁ suparicchinnataṁ dasseti.

Laddhābhisekā khattiyā attano vijite visavitāya brāhmaṇādike catūhi saṅgahavatthūhi rañjetuṁ sakkonti, na itarāti āha "rājānoti abhisittā"ti. Rājato yathāladdhagāmanigamādiṁ issaravatāya bhuñjantīti bhojakā, tādiso bhogo etesaṁ

atthi tattha vā niyuttāti **bhogikā**, te eva **"bhogiyā"**ti vuttā. **Saparivāraṁ dāna**nti vuttanayena saparivāradānaṁ. **Jānātū**ti "sadevako loko jānātū"ti iminā viya adhippāyena **nibbattaṁ cakkalakkhaṇan**ti lakkhaṇasseva kammasarikkhatā dassitā. Evaṁ sati tikameva siyā, na catukkaṁ, tasmā cakkalakkhaṇassa mahāparivāratāya ñāpakanimittabhāvo kammasarikkhakaṁ nāma. Tenevāha "saparivāraṁ -pa- jānātūti nibbattan"ti. "Dīghāyukatāya taṁ nimittan"ti¹ ca vakkhati, tathā "taṁ lakkhaṇaṁ bhavati tadatthajotakan"ti² ca. Nissandaphalaṁ pana paṭipakkhābhibhavo daṭṭhabbo. Tenevāha gāthāyaṁ "sattumaddano"ti.

205. **Etan**ti etam gāthābandhabhūtam vacanam, tam panatthato gāthā evāti āha "imā tadatthaparidīpanā gāthā vuccantī"ti.

Puratthāti vā "pure"ti vuttatopi pubbe. Yasmā mahāpuriso na atītāya ekajātiyam, nāpi katipayajātīsu, atha kho purimapurimatarāsu tathāva paṭipanno, tasmā tattha paṭipattim dassetum "pure puratthā"ti vuttam. Imissāpi jātiyam atītakālavasena "pure puratthā"ti vattum labbhāti tato visesanattham "purimāsu jātīsū"ti vuttanti āha "imissā"ti-ādi. Keci "imissā jātiyā pubbe tusitadevaloke katakammapaṭikkhepavacanan"ti vadanti, tam tesam matimattam tattha tādisassa katakammassa abhāvato. Apanūdanoti apanetā. Adhimuttoti yuttapayutto.

Puññakammenāti dānādipuñnakammena. Evaṁ santeti satamattena puñnakammena ekekaṁ lakkhaṇaṁ nibbatteyya, evaṁ sati. Na rocayiṁsūti kevalaṁ satamattena puñnakammena lakkhaṇanibbattiṁ na rocayiṁsu aṭṭhakathācariyā. Kathaṁ pana rocayiṁsūti āha "anantesu panā"ti-ādi. Ekekaṁ kammanti ekekaṁ dānādipubbakammaṁ. Ekekaṁ sataguṇaṁ katvāti anantāsu lokadhātūsu yattakā sattā, tehi sabbehi paccekaṁ satakkhattuṁ katāni dānādipuñnakammāni yattakāni, tato ekekaṁ puñnakammaṁ mahāsattena sataguṇaṁ kataṁ "satan"ti adhippetaṁ, tasmā idha sata-saddo bahubhāvapariyāyo, na saṅkhyāvacanoti dasseti "sataghi sataṁ

devamanussā"ti-ādīsu viya. Tenāha "tasmā satapuññalakkhaņoti imamattham rocayimsū"ti.

Āyatapaņhitāditilakkhaņavaņņanā (3-4-5)

206. Sarasacuti nāma jātassa sattassa yāvajīvam jīvitvā pakatiyā maraṇam. Ākaḍḍhajiyassa dhanudaṇḍassa viya pādānam antomukham kuṭilatāya antovaṅkapādatā. Bahimukham kuṭilatāya bahivaṅkapādatā. Pādatalassa majjhe ūnatāya ukkuṭikapādatā. Aggapādena khañjanakā aggakoṇḍā. Paṇhippadesena khañjanakā paṇhikoṇḍā. Unnatakāyenāti anonatabhāvena samussitasarīrena. Muṭṭhikatahatthāti āvudhādīnam gahaṇattham katamuṭṭhihatthā. Phaṇahatthakāti aññamaññam saṁsaṭṭhaṅgulihatthā. Idamettha kammasarikkhakanti idam imesam tiṇṇampi lakkhaṇānam Tathāgatassa dīghāyukatāya ñāpakanimittabhāvo ettha āyatapaṇhitā, dīghaṅgulitā brahmujugattatāti etasmim lakkhaṇattaye kammasarikkhakattam. Nissandaphalam pana anantarāyatādi daṭṭhabbam.

207. Bhāyitabbavatthunimittam uppajjamānampi bhayam attasinehahetukam pahīnasinehassa tadabhāvatoti āha "yathā mayham maraṇato bhayam mama jīvitam piyan"ti. Suciṇṇenāti suṭṭhu katūpacitena sucaritakammunā.

Cavitvāti saggato cavitvā. "Sujātagatto subhujo" ti-ādayo sarīrāvayavaguņā imehi lakkhaņehi avinābhāvinoti dassetum vuttā. Cirayapanāyāti attabhāvassa cirakālam pavattanāya. Tenāha "dīghāyukabhāvāyā" ti. Tatoti cakkavattī hutvā yāpanato. Vasippattoti jhānādīsu vasibhāvanceva cetovasibhāvanca patto hutvā, katham iddhibhāvanāya iddhipādabhāvanāyāti attho. Yāpeti cirataranti yojanā.

Sattussadatālakkhaņavaņņanā (6)

208. Raso jāto etesanti **rasitāni**, mahārasāni. Tenāha "**rasasampannānan**"ti. **Piṭṭhakhajjakādīnī**ti pūpasakkhalimodakādīni. **Ādi**saddena pana kadaliphalādim saṅgaṇhāti. Piṭṭham pakkhipitvā pacitabbapāyasam **piṭṭhapāyasam. Ādi**-saddena tathārūpabhojjayāgu-ādim saṅgaṇhāti.

Idha kammasarikkhakam nāma sattussadatālakkhaṇassa paṇītalābhitāya ñāpakanimittabhāvo. Iminā nayena tattha tattha lakkhaṇe kammasarikkhakam niddhāretvā yojetabbam.

209. Uttamo aggarasadāyakoti sabbasattānam uttamo lokanātho aggānam paṇītānam rasānam dāyako. Uttamānam aggarasānanti paṇītesupi paṇītarasānam. Khajjabhojjādijotakanti khajjabhojjādilābhajotakam. Lābhasamvattanikassa kammassa phalam "lābhasamvattanikan"ti kāraṇūpacārena vadati. Tadatthajotakanti vā tassa paṇītabhojanadāyakattasankhātassa atthassa jotakam. Tadādhigacchatīti ettha ākāro nipātamattanti āha "tam adhigacchatī"ti. Lābhiruttamanti rakāro padasandhikaro.

Karacaranādilakkhanavannanā (7-8)

210. **Pabbajitaparikkhāram** pattacīvarādim. **Gihiparikkhāram** vatthāvudhayānasayanādim.

Sabbanti sabbam upakāram. Makkhetvā nāseti makkhibhāve ṭhatvā. Telena viya makkhetīti satadhotatelena makkheti viya. Atthasamvaḍḍhanakathāyāti hitāvahakathāya. Kathāgahaṇam cettha nidassanamattam. Paresam hitāvaho kāyapayogopi atthacariyā. Aṭṭhakathāyam pana vacīpayogavaseneva atthacariyā vuttā.

Samānattatāyāti sadisabhāve samānatṭhāne ṭhapanena, taṁ panassa samānaṭṭhāne ṭhapanaṁ attasadisatākaraṇaṁ, sukhena ekasambhogatā, attano sukhuppattiyaṁ, tassa ca dukkhuppattiyaṁ tena attano ekasambhogatāti āha "samānasukhadukkhabhāvenā"ti. Sā ca samānasukhadukkhatā ekato nisajjādinā pākaṭā hotīti taṁ dassento "ekāsane"ti-ādimāha. Na hi sakkā ekaparibhogo kātuṁ jātiyā hīnattā. tathā akariyamāne ca so kujjhati bhogena adhikattā, tasmā dussaṅgaho. Na hi so ekaparibhogaṁ icchati jātiyā hīnabhāvato. Na akariyamāne ca kujjhati bhogena hīnabhāvato. Ubhohīti jātibhogehi. Sadisopi susaṅgaho

ekasadisabhāveneva itarena saha ekaparibhogassa paccāsīsāya, akaraņe ca tassa kujjhanassābhāvato. **Adīyamānepi** kismiñci āmise **akariyamānepi** saṅgahe. **Na pāpakena cittena passati** pesalabhāvato. Tato eva **paribhogopi -pa- hoti. Evarūpan**ti gihī ce, ubhohi sadisaṁ, pabbajito ce, sīlavantanti adhippāyo.

Susangahitāva hontīti suṭṭhu sangahitā eva honti daļhabhattibhāvato. Tenāha "na bhijjantī"ti.

Dānādisaṅgahakammanti dānādibhedaṁ parasaṅgaṇhanavasena pavattaṁ kusalakammaṁ.

211. Anavaññātena aparibhūtena sambhāvitena. Pamodo vuccati hāso, na appamodenāti ettha paṭisedhadvayena so eva vutto. So ca odagyasabhāvattā na dīno dhammūpasañhitattā na gabbhayuttoti āha "na dīnena na gabbhitenāti attho"ti. Sattānam agaṇhanaguṇenāti yojanā.

Atiruciranti ativiya rucirakatam, tam pana passantānam pasādāvahanti āha "supāsādikan"ti. Suṭṭhu chekanti ativiya sundaram. Vidhātabboti vidhātum sandisitum sakkuṇeyyo. Piyam vadatīti piyavadū yathā "sabbavidū"ti. Sukhameva sukhatā, tam sukhatam. Dhammañca anudhammañcāti lokuttaradhammañceva tassa anurūpapubbabhāgadhammañca.

Ussankhapādādilakkhaņavannanā (9-10)

212. "Atthūpasaṁhitan"ti iminā vaṭṭanissitā dhammakathā vuttāti āha "idhalokaparalokatthanissitan"ti. "Dhammūpasaṁhitan"ti iminā vivaṭṭanissitā, tasmā dasakusalakammapathā vivaṭṭasannissayā veditabbā. Nidaṁsesīti sandassesi te dhamme paccakkhe katvā pakāsesi. Nidaṁsanakathanti pākaṭakaraṇakathaṁ. Jeṭṭhaṭṭhena aggo, pāsaṁsaṭṭhena seṭṭho, pamukhaṭṭhena pāmokkho, padhānaṭṭhena uttamo, hitasukhatthikehi pakārato varaṇīyato rajanīyato pavaroti evaṁ atthavisesavācīnampi "aggo"ti-ādīnaṁ padānaṁ bhāvatthassa bhedābhāvato "sabbāni aññamaññavevacanānī"ti āha.

Uddhaṅgamanīyāti suṇantānaṁ uparūpari visesaṁ gamentīti uddhaṅgamanīyā. Saṅkhāya adho piṭṭhipādasamīpe eva patiṭṭhitattā adhosaṅkhā pādā etassāti adhosaṅkhapādo. Saṅkhāti ca gopphakānamidaṁ nāmaṁ.

213. **Dhammadānayaññan**ti dhammadānasaṅkhātaṁ yaññaṁ.

Suṭṭhu saṇṭhitāti sammadeva saṇṭhitā. Piṭṭhipādassa upari pakatiaṅgulena caturaṅgule jaṅghāpadese **nigūṭhā** apaññāyamānarūpā hutvā ṭhitāti attho.

Eņijanghalakkhaņavannanā (11)

214. Sippanti sikkhitabbaṭṭhena "sippan"ti laddhanāmaṁ sattānaṁ jīvikāhetubhūtaṁ ājīvavidhiṁ. Jīvikatthaṁ, sattānaṁ upakāratthaffica veditabbaṭṭhena vijjā, mantasatthādi. Caranti tena sugatiṁ, sukhaffica gacchantīti caraṇaṁ. Kammassakatāṇāṇaṁ uttarapadalopena "kamman"ti vuttanti āha "kammanti kammassakatājānanapaññā"ti. Tāni cevāti pubbe vuttahatthi-ādīni ceva. Satta ratanānīti muttādīni satta ratanāni. Ca-saddena rañňo upabhogabhūtānaṁ vatthaseyyādīnaṁ saṅgaho. Rañño anucchavikānīti rañňo paribhuñjanayogyāni. Sabbesanti "rājārahānī"ti-ādinā vuttānaṁ sabbesaṁyeva ekajjhaṁ gahaṇaṁ. Buddhānaṁ parisā nāma odhiso, anodhiso ca samitapāpā, tathatthāya paṭipannā ca hotīti vuttaṁ "samaṇānaṁ koṭṭhāsabhūtā catasso parisā"ti.

Sippādivācananti sippānam¹ sikkhāpanam. Pāļiyampi hi "vācetā"ti vācanasīsena sikkhāpanam dassitam. Ukkuṭikāsananti tamtamveyyāvaccakaraṇena ukkuṭikassa nisajjā. Payojanavasena gehato geham gāmato gāmam jaṅghāyo kilametvā pesanam jaṅghapesanikā. Likhitvā pātitam viya hoti aparipuṇṇabhāvato. Anupubba-uggatavaṭṭitanti gopphakaṭṭhānato paṭṭhāya yāva jāṇuppadesā mamsūpacayassa anukkamena samantato vaḍḍhitattā anupubbena uggatam hutvā suvaṭṭitam.

Eņijaṅghalakkhaṇanti saṇṭhānamattena eṇimigajaṅghāsadisajaṅghalakkhaṇaṁ.

215. "Yatupaghātāyā"ti ettha ta-kāro padasandhikaro, anunāsikalopena niddesoti āha "yan"ti-ādi. "Uddhaggalomā sukhumattacotthatā"ti vuttattā codakena "kim pana aññena kammena aññam lakkhaṇam nibbattatī"ti codito, ācariyo "na nibbattatī"ti vatvā "yadi evam idha kasmā lakkhaṇantaram kathitan"ti antolīnameva codanam pariharanto "yam pana nibbattatīti -pa- idha vuttan"ti āha. Tattha yam pana nibbattatīti yam lakkhaṇam vuccamānalakkhaṇanibbattakena kammunā nibbattatī. Tam anubyañjanam hotīti tam lakkhaṇam vuccamānassa lakkhaṇassa anukūlalakkhaṇam nāma hoti. Tasmā tena kāraṇena idha eṇijaṅghalakkhaṇakathane "uddhaggalomā sukhumattacotthatā"ti lakkhanantaram vuttam.

Sukhumacchavilakkhanavannanā (12)

216. **Samitapāpaṭṭhena samaṇaṁ,** na pabbajjāmattena. **Bāhitapāpaṭṭhena brāhmaṇaṁ,** na jātimattena.

Mahantānam atthānam pariggaņhanato mahatī paññā etassāti mahāpañño. Sesapadesupi eseva nayoti āha "mahāpaññādīhi samannāgatoti attho"ti. Nānatthanti yāhi mahāpaññādīhi samannāgatattā bhagavā "mahāpañño"ti-ādinā kittīyati, tāsam mahāpaññādīnam idam nānattam ayam vemattatā.

Yassa kassaci visesato arūpadhammassa mahattaṁ nāma kiccasiddhiyā veditabbanti tadassā kiccasiddhiyā dassento "mahante sīlakkhandhe pariggaṇhātīti mahāpaññā"ti-ādimāha. Tattha hetumahantatāya, paccayamahantatāya, nissayamahantatāya, pabhedamahantatāya, kiccamahantatāya, phalamahantatāya, ānisaṁsamahantatāya ca sīlakkhandhassa mahantabhāvo veditabbo. Tattha hetu alobhādayo. Paccayo hirottappasaddhāsativīriyādayo. Nissayo sāvakabodhipaccekabodhisammāsambodhiniyatatā, taṁsamaṅgino ca purisavisesā. Pabhedo cārittavārittādivibhāgo. Kiccaṁ tadaṅgādivasena paṭipakkhavidhamanaṁ. Ānisaṁso piyamanāpatādi. Ayamettha saṅkhepo, vitthāro pana visuddhimagge¹, ākaṅkheyyasuttādīsu² ca āgatanayeneva veditabbo. Iminā

nayena samādhikkhandhādīnampi mahantatā yathāraham vitthāretvā veditabbā. Ṭhānāṭhānānam pana mahāvisayatāya, sā bahudhāhukasutte āgatanayena veditabbā. Vihārasamāpattiyo samādhikkhandhaniddhāraṇanayena veditabbā. Ariyasaccānam Sakalasāsanasaṅgahato, so saccavibhaṅga¹taṁsaṁvaṇṇanāsu² āgatanayena, satipaṭṭhānādīnaṁ satipaṭṭhānavibhaṅgādīsu³, taṁsaṁvaṇṇanāsu⁴ ca āgatanayena, sāmaññaphalānaṁ mahato hitassa, mahato sukhassa, mahato atthassa mahato yogakkhemassa nibbattibhāvato, santapaṇītanipuṇa-atakkāvacarapaṇḍitavedanīyabhāvato ca, abhiññānaṁ mahāsambhārato, mahāvisayato, mahākiccato, mahānubhāvato, mahānibbattito ca, nibbānassa madanimmadanādimahattasiddhito mahantatā veditabbā.

Puthupaññāti etthāpi vuttanavānusārena attho veditabbo. Avam pana viseso—nānākhandhesu ñāṇam pavattatīti "ayam rūpakkhandho nāma -paayam viññanakkhandho nama"ti evam pañcannam khandhanam nānākaranam paticca ñānam pavattati. Tesupi "ekavidhena rūpakkhandho, ekādasavidhena rūpakkhandho. Ekavidhena vedanākkhandho, bahuvidhena vedanākkhandho. Ekavidhena saññākkhandho. Ekavidhena sankhārakkhandho. Ekavidhena viññānakkhandho, bahuvidhena viññānakkhandho"ti evam ekekassa khandhassa atītādibhedavasenāpi nānākaraņam paţicca ñāṇam pavattati. Tathā "idam cakkhāyatanam nāma -pa- idam dhammayatanam nama. Tattha dasayatana kamayacara, dve catubhūmakā"ti evam āyatanānam nānattam paticca ñānam pavattati. Nānādhātūsūti "ayam cakkhudhātu nāma -pa- ayam manoviññānadhātu nāma. Tattha soļasa dhātuyo kāmāvacarā, dve dhātuyo catubhūmikā"ti evam nānādhātūsu ñānam pavattati, tayidam upādinnakadhātuvasena vuttam. Paccekabuddhānampi hi dvinnañca aggasāvakānam upādinnakadhātūsu evam nānākaranam paticca nānam pavattati, tanca kho ekadesatova, na nippadesato. Anupādinnakadhātūnam pana lakkhanādimattameva jānanti, na nānākaraṇam. Sabbaññubuddhānam eva pana "imāya nāma dhātuyā ussannattā imassa rukkhassa khandho seto, imassa kālo, imassa mattho, imassa

^{1.} Abhi 2. 104 pitthe.

^{3.} Abhi 2. 200 pitthe.

^{2.} Abhi-Ṭṭha 2. 78 piṭṭhe.

^{4.} Abhi-Ttha 2. 204 pitthe.

bahalattaco, imassa tanutaco. Imassa pattam vaṇṇasaṇṭhānādivasena evarūpam. Imassa puppham nīlam, imassa pītakam, lohitakam, odātam, sugandham, duggandham. Phalam khuddakam, mahantam, dīgham, gaṭṭam, susaṇṭhānam, dussaṇṭhānam, maṭṭham, pharusam, sugandham, duggandham, madhuram, tittakam, ambilam, kaṭukam, kasāvam. Kaṇṭako tikhiṇo, atikhiṇo, ujuko, kuṭilo, kaṇho, nīlo, odāto hotī''ti dhātunānattam paṭicca ñāṇam pavattati.

Nānāpaticcasamuppādesūti ajjhattabahiddhābhedato ca nānāpabhedesu paticcasamuppādangesu. Avijjādi-angāni hi paccekam paticcasamuppādasaññitāni. Tenāha sankhārapitake "dvādasa paccayā dvādasa paticcasamuppādā"ti. Nānāsuññatamanupalabbhesūti nānāsabhāvesu niccasārādivirahitesu suñnatabhāvesu tato eva itthipurisaattattaniyādivasena anupalabbhanasabhāvesu pakāresu. Ma-kāro hettha padasandhikaro. Nānā-atthesūti atthapatisambhidāya visayabhūtesu paccayuppannādivasena nānāvidhesu atthesu. **Dhammesū**ti dhammapatisambhidāya visayabhūtesu paccayādivasena nānāvidhesu dhammesu. Niruttīsūti tesamyeva atthadhammānam niddhāranavacanasankhātesu nānāniruttīsu. Paţibhānesūti atthapatisambhidādīsu visayabhūtesu "imāni ñānāni idamatthajotakānī"ti¹ tathā tathā patibhānato upatitthanato "patibhānānī"ti laddhanāmesu nānāñānesu. "Puthunānāsīlakkhandhesū"ti-ādīsu sīlassa puthuttam vuttameva, itaresam pana vuttanayānusārena suviññeyyattā pākatameva. Yam pana abhinnam ekameva nibbanam, tattha upacaravasena puthuttam gahetabbanti āha "puthujjanasādhārane dhamme samatikkammā"ti, tenassa madanimmadanādipariyāyena puthuttam paridīpitam hoti.

Evam visayavasena paññāya mahattam, puthuttam dassetvā idāni sampayuttadhammavasena hāsabhāvam, pavatti-ākāravasena javanabhāvam, kiccavasena tikkhādibhāvam dassetum "katamā hāsapaññā"ti-ādi vuttam. Tattha hāsabahuloti pītibahulo. Sesapadāni tasseva vevacanāni. Sīlam paripūretīti haṭṭhapahaṭṭho udaggudaggo hutvā ṭhapetvā indriyasamvaram tassa visum vuttattā anavasesasīlam paripūreti. Pītisomanassasahagatā hi paññā abhirativasena ārammane phullitavikasitā

viya pavattati, na evam upekkhāsahagatā. Puna sīlakkhandhanti ariyasīlakkhandhamāha. "Samādhikkhandhan"ti-ādīsupi eseva nayo.

Sabbam tam rūpam aniccato khippam javatīti yā rūpadhamme "aniccā" ti sīghavegena pavattati, patipakkhadūrabhāvena pubbābhisankhārassa sātisayattā indena vissatthavajiram viya lakkhanam avirajjhantī adandhāyantī rūpakkhandhe aniccalakkhanam vegasā pativijihati, sā javanapaññā nāmāti attho. Sesapadesupi eseva nayo. Evam lakkhanārammanikavipassanāvasena javanapaññam dassetvā balavavipassanāvasena dassetum "rūpan"ti-ādi vuttam. Tattha khayatthenāti yattha yattha uppajjati, tattha tattheva bhijjanato khayasabhāvattā. Bhayatthenāti bhayānakabhāvato. Asārakatthenāti asārakabhāvato attasāravirahato, niccasārādivirahato ca. **Tulayitvā**ti tulanabhūtāya vipassanāpaññāya tuletvā. **Tīrayitvā**ti tāya eva tīraṇabhūtāya tīrayitvā. Vibhāvayitvāti yāthāvato pakāsetvā paccakkham katvā. Vibhūtam katvāti pākatam katvā. **Rūpanirodhe**ti rūpakkhandhanirodhahetubhūte **nibbāne** ninnaponapabbhārabhāvena. Idāni sikhāppattavipassanāvasena javanapaññam dassetum puna "rūpan"ti-ādi vuttam. "Vutthānagāminivipassanāvasenā"ti keci.

Ñāṇassa tikkhabhāvo nāma savisesam paṭipakkhapahānena veditabboti "khippam kilese chindatīti tikkhapaññā"ti vatvā te pana kilese vibhāgena dassento "uppannam kāmavitakkan"ti-ādimāha. Tikkhapañño khippābhiñño hoti, paṭipadā cassa na calatīti āha "ekasmim āsane cattāro ariyamaggā -pa-adhigatā hontī"ti-ādi.

"Sabbe saṅkhārā aniccā dukkhā vipariṇāmadhammā, saṅkhatā paṭiccasamuppannā khayadhammā vayadhammā virāgadhammā nirodhadhammā"ti yāthāvato dassanena saccappaṭivedho ijjhati, na aññathāti kāraṇamukhena nibbedhikapaññaṁ dassetuṁ "sabbasaṅkhāresu ubbegabahulo hotī"ti-ādi vuttaṁ. Tattha ubbegabahuloti vuttanayena sabbasaṅkhāresu abhiṇhapavattasaṁvego. Uttāsabahuloti ñāṇuttāsavasena sabbasaṅkhāresu bahuso utrāsamānaso, etena ādīnavānupassanamāha. "Ukkaṇṭhanabahulo"ti pana iminā

nibbidānupassanamāha, "aratibahulo"ti-ādinā tassā eva aparāparuppattim. Bahimukhoti sabbasankhārato bahibhūtam nibbānam uddissa pavattanānamukho, tathā vā pavattitavimokkhamukho. Nibbijjhanam nibbedho, so etissā atthi, nibbijjhatīti vā nibbedhikā, sā eva pannā nibbedhikapannā. Yam panettha atthato avibhattam, tam heṭṭhā vuttanayattā, uttānatthattā ca suvinneyyameva.

217. Pabbajitam upāsitāti ettha yādisam pabbajitam upāsato pañnāpaṭilābho hoti, tam dassetum "paṇḍitam pabbajitam"ti vuttam. Upāsanancettha upaṭṭhānavasena icchitam, na upanisīdanamattenāti āha "payirupāsitā"ti. Atthanti hitam. Abbhantaram karitvāti abbhantaragatam katvā. Tenāha "atthayuttan"ti. Bhāvanapumsakaniddeso cāyam, hitūpasanhitam katvāti attho. Antara-saddo vā cittapariyāyo "yassantarato na santi kopā"ti-ādīsu¹ viya, tasmā atthantaroti hitajjhāsayoti attho.

Paţilābhatthāya gatenāti paţilābhatthāya pavattena,

passissati, na cakkhuviññānenāti adhippāyo.

paṭilābhasamvattaniyenāti attho. **Uppāde ca nimitte ca chekā**ti uppādavidhimhi ceva nimittavidhimhi ca kusalā. Uppādanimittakovidatāsīsena cettha lakkhaṇakosallameva dasseti. Atha vā sesalakkhaṇānam nibbattiyā buddhānam, cakkavattīnanca uppādo anumīyati, yāni tehi laddhabba-ānisamsāni nimittāni, tasmim **uppāde ca nimitte ca** anuminanādivasena **chekā** nipunāti attho. **Natvā passissatī**ti ñānena iānitvā

Atthānusāsanīsūti² atthānam hitānam anusāsanīsu. Yasmā anatthapaṭivajjanapubbikā sattānam atthapaṭipatti, tasmā anatthopi paricchijjagahetabbo, jānitabbo cāti vuttam "atthānattham pariggāhakāni ñāṇānī"ti, yato "āyupāyakosallam viya apāyakosallampi icchitabban"ti vuttam.

^{1.} Khu 1. 100 pitthe Udāne.

Suvannavannalakkhanavannanā (13)

218. Paṭisaṅkhānabalena kodhavinayena akkodhano, na bhāvanābalenāti dassetuṁ "na anāgāmimaggenā"ti-ādi vuttaṁ. Evaṁ akkodhavasikattāti evaṁ maghamāṇavo viya na kodhavasaṁ gatattā. Nābhisajjīti kujjhanavaseneva na abhisajji. Yañhi kodhassa uppattiṭṭhānabhūte ārammaṇe upanāhassa paccayabhūtaṁ kujjhanavasena abhisajjanaṁ, taṁ idhādhippetaṁ, na lubbhanavasena. Tenāha "kuṭilakaṇṭako viyā"ti-ādi. So hi yattha laggati, taṁ khobhento eva laggati. Tattha tatthāti tasmiṁ tasmiṁ mammaṭṭhāne. Mammanti phuṭṭhamattepi rujjanaṭṭhānaṁ. Pubbuppattikoti paṭhamuppanno. Tato balavataro byāpādo laddhāsevanatāya cittassa byāpajjanato. Tato balavatarā patitthiyanāti sātisayaṁ laddhāsevanatāya tato byāpādāvatthāyapi balavatarā patitthiyanā paccatthikabhāvena thāmappattito.

Sukhumattharaṇādīti **ādi-**saddena paṇītabhojanīyādīnampi saṅgaho daṭṭhabbo bhojanadānassapi vaṇṇasampadānimittabhāvato. Tenāha bhagavā "bhojanaṁ bhikkhave dadamāno dāyako paṭiggāhakānaṁ -pa- āyuṁ deti, vaṇṇaṁ detī"ti¹. Tathā ca vakkhati "āmisadānena vā"ti.

219. Abhivissajjesīti adāsi. Devoti megho, pajjunno eva vā. Varataroti uttamataro. Pabbajjāya visadisāvattādibhāvato na pabbajjāti apabbajjā, gihibhāvo. Acchādenti kopīnam paṭicchādenti etehīti acchādanāni, nivāsanāni, tesam acchādanānañceva sesavatthānañca kojavādiuttamapāvuraṇānañca. Vināsoti katassa kammassa avipaccitvā vināso.

Kosohitavatthaguyhalakkhaṇavaṇṇanā (14)

220. Samānetāti sammadeva ānetā samāgametā. Rajje patiṭṭhitena sakkā kātuṁ bahubhatikasseva ijjhanato. Kattā nāma natthīti vajjaṁ paṭicchādentīti ānetvā sambandho, karonti vajjapaṭicchādanakammanti vā. Nanu vajjapaṭicchādanakammaṁ nāma sāvajjanti? Saccaṁ sāvajjaṁ

samkiliṭṭhacittena paṭicchādentassa, idam pana asamkiliṭṭhacittena parassa uppajjanaka-anattham pariharaṇavasena pavattam adhippetam.

"Nātisaṅgahaṁkarontenā"ti etena ñātatthacariyāvasena taṁ kammaṁ pavattatīti dasseti.

221. **Amittatāpanā**ti amittānam tapanasīlā, amittatāpanam hotu vā mā vā evamsabhāvāti attho. Na hi cakkavattino puttānam amittā nāma keci honti, ye te bhaveyyum, cakkānubhāveneva sabbepi khattiyādayo anuvattakā tesam bhavanti.

Paṭhamabhāṇavāravaṇṇanā niṭṭhitā.

Parimandalādilakkhanavannanā (15-16)

222. Samanti samānam. Tena tena loke viññātaguņena samam samānam jānāti, yato tattha paṭipajjanavidhināva itarasmim paṭipajjati. Sayam jānātīti aparaneyyo hutvā sayameva jānāti. Purisam jānātīti vā "ayam seṭṭho, ayam majjhimo, ayam nihīno"ti tam tam purisam yāthāvato jānāti. Purisavisesam jānātīti tasmim tasmim purise vijjamānam visesam jānāti, yato tattha tattha anurūpadānapadānādipaṭipattiyā yuttapattakārī hoti. Tenāha "ayamidamarahatī"ti-ādi.

Sampattipaṭilābhaṭṭhenāti diṭṭhadhammikādisampattīnam paṭilābhāpanaṭṭhena. Samasaṅgahakammanti samam jānitvā tadanurūpam tassa tassa saṅgaṇhanakammam.

223. **Tulayitvā**ti tīrayitvā. **Paṭivicinitvā**ti vīmaṁsitvā. Nipuṇayogato **nipuṇā**, ativiya nipuṇā **atinipuṇā**, sā pana tesaṁ nipuṇatā saṇhasukhumā paññāti āha "**sukhumapaññā**"ti.

Sīhapubbaddhakāyādilakkhaṇavaṇṇanā (17-18-19)

224. **Khemakāmo**ti anupaddavakāmo. Kammassakatāñāṇaṁ sattānaṁ vaḍḍhi-āvahaṁ sabbasampattividhāyakanti āha **"paññāyāti kammassakatāpaññāyā"**ti.

Samantaparipūrānīti samantato sabbabhāgehi paripuṇṇāni. Tato eva **ahīnāni** anūnāni. **Dhanādīhī**ti dhanadhaññādīhi.

225. **Okappanasaddhā** saddheyyavatthum okkanditvā pakkhanditvā saddahanasaddhā. Sā eva pasādanīyavatthusmimpi abhippasīdanavasena pavattiyā **pasādasaddhā**. **Pariyattisavanenā**ti sattānam hitasukhāvahāya pariyattiyā savanena. Dhāraṇaparicayādīnam tammūlakattā tathā vuttam. **Etesan**ti saddhādīnam. Saha hānadhammenāti **sahānadhammo**, na sahānadhammoti **asahānadhammo**, tassa bhāvo asahānadhammatā, tam **asahānadhammatam**, aparihāniyasabhāvanti attho.

Rasaggasaggitālakkhanavannanā (20)

226. **Tilaphalamattampi** bhojanam. **Sabbattha pharatī**ti sabbā rasāharaṇiyo anussarantam sabhāvena sabbasmim kāye pharati. **Samā hutvā vahantī**ti avisamā ujukā hutvā pavattanti.

Ārogyakaraṇakammanti arogabhāvakaraṁ sattānaṁ aviheṭhanakammaṁ. Madhurādibhedaṁ rasaṁ gasati harati etehi, sayameva vā taṁ gasanti gilanti anto pavesentīti rasaggasā, rasaggasānaṁ aggā rasaggasaggā, te ettha santīti rasaggasaggī, tadeva lakkhaṇaṁ. Bhavati hi abhinnepi vatthusmiṁ taggatavisesāvabodhanatthaṁ bhinnaṁ viya katvā vohāro yathā "silāputtakassa sarīran"ti. Rasaggasaggitāsaṅkhātaṁ vā lakkhanaṁ rasaggasaggilakkhanaṁ.

227. **Vadha**-saddo "attānam vadhitvā vadhitvā rodatī"ti-ādīsu¹ bādhanatthopi hotīti tato visesanattham "māraṇavadhenā"ti vuttam, māraṇasaṅkhātena vadhenāti attho. Bādhanattho eva vā vadha-saddo, māraṇena, bādhanena cāti attho. **Ubbādhanāyā**ti bandhanāgāre pakkhipitvā uddham uddham bādhanena. Tenāha "bandhanāgārappavesanenā"ti.

Abhinīlanettādilakkhaņavaņņanā (21-22)

228. **Visaṭan**ti kujjhanavasena vinisaṭaṁ katvā. Tenāha **"kakkaṭako viyā"**ti-ādi. **Visāc**īti virūpaṁ sācitakaṁ, vijimhanti attho. Tenāha

"vaṅkakkhikoṭiyā"ti, kuṭila-akkhikoṭipātenāti attho. Viceyya pekkhitāti ujukam anoloketvā diṭṭhipātam vicāretvā oloketvā. Tenāha "yo kujjhitvā"tiādi. Paroti kujjhito. Na oloketi tam sammukhā gacchantam kujjhitvā na oloketi, parammukhā. Viteyyāti virūpam tiriyam, viññūnam olokanakkamam vītikkamitvāti attho. Jimham anoloketvā ujukam olokanam nāma kuṭilabhāvakarānam pāpadhammānam abhājana-ujukatacittasseva hotīti āha "ujumano hutvā ujum pekkhitā"ti. Yathā ca ujum pekkhitā hotīti ānetvā sambandho. Pasaṭanti ummīlanavasena sammadeva patthaṭam. Vipulam vitthatanti tasseva vevacanam. Piyam piyāyitabbam dassanam olokanam etassāti piyadassano.

Kāṇoti akkhīni nimmīletvā pekkhanako. Kākakkhīti kekarakkho.
Vaṅkakkhīti jimhapekkhanako. Āvilakkhīti ākuladiṭṭhipāto.
Nīlapītalohitasetakāļavaṇṇānaṁ vasena pañcavaṇṇo. Tattha pītalohitavaṇṇā setamaṇḍalagatarājivasena, nīlasetakāļavaṇṇā pana taṁtaṁmaṇḍalavaseneva veditabbā. "Pasādoti pana tesaṁ vaṇṇānaṁ pasannākāraṁ sandhāya vuttan"ti keci. Pañcavaṇṇo pasādoti pana yathāvuttapañcavaṇṇaparivāro, tehi vā paṭimaṇḍito pasādoti attho. Nettasampattikarānīti "pañcavaṇṇapasādatā, tirohitavidūragatadassanasamatthatā"ti evamādicakkhusampadāya kāraṇāni¹. Lakkhaṇasatthe yuttāti lakkhaṇasatthe āyuttā sukusalā.

Uņhīsasīsalakkhaņavaņņanā (23)

230. **Pubbaṅgamo**ti ettha pubbaṅgamatā nāma pamukhatā, jeṭṭhaseṭṭhakabhāvo bahujanassa anuvattanīyatāti āha **"gaṇajeṭṭhako"**ti-ādi.

Pubbaṅgamatāti pubbaṅgamassa kammaṁ. Yassa hi kāyasucaritādikammassa vasena mahāpuriso bahujanassa pubbaṅgamo ahosi, tadassa kammaṁ "pubbaṅgamatā"ti adhippetaṁ, na pubbaṅgamabhāvo. Tenāha "idha kammaṁ nāma pubbaṅgamatā"ti.

Pītipāmojjena paripuņņasīsoti pītiyā, pāmojjena ca sampuņņapaññāsīso bahulam somanassasahagatañāṇasampayuttacittasamangī eva hutvā **vicarati. Mahāpuriso**ti mahāpurisajātiko.

231. Bahujananti sāmi-atthe upayogavacananti āha "bahujanassā"ti. Paribhuñjanaṭṭhena paṭibhogo, upayogavatthu paṭibhogo, tassa hitāti paṭibhogiyā. Desakālaṁ ñatvā tadupakaraṇūpaṭṭhānādiveyyāvaccakarā sattā. Abhiharantīti byāharanti. Tassa tassa veyyāvaccassa paṭiharaṇato paṭihāro, veyyāvaccakaro, tassa bhāvo paṭihārakanti āha "veyyāvaccakarabhāvan"ti. Visavanaṁ visavo, kāmakāro vasitā, so etassa atthīti visavīti āha "ciṇṇavasī"ti.

Ekekalomatādilakkhaņavaņņanā (24-25)

232. **Upavattatī**ti anukūlabhāvam upecca vattati. Tenāha "ajjhāsayam anuvattatī"ti.

Ekekalomalakkhaṇanti ekekasmim lomakūpe ekekalomatālakkhaṇam. Ekekehi lomehīti aññesam sarīre ekekasmimpi lomakūpe anekānipi lomāni uṭṭhahanti, na Tathāgatassa. Tehi puna paccekam lomakūpesu ekekeheva uppannehi kuṇḍalāvattehi padakkhiṇāvattakajātehi nicitam viya sarīram hotīti vuttam "ekekalomūpacitangavā"ti.

Cattālīsādilakkhaņavaņņanā (26-27)

234. **Abhinditabbapariso**ti parehi kenaci saṅgahena saṅgahetvā, yuttikāranaṁ dassetvā vā na bhinditabbapariso.

Apisuṇavācāyāti upayogatthe sāmivacanam, pesuññassa paṭipakkhabhūtam kusalakammam. Pisuṇā vācā etassāti pisuṇavāco, tassa pisuṇavācassa puggalassa. Aparipuṇṇāti cattārīsato ūnabhāvena na paripuṇṇā. Viraļāti savivarā.

Pahūtajivhādilakkhaņavaņņanā (28-29)

236. Ādeyyavācoti ādaragāravavasena ādātabbavacano. "Evametan"ti gahetabbavacano sirasā sampaṭicchikasāsano.

Baddhajivhāti yathā sukhena parivattati, evam sirādīhi palibuddhajivhā. Gūļhajivhāti rasabahalatāya gūļhagaṇḍasadisajivhā. Dvijivhāti agge kappabhāvena dvidhābhūtajivhā. Mammanāti apparippuṭatalāpā. Kharapharusakakkasādivasena saddo bhijjati bhinnakāro hoti. Vicchinditvā pavattassaratāya chinnassarā vā. Anekākāratāya bhinnassarā vā. Kākassa viya amanuññassaratāya kākassarā vā. Madhuroti iṭṭhe¹ kammaphalena vatthuno suvisuddhattā. Pemanīyoti pītisañjanano, piyāyitabbo vā.

237. Akkosayuttattāti akkosupasañhitattā akkosavatthusahitattā. Ābādhakarinti ghaṭṭanavasena paresaṁ pīṭāvahaṁ. Bahuno janassa avamaddanato, pamaddābhāvakaraṇato vā bahujanappamaddanaṁ. Abāṭhanti vā ettha a-kāro vuddhi-attho "asekkhā dhammā"ti-ādīsu² viya, tasmā ativiyabāṭhaṁ pharusaṁ giranti evamettha attho veditabbo. Nabhaṇīti cettha "na abhaṇi nabhaṇī"ti saralopena niddeso. Susaṁhitanti suṭṭhu saṁhitaṁ. Kena pana suṭṭhu saṁhitaṁ? "Madhuran"ti anantarameva vuttattā madhuratāyāti viññāyati, kā panassa madhuratāti āha "suṭṭhu pemasañhitan"ti. Upayogaputhuttavisayoyaṁ vācā-saddoti āha "vācāyo"ti, sā cassā upayogaputhuttavisayatā "hadayagāminiyo"ti padena samānādhikaraṇatāya daṭṭhabbā. "kaṇṇasukhan"ti pāṭhe bhāvanapuṁsakaniddesoyanti dassetuṁ "yathā"ti-ādi vuttaṁ. Vedayathāti kālavipallāsenāyaṁ niddesoti āha "vedayitthā"ti. Brahmassaratanti seṭṭhassarataṁ, brahmuno sarasadisassarataṁ vā. Bahūnaṁ bahunti bahūnaṁ janānaṁ bahuṁ subhanitanti yojanā.

Sīhahanulakkhaņavaņņanā (30)

238. **Appadhamsiko**ti appadhamsiyo. **Ya-**kārassa hi **ka-**kāram katvā ayam niddeso yathā "niyyānikā dhammā"ti³. **Guṇato**ti attanā adhigatagunato. **Thānato**ti yathāthitatthānantarato.

Palāpakathāyāti samphappalāpakathāya. Antopaviṭṭhahanukā ekato, ubhato vā samkucitavisukā. Vaṅkahanukā ekapassena kuṭilavisukā. Pabbhārahanukā purato olambamānavisukā.

239. Vikiṇṇavacanā nāma samphappalāpino, tappaṭikkhepena avikiṇṇavacanā mahābodhisattā. Vācā eva tadatthādhigamupāyatāya "byappatho"ti vuttāti āha "avikiṇṇa -pa- vacanapatho assā"ti. "Dvīhi dvīhī"ti nayidamāmeḍitavacanam asamānādhikaraṇato, atha kho dvīhi diguṇatādassananti āha "dvīhi dvīhīti catūhī"ti. Tasmā "dvidugamā"ti catugamā vuttāti āha "catuppadānan"ti. Tathāsabhāvoti yathāssa vuttanayena kenaci appadhamsiyatā hoti guṇehi, tathāsabhāvo.

Samadantādilakkhaṇavaṇṇanā (31-32)

- 240. Visuddhasīlācāratāya parisuddhā samantato, sabbathā vā suddhā puggalā parivārā etassāti **parisuddhaparivāro**.
- 241. Pahāsīti tadaṅgavasena, vikkhambhanavasena ca pariccaji. Tidivaṁ tāvatiṁsabhavanaṁ puraṁ nagaraṁ etesanti tidivapurā, tāvatiṁsadevā, tesaṁ varo tidivapuravaro, indo. Tena tidivapuravarena. Tenāha "sakkenā"ti. Lapanti kathenti etenāti lapanaṁ, mukhanti āha "lapanajanti mukhajan"ti. Suṭṭhu dhavalatāya sukkā, īsakampi asaṁkiliṭṭhatāya suci, sundarasaṇṭhānatāya suṭṭhu bhāvanato¹, vipassanato ca sobhanā. Kāmaṁ janānaṁ manussānaṁ nivāsanaṭṭhānādibhāvena patiṭṭhābhūto desaviseso "janapado"ti vuccati, idha pana saparivāracatumahādīpasaññito sabbo padeso tathā vuttoti āha "cakkavāļaparicchinno janapado"ti. Nanu ca yathāvutto padaso samuddaparicchinno, na cakkavāļapabbataparicchinnoti? So padeso cakkavāļaparicchinnopi hotīti tathā vuttaṁ, ye vā samuddanissitā, cakkavāļaparicchinnopi totīti tathā vuttaṁ, ye vā samuddanissitā, cakkavāļaparicchinno"ti avoca. Cakkavāļaparicchinnoti ca cakkavāļena paricchinnoti evamettha attho daṭṭhabbo. Tassāti tassa cakkavattino.

Puna tassāti tassa janapadassa. Bahujana sukhanti ettha paccattabahuvacanalopena bahujanaggahaṇanti āha "bahujanā"ti. Yathā pana te hitasukhaṁ caranti, taṁ vidhiṁ dassetuṁ "samānasukhadukkhā hutvā"ti vuttaṁ. Vigatapāpoti sabbaso samucchindanena viniddhutapāpadhammo. Daratho vuccati kāyiko, cetasiko ca pariļāho. Tattha cetasikapariļāho "vigatapāpo"ti imināva vuttoti āha "vigatakāyikadarathakilamatho"ti. Rāgādayo yasmiṁ santāne uppannā, tassa malīnabhāvakaraṇena malā. Kacavarabhāvena khilā. Sattānaṁ mahānatthakarattā visesato doso kalīti vuttaṁ "dosakalīnañcā"ti. Panūdehīti samucchindanavasena sasantānato nīhārakehi, pajahanakehīti attho. Sesaṁ suviññeyyameva.

Ettha ca yasmā sabbesampi lakkhanānam mahāpurisasantānagatapuññasambhārahetukabhāvena sabbamyeva tam puññakammam sabbassa lakkhanassa kāranam visittharūpattā phalassa. Na hi abhinnarūpakāraņam bhinnasabhāvassa phalassa paccayo bhavitum sakkoti, tasmā yassa yassa lakkhaņassa yam yam puññakammam visesakāranam, tam tam¹ vibhāgena dassentī ayam desanā pavattā. Tattha yathā yādisam kāyasucaritādipuññakammam suppatitthitapādatāya kāranam vuttam, tādisameva "unhīsasīsatāya kāranan"ti na sakkā vattum dalhasamādānatāvisitthassa tassa suppattitthitapādatāva kāranabhāvena vuttattā, itarassa ca pubbangamatāvisitthassa vuttattā, evam yādisam āyatapanhitāya kāraṇam, na tādisameva dīghangulitāya, brahmujugattatāya ca kāraṇam visittharūpattā phalassa. Na hi abhinnarūpakāraṇam bhinnasabhāvassa phalassa paccayo bhavitum sakkoti. Tattha yathā ekeneva kammunā cakkhādinānindriyuppattiyam avatthābhedato, sāmatthiyabhedato vā kammabhedo icchitabbo. Na hi yadavattham kammam cakkhussa kāranam, tadavatthameva sotādīnam kāranam hoti abhinnasāmatthiyam vā, tasmā pañcāyatanikattabhāvapatthanābhūtā purimanipphannā kāmatanhā paccayavasena visitthasabhāvā kammassa visitthasabhāvaphalanibbattanasamatthatāsādhanavasena paccayo hotīti ekampi anekavidhaphalanibbattanasamatthatāvasena anekarūpatam āpannam viya hoti, evamidhāpi "ekampi pānātipātā

veramaṇivasena pavattaṁ kusalakammaṁ āyatapaṇhitādīnaṁ tiṇṇampi lakkhaṇānaṁ nibbattakaṁ hotī''ti vuccamānepi na koci virodho. Tena vuttaṁ "so tassa kammassa katattā -pa- imāni tīṇi mahāpurisalakkhaṇāni paṭilabhatī''ti¹. Nānākammunā pana tesaṁ nibbattiyaṁ vattabbameva natthi, pāḷiyaṁ pana "tassa kammassā''ti ekavacananiddeso sāmaññavasenāti daṭṭhabbo. Evañca katvā satapuññalakkhaṇavacanaṁ samatthitaṁ hoti. "Imāni dve mahāpurisalakkhaṇāni paṭilabhatī''ti-ādīsupi eseva nayoti.

Sumangalavilāsiniyā dīghanikāyaṭṭhakathāya Lakkhaṇasuttavaṇṇanāya līnatthappakāsanā.

8. Siṅgālasutta

Nidānavaņņanā

242. Pākārena parikkhittanti padam ānetvā sambandho. Gopuraṭṭālakayuttanti dvārapāsādena ceva tattha tattha pākāramatthake patiṭṭhāpita-aṭṭālakehi ca yuttam. Veļūhi parikkhittattā, abbhantare pupphūpagaphalūpagarukkhasanchannattā ca nīlobhāsam. Chāyūdakasampattiyā, bhūmibhāgasampattiyā ca manoramam.

Kāļakavesenāti kalandakarūpena. Nivāpanti bhojanam. Tanti uyyānam.

"Kho panā"ti vacanālankāramattametanti tena samayenāti atthavacanam yuttam. Gahapatimahāsāloti gahapatibhūto mahāsāro, ra-kārassa la-kāram katvā ayam niddeso. Vibhavasampattiyā mahāsārappatto kuṭumbiko. "Putto panassa assaddho"ti-ādi aṭṭhuppattikoyam suttanikkhepoti tam aṭṭhuppattim dassetum āraddham. Kammaphalasaddhāya abhāvena assaddho. Ratanattaye pasādābhāvena appasanno. Evamāhāti evam idāni vuccamānākārena vadati.

Yāvajīvam anussaraņīyā hoti hitesitāya vuttā pacchimā vācāti adhippāyena. Puthudisāti visum visum disā, tā pana anekāti āha "bahudisā"ti.

243. "Na tāva paviṭṭho"ti-ādīsu vattabbaṁ heṭṭhā vuttameva. Na idānevāti na imāya eva velāya. Kiṁcarahīti āha "paccūsasamayepī"ti-ādi. Gihivinayanti gihīnaṁ gahaṭṭhānaṁ vinayatantibhūtaṁ "gihinā evaṁ vattitabban"ti gahaṭṭhācārassa gahaṭṭhavattassa anavasesato imasmiṁ sutte savisesaṁ katvā vuttattā. Tathevāti yathā buddhacakkhunā diṭṭhaṁ, tatheva passi. Namassati vattavasena kattabbanti gahetvā ṭhitattā.

Chadisādivannanā

244. **Vacanaṁ sutvāva cintesi** buddhānubhāvena, attasammāpaṇidhānanimittena puññabalena ca codiyamāno. **Na kira tā etā**ti tā

cha disā etā idāni mayā namassiyamānā puratthimādikā na honti kirāti. **Nipātamattan**ti anatthakabhāvaṁ tassa vadati. **Pucchāpadan**ti pucchāvacanaṁ.

Bhagavā gahapatiputtena namassitabbā cha disā pucchito desanākusalatāya ādito eva tā akathetvā tassa tāva patipattiyā nam bhājanabhūtam kātum vajjanīyavajjanatthanceva sevitabbasevanatthanca ovādam dento "yato kho gahapatiputtā" ti-ādinā desanam ārabhi. Tattha kammakilesāti kammabhūtā samkilesā. Kilissantīti kilitthā malīnā viya thitā, upatāpitā ca hontīti attho. **Tasmā**ti kilissananimittattā. Yadipi surāpānam pañcaverabhāvena upāsakehi parivajjanīyam, tassa pana apāyamukhabhāvena parato vattukāmatāya pānātipātādike eva sandhāya "cattāro"ti vuttam, na "pañcā"ti. "Visum akammapathabhāvato cā"ti apare. "Surāpānampi 'surāmerayapānam bhikkhave āsevitam bhāvitam bahulīkatam nirayasamvattanikan'ti-ādi¹ vacanato visum kammapathabhāvena āgatam. Tathā hi tam duccaritakammam hutvā duggatigāmipitthivattakabhāvena niyatan"ti keci, tesam matena ekādasa kammapathā siyum. Tasmā yathāvuttesveva kammapathesu upakārakattasabhāgattavasena anuppaveso datthabboti "visum akammapathabhāvato cā"ti suvuttametam. Surāpānassa bhogāpāyamukhabhāvena vattukāmatāya "cattāro" tveva avoca. Titthati ettha phalam tadāyattavuttitāyāti **thānam**, hetūti āha "**thānehīti kāraņehī**"ti. Apenti apagacchanti, apeti vā etehīti apāyā, apāyānam, apāyā eva vā mukhāni dvārānīti apāyamukhāni. Vināsamukhānīti etthāpi eseva nayo.

Kiñcāpi "ariyasāvakassā"ti pubbe sādhāraņato vuttam, visesato pana paṭhamāya bhūmiyam ṭhitasseva vakkhamānanayo yujjatīti "soti so sotāpanno"ti vuttam. Pāpaka-saddo nihīnapariyāyoti "lāmakehī"ti vuttam. Apāyadukkham, vaṭṭadukkhañca pāpentīti vā pāpakā, tehi pāpakehi. Cha disā paṭicchādentoti tena tena bhāgena dissantīti "disā"ti saññite cha bhāge satte yathā tehi saddhim attano chiddam na hoti, evam paṭicchādento paṭisandhārento.

Vijinanatthāyāti abhibhavanatthāya. Yo hi diṭṭhadhammikaṁ, samparāyikañca anatthaṁ parivajjanavasena abhibhavati, tato eva tadubhayatthaṁ sampādeti, so ubhayalokavijayāya paṭipanno nāma hoti paccatthikaniggaṇhanato, sakatthasampādanato ca. Tenāha "ayañceva loko"ti-ādi. Pāṇātipātādīni pañca verāni verappasavanato. Āraddho hotīti saṁsādhito hoti, tayidaṁ saṁsādhanaṁ kittisaddena idha sattānaṁ cittatosanena, verābhāvāpādanena ca hotīti āha "paritosito ceva nipphādito cā"ti. Puna pañca verānīti pañca veraphalāni uttarapadalopena.

245. Katamassāti katame assa. Kilesasampayuttattā kilesoti tamyogato tamsadisam vadati yathā "pītisukham paṭhamam jhānam¹, nīlam vatthan"ti ca. Sampayuttatā cettha tadekaṭṭhatāya veditabbā, na ekuppādāditāya. Evañca katvā pāṇātipātakammassa diṭṭhimānalobhādīhipi kiliṭṭhatā siddhā hoti, micchācārassa dosādīhi kiliṭṭhatā. Tenāha "sakilesoyevā"ti-ādi. Pubbe vutta-atthavasena pana sammukhenapi nesam kilesapariyāyo labbhateva. Etadatthaparidīpakamevāti yo "pāṇātipāto kho"ti-ādinā vutto, etassa atthassa paridīpakameva. Yadi evam kasmā puna vuttanti āha "gāthābandhan"ti, tassa atthassa sukhaggahaṇattham bhagavā gāthābandham avocāti adhippāyo.

Catuțhānādivannanā

246. "Pāpakammaṁ karotī"ti kasmā ayamuddesaniddeso pavattoti antolīnacodanaṁ sandhāya "idaṁ bhagavā"ti-ādi vuttaṁ. Sukkapakkhavasena hi uddeso kato, kaṇhapakkhavasena ca niddeso āraddho. Kāraketi pāpakammassa kārake. Akārako pākaṭo hoti yathā paṭipajjanto pāpaṁ karoti nāma, tathā appaṭipajjanato. Saṁkilesadhammavivajjanapubbakaṁ vodānadhammapaṭipatti-ācikkhanaṁ idha desanākosallaṁ. Paṭhamataraṁ kārakaṁ dassento āha yathā "vāmaṁ muñca dakkhinaṁ ganhā"ti².

^{1.} Dī 1. 69; Ma 1. 214, 231, 239; Saṁ 1. 412; Aṁ 1. 441; Aṁ 2. 21; Vi 1. 5; Abhi 1. 116; Abhi 2. 253 pitthesu.

^{2.} Abhi-Ttha 1. 321 pitthe.

Tathā hi bhagavā aṭṭhatimsa maṅgalāni dassento "asevanā ca bālānan"ti¹ vatvā "paṇḍitānañca sevanā"ti¹ avoca. Chandāgatinti ettha sandhivasena saralopoti dassento āha "chandena pemena agatin"ti. Chandāti hetumhi nissakkavacananti āha "chandenā"ti. Chanda-saddo cettha taṇhāpariyāyo, na kusalacchandādipariyāyoti āha "pemenā"ti. Parapadesūti "dosāgatim gacchanto"ti-ādīsu vākyesu. "Eseva nayo"ti iminā "dosena kopenā"ti evamādi-atthavacanam atidisati. Mittoti daļhamitto, sambhattoti attho. Sandiṭṭhoti diṭṭhamattasahāyo. Pakativeravasenāti pakatiyā uppannaveravasena, cirakālānubandhavirodhavasenāti attho. Tenevāha "taṅkhaṇuppannakodhavasena vā"ti. Yaṁ vā taṁ vā ayuttaṁ akāraṇaṁ vatvā. Visame corādike, visamāni vā kāyaduccaritādīni samādāya vattanena nissito visamanissito.

Chandāgati-ādīni na gacchati maggeneva catunnampi agatigamanānam pahīnattā, agatigamanānīti ca tathāpavattā apāyagamanīyā akusalacittuppādā veditabbā agati gacchati etehīti.

Yassati tena kittīyatīti **yaso**, thutighoso. Yassati tena purecarānucarabhāvena parivārīyatīti **yaso**, parivāroti āha **"kittiyasopi parivārayasopī"**ti. **Parihāyatī**ti pubbe yo ca yāvatake labbhati, tato parito hāyati parikkhayam gacchati.

Cha apāyamukhādivannanā

247. Pūve bhājane pakkhipitvā tajjam udakam datvā madditvā katā pūvasurā. Evam sesasurāpi. Kiṇṇāti pana tassā surāya bījam vuccati, ye "surāmodakā"tipi vuccanti, te pakkhipitvā katā kiṇṇapakkhittā. Harītakīsāsapādinānāsambhārehi samyojitā sambhārasamyuttā. Madhukatālanāļikerādipuppharaso cirapārivāsiko pupphāsavo. Panasādiphalaraso phalāsavo. Muddikāraso madhvāsavo. Ucchuraso guļāsavo. Harītakāmalakakaṭukabhaṇḍādinānāsambhārānam raso cirapārivāsiko sambhārasamyutto. Tam sabbampīti tam sabbam dasavidhampi.

Madakaraṇavasena majjam pivantam madayatīti katvā. Surāmerayamajje pamādaṭṭhānam surāmerayamajjapamādaṭṭhānam. Anu anu yogoti punappunam tamsamangitā. Tenāha "punappunam karaṇan"ti, aparāparam pavattananti attho. Uppannā ceva bhogā parihāyanti pānabyasanena byasanakaraṇato. Anuppannā ca nuppajjanti pamattassa kammantesu ñāyakaraṇābhāvato. Bhogānanti bhuñjitabbaṭṭhena "bhogā"ti laddhanāmānam kāmaguṇānam. Apāyamukhasaddassa attho heṭṭhā vutto eva. Avelāyāti ayuttavelāya. Yadā vicarato attharakkhādayo na honti. Visikhāsu cariyāti racchāsu vicaraṇam.

Samajjā vuccati maho, yatthā naccānipi payojīyanti, tesam dassanādiattham tattha abhirativasena caraṇam upagamanam samajjābhicaraṇam.

Naccādidassanavasenāti naccādīnam dassanādivasenāti-ādisaddalopo daṭṭhabbo, dassanena vā savanampi gahitam virūpekasesanayena.

Ālocanasabhāvatāya vā pañcaviññāṇānam savanakiriyāyapi dassanasankhepasambhavato "dassanavasena" icceva vuttam. Idha cittālasiyatā akāraṇanti "kāyālasiyatā"ti vuttam. Yuttappayuttatāti tappasutatā atirekataratāya.

Surāmerayassa cha ādīnavādivannanā

248. Sayam daṭṭhabbanti sandiṭṭhaṁ, sandiṭṭhameva sandiṭṭhikaṁ, dhanajānisaddāpekkhāya pana itthiliṅgavasena niddeso, diṭṭhadhammikāti ayamettha atthoti āha "idhalokabhāvinī"ti. Samaṁ, sammā passitabbāti vā sandiṭṭhikā, pānasamakālabhāvinīti attho. Kalahappavaḍḍhanī mittassa kalahe anādīnavadassibhāvato. Khettaṁ uppattiṭṭhānabhāvato. Āyatananti vā kāraṇaṁ, ākaro vāti attho. Paraloke akittiṁ pāpuṇanti akittisaṁvattaniyassa kammassa pasavanato. Kopīnaṁ vā pākaṭabhāvena akattabbarahassakammaṁ. Surāmadamattā ca pubbe attanā kataṁ tādisaṁ kammaṁ amattakāle chādentā vicaritvā mattakāle paccatthikānampi vivaranti pākaṭaṁ karonti, tena tesaṁ sā surā tassa kopīnassa nidaṁsanato "kopī na nidaṁsanī"ti vuccatīti evamettha attho daṭṭhabbo. Kammassakatāpaññanti nidassanamattaṁ daṭṭhabbaṁ. "Yaṁ kiñci lokiyaṁ paññaṁ dubbalaṁ karotiyevā"ti hi sakkā viññātuṁ. Tathā hi byatirekamukhena tamatthaṁ

patiṭṭhapetuṁ "maggapaññaṁ panā"ti-ādi vuttaṁ. "Antomukhameva na pavisatī"ti iminā surāya maggapaññādubbalakaraṇassa durasamussāritabhāvamāha. Nanu cevaṁ surāya tassā paññāya dubbalīkaraṇe sāmatthiyavighāto acodito hoti ariyānaṁ anuppayogasseva coditattāti? Nayidamevaṁ upayogopi nāma sadā tesaṁ natthi, kuto kiccakaraṇanti imassa atthassa vuttattā. Atha pana aṭṭhānaparikappavasenassā kadāci siyā upayogo, tathāpi so tassā dubbaliyaṁ īsakampi kātuṁ nālameva sammadeva paṭipakkhadūrībhāvena suppatiṭṭhitabhāvato. Tenāha "maggapaññaṁ pana dubbalaṁ kātuṁ na sakkotī"ti. Maggasīsena cettha ariyānaṁ sabbassāpi lokiyalokuttarāya paññāya dubbalabhāvāpādāne asamattatā dassitāti daṭṭhabaṁ. Pajjati etena phalanti padaṁ, kāraṇaṁ.

249. Attāpissa akālacārissa agutto sarasato arakkhito upakkamatopi parivajjanīyānam aparivajjanato. Tenāha "avelāya caranto hī"ti-ādi. Kaṇṭakādīnipīti pi-saddena sobbhādike saṅgaṇhāti. Verinopīti pi-saddena corādikā saṅgayhanti. Puttadārāti ettha puttaggahaṇena puttīpi gahitāti āha "puttadhītaro"ti. Bahi patthananti kāmapatthanāvasena antogehassitato nibaddhavatthuto bahiddhā patthanam katvā. Aññehi katapāpakammesūti parehi katāsu pāpakiriyāsu. Saṅkitabbo hoti akāle tattha tattha caraṇato. Ruhati yasmim padese corikā pavattā, tattha parehi diṭṭhattā. Vattum na sakkāti "ettakam dukkham, ettakam domanassan"ti paricchinditvā vattum na sakkā. Tam sabbampi¹ vikālacārimhi puggale āharitabbam tassa upari pakkhipitabbam hoti. Katham? Aññasmim puggale tathārūpe āsaṅkitabbe asati. Itīti evam. Soti vikālacārī. Purakkhato purato attano upari āsaṅkante katvā carati.

250. **Naṭanāṭakādinaccan**ti naṭehi nāṭakehi

naccitabbanāṭakādinaccavidhi. Ādi-saddena avasiṭṭhaṁ sabbaṁ saṅgaṇhāti. "Tattha gantabbaṁ hotī"ti vatvā tatthassa gamanena yathā anuppannānaṁ bhogānaṁ anuppādo, uppannānañca vināso hoti, taṁ dassetuṁ "tassā"ti-ādi vuttaṁ. Gītanti saragataṁ,

pakaraṇagataṁ, tāḷagataṁ, apadhānagatanti gandhabbasatthavihitaṁ aññampi sabbaṁ gītaṁ veditabbaṁ. Vāditanti vīṇāveṇumudiṅgādivādanaṁ. Akkhānanti bhāratayuddhasītāharaṇādi-akkhānaṁ. Pāṇissaranti kaṁsatāḷaṁ, "pāṇitāḷan"tipi vadanti. Kumbhathūnanti caturassa-ambaṇakatāḷaṁ. "Kuṭabherisaddo"ti keci. "Eseva nayo"ti iminā "kasmiṁ ṭhāne"ti-ādinā nacce vuttamatthaṁ gītādīsu atidisati.

251. Jayanti jūtam jinanto. Veranti jitena kīļakapurisena jayanimittam attano upari veram virodham pasavati uppādeti. Tañhissa verapasavanam dassetum "jitam mayā"ti-ādi vuttam. Jinoti jūtaparājayāpannāya dhanajāniyā jino. Tenāha "aññena jito samāno"ti-ādi. Vittam anusocatīti tam jinam vittam uddissa anutthunati. Vinicchayaṭṭhāneti yasmim kismiñci aṭṭavinicchayaṭṭhāne. Sakkhipuṭṭhassāti sakkhibhāvena puṭṭhassa. Akkhasoṇḍoti akkhadhutto. Jūtakaroti jūtapamādaṭṭhānānuyutto. Tvampi nāma kulaputtoti kulaputto nāma tvam, na mayam tayi kolaputtiyam idāni passāmāti adhippāyo. Chinnabhinnakoti chinnabhinnahirottappo, ahiriko anottappīti attho. Tassa kāraṇāti tassa atthāya.

Anicchitoti na icchito. Positabbā bhavissati jūtaparājayena sabbakālam rittatucchabhāvato.

Pāpamittatāya cha ādīnavādivannanā

- 252. **Akkhadhuttā**ti akkhesu dhuttā, akkhanimittam atthavināsakā. **Itthisoņḍā**ti itthīsu soṇḍā, itthisambhoganimittam ātappanakā. Tathā **bhattasoṇḍā**dayo veditabbā. **Pipāsā**ti uparūpari surāvipāsā. Tenāha **"pānasoṇḍā"**ti. **Nekatikā**dayo heṭṭhā vuttā eva. Metti-uppattiṭṭhānatāya **mittā honti. Tasmā**ti pāpamittatāya.
- 253. **Kammantan**ti kammam, yathā suttamyeva suttanto, evam kammamyeva kammanto, tam kātum **gacchāmāti vutto.** Kammam vā anto niṭṭhānam gacchati etthāti **kammanto**, kammakaraṇaṭṭhānam, tam **gacchāmāti vutto.**

Pannasakhāti suram pātum panne paṭipajjante eva sakhāti pannasakhā. Tenāha "ayamevattho"ti. "Sammiyasammiyo"ti vacanam ettha atthīti sammiyasammiyo. Tenāha "sammasammāti vadanto"ti. Sahāyo hotīti sahāyo viya hoti. Otārameva gavesatīti randhameva pariyesati anatthamassa kātukāmo. Verappasavoti parehi attani verassa pasavanam anupavattanam. Tenāha "verabahulatā"ti. Paresam kariyamāno anattho ettha atthīti anattho, tabbhāvo anatthatāti āha "anatthakāritā"ti. Yo hi paresam anattham karoti, so atthato attano anatthakāro nāma, tasmā anatthatāti ubhayānatthakāritā. Ariyo vuccati satto, kucchito ariyo kadariyo. Yassa dhammassa vasena so "kadariyo"ti vuccati, so dhammo kadariyatā, macchariyam. Tam pana dubbisajjanīyabhāve ṭhitam sandhāyāha "suṭṭhu kadariyatā thaddhamacchariyabhāvo"ti. Avipaṇṇasabhāvato uṭṭhātum asakkonto ca iṇam gaṇhanto samsīdantova iṇam vigāhati nāma. Sūriye anuggate eva kammante anārabhanto rattim anuṭṭhānasīlo.

Atthāti dhanāni. Atikkamantīti apagacchanti. Atha vā atthāti kiccāni. Atikkamantīti atikkantakālāni honti, tesam atikkamopi atthato dhanānam eva atikkamo. Iminā kathāmaggenāti iminā "yato kho gahapatiputtā"ti-ādi¹ nayappavattena kathāsankhātena hitādhigamūpāyena. Ettakam kammanti cattāro kammakilesā, cattāri agatigamanāni, cha bhogānam apāyamukhānīti evam vuttam cuddasavidham pāpakammam.

Mittapatirūpakavannanā

254. Anatthoti "bhogajāni, āyasakyam, parisamajjhe mankubhāvo, sammūļhamaraṇan"ti evamādiko diṭṭhadhammiko "duggatiparikileso, sugatiyañca appāyukatā, bahvābādhatā, atidaliddatā, appannapānatā"ti evamādiko ca anattho uppajjati. Yāni kānici bhayānīti attānuvādabhayaparānuvādabhayadaṇḍabhayādīni loke labbhamānāni yāni kānici bhayāni. Upaddavāti antarāyā. Upasaggāti sarīrena samsaṭṭhāni

viya uparūpari uppajjanakāni byasanāni. **Aññadatthū**ti ekantenāti etasmim atthe nipāto "aññadatthudaso"ti-ādīsu¹ viyāti vuttam "**ekamsenā**"ti. **Yam kiñci** gahaṇayogyam **haratiyeva** gaṇhātiyeva. Vācā eva paramā etassa kammanti **vacīparamo**. Tenāha "**vacanamattenevā**"ti-ādi. **Anuppiyan**ti takkanam, yam vā "rucī"ti vuccati yehi surāpānādīhi bhogā apenti vigacchanti, tesu tesam **apāyesu** byasanahetūsu **sahāyo hoti**.

- 255. Hārakoyeva hoti, na dāyako, tamassa ekamsato hārakabhāvam dassetum "sahāyassā"ti-ādi vuttam. Yam kiñci appakanti pupphaphalādi yam kiñci parittam vatthum datvā, bahum pattheti bahum mahaggham vatthayugādim paccāsīsati. Dāso viya hutvā mittassa tam tam kiccam karonto katham amitto nāma jātoti āha "ayan"ti-ādi. Yassa kiccam karoti anatthaparihārattham, attano mittabhāvadassanatthanca, tam sevati. Atthakāranāti vaḍḍhinimittam, ayametesam bhedo.
- 256. **Pare**ti paradivase. **Na āgatos**īti āgato nāhosi. **Khīṇan**ti tādisassa, asukassa ca dinnattā. **Sassasaṅgahe**ti sassato kātabbadhaññasaṅgahe **kate**.
- 257. "Dānādīsu yaṁ kiñci karomā"ti vutte "sādhu samma karomā"ti anujānātīti imamatthaṁ **"kalyāņepi eseva nayo**"ti atidisati. Nanu evamanujānanto ayaṁ mitto eva, na amitto mittapatirūpakoti? Anuppiyabhāṇīdassanamattametaṁ. Sahāyena vā desakālaṁ, tasmiṁ vā kate uppajjanakavirodhādiṁ asallakkhetvā "karomā"ti vutte yo taṁ jānanto eva "sādhu samma karomā"ti anuppiyaṁ bhaṇati, taṁ sandhāya vuttaṁ "kalyāṇampissa anujānātī"ti. Tena vuttaṁ "kalyāṇepi eseva nayo"ti.
 - 259. Mittapatirūpakā ete mittāti evam jānitvā.

Suhadamittavannanā

- 260. **Sundarahadayā**ti pemassa atthivasena bhaddacittā.
- 261. Pamattaṁ rakkhatīti ettha pamādavasena kiñci ayutte kate tādise kāle rakkhaṇaṁ "bhītassa saraṇaṁ hotī"ti imināva taṁ gahitanti tato aññameva pamattassa rakkhaṇavidhiṁ dassetuṁ "majjaṁ pivitvā"ti-ādi vuttaṁ. Gehe ārakkhaṁ asaṁvihitassa bahigamanampi pamādapakkhikamevāti "sahāyo bahigato vā hotī"ti vuttaṁ. Bhayaṁharantoti bhayaṁ paṭibāhanto. Bhogahetutāya phalūpacārena dhanaṁ "bhogan"ti vadati. Kiccakaraṇīyeti khuddake, mahante ca kātabbe uppanne.
- 262. **Nigūhituṁ yuttakathan**ti nigūhituṁ chādetuṁ yuttakathaṁ, nigūhituṁ vā yuttā kathā etassāti **nigūhituṁyuttakathaṁ**, attano kammaṁ. **Rakkhatī**ti anāvikaronto chādeti. **Jīvitampī**ti **pi**-saddena kimaṅgaṁ pana aññaṁ pariggahitavatthunti dasseti.
- 263. Passantesu passantesūti āmeḍitavacanena nivāriyamānassa pāpassa punappunam karaṇam dīpeti. Punappunam karonto hi pāpato visesena nivāretabbo hoti. Saraṇesūti saraṇesu vattassu abhinnāni katvā paṭipajja, saraṇesu vā upāsakabhāvena vattassu. Nipuṇanti saṇham. Kāraṇanti kammassakatādibhedayuttam. Idam kammanti imam dānādibhedam kusalakammam. "Kamman"ti sādhāraṇato vuttassāpi tassa "sagge nibbattantī"ti padantarasannidhānena saddhāhi rottappālobhādiguṇadhammasamaṅgītā viya kusalabhāvo jotito hoti. Saddhādayo hi dhammā saggagāmimaggo. Yathāha—

"Saddhā hiriyam kusalañca dānam, Dhammā ete sappurisānuyātā. Etam hi maggam diviyam vadanti, Etena hi gacchati devalokan"ti¹. 264. Bhavanam sampattivaḍḍhanam bhavoti attho, tappaṭikkhepena abhavoti āha "abhavena avuḍḍhiyā"ti. Pārijuññanti jāni. Anattamano hotīti attamano na hoti anukampakabhāvato. Aññadatthu tam abhavam attani āpatitam viya maññati. Idāni tam bhavam sarūpato dassetum "tathārūpan"tiādi vuttam. Virūpoti bībhaccho. Na pāsādikoti tasseva vevacanam. Sujātoti sundarajātiko jātisampanno.

265. Jalanti jalanto. Aggīvāti aggikkhandho viya. Bhāsatīti virocati. Yasmāssa bhagavatā savisesam virocanam, loke pākaṭabhāvañca dassetum "jalam aggīva bhāsatī"ti vuttam, tasmā yadā aggi savisesam virocati, yattha ca ṭhito dūre ṭhitānampi paññāyati, tam dassanādivasena tamattham vibhāvetum "rattin"ti-ādi vuttam.

"Bhamarasseva irīyato"ti etenevassa bhogasamharaṇam dhammikam ñāyopetanti dassento "attānampī"ti-ādimāha. Rāsim karontassāti yathāssa dhanadhaññādibhogajātam sampiṇḍitam rāsibhūtam hutvā tiṭṭhati, evam irīyato āyūhantassa ca. Cakkappamāṇanti rathacakkappamāṇam. Nicayanti vuḍḍhim parivuḍḍhim. "Bhogā sannicayam yantī"ti keci paṭhanti.

Samāhatvāti samharitvā. Alam-saddo "alameva sabbasankhāresu nibbinditum, alam virajjitun"ti-ādīsu¹ yuttanti imamattham joteti, "alamariyañāṇadassanavisesan"ti-ādīsu² pariyattanti. Yo ve ṭhitattoti-ādīsu³ viya atta-saddo sabhāvapariyāyoti tam sabbam dassento "yuttasabhāvo"ti-ādimāha. Saṇṭhapetunti sammā ṭhapetum sammadeva pavattetunti attho.

Evaṁ vibhajantoti evaṁ vuttanayena attano dhanaṁ catudhā vibhajanto vibhajanahetu mittāni ganthati soļasa kalyāṇamittāni mettāya ajīrāpanena pabandhati. Tenāha "abhejjamānāni ṭhapetī"ti. Kathaṁ pana vuttanayena catudhā bhogānaṁ vibhajanena mittāni ganthatīti āha "yassa hī"ti-ādi. Tenāha bhagavā "dadaṁ mittāni ganthatī"ti⁴.

^{1.} Dī 2. 161; Sam 1. 387, 390, 393, 397, 398 piţthesu.

^{2.} Ma 1. 268, 269 piṭṭhesu.

^{3.} Khu 1. 310 pitthe.

^{4.} Sam 1. 207 pitthe.

Bhuñjeyyāti upabhuñjeyya, upayuñjeyya cāti attho. Samaṇabrāhmaṇakapaṇaddhikādīnaṁ dānavasena ceva adhivatthadevatādīnaṁ petabalivasena, nhāpitādīnaṁ vetanavasena ca viniyogopi upayogo eva. Tathā hi vakkhati "imesu panā"ti-ādi¹. Āyo nāma heṭṭhimantena vayato catugguṇo icchitabbo, aññathā vayo avicchedavasena na santāneyya, nidheyya, bhājeyya ca asambhateti vuttaṁ "dvīhi kammaṁ payojaye"ti. Nidhetvāti² nidahitvā, bhūmigataṁ katvāti attho. Rājādivasenāti ādi-saddena aggi-udakacoradubbhikkhādike saṅgaṇhāti. Nhāpitādīnanti ādi-saddena kulālarajakādīnaṁ saṅgaho.

Chaddisāpaṭicchādanakaṇḍavaṇṇanā

266. Catūhi kāranehīti na chandagamanādīhi catūhi kāranehi. Akusalam pahāyāti "cattāro kammakilesā"ti vuttam akusalanceva agatigamanākusalañca pajahitvā. Chahi kāranehīti surāpānādīsu ādīnavadassanasankhātehi chahi kāranehi. Surāpānānuyogādibhedam chabbidham bhogānam apāyamukham vināsamukham vajjetvā. Solasa mittānīti upakārādivasena cattāro, pamattarakkhanādikiccavisesavasena paccekam cattāro cattāro katvā solasavidhe kalyānamitte **sevanto** bhajanto. Satthavānijjādimicchājīvam pahāya ñāyeneva vattanato dhammikena ājīvena iīvati. Namassitabbāti upakāravasena, gunavasena ca namassitabbā sabbadā natena hutvā vattitabbā. Disā-saddassa attho heṭṭhā vutto eva. Āgamanabhayanti tattha sammā appatipattiyā, micchāpatipattiyā ca uppajjanaka-anattho. So hi bhāyanti etasmāti "bhayan"ti vuccati. Yena kāranena mātāpitu-ādayo puratthimādibhāvena apaditthā, tam dassetum "pubbupakāritāyā" ti-ādi vuttam, tena atthasarikkhatāya nesam puratthimādibhāvoti dasseti. Tathā hi mātāpitaro puttānam puratthimabhāvena tāva upakāribhāvena dissanato, apadissanato ca puratthimā disā. Ācariyā antevāsikassa dakkhinabhāvena, hitāhitam patikusalabhāvena dakkhinārahatāya ca vuttanayena dakkhinā disā. Iminā nayena "pacchimā disā"ti-ādīsu

^{1.} Dī-Ṭṭha 3. 135 piṭṭhe.

yathāraham attho veditabbo. Gharāvāsassa dukkhabahulatāya te te ca kiccavisesā yathā-uppattitadukkhanittharaṇatthāti vuttam "te te dukkhavisese uttaratī"ti. Yasmā dāsakammakarā sāmikassa pādānam payirupāsanavasena ceva tadanucchavikakiccasādhanavasena ca yubhuyyena santikāvacarā, tasmā vuttam "pādamūle patiṭṭhānavasenā"ti. Guṇehīti uparibhāvāvahehi guṇehi. Upari ṭhitabhāvenāti saggamagge, mokkhamagge ca patiṭṭhitabhāvena.

267. **Bhato**ti posito, tam pana bharaṇam jātakālato paṭṭhāya sukhapaccayūpaharaṇena, dukkhapaccayāpaharaṇena ca tehi pavattitanti dassetum "thaññam pāyetvā"ti-ādi vuttam. **Jaggito**ti paṭijaggito. **Te**ti mātāpitaro.

Mātāpitūnam santakam khettādim avināsetvā rakkhitam tesam paramparāya ṭhitiyā kāraṇam hotīti "tam rakkhanto kulavamsam saṇṭhapeti nāmā"ti vuttam. Adhammikavamsatoti "kulappadesādinā attanā sadisam etam purisam ghaṭetvā vā gīvāyam vā hatthe vā bandhamaṇiyam vā tāretabban"ti evamādinā pavatta-adhammikapaveṇito. Hāretvāti apanetvā tam gāham vissajjāpetvā. Mātāpitaro tato gāhato vivecaneneva hi āyatim tesam paramparāhārikā siyā. Dhammikavamseti himsādiviratiyā dhammike vamse dhammikāya paveṇiyam. Ṭhapentoti patiṭṭhapento. Salākabhattādīni anupacchinditvāti salākabhattadānādīni avicchinditvā.

Dāyajjam paṭipajjāmīti ettha yasmā dāyapaṭilābhassa yogyabhāvena vattamānoyeva dāyajjam paṭipajjati nāma, na itaro, tasmā tamattham dassetum "mātāpitaro"ti-ādi vuttam. Dāraketi putte. Vinicchayam patvāti "puttassa cajavissajjanan"ti evamāgatam vinicchayam āgamma. Dāyajjam paṭipajjāmīti vuttanti "dāyajjam paṭipajjāmī"ti idam catuttham vattanaṭṭhānam vuttam. Tesanti mātāpitūnam. Tatiyadivasato paṭṭhāyāti matadivasato tatiyadivasato paṭṭhāya.

Pāpato nivāraņam nāma anāgatavisayam. Sampattavatthutopi hi nivāranam vītikkame anāgate eva siyā, na vattamāne. Nibbattitā pana

pāpakiriyā garahaṇamattapaṭikārāti āha "katampi garahantī"ti. Nivesentīti patiṭṭḥapenti. Vuttappakārā mātāpitaro anavajjameva sippaṁ sikkhāpentīti vuttaṁ "muddāgaṇanādisippan"ti. Rūpādīhīti ādi-saddena bhogaparivārādiṁ saṅganhāti. Anurūpenāti anucchavikena.

Niccabhūto samayo abhiṇhakaraṇakālo. Abhiṇhattho hi ayam nicca-saddo "niccapahamsito niccapahaṭṭho"ti-ādīsu viya. Yuttapattakālo eva samayo kālasamayo. "Uṭṭhāya samuṭṭhāyā"ti imināssa niccameva dāne tesam yuttapayuttatam dasseti. Sikhāṭhapanam dārakakāle. Āvāhavivāham puttadhītūnam yobbanappattakāle.

Tam bhayam yathā nāgacchati, evam pihitā hoti "puratthimā disā"ti vibhattim parināmetvā yojanā. Yathā pana tam bhayam āgaccheyya, yathā ca nāgaccheyya, tadubhayam dassetum "sace hī"ti-ādi vuttam. **Vippatipannā**ti "bhato ne bharissāmī"ti-ādinā vuttasammāpatipattiyā akāranena ceva tappatipakkhamicchāpatipattiyā akaranena ca vippatipannā puttā assu. Etam bhayanti etam "mātāpitūnam appatirūpā"ti viññūnam garahitabbatābhayam, paravādabhayan"ti evamādi **āgaccheyya** puttesu. Puttānam nānurūpāti ettha "puttānan" ti padam etam bhayam puttānam āgaccheyyāti evam idhāpi ānetvā sambandhitabbam. Tādisānañhi mātāpitūnam puttānam ovādānusāsaniyo dātum samatthakālato patthāya tā tesam dātabbā evāti katvā tathā vuttam. Puttānañhi vasenāyam desanā anāgatā. Sammāpatipannesu ubhosu attano, mātāpitūnañca vasena uppajjanakatāya **sabbam** bhayam **na hoti** sammāpatipannattā. Evam paṭipannattā eva paṭicchannā hoti tattha kātabbapaṭisanthārassa sammadeva katattā. **Khemā**ti anupaddavā. Yathāvuttasammāpatipattiyā akaranena hi uppajjanaka-upaddavā karaņena na hontīti.

"Na kho te"ti-ādinā vutto saṅgīti-anāruļho bhagavatā tadā tassa vutto paramparāgato attho veditabbo. Tenāha "bhagavā siṅgālakaṁ etadavocā"ti. Ayañhīti ettha hi-saddo avadhāraṇe. Tathā hi "no aññā"ti aññadisaṁ nivatteti.

268. Ācariyam dūratova disvā utthānavacaneneva tassa paccuggamanādisāmīcikiriyā avuttasiddhāti tam dassento "paccuggamanam katvā"ti-ādimāha. Upatthānenāti payirupāsanena. Tikkhattum upatthānagamanenāti pāto, majjhanhike, sāyanti tīsu kālesu upatthānattham upagamanena. Sippuggahanattham pana upagamanam upatthanantogadham payojanavasena gamanabhāvatoti āha "sippuggahana -pa- hotī"ti. Sotum icchā sussūsā, sā pana ācariye, sikkhitabbasikkhe ca ādaragāravapubbikā icchitabbā "addhā iminā sippena sikkhitena evarūpam gunam patilabhissāmī''ti. Tathābhūtañca tam savanam saddhāpubbangamam hotīti āha "saddahitvā savanenā"ti. Vuttamevattham byatirekavasena dassetum "asaddahitvā -pa- nādhigacchatī"ti vuttam. Tasmā tassattho vuttapatipakkhanayena veditabbo. Yam sandhāya "avasesakhuddakapāricariyāyā"ti vuttam, tam vibhajanam anavasesato dassetum "antevāsikena hī"ti-ādi vuttam. Paccupatthānādīnīti ādi-saddena āsanapaññāpanam, bījananti evamādim sanganhāti. Antevāsikavattanti antevāsikena ācariyamhi sammāvattitabbavattam. **Sippapatiggahanenā**ti sippaganthassa sakkaccam uggahanena. Tassa hi sutthu uggahanena tadanusārenassa payogopi sammadeva uggahito hotīti. Tenāha "thokam gahetvā"ti-ādi.

Suvinītam vinentīti idha ācāravinayo adhippeto. Sippasmim pana sikkhāpanavinayo "suggahitam gāhāpentī"ti imināva saṅgahitoti vuttam "evam te nisīditabban"ti-ādi. Ācariyā hi nāma antevāsike na diṭṭhadhammike eva vinenti, atha kho samparāyikepīti āha "pāpamittā vajjetabbā"ti. Sippaganthassa uggaṇhanam nāma yāvadeva payogasampādanatthanti āha "payogam dassetvā gaṇhāpentī"ti. Mittāmaccesūti attano mittāmaccesu. Paṭiyādentīti pariggahetvā nam mamattavasena paṭiyādenti. "Ayam amhākam antevāsiko"ti-ādinā hi attano pariggahitadassanamukhena ceva "bahussuto"ti-ādinā tassa guṇapariggaṇhanamukhe ca tam tesam paṭiyādenti. Sabbadisāsu rakkham karonti cātuddisabhāvasampādanenassa sabbattha sukhajīvibhāvasādhanato. Tenāha "uggahitasippo hī"ti-ādi. Sattānañhi duvidhā sarīrarakkhā abbhantaraparissayapaṭighātena, bāhiraparissayapaṭighātena ca.

Tattha **abbhantaraparissayo** khuppipāsādibhedo, so lābhasiddhiyā paṭihaññati tāya tajjāparihārasaṁvidhānato. **Bāhiraparissayo** cora-amanussādihetuko, so vijjāsiddhiyā paṭihaññati tāya tajjāparihārasaṁvidhānato. Tena vuttaṁ **"yaṁ yaṁ disan"**ti-ādi.

Pubbe "uggahitasippo hī"ti-ādinā sippasikkhāpaneneva lābhuppattiyā disāsu parittāṇakaraṇaṁ dassitaṁ, idāni "yaṁ vā so"ti-ādinā tassa uggahitasippassa nipphattivasena guṇakittanamukhena paggaṇhanenapi lābhuppattiyāti ayametesaṁ vikappānaṁ bhedo. Sesanti "paṭicchannā hotī"ti-ādikaṁ pāḷi-āgataṁ, "evañca pana vatvā"ti-ādikaṁ aṭṭhakathāgatañca. Etthāti etasmiṁ dutiyadisāvāre. Purimanayenevāti pubbe paṭhamadisāvāre vuttanayeneva.

269. Sammānanā nāma sambhāvanā, sā pana atthacariyālakkhaṇā ca dānalakkhaṇā ca catutthapañcamaṭṭhāneheva saṅgahitāti piyavacanalakkhaṇaṁ taṁ dassetuṁ "sambhāvitakathākathanenā"ti vuttaṁ. Vigatamānanā vimānanā, na vimānanā avimānanā¹, vimānanāya akaraṇaṁ. Tenāha "yathā dāsakammakarādayo"ti-ādi. Sāmikena hi vimānitānaṁ itthīnaṁ sabbo parijano vimānetiyeva. Paricarantoti indriyāni paricaranto. Taṁ aticarati nāma taṁ attano gihiniṁ atimaññitvā agaṇetvā vattanato. Issariyavossaggenāti ettha yādiso issariyavossaggo gihiniyā anucchaviko, taṁ dassento "bhattagehe vissaṭṭhe"ti āha. Gehe eva ṭhatvā vicāretabbampi hi kasivāṇijjādikammaṁ kulitthiyā bhāro na hoti, sāmikasseva bhāro, tato āgatasāpateyyaṁ pana tāya suguttaṁ katvā ṭhapetabbaṁ hoti. "Sabbaṁ issariyaṁ vissaṭṭhaṁ nāma hotī"ti etā maññantīti adhippāyo. Itthiyo nāma puttalābhena viya mahagghavipulālaṅkāralābhenapi na santussantevāti tāsaṁ tosanaṁ alaṅkāradānanti āha "attano vibhavānurūpenā"ti.

Kulitthiyā samvihitabbakammantā nāma āhārasampādanavicārappakārāti āha "yāgubhattapacanakālādīnī"ti-ādi. Sammānanādīhi yathāraham piyavacanehi ceva bhojanadānādīhi ca paheņakapesanādīhi aññato, tattheva vā uppannassa pannākārassa chanadivasādīsu pesetabbapiyabhandehi ca sangahitaparijanā. Gehasāminiyā antogehajano niccam sangahito evāti vuttam "idha parijano nāma -pa- ñātijano"ti. Ābhatadhananti bāhirato antogeham pavesitadhanam. Gihiniyā nāma pathamam āhārasampādane kosallam icchitabbam, tattha ca yuttapayuttatā, tato sāmikassa itthijanāyattesu kiccākiccesu, tato puttānam parijanassa kātabbakiccesūti āha "yāgubhattasampādanādīsū"ti-ādi. "Nikkosajjā"ti vatvā tameva nikkosajjatam byatirekato, anvayato ca vibhāvetum "yathā" ti-ādi vuttam. Idhāti imasmim tatiyadisāvāre. Purimanayenevāti pathamadisāvāre vuttanaveneva. Iti bhagavā "pacchimā disā puttadārā"ti uddisitvāpi dāravaseneva pacchimam disam vissajjesi, na puttavasena. Kasmā? Puttā hi dārakakāle attano mātu anugganhaneneva anuggahitā honti anukampitā, viññutam pattakāle pana yathā tepi tadā anuggahetabbā, svāyam vidhi "pāpā nivārentī"ti-ādinā pathamadisāvāre dassito evāti kim puna vissajjanenāti. Dānādisangahavatthūsu yam vattabbam, tam hetthā vuttamevāti.

- 270. Cattāripi ṭhānāni laṅghitvā pañcamameva ṭhānaṁ vivarituṁ "avisaṁvādanatāyā"ti-ādi vuttaṁ. Tattha yassa yassa nāmaṁ gaṇhātīti sahāyo atthikabhāvena yassa yassa vatthuno nāmaṁ katheti.

 Avisaṁvādetvāti ettha duvidhaṁ avisaṁvādanaṁ vācāya, payogena cāti taṁ duvidhampi dassetuṁ "idampī"ti-ādi vuttaṁ. "Dānenā"ti ca idaṁ nidassanamattaṁ daṭṭhabbaṁ itarasaṅgahavatthuvasenapi avisaṁvādetvā saṅgaṇhanassa labbhanato, icchitabbato ca. Aparā pacchimā pajā aparapajā, aparāparaṁ uppannā vā pajā aparapajā. paṭipūjanā nāma mamāyanā, sakkārakiriyā cāti tadubhayaṁ dassetuṁ "kelāyantī"ti-ādi vuttaṁ.

 Mamāyantīti mamattaṁ karonti.
- 271. **Yathābalaṁ kammantasaṁvidhānenā**ti dāsakammakarānaṁ yathābalaṁ balānurūpaṁ tesaṁ tesaṁ kammantānaṁ saṁvidahanena vicāraṇena, kārāpanenāti attho. Tenāha "daharehī"ti-ādi. **Bhattavetanānuppadānenā**ti tassa tassa dāsakammakarassa anurūpaṁ bhattassa, vetanassa ca

padānena. Tenevāha "ayaṁ khuddakaputto"ti-ādi. Bhesajjādīnīti ādisaddena sappāyāhāravasanaṭṭhānādiṁ saṅgaṇhāti. Sātabhāvo eva rasānaṁ acchariyatāti āha "acchariye madhurarase"ti. Tesanti dāsakammakarānaṁ. Vossajjanenāti kammakaraṇato vissajjanena. Velaṁ ñatvāti "pahārāvaseso, upaḍḍhapahārāvaseso vā divaso"ti velaṁ jānitvā. Yo koci mahussavo chaṇo nāma. Kattikussavo, phagguṇussavoti evaṁ nakkhattasallakkhito mahussavo nakkhattaṁ. Pubbuṭṭhāyitā, pacchānipātitā ca Mahāsudassane¹ vuttā evāti idha anāmaṭṭhā.

Dinnādāyinoti pubbapadāvadhāraṇavasena sāvadhāraṇavacananti avadhāraṇena nivattitam dassetum "corikāya kiñci aggahetvā"ti vuttam. Tenāha "sāmikehi dinnasseva ādāyino"ti. Na mayam kiñci labhāmāti anujjhāyitvāti paṭisedhadvayena tehi laddhabbassa lābham dasseti. "Kim etassa kammena katenāti anujjhāyitvā"ti idam tuṭṭhahadayatāya kāraṇadassanam paṭipakkhadūrībhāvato. Tuṭṭhahadayatādassanampi kammassa sukatakāritāya kāraṇadassanam. Kitti eva vaṇṇo kittivaṇṇo, tam kittivaṇṇam guṇakatham haranti tam tam disam upāharantīti kittivaṇṇaharā. Tathā tathā kittetabbato hi kitti, guṇo, tesam vaṇṇanam kathanam vaṇṇo. Tenāha "guṇakathāhārakā"ti.

272. Kāraṇabhūtā mettā etesam atthīti mettāni, kāyakammādīni. Yāni pana tāni yathā yathā ca sambhavanti, tam dassetum "tatthā"ti-ādi vuttam. "Vihāragamanan"ti-ādīsu "mettacittam paccupaṭṭhāpetvā"ti padam āharitvā yojetabbam. Anāvaṭadvāratāyāti ettha dvāram nāma alobhajjhāsayatā dānassa mukhabhāvato. Tassa sato deyyadhammassa dātukāmatā anāvaṭakā evam hi gharamāvasanto kulaputto gehadvāre pihitepi anāvaṭadvāro eva, aññathā apihitepi gharadvāre āvaṭadvāro evāti. Tena vuttam "tatthā"ti-ādi. Vivaritvāpi vasantoti vacanaseso. Pidahitvāpīti etthāpi eseva nayo. "Sīlavantesū"ti idam patiggāhakato dakkhinavisuddhidassanattham vuttam.

Karuṇākhettepi dānena anāvaṭadvāratā eva. "Santaññevā"ti iminā asantam natthivacanam pucchitapaṭivacanam viya icchitabbamevāti dasseti viññūnam atthikānam cittamaddavakaraṇato. "Purebhattam paribhuñjitabbakan"ti idam yāvakālike eva āmisabhāvassa niruļhatāya vuttam.

"Sabbe sattā"ti idam tesam samaņabrāhmaņānam ajjhāsayasampattidassanam pakkhapātābhāvadīpanato, odhiso pharaņāyapi mettābhāvanāya labbhanato. Yāya kusalābhivaḍḍhi-ākaṅkhāya tesam upaṭṭhākānam, tathā nesam gehapavisanam, tam sandhāyāha "pavisantāpi alyāṇena cetasā anukampanti nāmā"ti. Sutassa pariyodāpanam nāma tassa yāthāvato attham vibhāvetvā vicikicchātamavidhamanena visodhananti āha "attham kathetvā kaṅkham vanodentī"ti. Savanam nāma dhammassa yāvadeva sammāpaṭipajjanāya asati tasmim tassa niratthakabhāvato, tasmā sutassa pariyodāpanam nāma sammāpaṭipajjāpananti āha "tathattāya vā paṭipajjāpentī"ti.

273. Alamattoti samatthasabhāvo, so ca atthato samattho evāti "agāraṁ ajjhāvasanasamattho"ti vuttaṁ. Disānamassanaṭṭhāneti yathāvuttadisānaṁ paccupaṭṭhānasaññite namassanakāraṇe. Paṇḍito hutvā kusalo cheko labhate yasanti yojanā. Saṇhaguṇayogato saṇho, saṇhaguṇoti panettha sukhumanipuṇapaññā, muduvācāti dassento "sukhuma -pa- bhaṇanena vā"ti vuttaṁ. Disānamassanaṭṭhānenāti yena ñāṇena yathāvuttā cha disā vuttanayena paṭipajjanto namassati nāma, taṁ ñāṇaṁ disānamassanaṭṭhānaṁ, tena paṭibhānavā. Tena hi taṁtaṁkiccayuttapattavasena paṭipajjanto idha "paṭibhānavā"ti vutto. Nivātavuttīti paṇipātasīlo. Atthaddhoti na thaddho. Thambharahitoti cittassa uddhumātalakkhaṇena thambhitabhāvena virahito. Uṭṭhānavīriyasampannoti kāyikena vīriyena samannāgato. Nirantarakaraṇavasenāti āraddhassa kammassa satatakāritāvasena. Ṭhānuppattiyā paññāyāti tasmiṁ tasmiṁ atthakicce upaṭṭhite ṭhānaso taṅkhaṇe eva uppajjanakapaññāya.

Saṅgahakaroti yathāraham sattānam saṅgaṇhanako. **Mittakaro**ti mittabhāvakaro, so pana atthato mitte pariyesanako nāma

hotīti vuttam "mittagavesano"ti. Yathāvuttam vadam vacanam jānātīti vadaññūti āha "pubbakārinā vuttavacanam jānātī"ti. Idāni tamevattham sankhepena vuttam vitthāravasena dassetum "sahāya kassā"ti-ādi vuttam. Pubbe yathāpavattāya vācāya jānane vadañnutam dassetvā idāni ākārasallakkhaņena appavattāya vācaya jānanepi vadañnutam dassetum "apicā"ti-ādi vuttam. "Yena yena vā panā"ti-ādinā vacanīyatthatam vadañnū-saddassa dasseti. Netāti yathādhippetamattham paccakkhato pāpetā. Tenāha "tam tam attham dassento pañnāya netā"ti. Neti tam tam atthanti ānetvā sambandho. Punappunam netīti anu anu neti, tam tam atthanti ānetvā yojanā.

Tasmim tasminti tasmim tasmim dānādīhi saṅgahehi saṅgahetabbe puggale. Āṇiyāti akkhasīsagatāya āṇiyā. Yāyatoti gacchato. Puttakāraṇāti puttanimittam. Puttahetukañhi puttena kattabbam mānam vā pūjam vā.

Upayogavacaneti upayogatthe. Vuccatīti vacanam, attho.
Upayogavacane vā vattabbe. Paccattanti paccattavacanam. Sammā pekkhantiti sammadeva kātabbe pakkhanti. Pasamsanīyāti pasamsitabbā. Bhavanti ete sangahetabbe tattha puggale yathāraham pavattentāti adhippāyo.

274. "Iti bhagavā"ti-ādi nigamanam. Yā disāti yā mātāpitu-ādilakkhaṇā puratthimādidisā. Namassāti namasseyyāsīti attho. "Yathā katham panā"ti-ādikāya gahapatiputtassa pucchāya vasena desanāya āraddhattā "pucchāya ṭhatvā"ti vuttam. Akathitam natthi gihīhi kattabbakamme appamādapaṭipattiyā anavasesato kathitattā. Mātāpitu-ādīsu hi tehi ca paṭipajji tabbapaṭipattiyā niravasesato katheneneva rājādīsupi patipajjitabbavidhi atthato kathito eva hotīti. Gihino vinīyanti, vinayam upenti etenāti gihivinayo. Yathānusiṭṭhanti yathā idha satthārā anusiṭṭham gihicārittam, tathā tena pakārena tam avirādhetvā. Paṭipajjamānassa vuddhiyeva pāṭikaṅkhāti diṭṭhadhammikasamparāyikaparamatthehi vuddhiyeva icchitabbā avassambhavinīti.

Sumaṅgalavilāsiniyā dīghanikāyaṭṭhakathāya Siṅgālasuttavaṇṇanāya līnatthappakāsanā.

9. Āṭānāṭiyasutta

Pathamabhāṇavāravaṇṇanā

275. "Catuddisam rakkham thapetvā"ti idam dvīsu thānesu catūsu disāsu thapitam rakkham sandhāya vuttanti tadubhayam dassetum "asurasenāyā" ti-ādi vuttam. Attano hi adhikāre, attano rakkhāya ca appamajjanena tesam idam dvīsu thānesu catūsu disāsu ārakkhatthapanam. Yam hi tam asurasenāya patisedhanattham devapure catūsu disāsu sakkassa devānamindassa ārakkhatthapanam, tam attano adhikāre appamajjanam. Yam pana nesam bhagavato santikam upasankamane catūsu disāsu ārakkhatthapanam, tam attano katārakkhāya appamajjanam. Tena vuttam "asurasenāya nivāranatthan" ti-ādi. Pāliyam catuddisanti bhummatthe upayogavacananti bhummavasena tadattham dassento "catūsu disāsū"ti āha. Ārakkham thapetvāti vessavanādayo cattāro mahārājāno attanā attanā rakkhitabbadisāsu ārakkham thapetvā guttim sammadeva vidahitvā. Balagumbam thapetvāti yakkhasenādisenābalasamūham thapetvā. Ovaranam thapetvāti patipakkhanisedhanasamattham āvaranam thapetvā. Iti tīti padehi yathākkamam paccekam devanagaradvārassa anto, dvārasamīpe, dvārato bahi, disārakkhāvasanoti tividhāya rakkhāya thapitabhāvo vā dīpito. Tenāha **"evam sakkassa -pa- katvā"**ti. **Satta buddhe ārabbhā**ti ettha satteva buddhe ārabbha paribandhanakāraṇam **mahāpadānatīkāyam**¹ vuttanaveneva veditabbam. **Dhamma-ānan**ti dhammamayam ānam, satthu dhammacakkanti attho. "Parisato bāhirabhāvo, asambhogo"ti evamādim idancidanca vivajjanakaranam karissāmāti. Sāvananti catunnampi parisānam tikkhattum parivārena anusāvanam, yathā sakko devānamindo asurasenāya nivāranattham catūsu disāsu ārakkham thapāpeti, evam mahārājānopi tādise kiccavisese attano ārakkham thapenti. Imesampi hi tato sāsankam sappatibhayanti. Tena vuttam "attanopī"ti-ādi.

Abhikkantāti atikkantā, vigatāti atthoti āha "khaye dissatī"ti. Teneva hi "nikkhanto paṭhamo yāmo"ti anantaram vuttam.

Abhikkantataroti ativiya kantataro. Tādiso ca sundaro bhaddako nāma hotīti āha "sundare dissatī"ti.

Koti devanāgayakkhagandhabbādīsu ko katamo. Meti mama. Pādānīti pāde. iddhiyāti imāya evarūpāya deviddhiyā. "Yasasā"ti iminā edisena parivārena, paricchedena ca. Jalanti vijjotamāno abhikkantenāti ativiya kantena kamanīyena abhirūpena. Vaṇṇenāti sarīravaṇṇanibhāya. Sabbā obhāsayaṁ disāti dasapi disā pabhāsento cando viya, sūriyo viya ca ekobhāsaṁ ekālokaṁ karontoti gāthāya attho. Abhirūpeti uļārarūpe sampannarūpe. Abbhanumodaneti sampahaṁsane. Idha panāti "abhikkantāya rattiyā"ti etasmiṁ pade. Tenāti khayapariyāyattā.

Rūpāyatanādīsūti ādi-saddena akkharādīnam saṅgaho daṭṭhabbo. Suvaṇṇavaṇṇoti suvaṇṇacchavīti ayamettha atthoti āha "chaviyan"ti. Tathā hi vuttam "kañcanasannibhattaco"ti. Saññūḷhāti saṅganthitā. Vaṇṇāti guṇavaṇṇanāti āha "thutiyan"ti, thomanāyanti attho. Kulavaggeti khattiyādikulakoṭṭhāse. Tattha "accho vippasanno"ti-ādinā vaṇṇitabbaṭṭhena vaṇṇo, chavi. Vaṇṇanaṭṭhena vaṇṇo, thuti. Abhitthavanaṭṭhena vaṇṇo, thuti, aññamaññam asaṅkarato vaṇṇitabbato ṭhapetabbato vaṇṇo, khattiyādikulavaggo. Vaṇṇīyati ñāpīyati etenāti vaṇṇo, ñāpakam kāraṇam. Vaṇṇanato thūlarassādibhāvena upaṭṭhānato vaṇṇo, saṇṭhānam. "Mahantam khuddakam majjhiman"ti vaṇṇetabbato pamāṇetabbato vaṇṇo, pamāṇam. Vaṇṇīyati cakkhunā vivarīyatīti vaṇṇo, rūpāyatananti evam tasmim tasmim atthe vaṇṇa-saddassa pavatti veditabbā. Soti vaṇṇasaddo. Chaviyam daṭṭhabbo rūpāyatane gayhamāna'ssa chavimukheneva gahetabbato. "Chavigatā pana vaṇṇadhātu eva suvaṇṇavaṇṇoti ettha vaṇṇaggahaṇena gahitā"ti apare.

Kevalaparipuṇṇanti ekadesampi asesetvā niravasesatova paripuṇṇanti ayamettha atthoti āha "anavasesatā attho"ti. **Kevalakappā**ti kappa-saddo nipāto padapūranamattam, kevalam icceva

attho. Kevala-saddo bahulavācīti āha "yebhuyyatā attho"ti. Keci pana "īsakam asamattā kevalakappā"ti¹ vadanti. Evam sati anavasesattho eva kevala-saddattho siyā, anatthantarena pana kappa-saddena padavaḍḍhanam katam kevalam eva kevalakappanti. Atha vā kappanīyatā, paññāpetabbatā kevalakappā. Abyāmissatā vijātiyena asankarā suddhatā. Anatirekatā tamparamatā visesābhāvo. Kevalakappanti kevalam daļham katvāti attho. Kevalam vuccati nibbānam sabbasankhatavivittattā. Tam etassa adhigatam atthīti kevalī, sacchikatanirodho khīṇāsavo.

Kappa-saddo panāyam sa-upasaggo, anupasaggo cāti adhippāyena okappaniyapade labbhamānam kappaniyasaddamattam nidasseti, aññathā kappa-saddassa atthuddhāre okappaniyapadam anidassanameva siyā. Samaṇakappehīti vinayakkamasiddhehi samaṇavohārehi. Niccakappanti niccakālam. Paññattīti nāmam hetam tassa āyasmato, yadidam kappoti. kappitakesamassūti kattariyā cheditakesamassu. Dvaṅgulakappoti majjhanhikavelāya vītikkantāya dvaṅgulatāvikappo. Lesoti apadeso. Anavasesam pharitum samatthassa obhāsassa kenaci kāraṇena ekadesapharaṇampi siyā, ayam pana sabbasova pharīti dassetum samantattho kappa-saddo gahitoti āha "anavasesam samantato"ti.

Yasmā devatānam sarīrappabhā dvādasayojanamattam ṭhānam, tato bhiyyopi pharitvā tiṭṭhati, tathā vatthābharaṇādīhi samuṭṭhitā pabhā tasmā vuttam "candimā viya, sūriyo viya ca ekobhāsam ekam pajjotam karitvā"ti. Kasmā ete mahārājāno bhagavato santike nisīdimsu, nanu yebhuyyena devatā bhagavato santikam upagatā ṭhatvāva kathetabbam kathentā gacchantīti? Saccametam, idha pana nisīdane kāraṇam atthi, tam dassetum "devatānan"ti-ādi vuttam. "Idam parittam nāma sattabuddhapaṭisamyuttam garu, tasmā na amhehi ṭhatvā gahetabban"ti cintetvā parittagāravavasena nisīdimsu.

276. Kasmā panettha vessavaņo eva kathesi, na itaresu yo kocīti tattha kāraṇaṁ dassetuṁ **"kiñcāpī"**ti-ādi vuttaṁ.

Vissāsiko abhiṇham upasaṅkamanena. Byattoti visārado, tañcassa veyyattiyam suṭṭhu sikkhitabhāvenāti āha "susikkhito"ti. Manussesu viya hi devesupi kocideva purimajātiparicayena susikkhito hoti, tatrāpi kocideva yathādhippetamattham vattum samattho paripuṇṇapadabyañjanāya poriyā vācāya samannāgato. "Mahesakkhā"ti imassa atthavacanam "ānubhāvasampannā"ti, mahesakkhāti vā mahāparivārāti attho. Pāṇātipāte ādīnavadassaneneva tamvipariyāyato tato veramaṇiyam ānisamso pākaṭo hotīti "ādīnavam dassetvā"icceva vuttam. Tesu senāsanesūti yāni "araññavanappatthānī"ti-ādinā¹ vuttāni bhikkhūnam vasanaṭṭhānabhūtāni araññāyatanāni, tesu bhikkhūhi sayitabbato, āsitabbato ca senāsanasaññitesu. Nibaddhavāsinoti rukkhapabbatapaṭibaddhesu vimānesu niccavāsitāya nibaddhavāsino. Baddhattāti gāthābhāvena ganthitattā sambandhitattā.

"Ugganhātu bhante bhagavā"ti attanā vuccamānam parittam bhagavantam ugganhāpetukāmo vessavano avocāti adhippāyena codako "kim pana bhagavato appaccakkhadhammo nāma atthī"ti codesi. Ācariyo sabbattha appatihatañanacarassa bhagavato na kiñci appaccakkhanti dassento "natthī"ti vatvā "ugganhātu bhante bhagavā"ti vadato vessavanassa adhippāyam vivaranto "okāsakaranatthan" ti-ādimāha. Yathā hi Pancasikho gandhabbadevaputto devānam Tāvatimsānam, brahmuno ca Sanankumārassa sammukhā attano yathāsutam dhammam bhagavato santikam upagantvā pavedeti, evamayampi mahārājā itarehi saddhim ātānātanagare gāthāvasena bandhitam parittam bhagavato pavedetum okāsam kārento "ugganhātu bhante bhagavā"ti **āha**, na nam tassa pariyāpunane niyojento. Tasmā ugganhātūti yathā idam parittam mayā paveditamattameva hutvā catunnam parisānam cirakālam hitāvaham hoti, evam uddham ārakkhāya ganhātu, sampaticchatūti attho. **Satthu kathite**ti satthu ārocite, catunnam parisānam satthu kathane vāti attho. **Sukhavihārāyā**ti yakkhādīhi avihimsāya laddhabbasukhavihārāya.

277. **Sattapi buddhā cakkhumanto** pañcahi cakkhūhi cakkhumabhāve visesābhāvato. Tasmāti vasmā cakkhumabhāvo viya sabbabhūtānukampitādayo sabbepi visesā sattannampi buddhānam sādhāranā tasmā, gunanemittakāneva vā yasmā buddhānam nāmāni nāma, na lingikāvatthikavādicchakāni, tasmā buddhānam gunavisesadīpanāni "cakkhumantassā"ti-ādinā¹ vuttāni **etāni ekekassa satta satta nāmāni honti.** Tesam nāmānam sādhāranabhāvam atthavasena vojetabbāti dassetum "sabbepī"ti-ādi vuttam. Sabbabhūtānukampinoti anaññasādhāraṇamahākaruṇāya sabbasattānam anukampikā. Nhātakilesattāti atthangikena ariyamaggajalena saparasantanesu niravasesato dhotakilesamalattā. **Mārasenāpamaddino**ti saparivāre pañcapi māre pamadditavanto. Vusitavantoti maggabrahmacariyavāsam, dasavidham ariyavāsañca vusitavanto. Vusitavantatāya eva bāhitapāpatā vuttā hotīti "brāhmanassā"ti padam anāmattham. **Vimuttā**ti anaññasādhāranānam pañcannampi vimuttīnam vasena niravasesato muttā. Angatoti sarīrangato, ñānaṅgato ca. Dvattim samahāpurisalakkhana² asīti anubyañjanehi³ nikkhamanappabhā, byāmappabhā, ketumālā-unhīsappabhā ca sarīraṅgato nikkhamanakarasmiyo, yamakamahāpātihāriyādīsu uppajjanakappabhā ñānaṅgato nikkhamanakarasmiyo. **Na etāneva** "cakkhumā"ti-ādinā¹ vuttāni satta nāmāni, atha kho aññānipi bahūni aparimitāni nāmāni. Kathanti āha "asankhyeyyāni nāmāni saguņena mahesinoti vuttan"ti4. Kena vuttam? Dhammasenāpatinā.

Yadi evam kasmā vessavaņo etāneva gaņhīti āha "attano pākaṭanāmavasenā"ti. Khīṇāsavā janāti adhippetā. Te hi kammakilesehi jātāpi evam na puna jāyissantīti iminā atthena janā. Yathāha "yo ca kālaghaso bhūto"ti⁵. Desanāsīsamattanti nidassanamattanti attho, avayavena vā samudāyupalakkhaṇametam. Sati ca

^{1.} Dī 3. 159 pitthe.

^{2.} Dī 2. 13; Dī 3. 117; Ma 2. 336 piṭṭhesu vitthāro.

^{3.} Jinālaṅkāratīkāya vijātamaṅgalavannanāyaṁ vitthāro.

^{4.} Abhi-Ttha 1. 420; Udāna-Ttha 306; Patisam-Ttha 1. 277; Netti-Ttha 119 pitthesu.

^{5.} Khu 5. 68 pitthe Jātake.

pisuṇavācappahāne pharusavācā pahīnāva hoti, pageva ca musāvādoti "apisuṇā"icceva vuttā. Mahattāti mahā attā sabhāvo etesanti mahattā. Tenāha "Mahantabhāvaṁ pattā"ti. Mahantāti vā mahā-antā, parinibbānapariyosānāti vuttaṁ hoti. Mahantehi vā sīlādīhi samannāgatā. Ayaṁ tāva aṭṭhakathāyaṁ āgataneyena attho. Itaresaṁ pana matena buddhādīhi ariyehi mahanīyato pūjanīyato mahaṁ nāma nibbānaṁ, mahaṁ anto etesanti mahantā, nibbānadiṭṭhāti attho. Nissāradāti sārajjarahitā, nibbhayāti attho. Tenāha "vigatalomahaṁsā"ti.

Hitanti hitacittam, sattānam hitesīti attho. Yathābhūtam vipassisunti pañcupādānakkhandhesu samudayādito yāthāvato vividhenākārena passimsu. "Ye cāpī"ti pubbe paccattabahuvacanena aniyamato vutte tesampīti attham¹ sampadānabahuvacanavasena niyametvā "namatthū"ti ca padam ānetvā yojeti yam tam-saddānam abyabhicāritasambandhabhāvato. Vipassimsu namassantīti vā yojanā. Paṭhamagāthāyāti "ye cāpi nibbutā loke"ti evam vuttagāthāya. Dutiyagāthāyāti tadanantaragāthāya. Tattha disanāmukhamattanti itaresampi buddhānam nāmaggahaņe patte imasseva bhagavato nāmaggahaṇam tathā desanāya mukhamattam, tasmā tepi atthato gahitā evāti adhippāyo. Tenāha "ayampi hī"ti-ādi. Tattha ayanti ayam gāthā. Purimayojanāyam tassāti visesitabbatāya abhāvato "yanti nipātamattan"ti vuttam, idha pana "tassa namatthū"ti evam sambandhassa ca icchitattā "yan"ti nāmapadam upayogekavacananti dassento "yam namassanti gotaman"ti āha.

278. "Yato uggacchati sūriyo"ti-ādikaṁ kasmā āraddhaṁ? Yaṁ ye yakkhādayo satthu dhamma-āṇaṁ, attano ca rājaṇaṁ nādiyanti, tesaṁ "idañcidañca niggahaṁ karissāmā"ti sāvanaṁ kātukāmā tattha tattha dvisahassaparittadīpaparivāresu catūsu mahādīpesu attano āṇāya vattānaṁ attano puttānaṁ, aṭṭhavīsatiyā yakkhasenāpati-ādīnañca sattari pasādagāragabahumānañca pavedetvā niggahārahānaṁ santajjanatthaṁ āraddhaṁ.

Tattha "yato uggacchatī"ti-ādīsu "yato ṭhānato udetī"ti vuccati, kuto pana ṭhānato udetīti vuccati? Pubbavidehavāsīnam tāva majjhanhikaṭṭhāne ṭhito jambudīpavāsīnam udetīti vuccati, uttarakurukānam pana oggacchatīti iminā nayena sesadīpesupi sūriyassa uggacchanoggacchanapariyāyo veditabbo. Ayañca attho heṭṭhā Aggaññasuttavaṇṇanāyaṁ¹ pakāsito eva. Aditiyā puttoti lokasamudācāragasena vuttam. Lokiyā hi deve aditiyā puttā, asure atithiyā puttāti vadanti. Ādippanato pana ādicco, ekappahāreneva tīsu dīpesu ālokavidamsanena samujjalanatoti attho. Maṇḍalīti ettha ī-kāro bhusatthoti āha "mahantam maṇḍalam assāti maṇḍalī"ti. Mahantam hissa vimānamaṇḍalam paññāsayojanāyāmavitthārato. "Saṁvarīpi nirujjhatī"ti imināva divasopi jāyatīti ayampi attho vuttoti veditabbo. Ratti antaradhāyatīti sinerupacchāyālakkhaṇassa andhakārassa vigacchanato.

Udakarahadoti jaladhi. "Tasmim ṭhāne"ti idam puratthimasamuddassa uparibhāgena sūriyassa gamanam sandhāya vuttam. Tathā hi jambudīpe ṭhitānam puratthimasamuddato sūriyo uggacchanto viya upaṭṭhāti. Tenāha "yato uggacchati sūriyo"ti. Samuddanaṭṭhena attani patitassa sammadeva, sabbaso ca undanaṭṭhena kiledanaṭṭhena samuddo. Samuddo hi kiledanaṭṭho rahado. Saritodakoti anekāni yojanasahassāni vitthiṇṇodako, saritā nadiyo udake etassāti vā saritodako.

Sinerupabbatarājā cakkavāļassa vemajjhe ṭhito, taṁ padhānaṁ katvā vattabbanti adhippāyena "itoti sineruto"ti vatvā tathā pana disāvavatthānaṁ anavaṭṭhitanti "tesaṁ nisinnaṭṭhānato vā"ti vuttaṁ. Te santi catunnaṁ mahārājānaṁ. Nisinnaṭṭhānaṁ āṭānāṭanagaraṁ. Tattha hi nisinnā te imaṁ parittaṁ bandhiṁsu. Tesaṁ nisinnaṭṭhānatoti vā satthu santike tesaṁ nisinnaṭṭhānato. Ubhayathāpi sūriyassa udayaṭṭhānā puratthimā disā nāma hoti. Purimapakkhaṁyevettha vaṇṇenti. Tena vuttaṁ "ito sā purimā disā"ti. Sūriyo, pana candanakkhattādayo ca sineruṁ dakkhiṇato, cakkavāļapabbatañca vāmato katvā parivattenti. Yattha ca nesaṁ uggamanaṁ paññāyati, sā

puratthimā disā. Yattha okkamanam paññāyati, sā pacchimā disā. Dakkhiṇapasse uttarā disā, vāmapasse dakkhiṇā disāti catumahādīpavāsīnam paccekam sineru uttarādisāyameva, tasmā anavaṭṭhitā disāvavatthāti āha "iti nam ācikkhati jano"ti. Yam disanti yam puratthimadisam. Yasassīti mahāparivāro. Koṭisatasahassaparimāṇā hi devatā abhiṇham parivārenti. Candananāgarukkhādīsu osadhitiṇavanappatisugandhānam abbanato, tehi dittabhāvūpagamanato "gandhabbā"ti laddhanāmānam cātumahārājikadevānam adhipati bhāvato¹. Me sutanti ettha meti nipātamattam. Sutanti vissutanti attho. Ayañhettha yojanā—tassa dhataraṭṭhamahārājassa puttāpi bahavo. Kittakā? Asīti, dasa, eko ca. Ekanāmā. Katham? Indanāmā. "Mahapphalā"ti ca sutam vissutametam loketi.

Ādicco gotamagotto, bhagavāpi gotamagotto, ādiccena samānagottabhāya ādicco bandhu etassātipi ādiccabandhu, ādiccassa vā bandhūti ādiccabandhu, taṁ **ādiccabandhunaṁ**. **Anavajjenā**ti avajjapaṭipakkhena brahmavihārena. **Samekkhasi** odhiso, anodhiso ca pharaṇena olokesi āsayānusayacariyādhimutti-ādivibhāgāvabodhavasena. **Vatvā vandantī**ti "lokassa anukampako"ti kittetvā vandanti. **Sutaṁ netan**ti sutaṁ nanūti etasmiṁ atthe **nu-**saddo. Aṭṭhakathāyaṁ pana nokāroyanti adhippāyena **amhehī**ti attho vutto. **Etan**ti etaṁ tathā parikittetvā amanussānaṁ devatānaṁ vandanaṁ. **Vadanti** dhataraṭṭhamahārājassa puttā.

- 279. Yena petā pavuccantīti ettha vacanasesena attho veditabbo, na yathārutavasenevāti dassento "yena disābhāgena nīharīyantūti vuccantī"ti āha. Payhantu vāti pete sandhāya vadati. Chijjantu vā hatthapādādike pisuņā piṭṭhimaṁsikā. Haññantu pāṇātipātinoti-ādikā. Pavuccantīti vā samuccanti, "alaṁ tesan"ti samācinīyantīti attho. Evañhi vacanasesena vinā eva attho siddho hoti. Rahassaṅganti bījaṁ sandhāya vadati.
- 280. Yasmim disābhāge sūriyo attham gacchatīti ettha "yato ṭhānato udetī"ti ettha vuttanayānusārena attho veditabbo.

281. Yena disābhāgena uttarakuru rammo avaṭṭhito, ito sā uttarā disāti yojanā. Mahānerūti mahanto, mahanīyo ca Nerusaṅkhāto pabbato. Tenāha "Mahāsineru Pabbatarājā"ti. Rajatamayaṁ. Tathā hi tassa pabhāya ajjhotthataṁ tassaṁ disāyaṁ samuddodakaṁ khīraṁ viya paññāyati. Maṇimayanti indanīlamayaṁ. Tathā hi dakkhiṇadisāya samuddodakaṁ yebhuyyena nīlavaṇṇaṁ hutvā paññāyati, tathā ākāsaṁ. Manussā jāyanti. Kathaṁ jāyanti? Amamā apariggahāti yojanā. Mamattavirahitāti "idaṁ mama idaṁ mamā"ti mamaṅkāravirahitāti adhippāyo. Yadi tesaṁ "ayaṁ mayhaṁ bhariyā"ti pariggaho natthi, "ayaṁ me mātā, ayaṁ bhaginī"ti evarūpā idha viya mariyādāpi na siyā mātu-ādibhāvassa ajānanatoti codanaṁ sandhāyāha "mātaraṁ vā"ti-ādi. Chandarāgo nuppajjatīti ettha "dhammatāsiddhassa sīlassa ānubhāvena putte diṭṭhamatte eva mātu thanato thaññaṁ paggharati, tena saññāṇena nesaṁ mātari puttassa mātusaññā, mātu ca putte puttasaññā paccupaṭṭhitā"ti keci.

Naṅgalāti liṅgavipallāsena vuttanti āha "naṅgalānipī"ti. Akaṭṭheti akasite akatakasikamme.

Taṇḍulāva tassa phalanti sattānaṁ puññānubhāvahetukā thusādiabhāvena taṇḍulā eva tassa sālissa phalaṁ. Tuṇḍikiranti pacanabhājanassa
nāmanti vuttaṁ "ukkhaliyan"ti. Ākiritvāti taṇḍulāni pakkhipitvā.
Niddhūmaṅgārenā¹ti dhūmaṅgārarahitena kevalena agginā. Jotikapāsāṇato
aggimhi uṭṭhahante kuto dhūmaṅgārānaṁ sambhāvo. Bhojananti
odanamevādhippetanti "bhojanamevā"ti avadhāraṇaṁ katvā tena
nivattetabbaṁ dassento "añño sūpo vā byañjanaṁ vā na hotī"ti āha. Yadi
evaṁ rasavisesayutto tesaṁ āhāro na hotīti? Noti dassento "bhuñjantānaṁ
-pa- raso hotī"ti āha. Macchariyacittaṁ nāma na hotīti dhammatāsiddhassa
sīlassa ānubhāvena. Tathā hi te katthacipi amamā pariggahāva hutvā vasanti.

Apica tattha uttarakurukānam puññānubhāvasiddho ayampi viseso veditabbo—tattha kira tesu tesu padesesu ghanacitapattasañchannasākhāpasākhā kūtāgārūpamā manoramārukkhā tesam manussānam nivesanakiccam sādhenti, yattha sukham nivasanti, aññepi tattha rukkhā sujātā sabbadāpi pupphitaggā titthanti, jalāsayāpi vikasitakamalakuvalayapundarīkasogandhikādipupphasañchannā sabbakālam paramasugandham samantato pavāyantā titthanti. Sarīrampi tesam atidīghatādidosarahitam ārohaparināhasampannam jarāya anabhibhūtattā valipalitādidosarahitam yāvatāyukam aparikkhīnajavabalaparakkamasobhameva hutvā titthati. Anutthānaphalūpajīvitāya na ca nesam kasivānijjādivasena āhārapariyetthivasena dukkham atthi, tato eva na dāsadāsikammakarādipariggaho atthi, na ca tattha sītunhadamsamakasavātātapasarīsapavālādiparissayo atthi. Yathā nāmettha gimhānam pacchime māse paccūsavelāyam samasītunha-utu hoti, evameva sabbakālam samasītunhova utu hoti, na ca tesam koci upaghāto, vihesā vā uppajjati. Akatthapākimameva sālim akanam athusam sugandham tandulaphalam paribhuñjantānam nesam kuttham, gando, kilāso, soso, kāso, sāso, apamāro, jaroti evamādiko na koci rogo uppajjati. Na te khujjā vā vāmanakā vā kānā vā kunī vā khañjā vā pakkhahatā vā vikalaṅgā vā vikalindriyā vā honti. Itthiyopi tattha nātidīghā nātirassā nātikisā nātithūlā nātikālā nāccodātā sobhaggappattarūpā honti. Tathā hi dīghaṅgulī tambanakhī lambatthanā tanumajihā punnacandamukhī visālakkhī mudugattā samhitūrū odātadantā gambhīranābhī tanujanghā dīghanīlavellitakesī puthulasusonī nātilomānālomā subhagā utusukhasamphassā sanhā sakhilasambhāsā nānābharanavibhūsitā vicaranti. Sabbadā hi solasavassuddesikā viya honti. Purisā ca pañcavīsativassuddesikā viya, na puttadāresu rajjanti. Ayam tattha dhammatā.

Sattāhikameva ca tattha itthipurisā kāmaratiyā viharanti, tato vītarāgā yathāsakam gacchanti. Na tattha idha viya gabbhokkantimūlakam, gabbhapariharaṇamūlakam, vijāyanamūlakam vā dukkham hoti. Rattakancukato

kañcanapaṭimā viya dārakā mātukucchito amakkhitā eva semhādinā sukheneva nikkhamanti, ayam tattha dhammatā.

Mātā pana puttam vā dhītaram vā vijāyitvā tesam vicaranappadese thapetvā anapekkhā yathāruci gacchāti. Tesam tattha sayitānam ye passanti purisā, itthiyo vā, te attano anguliyo upanāmenti, tesam kammabalena tato khīram pavattati, tena dārakā yāpenti. Evam pana vaddhantā katipayadivaseheva laddhabalā hutvā dārikā itthiyo upagacchanti, dārakā purise. Kapparukkhato eva ca tesam tattha tattha vatthābharanāni nippajjanti. Nānāvirāgavannavicittāni hi sukhumāni mudusukhasamphassāni vatthāni tattha tattha kapparukkhesu olambantāni titthanti. Nānāvidharamsiiālasamujialavividhavannaratanavinaddhāni anekavidhamālākammalatākammabhittikammavicittāni sīsūpagagīvūpagahatthūpagakatūpagapādūpagāni sovannamayāni ābharanāni ca kapparukkhato olambanti. Tathā vīnāmudingapanavasammatālhasankhavamsavetālaparivānivallakīpabhutikā tūriyabhandāpi tato tato olambhanti. Tattha ca bahū phalarukkhā kumbhamattāni phalāni phalanti madhurarasāni, yāni paribhuñjitvā te sattāhampi khuppipāsāhi na bādhīyanti. Najjopi tattha suvisuddhajalā supatitthā ramanīyā akaddamā vālukatalā nātisītā nāccunhā surabhigandhīhi jalajapupphehi sanchannā sabbakālam surabhim vāyantiyo sandanti. Na tattha kantakatinakakkhalagacchalatā honti, akantakā pupphaphalasampannā eva honti. Candananāgarukkhā sayameva rasam paggharanti. Nhāyitukāmā ca nadītitthe ekajjham vatthābharanāni thapetvā nadim otaritvā nhatvā uttinnuttinnā uparitthimam vatthābharanam ganhanti, na tesam evam hoti "idam mama, idam parassā"ti, tato eva na tesam koci viggaho vā vivādo vā. Sattāhikā eva ca nesam kāmaratikīlhā hoti, tato vītarāgā viya vicaranti. Yattha ca rukkhe sayitukāmā honti, tato honti, tattheva sayanam upalabhanti. Mate ca satte disvā na rodanti, na socanti, tañca mandayitvā nikkhipanti. Tāvadeva ca nesam tathārūpā sakunā upagantvā matam dīpantaram nenti. Tasmā susānam vā asucitthānam vā tattha natthi. Na ca tato matā nirayam vā tiracchānayonim vā pettivisayam vā upapajjanti. "Dhammatāsiddhassa pañcasīlassa ānubhāvena

te devaloke nibbattantī"ti vadanti. Vassasahassameva ca nesam sabbakālam āyuppamāṇam. Sabbametam tesam pañcasīlam viya dhammatāsiddhamevāti veditabbam. **Tatthā**ti tasmim uttarakurudīpe.

Ekakhuram katvāti anekasaphampi ekasapham viya katvā, assam viya katvāti attho. "Gāvin"ti vatvā puna "pasun"ti vuttattā gāvito itaro sabbo catuppado idha "pasū"ti adhippetoti āha "thapetvā gāvin"ti.

Tassāti gabbhinitthiyā. Piṭṭhi onamituṁ sahatīti kucchiyā garubhāratāya tesaṁ āruļhakāle piṭṭhi onamati, tesaṁ nisajjaṁ sahati pallaṅke nisinnā viya honti. Sammādiṭṭhiketi kammapathasammādiṭṭhiyā sammādiṭṭhike. Etthāti jambudīpe. Ettha hi janapadavohāro, na uttarakurumhi. Tathā hi "paccanti mamilakkhuvāsike"ti ca vuttaṁ.

Tassa raññoti vessavaṇamahārājassa. Iti so attānameva param viya katvā vadati. Eseva nayo paratopi. Bahuvidham nānāratanavicittam nānāsaṇṭhānam rathādidibbayānam upaṭṭhitameva hoti sudantavāhanayuttam, na nesam yānānam upaṭṭhāpane ussukkam āpajjitabbam atthi. Etānīti hatthiyānādīni. Nesanti vessavaṇaparicārikānam. Kappitāni hutvā uṭṭhitāni āruhitum upakappanayānāni. Nipannāpi nisinnāpi vicaranti candimasūriyā viya yathāsakam vimānesu.

Nagarā ahūti liṅgavipallāsena vuttanti āha "nagarāni bhaviṁsūti attho"ti. Āṭānāṭā nāmāti itthiliṅgavasena laddhanāmaṁ nagaraṁ āsi.

Tasmim thatvāti tasmim padese parakusiṭanāṭānāmake nagare ṭhatvā. Tato ujum uttaradisāyam. Etassāti kasivantanagarassa. Aparabhāge aparakoṭṭhāse, parato icceva attho.

Kuveroti tassa purimajātisamudāgatam nāmanti teneva pasangena yenāyam sampatti adhigatā, tadassa pubbakammam ācikkhitum "ayam kirā"ti-ādi vuttam. Ucchuvappanti ucchusassam. Avasesasālāhīti avasesayantasālāhi, nissakka vacanancetam. Tatthevāti punnattham dinnasālāyameva.

Paṭi-esantoti pati pati atthe esanto vīmamsanto. Na kevalam te vīmamsanti eva, atha kho tamattham patiṭṭhāpentīti āha "visum visum atthe upaparikkhamānā anusāsamānā"ti. Yakkharaṭṭhikāti yakkharaṭṭhādhipatino. Yakkhā ca vessavaṇassa rañño nivesanadvāre niyuttā cāti yakkhadovārikā, tesam yakkhadovārikānam.

Yasmā dharaṇīporakkhaṇito purāṇodakaṁ bhassayantaṁ heṭṭhā vuṭṭhi hutvā nikkhamati, tasmā taṁ tato gahetvā meghehi pavuṭṭhaṁ viya hotīti vuttaṁ "yato pokkharaṇito udakaṁ gahetvā meghā pavassantī"ti. Yatoti yato dharaṇīpokkharaṇito. Sabhāti yakkhānaṁ upaṭṭhānasabhā.

Tasmim thāneti tassā pokkharaņiyā tīre yakkhānam vasanavane. Sadā phalitāti niccakālam sañjātaphalā. Niccapupphitāti niccam sañjātapupphā. Nānādijagaṇāyutāti nānāvidhehi dijagaṇehi yuttā. Tehi pana sakuṇasaṅghehi ito cito ca sampatantehi paribbhamantehi yasmā sā pokkharaṇī ākulā viya hoti, tasmā vuttam "vividhapakkhisaṅghasamākulā"ti. Koñcasakuṇehīti sārasasakuntehi.

"Evam viravantānan"ti iminā tathā vassitavasena "jīvañjīvakā"ti ayam tesam samaññāti dasseti. Uṭṭhavacittakāti etthāpi eseva nayo. Tenāha "evam vassamānā"ti. Pokkharasātakāti pokkharasaṇṭhānatāya "pokkharasātakā"ti evam laddhanāmā.

Sabbakālam sobhatīti sabba-utūsu sobhati, na tassā hemantādivasena sobhāvirato atthi. Evambhūtā ca niccam pupphitajalajathalajapupphatāya, phalabhārabharitarukkhaparivāritatāya, aṭṭhaṅgasamannāgatasalilatāya ca nirantaram sobhati.

282. Parikammanti pubbupacāram. Parisodhetvāti ekakkharassāpi avirādhanavasena ācariyasantike sabbam sodhetvā. Suṭṭhu uggahitāti parimaṇḍalapadabyañjanāya poriyā vācāya vissaṭṭhāya anelagaļāya atthassa viññāpanīyā sammadeva uggahitā. Tathā hi "atthañca byañjanañca parisodhetvā"ti vuttam. Attham jānato eva hi byañjanam parisujjhati, no ajānato. Padabyañjanānīti padañceva ahāpetvā. Evañhi paripuṇṇā

nāma hotīti. Visamvādetvāti añnathā katvā. Tejavantam na hoti virajjhanato ceva vimhayatthabhāvato ca. Sabbasoti anavasesato ādimajjhapariyosānato. Tejavantam hotīti sabhāvaniruttim avirādhetvā suppavattibhāvena sādhanato. Evam payogavipattim pahāya payogasampattiyā sati parittassa atthasādhakatam dassetvā idāni ajjhāsayavipattim pahāya ajjhāsayasampattiyā atthasādhakatam dassetum "lābhahetū"ti-ādi vuttam. Idam parittabhaṇanam sattānam anatthapaṭibāhanahetūti tassa ñāṇakaruṇāpubbakatā nissaraṇapakkho. Mettam purecārikam katvāti mettāmanasikārena sattesu hitapharanam purakkhatvā.

"Vatthum vā"ti-ādi pubbe catuparisamajjhe katāya sādhanāya bhagavato pavedanam. Gharavatthunti vasanageham. Nibaddhavāsanti paragehepi nevāsikabhāvena vāsam na labheyya, yam pana mahārājānam, yakkhasenāpatīnañca ajānantānamyeva kadāci vasitvā gamanam, tam appamāṇanti adhippāyo. Samitinti yakkhādisamāgamam. Kāmam pāļiyam "na meso"ti āgatam, itaresampi pana mahārājānam attanā ekajjhāsayatāya tesampi ajjhāsayam hadaye ṭhapetvā vessavaṇo tathā avoca. Kaññam anu anu vahitum ayutto anāvayho, sabbakālam kaññam laddhum ayuttoti attho, tam anāvayham. Tenāha "na āvāhayuttan"ti. Na vivayhanti avivayham, kaññam gahetum ayuttanti attho. Tenāha "na vivāhayuttan"ti. Āhito ahammāno etthāti atthā, attabhāvo. Attā visayabhūto etāsam atthīti attā, paribhāsā, tāhi. Pariyattam katvā vacanena paripuṇṇāhi. Yathā yakkhā akkositabbā, evam pavattā akkosā yakkha-akkosā nāma, tehi. Te pana "kaļārakkhi kaļāradantā kāļavaṇṇā"ti evamādayo.

Viruddhāti virujjhanakā parehi virodhino. Rabhasāti sārambhakāti adhippāyo. Tenāha "karaņuttariyā"ti. Rabhasāti vā sāhasikā. Sāmino manaso assāvāti manassā, kiṅkarā. Ye hi "kiṁ karomi bhaddante"ti sāmikassa vase vattanti, te evaṁ vuccanti. Tena vuttaṁ "yakkhasenāpatīnaṁ ye manassā, tesan"ti. Āṇāya avarodhitupacārā avaruddhā, te pana āṇāvato paccatthikā nāma hontīti "paccāmittā verino"ti vuttaṁ. Ujjhāpetabbanti heṭṭhā katvā cintāpetabbaṁ,

tam pana **ujjhāpanam** tesam nīcakiriyāya jānāpanam hotīti āha **"jānāpetabbā"**ti.

Parittaparikammakathāvannanā

Parittassa parikammam kathetabbanti āṭānāṭiyaparittassa parikammam pubbupacāraṭṭhāniyam mettasuttādi kathetabbam. Evañhi tam laddhāsevanam hutvā tejavantam hoti. Tenāha "paṭhamameva hī"ti-ādi. Piṭṭham vā mamsam vāti vā-saddo aniyamattho, tena macchaghatasūpādim saṅgaṇhāti. Otāram¹ labhanti attanā piyāyitabba-āhāravasena, piyāyitabbaṭṭhānavasena ca. "Paritta -pa- nisīditabban"ti imināva parittakārakassa bhikkhuno parisuddhipi icchitabbāti dasseti.

"Parittakārako -pa- samparivāritenā"ti idam parittakaraņe bāhirarakkhāsamvidhānam. "Mettacittam -pa- kātabban"ti idam abbhantararakkhā ubhayato rakkhāsamvidhānam. Evanhi amanussā parittakaraņassa antarāyam kātum na visahanti. Mangalakathā vattabbā pubbupacāravasena. Sabbasannipātoti tasmim vihāre, tasmim vā gāmakhette sabbesam bhikkhūnam sannipāto. Ghosetabbo, "cetiyangaņe sabbehi sannipatitabban"ti. Anāgantum nāma na labbhati amanussena buddhāṇābhayena, rājāṇābhayena ca. Gahitakāpadesena amanussova puechito hotīti āha "amanussaggahitako 'tvam ko nāmā'ti pucchitabbo"ti. Mālāgandhādīsu pūjanattham viniyunjiyamānesu. Pattīti tuyham pattidānam. Piṇḍapāte pattīti piṇḍapāte diyyamāne pattidānam. Devatānanti yakkhasenāpatīnam. Parittam bhaṇitabbanti etthāpi "mettacittam purecārikam katvā"ti ca "mangalakathā vattabbā"ti ca "vihārassa upavane"ti evamādi ca sabbam gihīnam parittakaraņe vuttam parikammam kātabbameva.

Sarīre adhimuccatīti sarīram anupavisitvā viya āvisanto yathā gahitakassa vasena na vattati, attano eva vasena vattati, evam adhimuccati adhiṭṭhahitvā tiṭṭhati. Tenāha "āvisatīti tasseva vevacanan"ti. Laggatīti tattheva laggo allīno hoti. Tenāha "na apetī"ti. Rogam vaḍḍhentoti dhātūnam samabhāvena vattitum appadānavasena uppannam

rogam vaddhento. Dhātūnam visamabhāvāpattiyā ca āhārassa ca aruccanena gahitakassa sarīre lohitam sussati, mamsam milāyati, tam panassa yakkho dhātukkhobhanimittatāya karonto viya hotīti vuttam "appamamsalohitam karonto"ti.

283. **Tesaṁ nāmāni** indādināmabhāvena voharitabbato. **Tato**ti tato ārocanato paraṁ. **Te**ti yakkhasenāpatayo. **Okāso na bhavissatī**ti bhikkhubhikkhuniyo, upāsaka-upāsikāyo viheṭhetuṁ avasaro na bhavissati sammadeva ārakkhāya vihitattāti.

Sumangalavilāsiniyā dīghanikāyaṭṭhakathāya Ātānātiyasuttavannanāya līnatthappakāsanā.

10. Sangītisutta

296. Dasasahassacakkavāļeti buddhakhettabhūte dasasahassaparimāņe cakkavāļe. Tattha hi imasmim cakkavāļe devamanussāyeva katādhikārā, itaresu devā visesabhāgino. Tena vuttam "dasasahassacakkāvāļe ñāṇajālam pattharitvā"ti. Ñāṇajālapattharaṇanti ca tesam tesam sattānam āsayādivibhāvanavasena ñāṇassa pavattanameva. Tenāha "lokam volokayamāno"ti, sattalokam byavalokayamāno āsayānusayacaritādhimuttiādike visesato ogāhetvā passantoti attho. Maṅgalam bhaṇāpessanti "tam tesam āyatim visesādhigamassa vijjāṭṭhānam hutvā dīgharattam hitāya sukhāya bhavissā"ti. Tīhi piṭakehi sammasitvāti tipiṭakato ekakadukādinā saṅgahetabbassa saṅgaṇhanavasena sammasitvā vīmamsitvā. Ñātum icchitā atthā pañhā, te pana imasmim sutte ekakādivasena āgatā sahassam, cuddasacāti āha "cuddasapañhādhikena pañhasahassena paṭimaṇḍetvā"ti. Evamidhasampiṇḍetvā dassite pañhe parato suttapariyosāne "ekakavasena dve pañhā kathitā"ti-ādinā vibhāgena pariganetvā sayameva dassessati.

Ubbhatakanavasandhāgāravaṇṇanā

297. Uccādhiṭṭhānatāya taṁ sandhāgāraṁ bhūmito ubbhataṁ viyāti "ubbhatakan"ti nāmaṁ labhati. Tenāha "uccattā vā evaṁ vuttan"ti. Sandhāgārasālāti ekā mahāsālā. Uyyogakaraṇādīsu hi rājāno tattha ṭhatvā "ettakā purato gacchantu, ettakā pacchā"ti-ādinā tattha nisīditvā sandhaṁ karonti mariyādaṁ bandhanti, tasmā taṁ ṭhānaṁ "sandhāgāran"ti vuccati. Uyyogaṭṭhānato ca āgantvā yāva gehaṁ gomayaparibhaṇḍādivasena paṭijagganaṁ karonti, tāva ekaṁ dve divase te rājāno tattha santhambhantītipi sandhāgāraṁ, tesaṁ rājūnaṁ saha atthānusāsanaagārantipi sandhāgāraṁi. Yasmā vā te tattha sannipatitvā "imasmiṁ kāle kasituṁ vaṭṭati, imasmiṁ kāle vapitun"ti-ādinā gharāvāsakiccaṁ sandharanti, tasmā chiddāvachiddaṁ

gharāvāsam tattha sandharantītipi sandhāgāram, sā eva sālāti sandhāgārasālā. Devatāti gharadevatā. Nivāsavasena anajjhāvutthattā "kenaci vā manussabhūtenā"ti vuttam. Kammakaranavasena pana manussā tattha nisajjādīni kappesumeva. "Sayameva pana satthu idhāgamanam amhākam puññavaseneva, aho mayam puññavanto"ti haṭṭhatuṭṭhā evam sammā cintesunti dassento "amhehī"ti-ādimāha.

298. Aṭṭakāti cittakammakaraṇatthaṁ baddhā mañcakā. Muttamattāti tāvadeva sandhāgāre navakammassa niṭṭhāpitabhāvamāha, tena "acirakāritan"ti-ādinā vuttamevatthaṁ vibhāveti. Araññaṁ ārāmo āramitabbaṭṭhānaṁ etesanti araññārāmā. Santharaṇaṁ santhari, sabbo sakalo santhari etthāti sabbasantari, bhāvanapuṁsakaniddesoyaṁ. Tenāha "yathā sabbaṁ santhataṁ hoti, evan"ti.

299. **Samantapāsādiko**ti samantato sabbabhāgena pasādāvaho cāturiyaso. "**Asītihatthamṭhānam gaṇhātī**"ti idam buddhānam kāyappabhāya pakatiyā asītihatthe ṭhāne abhibyāpanato vuttam. Iddhānubhāvena pana anantamaparimāṇam ṭhānam vijjotateva.

Nīlapītalohitodātamañjaṭṭhapabhassaravasena **chabbaṇṇā. Sabbe disābhāgā**ti sarīrappabhāya bāhullato vuttaṁ.

Abbhamahikādīhi upakkiliṭṭhaṁ suññaṁ na sobhati, tārakācitaṁ pana antalikkhaṁ tāsaṁ pabhāhi samantato vijjotamānaṁ virocatīti āha "samuggatatārakaṁ viya gaganatalan"ti. Sabbapāliphulloti mūlato paṭṭhāya yāva sākhaggā phullo. "Paṭipāṭiyā ṭhapitānan"ti-ādinā parikappūpamā. Tathā hi viya-saddaggahaṇaṁ kataṁ. Siriyā siriṁ abhibhavamānaṁ viyāti attano sobhāya tesaṁ sobhanti attho. "Bhikkhūpi sabbevā"ti idaṁ nesaṁ "appicchā"ti-ādinā vuttaguṇesu lokiyaguṇānaṁ vasena yojetabbaṁ. Na hi te sabbeva dasakathāvatthulābhino. Tena vuttaṁ "suttantaṁ āvajjetvā -pa-arahattaṁ pāpuṇissantī"ti¹. Tasmā ye tattha ariyā, te sabbesampi padānaṁ vasena bodhitā honti. Ye pana puthujjanā, te lokiyaguṇadīpakehi padehīti na tathā

heṭṭhā "asītimahātherā"ti-ādi vuttam. Pubbe arahattabhāgino gahitā.

Rūpakāyassa asīti-anubyañjanapaṭimaṇḍita¹ dvattiṁsamahāpurisalakkhaṇa²kāyappabhābyāmappabhāketumālāvicittatāva **buddhaveso.** Chabbaṇṇā buddharasmiyo vissajjentassa bhagavato kāyassa ālokitavilokitādīsu paramukkaṁsagato buddhāveṇiko accantupasamo **buddhavilāso.** Assanti³ tassaṁ.

Sandhāgārānumodanapaṭisaṁyuttāti "sītaṁ uṇhaṁ paṭihantī"ti-ādinā⁴ nayena sandhāgāraguṇūpasañhitā sandhāgārakaraṇapuññānisaṁsabhāvinī. Pakiṇṇakakathāti saṅgīti-anāruļhā suṇantānaṁ ajjhāsayānurūpatāya vividhavipulahetūpamāsamālaṅkatā nānānayavicittā vitthārakathā. Tenāha "tadā hī"ti-ādi. Ākāsagaṅgaṁ otārento viya nirupakkilesatāya suvisuddhena, vipulodāratāya aparimeyyena ca atthena suṇantānaṁ kāyacittapariļāhavūpasamanato. Pathavojaṁ ākaḍḍhanto viya aññesaṁ sudukkaratāya, mahāsāratāya vā atthassa. Mahājambuṁ matthake gahetvā cālento viya cālanapaccayaṭṭhānavasena pubbenāparaṁ anusandhānato. Yojaniya -pa- pāyamāno viya desanaṁ catusaccayante pakkhipitvā atthavedadhammavedasseva labhāpanena sātamadhuradhammāmatarasūpasaṁharaṇato. Madhugaṇḍanti madhupaṭalaṁ.

300. "Tuṇhībhūtaṁ tuṇhībhūtan"ti byāpanicchāyaṁ idaṁ āmeḍitavacananti dassetuṁ "yaṁyaṁ disan"ti-ādi vuttaṁ. Anuviloketvāti ettha anu-saddo "parī"ti iminā samānattho, vilokanañcettha satthu cakkhudvayenapi icchitabbanti "maṁsacakkhunā -pa- tato tato viloketvā"ti saṅkhepato vatvā tamatthaṁ vitthārato dassetuṁ "maṁsacakkhunā hī"ti-ādi vuttaṁ. Hatthena kucchitaṁ kataṁ hatthakukkuccaṁ kukatameva kukkuccanti katvā. Evaṁ pādakukkuccaṁ daṭṭhabbaṁ. Niccalā nisīdiṁsu attano suvinītabhāvena, buddhagāravena ca. "Ālokaṁ pana vaḍḍhayitvā"ti-ādi kadāci bhagavā evampi

^{1.} Jinālankāratīkāya vijātamangalavannanāya vitthāro.

^{2.} Dī 2. 13; Dī 3. 117; Ma 2. 336 piţthesu vitthāro.

^{3.} Tassanti (Atthakathāyam)

^{4.} Vi 4. 291, 314 pitthesu.

karotīti adhippāyena vuttam. Na hi satthu sāvakānam viya evam payogasampādanīyametam ñāṇam. Tirohitavidūravattanipi rūpagate mamsacakkhuno pavattiyā icchitattā vīmamsitabbam. **Arahattupagam** arahattapadaṭṭhānam. **Cakkhutalesu nimittam ṭhapetvā**ti bhāvanānuyogasampattiyā sabbesam tesam bhikkhūnam cakkhutalesu labbhamānam santindriyavigatathinamiddhatākārasankhātam nimittam attano hadaye ṭhapetvā sallakkhetvā. **Kasmā āgilāyati** koṭisatasahassahatthināgānam balam dhārentassāti codakassa adhippāyo. Ācariyo esa sankhārānam sabhāvo, yadidam aniccatā. Ye pana aniccā, te ekanteneva udayavayapaṭipīṭitatāya dukkhā eva, dukkasabhāvesu tesu satthu kāye dukkhuppattiyā ayam paccayoti dassetum "bhagavato hī"ti-ādi vuttam. **Piṭṭhivāto uppajji**, so ca kho pubbe katakammapaccayā. Svāyamattho paramatthadīpaniyam **Udānaṭṭhakathāyam** āgatanayeneva veditabbo.

Bhinnaniganthavatthuvannanā

- 301. Hetthā vuttameva pāsādikasuttavannanāyam1.
- 302. **Svākhyātaṁ dhammaṁ desetukāmo**ti svākhyātaṁ katvā dhammaṁ kathetukāmo, satthārā vā svākhyātaṁ dhammaṁ sayaṁ bhikkhūnaṁ kathetukāmo. Satthārā desitadhammameva hi tato tato gahetvā sāvakā sabrahmacārīnaṁ kathenti.

Ekakavannanā

303. Samaggehi bhāsitabbanti² aññamaññaṁ samaggehi hutvā bhāsitabbaṁ, sajjhāyitabbañceva vaṇṇetabbañcāti attho. Yathā pana samaggehi saṅgāyanaṁ hoti, tampi dassetuṁ "ekavacanehī"ti-ādi vuttaṁ. Ekavacanehīti virodhābhāvena samānavacanehi. Tenāha "aviruddhavacanehī"ti-ādi. Sāmaggirasaṁ dassetukāmoti yasmiṁ dhamme saṅgāyane³ sāmaggirasānubhavanaṁ icchitaṁ desanākusalatāya, tattha ekakadukatikādivasena bahudhā sāmaggirasaṁ dassetukāmo. Sabbe sattāti anavasesā

^{1.} Dī-Ttha 3. 89 pitthe.

^{2.} Gāyitabbam (Atthakathāyam)

^{3.} Saṅgāyanena (Ka)

sattā, te pana bhavabhedato sankhepeneva bhinditvā dassento "kāmabhavādīsū"ti-ādimāha. Byadhikaranānampi bāhiratthasamāso hoti yathā "urasilomo"ti āha "āhārato thiti etesanti āhāratthitikā"ti. Titthati etenāti **thiti**, āhāro thiti etesanti **āhāratthitikā**ti evam vā ettha samāsaviggaho datthabbo. Āhāratthitikāti paccayatthitikā, paccayāyattavuttikāti attho. Paccayattho hettha āhāra-saddo "ayamāhāro anuppannassa vā kāmacchandassa uppādāyā"ti-ādīsu¹ viya. Evañhi "sabbe sattā"ti iminā asaññasattāpi pariggahitā honti. Sā panāyam āhāratthitikatā nippariyāyato sankhāradhammo, na sattadhammo. Tenevāha atthakathācariyā "sabbe sattā āhāratthitikāti āgatatthāne sankhāraloko veditabbo"ti². Yadi evam "sabbe sattā"ti idam kathanti? Puggalādhitthānā desanāti nāyam doso. Yathāha bhagavā "ekadhamme bhikkhave bhikkhu sammā nibbindamāno sammā virajjamāno sammā vimuccamāno sammā pariyantadassāvī sammattam abhisamecca dittheva dhamme dukkhassantakaro hoti, katamasmim ekadhamme? Sabbe sattā āhāratthitikā"ti³. **Eko dhammo**ti "sabbe sattā āhāratthitikā"ti yvāyam puggalādhitthānāya kathāya sabbesam sankhārānam paccayāyattavuttitāya āhārapariyāyena sāmaññato paccayadhammo vutto, ayam āhāro nāma eko dhammo. Yāthāvato ñatvāti yathāsabhāvato abhisambujjhitvā. **Sammadakkhāto**ti teneva abhisambuddhākārena sammadeva desito.

Codako vuttampi attham yāthāvato appaṭipajjamāno neyyattham suttapadam nītatthato dahanto "sabbe sattā"ti vacanamatte ṭhatvā "nanu cā"ti-ādinā codeti. Ācariyo aviparītam tattha yathādhippetamattham pavedento "na virujjhatī"ti vatvā "tesañhi jhānam āhāro hotī"ti āha. Jhānanti ekavokārabhavāvaham saññāya virajjanavasena pavattam rūpāvacaracatutthajjhānam. Pāḷiyam pana "anāhārā"ti vacanam asaññabhave catunnam āhārānam abhāvam sandhāya vuttam, na paccayāhārassa abhāvato. "Evam santepī"ti idam sāsane yesu dhammesu

^{1.} Sam 3. 59, 90 pitthe.

^{2.} Visuddhi 1. 198; Vi-Ţtha 1. 90; Udāna-Ţtha 186; Cūļaniddesa-Ţtha 37 piṭṭhesu.

^{3.} Am 3. 297 pitthe.

visesato āhāra-saddo niruļho, "āhāraṭṭhitikā"ti ettha yadi te eva gayhanti, abyāpikadoso āpanno. Atha sabbopi paccayadhammo āhāroti adhippeto, imāya āhārapāḷiyā virodho āpannoti dassetum āraddham. "Na virujjhatī"ti yenādhippāyena vuttam, tam vivaranto "etasmiñhi sutte"ti-ādimāha. Kabaḷīkārāhārādīnam ojaṭṭhamakarūpāharaṇādi nippariyāyena āhārabhāvo. Yathā hi kabaḷīkārāhāro ojaṭṭhamakarūpāharaṇena rūpakāyam upatthambheti, evam phassādayo ca vedanādi-āharaṇena nāmakāyam upatthambhenti, tasmā satipi janakabhāve upatthambhakabhāvo ojādīsu sātisayo labbhamāno mukhyo āhāraṭṭhoti te eva nippariyāyena āhāralakkhaṇā dhammā vuttā. Idhāti imasmim saṅgītisutte. Pariyāyena paccayo āhāroti vutto sabbo paccayo dhammo attano phalam āharatīti imam pariyāyam labhatīti. Tenāha "sabbadhammānañhī"ti-ādi. Tattha sabbadhammānanti sabbesam saṅkhatadhammānam. Idāni yathāvuttamattham suttena¹ samatthetum "tenevāhā"ti-ādi vuttam. Ayanti paccayāhāro.

Nippariyāyāhāropi gahitova hoti, yāvatā sopi paccayabhāveneva janako, upatthambhako ca hutvā tam tam phalam āharatīti vattabbatam labhatīti. Tatthāti pariyāyāhāro, nippariyāyāhāroti dvīsu āhāresu. Asañāabhave yadipi nippariyāyāhāro na labbhati, paccayāhāro pana labbhati pariyāyāhāralakkhaņo. Idāni imamevattham vitthārena dassetum "anuppanne hi buddhe"ti-ādi vuttam. Uppanne buddhe titthakaramatanissitānam jhānabhāvanāya asijjhanato "anuppanne buddhe"ti vuttam. Sāsanikā tādisam jhānam na nibbattentīti "titthāyatane pabbajitā"ti vuttam. Titthiyā hi upapattivisese vimuttisaññino, saññāvirāgāvirāgesu ādīnavānisamsadassino vā hutvā asaññasamāpattim nibbattetvā akkhaṇabhūmiyam uppajjanti, na sāsanikā. Vāyokasiņe parikammam katvāti vāyokasiņe paṭhamādīni tīṇi jhānāni nibbattetvā tatiyajjhāne ciṇṇavasī hutvā tato vuṭṭhāya catutthajjhānādhigamāya parikammam katvā. Tenāha "catutthajjhānam nibbattetvā"ti. Kasmā panettha vāyokasiņeyeva parikammam vuttanti? Yadettha

vattabbam, tam brahmajālaṭīkāyam¹ vitthāritameva². Dhīti jigucchanatthe nipāto, tasmā dhī cittanti cittam jigucchāmīti attho. Dhibbatetam cittanti etam mama cittam jigucchitam vata hotu. Vatāti sambhāvane, tena jiguccham sambhāvento vadati. Nāmāti ca sambhāvane eva, tena cittassa abhāvam sambhāveti. Cittassa bhāvābhāvesu ādīnavānisamse dassetum "cittañhī"ti-ādi vuttam. Khantim rucim uppādetvāti "cittassa abhāvo eva sādhu suṭṭhū"ti imam diṭṭhinijjhānakkhantim, tattha ca abhirucim uppādetvā.

Tathā bhāvitassa jhānassa ṭhitibhāgiyabhāvappattiyā aparihīnajjhānassa titthāyatane pabbajitasseva tathā jhānabhāvanā hotīti āha "manusaloke"ti. Paṇihito ahosīti maraṇassa āsannakāle ṭhapito ahosi. Yadi ṭhānādinā ākārena nibbatteyya, kammabalena yāva bhedā tenevākārena tiṭṭheyya vāti āha "so tena iriyāpathenā"ti-ādi.

Evarūpānampīti evam acetanānampi. **Pi-**saddena pageva sacetanānanti dasseti. Katham pana acetanānam nesam paccayāhārassa upakappananti codanam sandhāya tattha nidassanam dassento "yathā"ti-ādimāha.

Ye uṭṭhānavīriyeneva divasam vītināmetvā tassa nissandaphalamattam kiñcideva labhitvā jīvikam kappenti, te uṭṭhānaphalūpajīvino. Ye pana attano puññaphalameva upajīventi, te puññaphalūpajīvino. Nerayikānam pana neva uṭṭhānavīriyavasena jīvikākappanam, puññaphalassa pana lesopi natthīti vuttam "ye pana te nerayikā -pa- na puññaphalūpajīvīti vuttā"ti. Paṭisandhiviññāṇassa āharaṇena manosañcetanāhāroti vuttā, na yassa kassaci phalassāti adhippāyena "kim pañca āhārā atthī"ti codeti, ācariyo nippariyāyāhāre adhippete siyā tava codanāyā'vasaro, sā pana ettha anavasarāti dassetum "pañca, na pañcāti idam na vattabban"ti vatvā pariyāyāhārasseva panettha adhippetabhāvam dassento "nanu paccayo āhāroti vuttametan"ti āha. Tasmāti yassa kassaci paccayassa "āhāro"ti icchitattā. Idāni vuttamevattham pāṭiyā samatthento "yam sandhāyā"ti-ādimāha.

^{1.} Dī-Ţī 1. 157 pitthe.

Mukhyāhāravasenapi nerayikānam āhāraṭṭhitikatam dassetum "kabaļīkāram āhāram -pa- sādhetī"ti vuttam. Yadi evam nerayikā sukhapaṭisamvedinopi hontīti? Noti dassetum "kheļopi hī"ti-ādi vuttam. Tayoti tayo arūpāhārā kabaļīkārāhārassa abhāvato. Avasesānanti asaññasattehi avasesānam. Kāmabhavādīsu nibbattasattānam paccayāhāro hi sabbesam sādhāraṇoti. Etam pañhanti "katamo eko dhammo"ti evam coditam etam pañham. Kathetvāti vissajjetvā.

"Tattha tattha -pa- dukkham hotī"ti etena yathā idha paṭhamassa pañhassa niyyātanam, dutiyassa uddharaṇam na katam, eva iminā eva adhippāyena ito paresu dukatikādipañhesu tattha tattha ādipariyosānesu eva uddharaṇaniyyātanāni katvā sesesu na katanti dasseti. Paṭicca etasmā phalam etīti paccayo, kāraṇam, tadeva attano phalam saṅkharotīti saṅkhāroti āha "imasmimpi -pa- saṅkhāroti vutto"ti. Āhārapaccayoti āharaṇaṭṭhavisiṭṭho paccayo. Āharaṇañcettha uppādakattappadhānam, saṅkharaṇam upatthambhakattappadhānanti ayametesam viseso. Tenāha "ayamettha heṭṭhimato viseso"ti. Nippariyāyāhāre gahite "sabbe sattā"ti vuttepi asaññasattā na gahitā eva bhavissantīti padesavisayo sabba-saddo hoti yathā "sabbe tasanti daṇḍassā"ti-ādīsu¹. Na hettha khīṇāsavādīnam gahaṇam hoti. Pākaṭo bhaveyya visesasāmaññassa visayattā pañhānam. No ca gaṇhimsu aṭṭhakathācariyā. Dhammo nāma natthi saṅkhatoti adhippāyo. Idha dutiyapañhe "saṅkhāro"ti paccayo eva kathitoti sambandho.

Yadā sammāsambodhisamadhigato, tadā eva sabbañeyyam sacchikatam jātanti āha "mahābodhimaṇḍe nisīditvā"ti. Sayanti sāmamyeva. Addhaniyanti addhānakkhamam cirakālāvaṭṭhāyi pārampariyavasena. Tenāha "ekena hī"ti-ādi. Paramparakathāniyamenāti paramparakathākathananiyamena, niyamitatthabyañjanānupubbiyā kathāyāti attho. Ekakavasenāti ekam ekam parimāṇam etassāti ekako, pañho. Tassa ekakassa vasena. Ekakam niṭṭhitam vissajjananti adhippāyoti.

Ekakavannanā niţţhitā.

Dukavannanā

304. **Cattāro khandhā**ti tesam tāva nāmanatthena nāmabhāvam pathamam vatvā pacchā nibbānassa vattukāmo āha. Tassāpi hi tathā nāmabhāvam parato vakkhati. "Nāmam karoti nāmayatī"ti ettha yam nāmakaranam, tam nāmanti āha "nāmanatthenāti nāmakaranatthenā"ti, attanovāti adhippāyo. Evañhi sātisayamidam tesam nāmakaranam hoti. Tenāha "attano nāmam karontāva uppajjantī" ti-ādi. Idāni tamattham byatirekamukhena vibhāvetum "yathā hī"ti-ādi vuttam. Yassa nāmassa karaneneva te "nāman"ti vuccati, tam sāmañnanāmam, kittimanāmam, gunanāmam vā na hoti, atha kho opapātikanāmanti purimāni tīņi nāmāni udāharaņavasena dassetvā "na evam vedanādīnan" ti te patikkhipitvā itaranāmameva nāmakaranatthena nāmanti dassento "vedanādayo hī"tiādimāha. "Mahāpathavi-ādayo"ti kasmā vuttam, nanu pathavi-āpādayo idha nāmanti anadhippetā, rūpanti pana adhippetāti? Saccametam, phassavedanādīnam viya pana pathavi-ādīnam opapātikanāmatāsāmaññena "pathavi-ādayo viyā"ti nidassanam katam, na arūpadhammā viya rūpadhammānam nāmasabhāvattā. Phassavedanādīnam hi arūpadhammānam sabbadāpi phassādināmakattā, pathavi-ādīnam kesakumbhādināmantarāpatti viya nāmantarānāpajjanato ca sadā attanāva katanāmatāya catukkhandhanibbanani namakaranatthena namam. Atha va adhivacanasamphasso viya adhivacananāmamantarena ye anupacitasambhārānam gahanam na gacchanti, te nāmāyattaggahanā nāmam. Rūpam pana vināpi nāmasādhanam attano ruppanasabhāvena gahaṇam upayātīti rūpam. Tenāha "tesu uppannesū"ti-ādi. Idhāpi "yathā pathaviyā"ti-ādīsu vuttanayeneva attho veditabbo nidassanavasena āgatattā. "Atītepī"ti-ādinā vedanādīsu nāmasaññā nirulhā, anādikālikā cāti dasseti.

Iti atītādivibhāgavantānampi vedanādīnam nāmakaraņaṭṭhena nāmabhāvo ekantiko, tabbibhāgarahite pana ekasabhāve nicce nibbāne vattabbameva natthīti dassento "nibbānam pana -pa- nāmanaṭṭhena nāman"ti āha. Nāmanaṭṭhenāti nāmakaraṇaṭṭhena. Namantīti ekantato sārammaṇattā tanninnā honti, tehi vinā nappavattantīti attho. Sabbanti khandhacatukkam,

nibbānañca. Yasmim ārammaņeyeva vedanākkhandho pavattati, tamsampayuttatāya saññākkhandhādayopi tattha pavattantīti so ne tattha nāmento viya hoti vinā appavattanato. Esa nayo saññākkhandhādīsupīti vuttam "ārammaņe aññamaññam nāmentī"ti. Anavajjadhamme maggaphalādike. Kāmam kesuci rūpadhammesupi ārammaṇādhipatibhāvo labbhateva, nibbāne panesa sātisayo tassa accantasantapaṇītatākappabhāvatoti tadeva ārammaṇādhipatipaccayatāya "attani nāmetī"ti vuttam. Tathā hi ariyā sakalampi divasabhāgam tam ārabbha vītināmentāpi tittim na gacchanti.

"Ruppanatthenā" ti etena ruppatīti rūpanti dasseti. Tattha sītādivirodhipaccayasannipāte visadisuppatti **ruppanam**. Nanu ca arūpadhammānampi virodhipaccayasamāgame visadisuppatti labbhatīti? Saccam labbhati, na pana vibhūtataram. Vibhūtataramhettha ruppanam adhippetam sītādiggahanato. Vuttañhetam "ruppatīti kho bhikkhave tasmā 'rūpan'ti vuccati. Kena ruppati? Sītenapi ruppati, unhenapi ruppatī"ti-ādi¹. Yadi evam katham brahmaloke rūpasamaññāti? Tatthāpi tamsabhāvānativattanato hotiyeva rūpasamaññā. Anuggāhakapaccayavasena vā visadisapaccayasannipāteti evamattho veditabbo. "Yo attano santāne vijjamānassayeva visadisuppattihetubhāvo, tam ruppanan"ti aññe. Imasmim pakkhe rūpayati vikāramāpādetīti **rūpam**. "Sanghattanena vikārāpattiyam ruppana-saddo nirulho"ti keci. Etasmim pakkhe arūpadhammesu rūpasamaññāya pasango eva natthi sanghattanābhāvato. "Patighato ruppanan"ti apare. "Tassāti rūpassā"ti vadanti, nāmarūpassāti pana yuttam. Yathā hi rūpassa, evam nāmassāpi vedanākkhandhādivasena, madanimmadanādivasena ca vitthārakathā **Visuddhimagge**² vuttā evāti. Iti ayam duko kusalattikena sangahite sabhavadhamme pariggahetva pavattoti.

Avijjāti avindiyam "attā, jīvo, itthī, puriso"ti evamādikam vindatīti avijjā, vindiyam "dukkham, samudayo"ti evamādikam na vindatīti avijjā, sabbampi dhammajātam aviditakaraņatthena avijjā, antarahite samsāre satte javāpetīti avijjā, atthato pana sā dukkhādīnam catunnam saccānam sabhāvacchādako sammoho hotīti āha "dukkhādīsu

aññāṇan"ti. **Bhavapatthanā** nāma kāmabhavādīnam patthanāvasena pavattataṇhā. Tenāha "yo bhaveyu bhavacchando"ti-ādi. Iti ayam duko vaṭṭamūlasamudācāradassanattham gahito.

Bhavadiṭṭhīti khandhapañcakaṁ "attā ca loko cā"ti gāhetvā taṁ "bhavissatī"ti gaṇhanavasena niviṭṭhā sassatadiṭṭhīti attho. Tenāha "bhavo vuccatī"ti-ādi. Bhavissatīti bhavo, tiṭṭhati sabbakālaṁ atthīti attho. Sassatanti sassatabhāvo. Vibhavadiṭṭhīti khandhapañcakameva "attā"ti ca "loko"ti ca gahetvā taṁ "na bhavissatī"ti gaṇhanavasena niviṭṭhā ucchedadiṭṭhīti attho. Tenāha "vibhavo vuccatī"ti-ādi. Vibhavissati vinassati ucchijjatīti vibhavo, ucchedo.

Yaṁ na hirīyatīti yena dhammena taṁsampayuttadhammasamūho, puggalo vā na hirīyati na lajjati, liṅgavipallāsaṁ vā katvā yo dhammoti attho veditabbo. Hirīyitabbenāti upayogatthe karaṇavacanaṁ, hirīyitabbayuttakaṁ kāyaduccaritādidhammaṁ na jigucchatīti attho. Nillajjatāti pāpassa ajigucchanā. Yaṁ na ottappatīti etthāpi vuttanayeneva attho veditabbo. Ottappitabbenāti pana hetu-atthe karaṇavacanaṁ, ottappitabbayuttakena ottappassa hetubhūtena kāyaduccaritādināti attho. Hirīyitabbenāti etthāpi vā evameva attho veditabbo. Abhāyanaka-ākāroti pāpato anuttāsanākāro.

"Yam hirīyatī"ti-ādīsu anantaraduke vuttanayena attho veditabbo. Niyakajjhattam jāti-ādisamuṭṭhānam etissāti ajjhattasamuṭṭhānā. Niyakajjhattato bahibhāvato bahiddhā parasantāne samuṭṭhānam etissāti bahiddhāsamuṭṭhānā. Attā eva adhipati attādhipati, ajjhattasamuṭṭhānattā eva attādhipatito āgamanato attādhipateyyā. Lokādhipateyyanti etthāpi eseva nayo. Lajjāsabhāvasaṇṭhitāti pāpato jigucchanarūpena avaṭṭhitā. Bhayasabhāvasaṇṭhitanti tato uttāsanarūpena avaṭṭhitam. Ajjhattasamuṭṭhānāditā ca hirottappānam tattha tattha pākaṭabhāvena vuttā, na pana tesam kadācipi aññamaññavippayogato. Na hi lajjanam nibbhayam, pāpabhayam vā alajjanam atthīti.

Dukkhanti kiccham, aniṭṭhanti vā attho. **Vippaṭikūlagāhimhī**ti dhammānudhammapaṭipattiyā vilomagāhake. Tassā eva vipaccanīkam duppaṭipatti sātam iṭṭham

etassāti vipaccanīkasāto, tasmim vipaccanīkasāte. Evambhūto ca ovādabhūte sāsanakkame, ovādake ca ādarabhāvarahito hotīti āha "anādare"ti. Tassa kammanti tassa dubbacassa puggalassa anādariyavasena pavattavacetanā dovacassam. Tassa bhāvoti tassa yathāvuttassa dovacassassa atthibhāvo dovacassatā, atthato dovacassameva. Tenevāha "sā atthato saṅkhārakkhandho hotī"ti. Cetanāppadhānatāya hi saṅkhārakkhandhassa evam vuttam. Etenākārenāti appadakkhiņaggāhitākārena.

Assaddhiyadussīlyādipāpadhammayogato puggalā pāpā nāma hontīti dassetum "ye te puggalā assaddhā"ti-ādi vuttam. Yāya cetanāya puggalo pāpasampavaṅko nāma hoti, sā cetanā pāpamittatā, cattāropi vā arūpino khandhā tadākārappavattā pāpamittatāti dassento "sāpi atthato dovacassatā viya daṭṭhabbā"ti-āha.

"Sukham vaco etasmim padakkhinaggāhimhi anulomasāte sādare puggaleti subbaco"ti-ādinā, "kalyānā saddhādayo puggalā etassa mittāti kalyānamitto"ti-ādinā ca anantaradukassa attho icchitoti āha "sovacassatā -pa- vuttapaṭipakkhanayena veditabbā"ti. Ubhoti sovacassatā, kalyānamittā ca. Tesam khandhānam pavatti-ākāravisesā "sovacassatā, kalyānamittatā"ti ca vuccanti, te lokiyāpi honti lokuttarāpīti āha "lokiyalokuttaramissakā kathitā"ti.

Vatthubhedādinā anekabhedabhinnā tamtamjātivasena ekajjham katvā rāsito gayhamānā āpattiyova **āpattikkhandhā**. Tā pana antarāpattīnam aggahaņe **pañcapi āpattikkhandhā āpattiyo**, tāsam pana gahaņe **sattapi āpattikkhandhā āpattiyo**. "Imā āpattiyo, ettakā āpattiyo, evanca tesam āpajjanam hotī"ti jānanapannā **āpattikusalatā**ti āha "yā tāsan"ti-ādi. Tāsam āpattīnanti tāsu āpattīsu. Tattha yam sambhinnavatthukāsu viya ṭhitāsu, duvinneyyavibhāgāsu ca āpattīsu asankarato vavatthānam, ayam visesato āpattikusalatāti dassetum dutiya-āpattiggahanam katam.

Saha kammavācāyāti kammavācāya saheva. Āpattito vuṭṭhāpanapayogatāya kammabhūtā vācā kammavācā, tathābhūtā anusāvanavācā ceva "passissāmī"ti evam pavattavācā ca. Tāya kammavācāya saddhim samakālameva "imāya kammavācāya ito āpattito vuṭṭhānam hoti, hontañca paṭhame vā tatiye vā anusāvane yyakārappatte, 'samvarissāmī'ti vā pade pariyosite hotī"ti evam tamtam āpattīhi vuṭṭhānaparicchedaparijānanapaññā āpattivuṭṭhānakusalatā. Vuṭṭhānanti ca yathāpannāya āpattiyā yathā tathā anantarāyatāpādanam, evam vuṭṭhānaggahaṇeneva desanāyapi saṅgaho siddho hoti.

"Ito pubbe parikammam pavattam, ito param bhavangamajjhe samāpattī"ti evam samāpattīnam **appanāparicchedajānanapaññā** samāpattikusalatā. Vuṭṭhāne kusalabhāvo **vuṭṭhānakusalatā**, pageva vuṭṭhānaparicchedakarañāṇam. Tenāha "yathāparicchinnasamayavasenevā"ti-ādi. Vuṭṭhānasamatthāti vuṭṭhāpane samatthā

"Dhātukusalatā"ti ettha pathavīdhātu-ādayo, sukhadhātu-ādayo, kāmadhātu-ādayo ca dhātuyo etāsveva antogadhāti etāsu kosalle dassite tāsupi kosallam dassitameva hotīti "aṭṭhārasa dhātuyo cakkhudhātu -pamanoviññāṇadhātū"ti vatvā "aṭṭhārasannam dhātūnam sabhāvaparicchedakā"ti vuttam. Tattha sabhāvaparicchedakāti yathābhūtasabhāvāvabodhinī. "Savanapaññā dhāraṇapaññā"ti-ādinā paccekam paññā-saddo yojetabbo. Dhātūnam savanadhāraṇapaññā sutamayā, itarā bhāvanāmayā. Tatthāpi sammasanapaññā lokiyā. Vipassanā paññā hi sā, itarā lokuttarā. Lakkhaṇādivasena, aniccādivasena ca manasikaraṇam manasikāro, tattha kosallam manasikārakusalatā. Tam pana ādimajjhapariyosānavasena tidhā bhinditvā dassento "sammasanapaṭivedhapaccavekkhaṇapaññā"ti āha. Sammasanapaññā hi tassā ādi, paṭivedhapaññā majjhe, paccavekkhaṇapaññā pariyosānam.

Āyatanānam ganthato ca atthato ca uggaņhanavasena tesam dhātulakkhaṇādivibhāgassa jānanapaññā **uggahajānanapaññā**. Sammasanapaṭivedhapaccavekkhaṇavidhino jānanapaññā **manasikārajānanapaññā**. Yasmā āyatanānipi atthato dhātuyova, manasikāro ca ugganhanādivasena tesam eva

manasikāravidhi, tasmā dhātukusalatādikā tissopi kusalatā ekadese katvā dassetum "apicā"ti-ādi vuttam. Savanam viya uggaņhanapaccavekkhaņānipi parittañāṇakattukānīti āha "savana-uggahaṇapaccavekkhaṇā lokiyā"ti. Ariyamaggakkhaṇe sammasanamanasikārānam nipphatti pariniṭṭhānanti tesam lokuttaratāpariyāyopi labbhatīti vuttam "sammasanamanasikārā lokiyalokuttaramissakā"ti. Paccayadhammānam hetu-ādīnam attano paccayuppannānam hetupaccayādibhāvena paccayabhāvo paccayākāro, so pana avijjādīnam dvādasannam paṭiccasamuppādaṅgānam vasena dvādasavidhoti āha "dvādasannam paccayākārānan"ti. Uggahādivasenāti uggahamanasikārasavanasammasanapaṭivepeccavekkhaṇavasena.

Ţhānañceva tiṭṭhati phalaṁ tadāyattavuttitāyāti kāraṇañca hetupaccayabhāvena karaṇato nipphādanato¹. Tesaṁ sotaviññāṇādīnaṁ. Etasmiṁ duke attho veditabboti sambandho. Ye dhammā yassa dhammassa kāraṇabhāvato ṭhānaṁ, teva dhammā taṁvidhurassa dhammassa akāraṇabhāvato aṭṭhānanti paṭhamanaye phalabhedena tasseva dhammassa ṭhānāṭṭhānatā dīpitā, dutiyanaye pana abhinnepi phale paccayadhammabhedena tesaṁ ṭhānāṭṭhānatā dīpitāti ayametesaṁ viseso. Na hi kadāci ariyā diṭṭhisampadā niccaggāhassa kāraṇaṁ hoti, akiriyatā pana siyā tassa kāraṇanti.

Ujuno bhāvo **ajjavam**, ajimhatā akuṭilatā avaṅkatāti atthoti tamattham anajjavapaṭikkhepamukhena dassetum "gomuttavaṅkatā"ti-ādi vuttam. Svāyam anajjavo bhikkhūnam yebhuyyena anesanāya, agocaracāritāya ca hotīti āha "ekacco hi -pa- caratī"ti. Ayam gomuttavaṅkatā nāma ādito paṭṭhāya yāva pariyosānā paṭipattiyā vaṅkabhāvato. Purimasadisoti paṭhamam vuttabhikkhusadiso. Candavaṅkatā nāma paṭipattiyā majjhaṭṭhāne vaṅkabhāvāpattito. Naṅgalakoṭivaṅkatā nāma pariyosāne vaṅkabhāvāvattito. Idam ajjavam nāma sabbatthakameva ujubhāvasiddhito. Ajjavatāti ākāraniddeso, yenākārenassa ajjavo pavattati, tadākāraniddesoti attho. Lajjatīti lajjī, hirimā, tassa bhāvo lajjavam, hirīti attho. Lajjā

etassa atthīti **lajjī** yathā "mālī, māyī"ti ca, tassa bhāvo **lajjībhāvo,** sā eva lajjā.

Parāparādhādīnam adhivāsanakkhamam adhivāsanakhanti. Sucisīlatā soraccam. Sā hi sobhanakammaratatā, suṭṭhuvā pāpato oratabhāvo viratatā soraccam. Tenāha "suratabhāvo"ti.

"Nāmañcarūpañcā"ti-ādīsu ayamaparo nayo—nāmakaraṇaṭṭhenāti aññaṁ anapekkhitvā sayameva attano nāmakaraṇasabhāvatoti attho. Yañhi parassa nāmaṁ karoti, tassa ca tadapekkhattā aññāpekkhaṁ nāmakaraṇanti nāmakaraṇasabhāvatā na hoti, tasmā mahājanassa ñātīnaṁ, guṇānañca sāmaññanāmādikārakānaṁ nāmabhāvo nāpajjati. Yassa ca aññehi nāmaṁ karīyati, tassa ca nāmakaraṇasabhāvatā natthīti natthiyeva nāmabhāvo, vedanādīnaṁ pana sabhāvasiddhattā vedanādināmassa nāmakaraṇasabhāvato nāmatā vuttā. Pathavī-ādinidassanena nāmassa sabhāvasiddhataṁyeva nidasseti, na nāmabhāvasāmaññaṁ, niruļhattā pana nāmasaddo arūpadhammesu eva vattati, na pathavī-ādīsūti na tesaṁ nāmabhāvo. Na hi pathavī-ādināmaṁ vijahitvā kesādināmehi rūpadhammānaṁ viya vedanādināmaṁ vijahitvā aññena nāmena arūpadhammānaṁ voharitabbena piṇḍākārena pavatti atthīti.

Atha vā rūpadhammā cakkhādayo, rūpādayo ca tesam pakāsakapakāsitabbabhāvato vināpi nāmena pākaṭā honti, na evam arūpadhammāti te adhivacanasamphasso viya nāmāyattaggahaṇīyabhāvena "nāman"ti vuttā. Paṭighasamphasso ca na cakkhādīni viya nāmena vinā pākaṭoti "nāman"ti vutto, arūpatāya vā aññanāmasabhāvattā saṅgahitoyaṁ, aññaphassasabhāgattā vā. Vacanatthopi hi rūpayatīti **rūpaṁ,** nāmayatīti **nāman**ti idha pacchimapurimānaṁ sambhavati. **Rūpayatī**ti vināpi nāmena attānaṁ pakāsetīti attho. **Nāmayatī**ti nāmena vinā apākaṭabhāvato attano pakāsakaṁ nāmaṁ karotīti attho. **Ārammaṇādhipatipaccayatāyā**ti satipi rūpassa ārammaṇādhipatipaccayabhāve na taṁ paramassāsabhūtaṁ nibbānaṁ viya sātisayaṁ nāmanabhāvena paccayoti nibbānameva "nāman"ti vuttaṁ

"Avijjā ca bhavataņhā cā"ti ayam duko sattānam vaṭṭamūlasamudācāradassanattho. Samudācaratīti hi samudācāro, vaṭṭamūlameva samudācāro vaṭṭamūlasamudācāro, vaṭṭamūladassanena vā vaṭṭamūlānam pavatti dassitā hotīti vaṭṭamūlānam samudācāro vaṭṭamūlasamudācāro, tamdassanatthoti attho.

Ekekasmiñca "attā"ti ca "loko"ti ca gahaṇavisesaṁ upādāya "attā ca loko cā"ti vuttaṁ, ekaṁ vā khandhaṁ "attā"ti gahetvā aññaṁ attano upabhogabhūtaṁ "loko"ti gaṇhantassa attano attānaṁ "attā"ti gahetvā parassa attānaṁ "loko"ti gaṇhantassa vā vasena "attā ca loko cā"ti vuttaṁ.

Saha sikkhitabbo dhammo **sahadhammo**, tattha bhavam sahadhammikam, tasmim **sahadhammike**. Dovacassa-saddato āya-saddam anaññattam katvā "dovacassāyan"ti vuttam, dovacassassa vā ayanam pavatti dovacassāyam. Āsevantassāpi anusikkhanā ajjhāsayena bhajanāti āha "sevanā -pa- bhajanā"ti. Sabbatobhāgena bhatti sambhatti.

Saha kammavācāyāti abbhānatiņavatthārakakammavācāya, "aham bhante itthannāmam āpattim āpajjin"ti-ādikāya ca saheva. Saheva hi kammavācāya āpattivuṭṭhānañca paricchijjati, "paññattilakkhaṇāya āpattiyā vā kāraṇam vītikkamalakkhaṇam kāyakammam, vacīkammam vā, vuṭṭhānassa kāraṇam kammavācā"ti kāraṇena saha phalassa jānanavasena "saha kammavācāyā"ti vuttam. "Saha kammavācāyā"ti iminā nayena saha parikammenāti etthāpi attho veditabbo.

Dhātuvisayā sabbāpi paññā **dhātukusalatā**. Tadekadesā **manasikārakusalatā**ti adhippāyena purimapadepi sammasanapaṭivedhapaññā vuttā. Yasmā pana nippariyāyato vipassanādipaññā eva manasikārakosallam, tasmā "tāsamyeva dhātūnam sammasanapaṭivedhapaccavekkhaṇapaññā"ti vuttam.

Āyatanavisayā sabbāpi paññā **āyatanakusalatā**ti dassento "dvādasannam āyatanānam uggahamanasikārajānanapaññā"ti vatvā puna **apicā**"ti-ādi vuttam. Dvīsupi vā padesu vācuggatāya āyatanapāļiyā, dhātupāļiyā ca manasi karaṇam **manasikāro.** Tathā uggaṇhantī manasi

karontī, tadattham sunantī, ganthato ca atthato ca dhārentī, "idam cakkhāyatanam nāma, ayam cakkhudhātu nāmā"ti-ādinā sabhāvato, gananato ca paricchedam jānantī ca paññā uggahapaññādikā vuttā. Manasikārapade pana catubbidhāpi paññā uggahoti tato pavatto aniccādimanasikāro "uggahamanasikāro" ti vutto. Tassa jānanam pavattanameva, "yathā pavattam vā uggaham, evameva pavatto uggaho"ti jānanam **uggahajānanam**, "manasikāro evam pavattetabbo, evanca pavatto"ti jānanam manasikārajānanam, tadubhayampi "manasikārakosallan" ti vuttam. Uggahopi hi manasikārasampayogato manasikāraniruttim laddhum arahati. Yo ca manasikātabbo, yo ca manasikaraņūpāyo, sabbo so "manasikāro"ti vattum vattati, tattha kosallam manasikārakusalatāti. Sammasanam paññā, sā maggasampayuttā aniccādisammasanakiccam sādheti niccasaññadipajahanato. **Manasikaro** sammasanasampayutto, so tattheva aniccādimanasikārakiccam maggasampayutto sādhetīti āha "sammasanamanasikārā lokiyalokuttaramissakā"ti. "Iminā paccayena idam hotī"ti evam avijjādīnam sankhārādipaccayuppannassa paccayabhāvajānanam paticcasamuppādakusalatā.

Adhivāsanam khamanam. Tañhi paresam dukkaṭam, duruttañca paṭivirodhākaraṇena attano upari āropetvā vāsanam "adhivāsanan"ti vuccati. Acaṇḍikkanti akujjhanam. Domanassavasena paresam akkhīsu assūnam anuppādanā anassuropo. Attamanatāti sakamanatā. Cittassa abyāpanno sako manobhāvo attamanatā. Cittanti vā cittabbabandham ekattena gahetvā tassa antarā uppannena pītisahagatamanena sakamanatā. Attamano vā puggalo, tassa bhāvo attamanatā. Sāna sattassāti puggaladiṭṭhinivāraṇattham "cittassā"ti vuttam. Adhivāsanalakkhaṇā khanti adhivāsanakhanti. Sucisīlatā soraccam. Sā hi sobhanakammaratatā. Suṭṭhu pāpato oratabhāvo viratatā soraccam. Tenāha "suratabhāvo"ti.

Sakhilo vuccati saņhavāco, tassa bhāvo sākhalyam, saņhavācatā. Tam pana byatirekamukhena vibhāventī yā pāļi pavattā, tam dassento "tattha katamam sākhalyan"ti-ādimāha. Tattha andakāti sadosavaņe rukkhe niyyāsapiņdiyo, ahicchattakādīni vā uṭṭhitāni "andakānī"ti

vadanti. Pheggurukkhassa pana kuthitassa andāni viya utthitā cunnapindiyo, ganthiyo vā andakā. Idha pana byāpajjanakakkasādibhāvato andakapakatibhāvena vācā "andakā"ti vuttā. Padumanālam viya sotam ghamsayamānā pavisantī kakkasā datthabbā. Kodhena nibbattattā tassa parivārabhūtā kodhasāmantā. Pure samvaddhanārī porī, sā viya sukumārā mudukā vācā porī viyāti **porī. Tatthā**ti "bhāsitā hotī"ti vuttāya kiriyāyātipi yojanā sambhavati, tattha vācāyāti vā. "Sanhavācatā" ti-ādinā tam vācam pavattayamānam cetanam dasseti. Sammodakassa puggalassa mudukabhāvo maddavam sammodakamudukabhāvo. Āmisena alabbhamānena, tathā dhammena cāti dvīhi chiddo. Āmisassa, dhammassa ca alābhena attano. parassa ca antare sambhavantassa hi chiddassa vivarassa bhedassa patisantharanam pidahanam sanganhanam patisantharo. Tam sarupato, patipattito ca pālidassanamukhena vibhāvetum "abhidhammepī"ti-ādimāha. Aggam aggahetvāti aggam attano aggahetvā. Uddesadānanti pāliyā, atthakathāya ca uddisanam. **Pālivannanā**ti pāliyā atthavannanā. Dhammakathākathananti sarabhaññasarabhananādivasena dhammakathanam.

Karuṇāti karuṇābrahmavihāramāha. Karuṇāpubbabhāgoti tassa pubbabhāga-upacārajjhānam vadati. Pāļipade pana yā kāci karuṇā "karuṇā"ti vuttā, karuṇācetovimuttīti pana appanāppattāva. Mettāyapi eseva nayo. Suci-saddato bhāve yya-kāram, i-kārassa ca e-kārādesam katvā ayam niddesoti āha "soceyyanti¹ sucibhavo"ti. Hotu tāva sucibhāvo soceyyam, tassa pana mettāpubbabhāgatā kathanti āha "vuttampi cetan"ti-ādi.

Muṭṭhā sati etassāti **muṭṭhassati**, tassa bhāvo **muṭṭhassaccaṁ**, satipaṭipakkho dhammo, na satiyā abhāvamattaṁ. Yasmā paṭipakkhe sati tassa vasena sativigatā vippavutthā nāma hoti, tasmā vuttaṁ "sativippavāso"ti. "Assatī"ti-ādīsu a-kāro paṭipakkhe daṭṭhabbo, na sattapaṭisedhe. Udake lābu viya yena cittaṁ ārammaṇe pilavantā viya tiṭṭhati, na ogāhati, sā pilāpanatā². Yena gahitampi ārammaṇaṁ sammussati

na sarati, sā **sammussanatā**. Yathā vijjāpaṭipakkhā avijjā vijjāya pahātabbato, evam sampajaññapaṭipakkham **asampajaññam**, avijjāyeva.

Indriyasamvarabhedoti indriyasamvaravināso. Appaţisankhāti apaccavekkhitvā ayoniso ca āhāraparibhoge ādīnavānisamse avīmamsetvā.

Appaṭisaṅkhāyāti itikattabbatāsu appaccavekkhaṇāya nāmaṁ. Aññāṇaṁ appaṭisaṅkhātanimittaṁ. Akampanañāṇanti tāya anabhibhavanīyaṁ ñāṇaṁ, tattha tattha paccavekkhaṇāñāṇañceva paccavekkhaṇāya muddhabhūtaṁ lokuttarañāṇañca. Nippariyāyato maggabhāvanā bhāvanā nāma, yā ca tadattā, tadubhayañca bhāventasseva icchitabbaṁ, na bhāvitabhāvanassāti vuttaṁ "bhāventassa uppannaṁ balan"ti. Tenāha "yā kusalānaṁ dhammānaṁ āsevanā bhāvanā bahulīkamman"ti.

Kāmam sampayuttadhammesu thirabhāvopi balaṭṭho eva, paṭipakkhehi pana akammanīyatā sātisayam balaṭṭhoti vuttam "assatiyā akampanavasenā"ti. Paccanīkadhammasamanato samatho samādhi. Aniccādinā vividhenākārena dassanato vipassanā paññā. Tam ākāram gahetvāti samādhānākāram gahetvā. Yenākārena pubbe alīnam anuddhatam majjhimam bhāvanāvīthipaṭipannam hutvā cittam samāhitam hoti, tam ākāram gahetvā sallakkhetvā. Nimittavasenāti kāraṇavasena. "Eseva nayo"ti iminā paggahova tam ākāram gahetvā puna pavattetabbassa paggāhassa nimittavasena paggāhanimittanti imamattham atidisati, tassattho samathe vuttanayānusārena veditabbo. Paggāho vīriyam kosajjapakkhato cittassa patitum adatvā paggaṇhanato. Avikkhepo ekaggatā vikkhepassa uddhaccassa paṭipakkhabhāvato. Paṭisaṅkhānakiccanibbattibhāvato lokuttaradhammānam paṭisaṅkhānabalabhāvo, tathā pubbe pavattākārasallakkhaṇavasena samathapaggāhānam upari pavattisabbhāvato samathanimittadukassapi missakatā vuttā.

Yathāsamādinnassa sīlassa bhedakaro **vītikkamo.** Sīlavināsako **asamvaro. Sammādiṭṭhivināsikā**ti "atthi dinnan"ti-ādi¹ nayappavattāya sammādiṭṭhiyā dūsiyā.

Sīlassa sampādanam nāma sabbabhāgato tassa anūnatāpādananti āha "sampādanato paripūraṇato"ti. Pāripūrattho hi sampadā-saddoti. Mānasikasīlam nāma sīlavisodhanavasena abhijjhādippahānam. Diṭṭhipāripūribhūtam ñāṇanti atthikadiṭṭhi-ādisammādiṭṭhiyā pāripūribhāvena pavattam ñānam.

Visuddhim papetum samatthanti cittavisuddhi-adi-uparivisuddhiya paccayo bhavitum samattham. Suvisuddhameva hi sīlam tassā padatthānam hotīti. Visuddhim pāpetum samattham dassananti nānadassanavisuddhim, paramatthavisuddhinibbānañca pāpetum upanetum samattham kammassakatāñānādisammādassanam. Tenāha "abhidhamme"ti-ādi. Ettha ca "idam akusalam kammam no sakam, idam pana kammam sakan"ti evam byatirekato, anvayato ca kammassakatājānanañānam kammassakatāñānam. Tenāha "ettha cā"ti-ādi. "Parena katampī"ti idam nidassanavasena vuttam yathā parena katam, evam attanā katampi sakakammam nāma na hotīti, attanā vā ussāhitena parena katampīti evam vā attho datthabbo. Yañhi tam parassa ussāhanavasena katam, tampi sakakammam nāma hotīti ayañhettha adhippāyo. Atthabhañjanatoti ditthadhammikādisabba-atthavināsanato. Atthajananatoti idhalokatthaparalokatthaparamatthanam uppadanato. Ārabbhakāle "aniccam dukkham anattā" ti pavattampi vacīsaccañca lakkhaṇāni paṭivijjhantam vipassanāñāṇam anulometi tattheva pativijjhanato. Paramatthasaccañca nibbānam na vilometi na virodheti ekanteneva sampāpanato.

Ñāṇadassananti ñāṇabhūtaṁ dassanaṁ, tena maggaṁ vadati. Taṁsampayuttameva vīriyanti paṭhamamaggasampayuttaṁ vīriyamāha. Sabbāpi maggapaññā diṭṭhivisuddhiyevāti dassetuṁ "apicā"ti-ādi vuttaṁ. Ayameva ca nayo abhidhammapāḷiyā¹ sametīti dassento "abhidhamme panā"ti-ādimavoca.

Yasmā samvego nāma sahottappañāṇam, tasmā samvegavatthum bhayato bhāyitabbato dassanavasena pavattañāṇam. Tenāha "jātibhayam"tiādi. Bhāyanti etasmāti bhayam, jāti eva bhayam jātibhayam. Samvejanīyanti samvijjitabbam bhāyitabbam uttāsitabbam. Ṭhānanti kāraṇam, vatthūti

attho. **Samvegajātassā**ti uppannasamvegassa. **Upāyapadhānan**ti upāyena pavattetabbam vīriyam.

Kusalānam dhammānanti sīlādīnam anavajjadhammānam. Bhāvanāyāti uppādanena, vaḍḍhanena ca. Asantuṭṭhassāti "alamettāvatā, kathamettāvatā"ti saṅkocāpattivasena na santuṭṭhassa. Bhiyyokamyatāti bhiyyo bhiyyo uppādanicchā. Vosānanti saṅkocam asamatthanti. Tussanam tuṭṭhi santuṭṭhi, natthi etassa santuṭṭhīti asantuṭṭhi, tassa bhāvo asantuṭṭhitā. Vīriyappavāhe vattamāne antarā eva paṭigamanam nivattanam paṭivānam, tam tassa atthīti paṭivānī, na paṭivānī appaṭivānī, tassa bhāvo appaṭivānitā. Sakkaccakiriyatāti kusalānam karaṇe sakkaccakiriyatā ādarakiriyatā. Sātaccakiriyatāti satatameva karaṇam. Aṭṭhitakiriyatāti antarā aṭṭhapetvā khaṇḍam akatvā karaṇam. Anolīnavuttitāti na līnappavattitā. Anikkhittachandatāti kusalacchandassa anikkhipanam. Anikkhittadhuratāti kusalakaraṇe vīriyadhurassa anikkhipanam. Āsevanāti ādarena sevanā. Bhāvanāti vaḍḍhanā brūhanā. Bahulīkammanti punappunam karaṇam.

Tisso vijjāti pubbenivāsānussatiñāṇam, dibbacakkhuñāṇam, āsavakkhayañāṇanti imā tisso vijjā. Paṭipakkhavijjhanaṭṭhena pubbe nivutthakkhandhādīnam viditakaraṇaṭṭhena visiṭṭhā muttīti vimutti. Svāyam viseso paṭipakkhavigamanena, paṭiyogivigamanena ca icchitabboti tadubhayam dassetum "ettha cā"ti-ādi vuttam. Tattha yena visesena samāpattiyo paccanīkadhammehi suṭṭhu muttā, tato nirāsaṅkatāya ārammaṇe ca abhiratā, tam vesesam upādāya tā adhikam muccanato, ārammaṇe adhimuccanato ca adhimuttiyo nāmāti vuttam "cittassa ca adhimuttī"ti. Muttattāti sabbasaṅkhārehi visesena nissatattā vimutti.

Khayeñāṇanti samucchedavasena kilese khepetīti khayo, ariyamaggo, tappariyāpannam ñāṇam khayeñāṇam. Paṭisandhivasenāti kilesānam tamtammaggavajjhānam uppannamagge khandhasantāne puna sandahanavasena. Anuppādabhūteti tamtamphale. Anuppādapariyosāneti anuppādakaro maggo anuppādo, tassa pariyosāne, kilesānam vā anuppajjanasankhāte pariyosāne, bhangeti atthoti.

Dukavannanā niţţhitā.

Tikavannanā

305. Dhammato añño kattā natthīti dassetum kattusādhanavasena "lubbhatīti lobho"ti vuttam. Lubbhati tena, lubbhanamattametanti karaṇabhāvasādhanavasenapi attho yujjateva. Dussati muyhatīti etthāpi eseva nayo. Akusalañca tam akosallasambhūtaṭṭhena ekantākusalabhāvato mūlañca attanā sampayuttadhammānam suppatiṭṭhitabhāvasādhanato, na akusalabhāvasādhanato. Na hi mūlakato akusalānam akusalabhāvo, kusalādīnañca kusalādibhāvo. Tathā sati momūhacittadvaye mohassa akusalabhāvo na siyā. Tesanti lobhādīnam. "Na lubbhatīti alobho"ti-ādinā paṭipakkhanayena. (1, 2)

Duṭṭhu caritānīti paccayato, sampayuttadhammato, pavatti-ākārato ca na suṭṭhu asammā pavattitāni. Virūpānīti bībhacchāni sampati, āyatiñca aniṭṭharūpattā. Kāyenāti kāyadvārena karaṇabhūtena. Kāyatoti kāyadvārato. "Suṭṭhu caritānī"ti-ādīsu vuttavipariyāyena attho veditabbo. Yassa sikkhāpadassa vītikkame kāyasamuṭṭhānā āpatti hoti, taṁ kāyadvāre paññattasikkhāpadaṁ. Avītikkamo kāyasucaritanti vārittasīlassa vasena vadati, cārittasīlassapi vā, yassa akaraṇe āpatti hoti.
Vacīduccaritasucaritaniddhāraṇampi vuttanayānusārena veditabbaṁ.
Ubhayattha paññattassāti kāyadvāre, vacīdvāre ca paññattassa.
Sikkhāpadassa vītikkamova manoduccaritaṁ manodvāre paññattassa sikkhāpadassa abhāvato, tayidaṁ dvāradvaye akiriyasamuṭṭhānāya āpattiyā vasena veditabbaṁ. Avītikkamoti yathāvuttāya āpattiyā avītikkamo manosucaritaṁ. "Sabbassāpi sikkhāpadassa avītikkamo manosucaritaṁ"ti keci. Tadubhayañhi cārittasīlaṁ uddissapaññattaṁ sikkhāpadaṁ, tassa avītikkamo siyā kāyasucaritaṁ, siyā vacīsucaritanti.

Pāṇo atipātīyati etāyāti **pāṇātipāto**, tathāpavattā cetanā, evam adinnādānādayopīti āha **"pāṇātipātādayo pana tisso cetanā"**ti. **Vacīdvārepi uppannā**

kāyaduccaritam dvārantare uppannassāpi kammassa sanāmāpariccāgato yebhuyyavuttiyā, tabbahulavuttiyā ca. Tenāhu **aṭṭhakathācariyā**—

"Dvāre caranti kammāni, na dvārā dvāracārino. Tasmā dvārehi kammāni, aññamaññam vavatthitā"ti¹.

Vacīduccaritam kāyadvārepi vacīdvārepi uppannāti ānetvā sambandhitabbam. Cetanāsampayuttadhammāti manokammabhūtāya cetanāya sammayuttadhammā. Kāyavacīkammabhūtāya pana cetanāya sampayuttā abhijjhādayo tamtampakkhikā vā honti abbohārikā vāti. Cetanāsampayuttadhammā manosucaritanti etthāpi eseva nayo. Tividhassa duccaritassa akaraṇavasena pavattā tisso cetanāpi viratiyopi kāyasucaritam kāyikassa vītikkamassa akaraṇavasena pavattanato, kāyena pana sikkhāpadānam samādiyane sīlassa kāyasucaritabhāve vattabbameva natthi. Eseva nayo vacīsucarite. (3, 4)

Kāmapaţisamyuttoti ettha dve kāmā vatthukāmo ca kilesakāmo ca. Tattha vatthukāmapakkhe ārammanakaranavasena kāmehi patisamyutto vitakko **kāmavitakko**. Kilesakāmapakkhe pana sampayogavasena kāmena patisamyuttoti yojetabbam. "Byāpādapatisamyutto"ti-ādīsu sampayogavaseneva attho veditabbo. Byāpādavatthupatisamyuttopi byāpādapatisamyuttoti gayhamāne ubhayathāpi yojanā labbhateva. Vihimsāpatisamyuttoti etthāpi eseva nayo. Vihimsanti etāya satte, vihimsanam vā esā sattānanti **vihimsā**, tāya patisamyutto vihimsāpatisamyuttoti evam saddattho veditabbo. Appiye amanāpe sankhāre ārabbha byāpādavitakkappavatti atthānāghātavasena dīpetabbā. Byāpādavitakkassa avadhim dassetum "yāva vināsanā"ti vuttam. Vināsanam pana pāṇātipāto evāti. "Saṅkhāro hi dukkhāpetabbo nāma natthī"ti kasmā vuttam, nanu ye "dukkhāpetabbā"ti icchitā sattasaññitā, tepi atthato sankhārā evāti? saccametam, ye pana indriyabaddhā saviññānakatāya dukkham paţisamvedenti, tasmā te vihimsāvitakkassa visayā icchitā sattasaññitā. Ye pana na dukkham

paṭisaṁvedenti vuttalakkhaṇāyogato, te sandhāya "vihiṁsāvitakko saṅkhāresu nuppajjatī"ti vuttaṁ. Yattha pana uppajjati, yathā ca uppajjati, taṁ dassatuṁ "ime sattā"ti-ādi vuttaṁ. (5)

Nekkhammam vuccati lobhato nikkhantattā alobho, nīvaraņehi nikkhantattāpi pathamajjhānam, sabbākusalehi nikkhantattā sabbo kusalo dhammo, sabbasankhatehi pana nikkhantattā nibbānam. Upanissayato, sampayogato, ārammanakaranato ca nekkhammena patisamyuttoti nekkhammapatisamyutto. Nekkhammavitakko sammāsankappo. Idāni tam bhūmivibhāgena dassetum "so"ti-ādi vuttam. Asubhapubbabhāgeti asubhajjhānassa pubbabhāge. Asubhaggahanañcettha kāmavitakkassa ujuvipaccanīkadassanattham katam. Kāmavitakkapatipakkho hi nekkhammavitakkoti. Evañca katvā uparivitakkadvayassa bhūmim dassentena sapubbabhāgāni mettākarunājhānādīni uddhatāni. Asubhajjhāneti asubhārammaņe pathamajjhāne. Avayave hi samudāyavohāram katvā niddisati yathā "rukkhe sākhā"ti. **Jhānam pādakam katvā**ti nidassanamattam. Tam jhānam sammasitvā uppannamaggaphalakālepi hi so lokuttaroti. Byāpādassa patipakkho, kiñcipi na byāpādeti etenāti vā abyāpādo, mettā, tāya patisamyutto abyāpādapatisamyutto. Mettājhāneti mettābhāvanāvasena adhigate pathamajjhāne. Karunājhāneti etthāpi eseva nayo. Vihimsāya patipakkho, na vihimsanti vā etāya satteti **avihimsā**, karunā.

Nanu ca alobhādosānaṁ aññamaññāvirahato tesaṁ vasena uppajjanakānaṁ imesaṁ nekkhammavitakkādīnaṁ, aññamaññaṁ asaṅkaraṇato vavatthānaṁ na hotīti? noti dassetuṁ "yadā"ti-ādi āraddhaṁ. Alobho sīsaṁ hotīti alobho padhāno hoti.

Niyamitapariṇatasamudācārādivasena yadā alobhappadhāno nekkhammagaruko cittuppādo hoti, tadā laddhāvasaro nekkhammavitakko patiṭṭhahati. Taṁsampayuttassa pana adosalakkhaṇassa abyāpādassa vasena yo tasseva abyāpādavitakkabhāvo sambhaveyya, sati ca abyāpādavitakkabhāve kussacipi aviheṭhanajātikatāya avihiṁsāvitakkabhāvo ca sambhaveyya, te **itare dve. Tadanvayikā**ti tasseva nekkhammavitakkassa anugāmino, sarūpato adissanato "tasmiṁ sati

honti, asati na hontī"ti tadanumānaneyyā bhavanti. Sesadvayepi iminā nayena attho veditabbo. **Vuttanayenevāti** "kāmapatisamyutto sankappo **kāmasankappo**"ti-ādinā **vitakkattike** vuttanaveneva¹ **veditabbo** atthato abhinnattā. Yadi evam kasmā puna desanā katāti? Tathā desanāya bujjhanakānam ajjhāsayavasena desanāmattamevetam. (6, 8)

Kāmavitakkādīnam viya uppajjanākāro veditabbo "tāsu dve sattesupi sankhāresupi uppajjantī"ti-ādinā. Tattha kāranamāha "tamsampayuttāyeva hi etā"ti. Tathevāti yathā nekkhammavitakkādīnam "asubhapubbabhāge kāmāvacaro hotī"ti-ādinā kāmāvacarādibhāvo vutto, tatheva tāsampi nekkhammasaññādīnampi **kāmāvacarādibhāvo veditabbo.** (9, 10)

Kāmapatisamyuttoti sampayogavasena kāmena patisamyutto. Takkanavasena **takko**. Visesato takkanavasena **vitakko**. Sankappanaparikappanavasena sankappo. Aññesupi kāmapatisamyuttesu dhammesu vijjamānesu vitakke eva kāmopapado dhātu-saddo nirulho veditabbo vitakkassa kāmasankappappavattiyā sātisayattā. Esa nayo byāpādadhātu-ādīsu. Sabbepi akusalā dhammā kāmadhātū hīnajjhāsayehi kāmitabbadhātubhāvato kilesakāmassa ārammaņasabhāvattāti attho. Vihethetīti vibādhati. Tatthāti tasmim yathāvutte kāmadhātuttike. Sabbākusalasangāhikāya kāmadhātuyā itarā **dve** sangahetvā kathanam sabbasangāhikā kathā. Tisso dhātuyo annamannam asankarato kathā asambhinnā. Itarā dve gahitāva hontīti itarā dve dhātuyo gahitā eva honti "sabbepi akusalā dhammā kāmadhātū"ti vuttattā sāmaññajotanāya savisayassa atibyāpanena. **Tato**ti itaradhātudvayasaṅgāhikāya kāmadhātuyā. Nīharitvāti niddhāretvā. Dassetīti evam bhagavā dassetīti vattum vaṭṭati. Byāpādadhātum -pa- kathesi. Kasmā? Pageva apavādā abhinivisanti, tato param ussaggo pavattati, thapetvā vā apavādavisayam tam pariharantova ussaggo pavattatīti, ñāyo hesa loke niruļhoti. (11)

Dve kathāti "sabbasaṅgāhikā, asambhinnā cā"ti¹ anantarattike vuttā dve kathā. Tattha **vuttanayena** ānetvā kathanavasena **veditabbā**. Tasmā tattha vutta-attho idhāpi āharitvā veditabbo "nekkhammadhātuyā gahitāya itarā dve gahitāva hontī"ti-ādinā.

(12)

Suññataṭṭhenāti attasuññatāya. Kāmabhavo kāmo uttarapadalopena suññataṭṭhena dhātu cāti kāmadhātu. Brahmalokanti paṭhamajjhānabhūmisaññitaṁ brahmalokaṁ. Dhātuyā āgataṭṭhānamhīti "kāmadhātu rūpadhātū"ti-ādinā dhātuggahaṇe kate². Bhavena paricchinditabbāti "kāmabhavorūpabhavo"ti-ādinā bhavavasena tadattho paricchinditabbo, na yāya kāyaci dhātuyā vasena. Yadaggena ca dhātuyā āgataṭṭhāne bhavena paricchedo kātabbo, tadaggena bhavassa āgataṭṭhāne dhātuyā paricchedo kātabbo, bhavavasena dhātuyā paricchijjanato. Nirujjhati kilesavaṭṭaṁ etthāti nirodho, sā eva suññataṭṭhena dhātūti nirodhadhātu, nibbānaṁ. Niruddhe ca kilesavaṭṭe kammavipākavaṭṭā niruddhā eva honti. (13, 14)

Hīnadhātuttiko **abhidhamme**³ hīnattikena paricchinditabboti vuttam **"hīnā dhātūti dvādasa akusalacittuppādā"**ti. Te hi lāmakaṭṭhena **hīnadhātu.** Hīnapaṇītānam majjhe bhavāti **majjhimadhātu,** avasesā tebhūmakadhammā. Uttamaṭṭhena, atappakaṭṭhena ca **paṇītadhātu,** navalokuttaradhammā. (15)

Pañcakāmaguṇā visayabhūtā etassa santīti pañcakāmaguṇiko, kāmarāgo. Rūpārūpabhavesūti rūpārūpūpapattibhavesu yathādhigatesu. Anadhigatesu pana so patthanā nāma hotīti "bhavavasena patthanā"ti imināva gahito. Jhānanikantīti rūpārūpajjhānesu nikanti. Bhavavasena patthanāti bhavesu patthanāti. Evaṁ catūhipi padehi yathākkamaṁ mahaggatūpapattibhavavisayā, mahaggatakammabhavavisayā, bhavadiṭṭhisahagatā, bhavapatthanābhūtā ca taṇhā "bhavataṇhā"ti vuttā. Vibhavadiṭṭhi vibhavo uttarapadalopena, vibhavasahagatā taṇhā vibhavataṇhā. Rūpādipañcavatthu kāmavisayā balavarāgabhūtā taṇhā kāmataṇhāti paṭhamanayo,

"sabbepi tebhūmakadhammā kāmanīyaṭṭhena kāmā"ti¹ vacanato te ārabbha pavattā diṭṭhivippayuttā sabbāpi taṇhā **kāmataṇhā**ti dutiyanayoti ayametesaṁ viseso. (16)

Abhidhamme panāti pana-saddo visesatthajotano, tena pañcakāmaguņikarāgato aññopi kāmāvacaradhammavisayo lobho abhidhamme² "kāmataṇhā"ti āgatoti imaṁ visesaṁ joteti. Tikantarampi samānaṁ taṇhaṁyeva nissāya pavattitadesanānantaratāya taṁ "vāro"ti vattabbataṁ arahatīti "iminā vārenā"ti vuttaṁ. Iminā vārenāti iminā pariyāyenāti attho. Rajanīyaṭṭhenāti kāmanīyaṭṭhena. Pariyādiyitvāti pariggahetvā. Tatoti kāmataṇhāya. Nīharitvāti niddhāretvā. Itarā dve taṇhāti rūpataṇhaṁ, arūpataṇhañca dasseti, etena "kāmataṇhā"ti sādhāraṇavacanametaṁ sabbassapi lobhassa, tassa pana "rūpataṇhā arūpataṇhā"ti visesavacanaṁ yathā kāmaguṇikarāgo rūparāgo arūparāgoti dasseti. Nirodhataṇhāti bhavanirodhe bhavasamucchede taṇhā. Yasmā hi ucchedadiṭṭhi manussattabhāve, kāmāvacaradevattabhāve, rūpāvacara-arūpāvacarattabhāve ṭhitassa attano sammā samucchedo hotīti bhavanirodhaṁ ārabbha pavattati, tasmā taṁsahagatāpi taṇhā tameva ārabbha pavattīti. (17, 18)

Vaṭṭasminti tividhepi vaṭṭe. Yathā tehi nissaritum appadānavasena kammavipākavaṭṭe tamsamangisattam tesam parāparuppattiyā paccayabhāvena samyojenti, evam kilesavaṭṭepīti. Satīti paramatthato vijjamāne. Rūpādibhedeti rūpavedanādivibhāge. Kāyeti khandhasamūhe. Vijjamānāti satī paramatthato upalabhamānā. Diṭṭhiyā parikappito hi attādi paramatthato natthi, diṭṭhi pana ayam atthevāti. Vicinantoti dhammasabhāvam vīmamsanto. Kicchatīti kilamati. Parāmasatīti parato āmasati. "Sīlena suddhi, vatena suddhī"ti gaṇhanto hi visuddhimaggam atikkamitvā tassa parato āmasati nāma. Vīsativatthukā diṭṭhīti rūpādidhamme, paccekam te vā nissitam, tesam vā nissayabhūtam, sāmibhūtam vā katvā parikappanavasena pavattiyā vīsativatthukā attadiṭṭhi vīsati. Vimatīti

dhammesu sammā, micchā vāmananābhāvato samsayitaṭṭhena amati, appaṭipajjananti attho. **Vipariyāsaggāho**ti asuddhimagge "suddhimaggo"ti viparītaggāho. (19)

Cirapārivāsiyatthenāti ciraparivutthatāya purānabhāvena.

Āsavanaṭṭhenāti sandanaṭṭhena, pavattanaṭṭhenāti attho. Savatīti pavattati. Avadhi-attho ā-kāro, avadhi ca mariyādābhividhibhedato duvidho. Tattha mariyādo kiriyam bahi katvā pavattati yathā "ā pāṭaliputtā vuṭṭho devo"ti. Abhividhi kiriyam byāpetvā pavattati yathā "ā bhavaggā bhagavato yaso pavatto"ti. Abhividhi-attho ayamākāro veditabbo.

Katthaci dve āsavā āgatāti vinayapāļim¹ sandhāyāha. Tattha hi "diṭṭhadhammikānam āsavānam samvarāya, samparāyikānam āsavānam paṭighātāyā"ti¹ dvidhā āsavā āgatāti. Katthacīti tikanipāte āsavasutte², añnesu ca saļāyatanasuttādīsu³. Saļhāyatanasuttesupi hi "tayome āvuso āsavā kāmāsavo bhavāsavo avijjāsavo"ti tayo eva āgatāti. Nirayam gamentīti nirayagāminīyā. Yasmā idha sāsavam kusalākusalam kammam āsavapariyāyena desitam, tasmā pañcagatisamvattanīyabhāvena āsavā āgatā. Imasmim sangītisutte tayo āgatāti. Ettha yasmā añnesu ca ā bhavaggam ā gotrabhum pavattantesu mānādīsu vijjamānesu attattaniyādiggāhavasena, abhibyāpanamadakaraṇavasena āsavasadisatā ca etesamyeva, na añnesam, tasmā etesveva āsava-saddo niruļho daṭṭhabbo. Na cettha "diṭṭhāsavo nāgato"ti cintetabbam bhavataṇhāya, bhavadiṭṭhiyāpi bhavāsavaggahaṇeneva gahitattā. Kāmāsavo nāma kāmanaṭṭhena, āsavanaṭṭhena ca. Vuttāyeva atthato ninnānākaranato. (20, 21)

Kāme esati gavesati etāyāti **kāmesanā**, kāmānam abhipatthanāvasena, pariyeṭṭhivasena, paribhuñjanavasena vā pavattarāgo. **Bhavesanā** pana bhavapatthanā, bhavābhiratibhavajjhosānavasena pavattarāgo.

Diṭṭhigatikasammatassāti aññatitthiyehi parikappitassa

^{1.} Vi 1. 24 pitthe. 2. Khu 1. 228 pitthe Itivuttake; Sam 3. 52 pitthe āsavasuttepi.

^{3.} Sam 2. 450 pitthe.

sambhāvitassa ca. **Brahmacariyassā**ti tapopakkamassa. **Tadekaṭṭhan**ti tāhi rāgadiṭṭhīhi sahajekaṭṭhaṁ. **Kamman**ti akusalakammaṁ. Tampi hi kāmādike nibbattanādhiṭṭhānādivasena pavattaṁ "esatī"ti vuccati. **Antaggāhikā diṭṭhī**ti nidassanamattametaṁ. Yā kāci pana micchādiṭṭhi tapopakkamahetukā **brahmacariyesanā** eva. (22)

Ākārasaņṭhānanti visiṭṭhākārāvaṭṭhānam. Kathaṁvidhanti hi kena pakārena saṇṭhitaṁ, samavaṭṭhitanti attho. Saddatthato pana vidahanaṁ visiṭṭhākārena avaṭṭhānaṁ vidhā, vidhīyati visadisākārena ṭhapīyatīti vidhā, koṭṭhāso. Vidahanato hīnādivasena vividhenākārena dahanato upadhāraṇato vidhā, mānova. Seyyasadisahīnānaṁ vasenāti seyyasadisahīnabhāvānaṁ yāthāvā'yāthāvabhūtānaṁ¹ vasena. Tayo mānā vuttā seyyasseva uppajjanakā. Esa nayo sadisahīnesupi. Tenāha "ayañhi māno"ti-ādi. Idāni yathā-uddiṭṭhe navavidhepi māne vatthuvibhāgena dassetuṁ "tatthā"ti-ādi vuttaṁ. Rājūnañcepa pabbajitānañca uppajjati. Kasmā? Te visesato attānaṁ seyyato dahantīti. Idāni tamatthaṁ vitthārato dassenti "rājā hī"ti-ādimāha. Ko mayā sadiso atthīti ko-saddo paṭikkhepatto, añño sadiso natthīti adhippāyo. Etesaṁyevāti rājūnaṁ, pabbajītānañca. Uppajjati seṭṭhavatthukattā tassa. "Hīnohamasmī"ti mānepi esevanayo.

"Ko mayā sadiso añño rājapuriso atthī"ti vā "mayham aññehi saddhim kim nānākaraṇan"ti vā "amaccoti nāmameva -pa- nāmāhan"ti vāti sadisassa seyyamānādīnam tiṇṇam pavatti-ākāradassanam.

Dāsādīnanti ādisaddena bhatikakammakarādīnam parādhīnavuttikānam gahaṇam. Ādi-saddena vā gahite eva "pukkusacaṇḍālādayopī"ti sayameva dasseti. Nanu ca māno nāmāyam sampaggaharaso, so katham omāne sambhavatīti? Sopi avakaraṇamukhena vidhānavatthunā paggaṇhanavaseneva pavattatīti nāyam virodho. Tenevāha "kim dāso nāma ahanti ete māne karotī"ti. Tathā hissa yāthāvamānatā vuttā.

Yāthāvamānā bhavanikanti viya, attadiṭṭhi viya ca na mahāsāvajjā, tasmā te na apāyagamanīyā. Yathābhūtavatthukatāya hi te yāthāvamānā. "Arahattamaggavajjhā"ti ca tassa anavasesappahāyitāya vuttam. Dutiyatatiyamaggehi ca te yathākkamam pahīyanti, ye oļārikatarā, oļārikatamā ca. Māno hi "ahamasmī"ti pavattiyā uparimaggesu sammādiṭṭhiyā ujuvipaccanīko hutvā pahīyati. Ayāthāvamānā nāma ayathābhūtavatthukatāya, teneva te mahāsāvajjabhāvena pathamamaggavajjhā vuttā. (23)

Atati satatam gacchati pavattatīti addhā, kāloti āha "tayo addhāti tayo **kālā**"ti. **Suttantapariyāyenā**ti bhaddekarattasuttādīsu¹ āgatanayena. Tattha hi "yo cāvuso mano, ye ca dhammā, ubhayametam paccuppannam, tasmim ce paccuppanne chandarāgapatibaddham hoti viññānam, chandarāgapatibaddhattā viññānassa tadabhinandati, tadabhinandanto paccuppannesu dhammesu samhīratī"ti¹ addhāpaccuppannam sandhāya evam vuttam. Tenāha "paţisandhito pubbe"ti-ādi. Tadantaranti tesam cutipațisandhīnam vemajiham paccuppanno addhā, yo pubbantāparantānam vemajihatāya "pubbantāparante kankhati², pubbantāparante aññānan"ti³ evamādīsu "pubbantāparanto"ti ca vuccati. Bhango dhammo atītamsena sangahitoti āha "bhangato uddham atīto addhā nāmā"ti. Tathā anuppanno dhammo anagatamsena sangahitoti aha "uppadato pubbe anagato addha nāmā"ti. Khanattayeti uppādo, thiti, bhangoti tīsu khanesu. Yadā hi dhammo hetupaccayassu samavāye uppajjati, yadā ca veti, iti dvīsupi khanesu thitikkhane viya paccuppannoti. Dhammanañhi pākabhāvūpādhikam pattabbam udayo, viddhamsabhāvūpādhikam vayo, tadubhayavemajjham thiti. Yadi evam addhā nāmāyam dhammo eva āpannoti? Na dhammo, dhammassa pana avatthābhedo, tañca upādāya loke kālasamaññāti dassetum "atītādibhedo ca nāma ayan"ti-ādi vuttam. Idhāti imasmim loke. Teneva vohārenāti tam tam avatthāvisesam upādāya dhammo "atīto anāgato paccuppanno"ti yena

vohārena voharīyati, dhammappavattimattatāya hi paramatthato avijjamānopi kālo tasseva dhammassa pavatti-avatthāvisesam upādāya teneva vohārena "atīto addhā"ti-ādinā vutto. (24)

Anta-saddo loke pariyosāne, koṭiyaṁ niruļhoti tadatthaṁ dassento "antoyeva anto"ti āha, koṭi antoti attho. Parabhāgoti pārimanto. Amati gacchati bhavappabandho niṭṭhānaṁ etthāti anto, koṭi. Amanaṁ niṭṭhānagamananti anto, osānaṁ. So pana "esevanto dukkhassā"ti¹ vuttattā dukkhaṇṇavassa pārimantoti āha "parabhāgo"ti. Ammati paribhuyyati hīṭīyatīti anto, lāmako. Ammati bhāgaso ñāyatīti anto, aṁsoti āha "koṭṭhāso anto"ti. Santo paramatthato vijjamāno kāyo dhammasamūhoti sakkāyo, khandhā, te pana ariyasaccabhūtā idhādhippetāti vuttaṁ "pañcupādānakkhandhā"ti. Purimataṇhāti yesaṁ nibbattikā, tannibbattito pageva siddhā taṇhā. Appavattibhūtanti nappavattati tadubhayaṁ etthāti tesaṁ appavattiṭṭhānabhūtaṁ. Yadi "sakkāyo anto"ti-ādinā aññamaññaṁ vibhattitāya dukkhasaccādayo gahitā, atha kasmā maggo na gahitoti āha "maggo panā"ti-ādi. Tattha upāyattāti upāyabhāvato, sampāpakahetubhāvatoti attho.

Yadi pana hetumantaggahaṇeneva hetu gahito hoti, nanu evam sakkāyaggahaṇeneva tassa hetubhūto sakkāyasamudayo gahito hotīti? Tassa gahaṇe saṅkhataduko viya, sappaccayaduko viya ca dukovāyam āpajjati, na tiko. Yathā pana sakkāyam gahetvā sakkāyasamudayopi gahito, evam sakkāyanirodham gahetvā sakkāyanirodhupāyo gayheyya, evam sati catukko ayam āpajjeyya, na tiko, tasmā hetumantaggahaṇena hetuggahaṇam na cintetabbam. Ayam panettha adhippāyo yutto siyā—idha sakkāyasakkāyasamudayā anādikālikā, asati maggabhāvanāyam paccayānuparamena apariyantā ca, nibbānam pana appaccayattā attano niccatāya eva sabbadābhāvīti anādikāliko, apariyanto ca. Iti imāni tīṇi saccāni mahāthero imāya sabhāgatāya "tayo antā"ti tikam katvā

dasseti. Ariyamaggo pana kadāci karahaci labbhamāno na tathāti tassa ativiya dullabhapātubhāvataṁ dīpetuṁ tikato bahikatoti ayamettha attanomati. (25)

Dukkhatāti dukkhabhāvo, dukkhamyeva vā yathā devo eva devatā. Dukkha-saddo cāyam adukkhasabhāvesupi sukhupekkhāsu kañci aniṭṭhatāvisesam upādāya pavattatīti tato nivattento sabhāvadukkhavācinā ekena dukkha-saddena visesetvā "dukkhadukkhatā"ti āha. Bhavati hi ekantato tamsabhāvepi atthe aññassa dhammassa yena kenaci sadisatālesena byabhicārāsankāti visesitabbatā yathā "rūparūpam¹, tilatelan"ti² ca. Sankhārabhāvenāti sankhatabhāvena. Paccayehi sankharīyantīti sankhārā, adukkhamasukhavedanā. Sankhariyamānattā eva hi asārakatāya paridubbalabhāvena bhangabhangābhimukhakkhaņesu viya attalābhakkhaņepi vibādhappattā eva hutvā sankhārā pavattantīti āha "sankhatattā uppādajarābhangapīļitā"ti. Tasmāti yathāvuttakāraṇato. Aññadukkhasabhāvavirahatoti

dukkhadukkhatāvipariṇāmadukkhatāsaṅkhātassa aññassa dukkhasabhāvassa abhāvato. Vipariṇāmeti pariṇāme, vigameti attho. Tenāha papañcasūdaniyaṁ "vipariṇāmadukkhāti natthibhāvo dukkhan"ti. Apariññātavatthukānañhi sukhavedanuparamo dukkhato upaṭṭhāti, svāyamattho piyavippayogena dīpetabbo. Tenāha "sukhassa hī"ti-ādi. Pubbe vuttanayo padesanissito vedanāvisesamattavisayattāti anavasesato saṅkhāradukkhataṁ dassetuṁ "apicā"ti dutiyanayo vutto. Nanu ca "sabbe saṅkhārā dukkhā"ti³ vacanato sukhadukkhavedanānampi saṅkhāradukkhatā āpannāti? Saccametaṁ, sā pana sāmaññajotanā-apavādabhūtena itaradukkhatāvacanena nivattīyatīti nāyaṁ virodho. Tenevāha "ṭhapetvā

Micchāsabhāvoti "hitasukhāvaho me bhavissatī"ti evam āsīsitopi tathā abhāvato, asubhādīsuyeva "subhan"ti-ādiviparītappavattito ca micchāsabhāvo, musāsabhāvoti attho. Mātughātakādīsu pavattamānāpi hi hitasukham icchantāva pavattantīti

dukkhavedanam sukhavedananca"ti. (27)

^{1.} Abhidhammatthasangaha-atthakathāyam rūpaparicchede rūpasamuddese.

^{2.} Abhi-Ttha 2. 21 pitthe.

^{3.} Khu 1. 53 pitthe Dhammapade.

te dhammā "hitasukhāvahā me bhavissantī"ti āsīsitā honti. Tathā asubhāsukhāniccānattesu subhādivipariyāsadalhatāya ānantariyakammaniyatamicchāditthīsu pavatti hotīti te dhammā asubhādīsu subhādiviparītappavattikā honti. Vipākadāne sati khandhabhedānantarameva vipākadānato **niyato**, micchatto ca so niyato cāti **micchattaniyato**. Anekesu ānantariyesu katesu yam tattha balavam, tam vipaccati, na itarānīti ekantavipākajanakatāya niyatatā na sakkā vattunti "vipākadāne satī"ti vuttam. Khandhabhedanantaranti cuti-anantaranti attho. Cuti hi marananiddese "khandhānam bhedo"ti¹ vuttā, etena vacanena sati phaladāne cuti-anantaro eva etesam phalakalo, na aññoti phalakalaniyamena niyatata vuttā hoti, na phaladānaniyamenāti niyataphalakālānam añnesampi upapajjavedanīyānam, ditthadhammavedanīyānampi niyatatā āpajjati, tasmā vipākadhammadhammānam paccayantaravikalatādīhi avipaccamānānampi attano sabhāvena vipākadhammatā viya balavatā ānantariyena vipāke dinne avipaccamānānampi ānantariyānam phaladāne niyatasabhāvā, ānantariyasabhāvā ca pavattīti attano sabhāvena phaladānaniyameneva niyatatā, ānantariyatā ca veditabbā. Avassañca niyatasabhāvā, ānantariyasabhāvā ca tesam pavattīti sampaticchitabbametam aññassa balavato ānantariyassa abhāve cuti-anantaram ekantena phaladānato.

Nanu evam aññesampi upapajjavedanīyānam aññasmim vipākadāyake asati cuti-anantarameva ekantena phaladānato ānantariyasabhāvā, niyatasabhāvā ca pavatti āpajjatīti? Nāpajjati asamānajātikena cetopaṇidhivasena, upaghātakena ca nivattetabbavipākattā anantarekantaphaladāyakattābhāvā, na pana ānantariyānam paṭhamajjhānādīnam dutiyajjhānādīni viya asamānajātikam phalanivattakam atthi sabbānantariyānam avīciphalattā, na ca heṭṭhūpapattim icchato sīlavato cetopaṇidhi viya uparūpapattijanakakammabalam ānantariyabalam nivattetum samattho cetopaṇidhi atthi anicchantasseva avīcipātanato, na ca ānantariyupaghātakam kiñci kammam atthi. Tasmā tesamyeva anantarekantavipākajanakasabhāvā pavattīti.

Anekāni ca ānantariyāni katāni ekante vipāke niyatattā uparatāvipaccanasabhāvāsaṅkattā nicchitāni sabhāvato niyatāneva. Cutianantaraṁ pana phalaṁ **anantaraṁ** nāma, tasmiṁ anantare niyuttāni tannibbattanena anantarakaraṇasīlāni, anantarapayojanāni cāti sabhāvato **ānantariyāneva** ca honti. Tesu pana samānasabhāvesu ekena vipāke dinne itarāni attanā kātabbakiccassa teneva katattā na dutiyaṁ, tatiyañca paṭisandhiṁ karonti, na samatthatāvighātattāti natthi tesaṁ niyatānantariyatānivattīhi. Na hi samānasabhāvaṁ samānasabhāvassa samattataṁ vihanatīti. Ekassa pana aññānipi upatthambhakāni hontīti daṭṭhabbānīti. **Sammāsabhāve**ti saccasabhāve. Niyato ekantiko anantarameva phaladānenāti **sammattaniyamato. Na niyato**ti ubhayathāpi na niyato. **Avasesānaṁ dhammānan**ti

kilesānantariyakammaniyyānikadhammehi aññesam dhammānam. (28)

Tamandhakāroti tamo andhakāroti padavibhāgo. Avijjā tamo nāma ārammaṇassa chādanaṭṭhena. Tenevāha "tamo vihato, āloko uppanno¹, tamokkhandho padālito"ti² ca ādi. Avijjāsīsena vicikicchā vuttā mahatā sammohena sabbakālaṁ aviyujjanato. Āgammāti patvā. Kaṅkhatīti "ahosiṁ nu kho ahaṁ atītamaddhānan"ti-ādinā³ kaṅkhaṁ uppādeti saṁsayaṁ āpajjati. Adhimuccituṁ na sakkotīti pasādādhimokkhavasena adhimuccituṁ na sakkotī. Tenāha "na sampasīdatī"ti. Yāvattakañhi yasmiṁ vatthusmiṁ vicikicchā na vigacchāti, tāva tattha saddhādhimokkho anavasarova. Na kevalaṁ saddhādhimokkho, nicchayādhimokkhopi tattha na patiṭṭhahati eva. (29)

Na rakkhitabbānīti "imāni mayā rakkhitabbānī"ti evam katthaci rakkhākiccam natthi parato rakkhitabbasseva abhāvato. Satiyā eva rakkhitānīti muṭṭhassaccassa bodhimūle eva savāsanam samucchinnattā satiyā rakkhitabbāni nāma sabbadāpi rakkhitāni eva. Natthi tathāgatassa kāyaduccaritanti tathāgatassa kāyaduccaritam nāma nattheva, yato suparisuddho kāyasamācāro bhagavato. No aparisuddhā, parisuddho eva aparisuddhihetūnam kilesānam pahīnattā. Tathāpi vinaye apakatañnutāvasena

siyā tesam apārisuddhileso, na bhagavatoti dassetum "na panā"ti-ādi vuttam. Tattha vihārakāram āpattinti ekavacanavasena "āpattiyo"ti ettha āpattisaddam ānetvā yojetabbam. Abhidheyyānurūpañhi lingavacanāni honti. Ese nayo sesesupi. "Manodvāre"ti idam tassā āpattiyā akiriyasamuṭṭhānatāya vuttam. Na hi manodvāre paññattā āpatti atthīti. Sa-upārambhavasenāti savattabbatāvasena, na pana duccaritalakkhaṇāpattivasena, yato nam bhagavā paṭikkhipati yathā āyasmato mahākappinassāpi "gaccheyyam vāham uposatham, na vā gaccheyyam. Gaccheyyam vāham saṃghakammam, na vā gaccheyyam"ti¹ parivitakkitam. Manoduccaritanti manodvārikam appasattham caritam. Satthārā appasatthatāya hi tam duccaritam nāma jātam, na sabhāvato.

Yasmā mahākāruṇiko bhagavā sadevakassa lokassa hitasukhāya eva paṭipajjamāno accantavivekajjhāsayatāya tabbidhuram dhammasenāpatino cittuppādam paṭikkhipanto "na kho te -pa- uppādetabban"ti avoca, tasmā so therassa cittuppādo bhagavato na pāsamsoti katvā, manoduccaritam nāma jāto, tassa ca paṭikkhepo upārambhoti āha "tasmim manoduccarite upārambham āropento"ti. Bhagavato pana ettakampi² natthi, yato pavāraṇāsutte "handa dāni bhikkhave pavāremi vo, na ca me kiñci garahatha kāyikam vā vācasikam vā"ti³ vutto bhikkhusamgho "na kho mayam bhante bhagavato kiñci garahāma kāyikam vā vācasikam vā"ti satthu parisuddhakāyasamācārādikam sirasā sampaṭicchi⁴. Ayañhi lokanāthassa duccaritābhāvo Bodhisattabhūmiyampi cariyācirānugato ahosi, pageva buddhabhūmiyanti dassento "anacchariyancetan"ti-ādimāha.

Buddhānamyeva dhammā guṇā, na aññesanti buddhadhammā. Tathā hi te buddhānam āveṇikadhammāti vuccanti. Tattha "natthi tathāgatassa kāyaduccaritan"ti-ādinā kāyavacīmanoduccaritābhāvavacanam yathādhikāram kāyakammādīnam ñāṇānuparivattitāya laddhaguṇakittanam, na āveṇikadhammantaradassanam. Sabbasmiñhi kāyakammādike ñāṇānuparivattini kuto kāyaduccaritādīnam sambhavo. "Buddhassa appaṭihatañāṇan"ti-ādinā vuttāni sabbaññutaññāṇato

^{1.} Vi 3. 143 pitthe.

^{3.} Sam 1. 192 pitthe.

^{2.} Ettakam nāma (Aṭṭhakathāyam)

^{4.} Sampaticchamsu (Ka)

visumyeva tīņi ñāṇāni catuyonipañcagatiparicchedakañāṇāni viyā"ti vadanti. Ekamyeva hutvā tīsu kālesu appaṭihatañāṇam nāma sabbaññutaññāṇameva. Natthi chandassa hānīti sattesu hitachandassa hāni natthi. Natthi vīriyassa hānīti khemapavivekavitakkānugatassa vīriyassa hāni natthi. "Natthi davāti khiḍḍādhippāyena kiriyā natthi. Natthi ravāti sahasā kiriyā natthī"ti vadanti, sahasā pana kiriyā davā "aññam karissāmī"ti aññakaraṇam ravā. Khalitanti¹ virajjhanam ñāṇena apphuṭam. Sahasāti vegāyitattam turitakiriyā. Abyāvaṭo manoti niratthako cittasamudācāro. Akusalacittanti aññāṇupekkhamāha, ayañca dīghabhāṇakānam pāṭho ākulo viya. Ayam pana pāṭho anākulo—

Atītamse buddhassa bhagavato appaṭihatañāṇam, anāgatamse, paccuppannamse. Imehi tīhi dhammehi samannāgatassa buddhassa bhagavato sabbam kāyakammam ñāṇapubbangamam ñāṇānuparivatti, sabbam vacīkammam, sabbam manokammam. Imehi chahi dhammehi samannāgatassa buddhassa bhagavato natthi chandassa hāni, natthi dhammadesanāya, natthi vīriyassa, natthi samādhissa, natthi paññāya, natthi vimuttiyā. Imehi dvādasahi dhammehi samannāgatassa buddhassa bhagavato natthi davā, natthi ravā, natthi apphuṭam, natthi vegāyitattam, natthi abyāvatamano, natthi appatisankhānupekkhāti.

Tattha appaţisaṅkhānupekkhāti aññāṇupekkhā. Sesaṁ vuttanayameva. Ettha ca Tathāgatassa ājīvapārisuddhiṁ kāyavacīmanosamācārapārisuddhiyāva saṅgahetvā samācārattayavasena mahātherena tiko desito. (30)

Kiñcanāti kiñcikkhā. Ime pana rāgādayo palibundhanaṭṭhena kiñcanā viyāti **kiñcanā**. Tenāha **"kiñcanāti palibodhā"**ti. (31)

Anudahanaṭṭhenāti anu anu dahanaṭṭhena. Rāgādayo arūpadhammā ittarakkhaṇā kathaṁ anudahantīti āsaṅkaṁ nivattetuṁ "tattha vatthūnī"ti vuttaṁ, daṭṭhabbānīti vacanaseso. Tatthāti tasmiṁ rāgādīnaṁ anudahanaṭṭhe. Vatthūnīti sāsane, loke ca pākaṭattā paccakkhabhūtāni kāraṇāni.

Rāgo uppanno tikhiņakaro hutvā. Tasmā taṁsamuṭṭhānā tejodhātu ativiya tikhiņabhāvena saddhiṁ attanā sahajātadhammehi hadayappadesaṁ jhāpesi yathā taṁ bāhirā tejodhātu sanissayaṁ. Tena sā bhikkhunī supato viya byādhi jhāyitvā matā. Tenāha "teneva jhāyitvā kālamakāsī"ti. Dosassa nissayānaṁ dahanatā pākaṭā evāti itaraṁ dassetuṁ "mohavasena hī"ti-ādi vuttaṁ. Ativattitvāti atikkamitvā. (32)

Kāmam āhuneyyaggi-ādayo tayo aggī brāhmaņehi icchitā santi, te pana tehi icchitamattā, na sattānam tādisā atthasādhakā. Ye pana sattānam atthasādhakā, te dassetum "āhunam vuccatī"ti-ādi vuttam. Tattha ādarena hunanam pūjanam āhunanti sakkāro "āhunan"ti vuccati, tam āhunam arahanti. Tenāha bhagavā "āhuneyyāti bhikkhave mātāpitūnam etam adhivacanan"ti¹. Yadaggena ca te puttānam bahukāratāya āhuneyyāti tesu sammāpaṭipatti nesam hitasukhāvahā, tadaggena tesu micchāpaṭipatti ahitadukkhāvahāti āha "tesu -pa- nibbattantī"ti. Svāyamatthoti yo mātāpitūnam attano upari vippaṭipannānam puttānam anudahanassa paccayabhāvena anudahanaṭṭho, so ayam attho. Mittavindakavatthunāti mittavindakassa nāma mātari vippaṭipannassa purisassa tāya eva vippaṭipattiyā cirataram kāyam āpāyikadukkhānubhavanādīpanena vatthunā veditabbo.

Idāni tamattham kassapassa bhagavato kāle pavattam vibhāvetum "mittavindako hī"ti-ādi vuttam. Dhanalobhena, na dhammacchanenāti adhippāto. Akutobhayam kenaci anuṭṭhāpanīyatāya. Nivāresi samuddapayākā nāma bahvantarāyāti adhippāyena. Antaram katvāti atikkamanavasena dvinnam pādānam antare katvā.

Nāvā aṭṭhāsi tassa pāpakammabalena vātassa avāyanato. Ekadivasam rakkhita-uposathakammānubhāvena sampattim anubhavanto. Yathā purimāhi parato mā agamāsīti vutto, evam aparāparāhipīti āha "tāhi 'parato parato² mā agamāsī'ti vuccamāno"ti. Khuracakkadharanti khuradhārūpamacakkadharam. Ekam purisam. Upaṭṭhāsi pāpakammassa balena.

Catubbhīti catūhi accharāsadisīhi vimānapetīhi, sampattim, anubhavitvāti vacanaseso. Aṭṭhajjhagamāti rūpādikāmaguņehi tato visiṭṭhatarā aṭṭha vimānapetiyo adhigacchi. Atricchanti atricchāsaṅkhātena atilobhena samannāgatattā atra atra kāmaguņe icchanto. Cakkanti khuracakkam. Āsadoti anatthāvahabhāvena āsādeti.

Soti gehasāmiko bhattā. Purimanayenevāti anudahanassa paccayatāya.

Aticārinīti sāmikam atikkamitvā carinī¹ micchācarinī². Rattim dukkhanti attano pāpakammānubhāvasamupaṭṭhitena sunakhena khāditabbatādukkham. Vañcetvāti tam ajānāpetvāva kāraṇaṭṭhānagamanam sandhāya vuttam. Paṭapaṭantīti paṭapaṭā katvā. Anuravadassanañhetam. Muṭṭhiyogo kirāyam tassa sunakhantaradhānassa, yadidam khelapiṇḍam bhūmiyam niṭṭhubhitvā pādena ghamsanam. Tena vuttam "so tathā akāsi. Sunakhā antaradhāyimsū"ti.

Dakkhiṇāti cattāro paccayā diyyamānā dakkhanti etehi hitasukhānīti. Taṁ dakkhiṇaṁ arahatīti dakkhiṇeyyo, bhikkhusaṁgho. Revatīvatthu Vimānavathupetavatthūsu³ tesaṁ aṭṭhakathāyañca āgatanayena veditabbaṁ. (33)

"Tividhena rūpasaṅgaho"ti ettha nanu saṅgaho ekavidhova, so kasmā "catubbidho"ti vuttoti? "Saṅgaho"ti atthaṁ avatvā aniddhāritatthassa saddasseva vuttattā. "Tividhena rūpasaṅgaho"ti-ādīsu⁵ padesu saṅgahasaddo tāva attano atthavasena catubbidhoti ayañhettha attho. Atthopi vā aniddhāritaviseso sāmaññena gahetabbataṁ patto "tividhena rūpasaṅgaho"ti-ādīsu⁵ "saṅgaho"ti vuttoti na koci doso. Niddhārite hi visese tassa ekavidhatā siyā, na tato pubbeti. "Jātisaṅgaho"ti vuttepi jāti-saddassa sāpekkhasaddattā attano jātiyā saṅgahoti ayamattho viññāyateva sambandhārahassa aññassa avuttattā yathā "mātāpitu

^{1.} Caranī (Ka)

^{2.} Micchācāram (Ka)

^{3.} Khu 2. 73, 206 piṭṭhādīsu.

^{4.} Vimāna-Ttha 240; Petavatthu-Ttha 240 pitthesu.

^{5.} Abhi 1. 148 pitthe.

upaṭṭhānan"ti¹. Aṭṭhakathāyaṁ pana yathādhippetamatthaṁ aparipuṇṇaṁ katvā dassetuṁ "jātisaṅgaho"icceva vuttaṁ. Samānajātikānaṁ saṅgaho, samānajātiyā vā saṅgaho sajātisaṅgaho. Sañjāyati etthāti sañjāti, sañjātiyā saṅgaho sañjātisaṅgaho, sañjātidesena saṅgahoti attho. Kiriyāya evarūpāya saṅgaho kiriyāsaṅgaho. Rūpakkhandhagaṇananti "rūpakkhandho"ti gaṇanaṁ saṅkhyaṁ gacchati ruppanasabhāvattā. Tīhi koṭṭhāsehi rūpagaṇanāti vakkhamānehi tīhi bhāgehi rūpassa saṅgaho, gaṇetabbatāti attho.

Rūpāyatanam nipassati paccakkhato vijānātīti nidassanam, cakkhuviññāṇam, nidassatīti vā nidassanam, daṭṭhabbabhāvo, cakkhuviññāṇassa gocarabhāvo, tassa ca rūpāyatanato anaññattepi aññehi dhammehi rūpāyatanam visesetum aññam viya katvā "saha nidassanenāti sanidassanan"ti evamettha attho veditabbo. Dhammasabhāvasāmaññena hi ekībhūtesu dhammesu yo nānattakaro sabhāvo, so añño viya katvā upacaritum yutto. Evañhi atthavisesāvabodho hotīti.

Cakkhupaṭihananasamatthatoti cakkhuno ghaṭṭanasamatthatāla. Ghaṭṭanam viya ca ghaṭṭanam daṭṭhabbam. Dutiyena atthavikappena daṭṭhabbabhāvasaṅkhātam nāssa nidassananti anidassananti yojanā. Etta ca dasannam āyatanānam yathāraham sayam, nissayavasena ca sampattānam, asampattānamca paṭimukhabhāvo aññamaññapatanam paṭihananam, yena byāpārādivikārapaccayantarasannidhāne cakkhādīnam visayesu vikāruppatti. Tattha byāpāro cakkhādīnam savisayesu āvicchannam, rūpādīnam iṭṭhāniṭṭhatā, tattha ca cittassa ābhujananti ime ādi-saddasaṅgahitā. Tehi vikārappattiyā paccayantarabyāpārato aññanti katvā anuggahūpaghāto vikāro. Upanissayo pana appadhānassa paccayo idha gahito. Kāraṇakāraṇampi kāraṇamevāti gayhamāne siyā tassāpi saṅgahoti. Vuttappakāranti "cakkhuviññāṇasaṅkhātan"ti vuttappakāram. Nāssa paṭighoti etthāpi "vuttappakāran"ti ānetvā sambandho. Avasesam solasavidham sukhumarūpam. (34)

Saṅkharontīti sampiṇḍenti. Cetanā hi āyūhanarasatāya yathā sampayuttadhamme yathāsakaṁkiccesu saṁvidahantī viya abhisandahantī

vattamānā teneva kiccavisesena te sampiņdentī viya hoti, evam attano vipākadhammepi paccayasamavāye sankharontī sampiņdentī viya hoti. Tenāha "sahajāta -pa- rāsī karontī"ti. Abhisankharotīti abhivisiṭṭham katvā sankhāroti. Puñnābhisankhāro hi attano phalam itarassa phalato ativiya visiṭṭham bhinnam katvā sankharoti paccayato, sabhāvato, pavatti-ākārato ca sayam itarehi visiṭṭhasabhāvattā. Esa nayo itarehipi.

Pujjabhavaphalanibbattanato, attano santanassa punanato ca puñño.

Mahācittacetanānanti asaṅkhyeyyāyunipphādanādimahānubhāvatāya mahācittesu pavattacetanānam. Aṭṭheva cetanā honti, yā kāmāvacarā kusalā. "Terasapī"ti kasmā vuttam, nanu "navā"ti vattabbam. Na hi bhāvanā ñānarahitā yuttāti anuyogam sandhāyāha "yathā hī"ti-ādi.

Kasiṇaparikammaṁ karontassāti kasiṇesu jhānaparikammaṁ karontassa. "Pathavī pathavī"ti-ādibhāvanā hi kasiṇaparikammaṁ. Tassa hi parikammassa supaguṇabhāvato anuyuttassa tattha ādarākaraṇena siyā ñāṇarahitacittaṁ. jhānapaccavekkhaṇāyapi eseva nayo. Keci mandalakaranampi bhāvanaṁ bhājāpenti.

Dānavasena pavattacittacetasikadhammā **dānaṁ**, tattha byāpārabhūtā āyūhanacetanā dānaṁ ārabbha, dānañca adhikicca uppajjatīti vuttā. Evaṁ itaresupi. **Ayaṁ saṅkhepadesanā**ti ayaṁ puññābhisaṅkhāre saṅkhepato atthadesanā, atthavannanāti attho.

Somanassacittenāti anumodanāpavattidassanamattametam daṭṭhabbam. Upekkhāsahagatenāpi hi anussarati evāti. Kāmam niccasīlam, uposathasīlam, niyamasīlampi sīlameva, paripuṇṇam pana sabbaṅgasampannam sīlam dassetum "sīlapūraṇatthāyā"ti-ādi vuttam. Nayadassanam vā etam, tasmā "niccasīlam, uposathasīlam, niyamasīlam samādiyissāmī"ti vihāram gacchantassa, samādiyitvā samādinnasīle ca tasmim "sādhu suṭṭhū"ti āvajjantassa, tam sīlam sodhentassa ca pavattā cetanā sīlamayāti evamettha yojanā veditabbā.

Pubbe samathavasena bhāvanānayo gahitoti idāni sammayananayena tam dassetum "paṭisambhidāyam vuttenā"ti-ādi vuttam. Tattha aniccatoti aniccabhāvato. Dukkhato, anattatoti etthāpi eseva nayo.

Tattha ye pañcupādānakkhandhā nāmarūpabhāvena pariggahitā, te yasmā dvārārammanehi saddhim dvārappavattadhammavasena vibhāgam labhanti, tasmā dvārachakkādivasena cha chakkā gahitā. Yasmā pana lakkhanesu anattalakkhanam dubbibhāvam¹, tasmā tassa vibhāvanāya cha dhātuyo gahitā. Tato yesu kasiņesu ito bāhirakānam attābhiniveso, tāni imesam jhānānam ārammanabhāvena upatthānākāramattāni, imāni pana tāni jhānānīti dassanattham dasa kasināni gahitāni. Tato dukkhānupassanāya parivārabhāvena patikkūlākāravasena dvattimsa kotthāsā gahitā. Pubbe khandhavasena sankhepato ime dhamma gahita, idani nātisankhepavitthāranayena ca manasi kātabbāti dassanattham dvādasāyatanāni, atthārasa dhātuyo ca gahitā. Tesu ime dhammā satipi suññaniriha-abyāpārabhāve dhammasabhāvato ādhipaccabhāvena pavattantīti anattabhāvavibhāvanattham indriyāni gahitāni. Evam anekabhedabhinnāpi ime dhammā bhūmittayapariyāpannatāya tividhāva hontīti dassanattham tisso dhātuyo gahitā. Etthāvatā nimittam dassetvā pavattam dassetum kāmabhavādayo nava bhavā gahitā. Ettake abhiññeyyavisese pavattamanasikārakosallena sanhasukhumesu nibbattitamahaggatadhammesu manasikāro pavattetabboti dassanattham jhāna-appamaññārūpāni gahitāni. Tattha jhānāni nāma vuttāvasesārammaņāni rūpāvacarajjhānāni. Puna paccayapaccayuppannavibhagato ime dhamma vibhajja manasikatabbati dassanattham paticcasamuppādangāni gahitāni. Paccayākāramanasikāro hi sukhena, sutthutarañca lakkhanattayam vibhāveti, tasmā so pacchato gahito. Evamete sammasanīyabhāvena gahitā khandhādivasena kotthāsato pañcavīsatividhā, pabhedato pana atītādibhedam anāmasitvā gayhamānā dvīhi ūnāni dvesatāni honti. Idam tāvettha pāļivavatthānam, atthavicāram pana icchantehi paramatthamañjūsāyam

visuddhimaggasamvannanāyam²vuttanayeneva veditabbam.

Na puññoti **apuñño.** Tassa puñña-sadde vuttavipariyāyena attho veditabbo. Santānassa iñjanahetūnam nīvaraṇādīnam suvikkhambhanato rūpataṇhāsaṅkhātassa iñjitassa abhāvato **aniñjam**, aniñjameva "āneñjan"ti vuttam. Tathā hi rūpārammaṇam rūpanimittārammaṇam sabbampi catutthajjhānam nippariyāyena "āneñjan"ti vuccati. (35)

Cattāro maggatthā, hetthimā tayo phalatthāti evam sattavidho. Tisso sikkhāti adhisīlādikā tisso sikkhā. Tāsu jātoti vā sekkho, ariyapuggalo hi ariyāya jātiyā jāyamāno sikkhāsu jāyati, na voniyam. Sikkhanasīloti vā **sekkho.** Puggalādhitthānāya vā kathāya sekkhassa ayanti aññāsādhāranamaggaphalattayadhammā sekkhapariyāyena vuttā. **Asekkho**ti ca yattha sekkhabhāvāsankā atthi, tatthāyam patisedhoti lokiyanibbānesu asekkhabhāvānāpatti datthabbā. Sīlasamādhipaññāsankhātā hi sikkhā attano patipakkhakilesehi vippamuttā parisuddhā upakkilesānam ārammanabhāvampi anupagamanato, etā "sikkhā"ti vattum yuttā-atthasupi maggaphalesu vijjanti, tasmā catumaggahetthimaphalattayasamangino viya arahattaphalasamangīpi tāsu sikkhāsu jātoti ca tamsamangino arahato itaresam viya sekkhatte sati sekkhassa ayanti ca sikkhā sīlam etassāti ca "sekkho"ti vattabbo siyati tannivattanattham asekkhoti yathāvuttasekkhabhāvapaţisedho kato. Arahattaphale hi pavattamānā sikkhā parinitthitasikkhākiccattā na sikkhākiccam karonti, kevalam sikkhāphalabhāveneva pavattanti, tasmā na tā sikkhāvacanam arahanti, nāpi tamsamangī sekkhavacanam, na ca "sikkhanasīlo, sikkhāsu jāto"ti ca vattabbasam arahati. Hetthimaphalesu pana sikkhā sakadāgāmimaggavipassanādīnam upanissayabhāvato sikkhākiccam karontīti sikkhāvacanam arahanti, tamsamangino ca sekkhavacanam, "sikkhanasīlā, sikkhāsu jātā"ti ca vattabbatam arahanti.

"Sikkhatīti sekkho"ti ca apariyositasikkho dassitoti. Anantarameva "khīṇāsavo"ti-ādim vatvā "na sikkhatīti¹ asekkho"ti vuttattā pariyositasikkho dassito, na sikkhārahito tassa tatiyapuggalabhāvena gahitattā. Vuddhippattasikkho vā asekkhoti

etasmim atthe sekkhadhammesu eva ţhitassa kassaci ariyassa asekkhabhāvāpattīti arahattamaggadhammā vuddhippattā, yathāvuttehi ca atthehi sekkhoti katvā tamsamangino aggamaggatthassa asekkhabhāvo āpannoti? Na tamsadisesu tabbohārato. Arahattamaggato hi ninnānākaraṇam arahattaphalam ṭhapetvā pariññādikiccakaraṇam, vipākabhāvañca, tasmā te eva sekkhadhammā "aggaphaladhammabhāvam āpannā"ti sakkā vattum, kusalasukhato ca vipākasukham santataratāya paṇītataranti, vuddhippattā ca te dhammā hontīti tamsamangī "asekkho"ti vuccatīti. (36)

Jātimahallakoti jātiyā vuḍḍhataro addhagato vayo-anuppatto. So hi rattaññutāya yebhuyyena jātidhammakuladhammapadesu thāvariyappattiyā jātithero nāma. Therakaraṇā dhammāti sāsane thirabhāvakarā guṇā paṭipakkhanimmadanakā. Theroti vakkhamānesu dhammesu thirabhāvappatto. Sīlavāti pāsamsena sātisayena sīlena samannāgato, sīlasampannoti attho, etena dussīlyasankhātassa bālyassa abhāvamāha. Suttageyyādi bahu sutametenāti bahussuto, etenāssa sutavirahasankhātassa bālyassa abhāvam, paṭisankhānabalena ca patiṭṭhitabhāvam vadati. "Catunnam jhānānam lābhī"ti iminā nīvaraṇādisankhātassa bālyassa abhāvam, bhāvanābalena ca patiṭṭhitabhāvam katheti. "Āsavānam khayā"tiādinā avijjāsankhātassa bālyassa sabbaso abhāvam, khīṇāsavattherabhāvena patiṭṭhitabhāvancassa dasseti. Na cettha samudāye vākyaparisamāpanam, atha kho paccekam vākyaparisamāpananti dassento "evam vuttesu dhammesū"ti-ādimāha. Theranāmako vā "thero"ti evamnāmako vā. (37)

Anuggahavasena, pūjāvasena vā attano santakam parassa dīyati etenāti dānam, pariccāgacetanā. Dānameva dānamayam. Padapūraņamattam mayasaddo. Puññañca tam yathāvuttena kiriyā ca kammabhāvatoti puññakiriyā. Paresam piyamanāpatāsevanīyatādīnam ānisamsānam. Pubbe -pavasenevāti sankhārattite¹

vuttadānamayasīlamayabhāvanāmayacetanāvaseneva. Imāni veditabbānīti sambandho. **Etthā**ti etesu puññakiriyavatthūsu. **Kāyena karontassā**ti attano kāyena

pariccāgapayogam pavattentassa. Tadatthanti dānattham. "Imam deyyadhammam dehī"ti vācam nicchārentassa. Dānapāramim āvajjetvā vāti yathā kevalam "annadānādīni demī"ti dānakāle tam dānamayam puññakiriyavatthu hoti, evam "imam dānamayam sammāsambodhiyā paccayo hotū"ti dānapāramim āvajjetvā dānakālepi dānasīseneva pavattitatā. Vattasīse ṭhatvāti "etam dānam nāma mayham kulavamso kulatanti kulapavenī kulacārittan"ti cārittasīle ṭhatvā dadato cārittasīlamayam. Yathā deyyadhammapariccāgavasena pavattamānāpi dānacetanā vattasīse ṭhatvā dadato sīlamayam puññakiriyavatthu hoti pubbābhisankhārassa, aparabhāgacetanāya ca tathā pavattattā, evam deyyadhamme khayato, vayato sammasanam paṭṭhapetvā dadato bhāvanāmayam puññakiriyavatthu hoti pubbabhāgacetanāya, deyyadhamme aparabhāgacetanāya ca tathā pavattattā.

Apacīticetanā apacitisahagatam apacīyati etāyāti yathā nandīrāgo eva nandīrāgasahagatā, yathāvuttāya vā apacitiyā sahagatam sahapavattanti apacitisahagatam. Apacāyanavasena pavattam puññakiriyavatthu. Vayasā, guņehi ca vuḍḍhatarānam vattapaṭipattīsu byāvaṭo hoti yāya cetanāya, sā veyyāvaccam, veyyāvaccameva veyyāvaccasahagatam.

Veyyāvaccasankhātāya vā vattapaṭipattiyā samuṭṭhāpanavaseneva sahagatam pavattanti veyyāvaccasahagatam, tathāpavattam puññakiriyavatthu. Attano santāne pattam puññam anuppadīyati etenāti pattānuppadānam. Tathā parena anuppadinnatāya pattam abbhanumodati etenāti pattabbhanumodanam. Ananuppadinnam pana kevalam abbhanumodīyati etenāti abbhanumodanam. Dhammam deseti etāyāti desanā, desanāva desanāmayam. Suṇāti etenāti savanam, savanameva savanamayam. Diṭṭhiyā ñāṇassa ujugamanam diṭṭhijugatam. Sabbattha "puññakiriyavatthū"ti padam apekkhitvā napumsakalingatā.

Pūjāvasena sāmīcikiriyā apacāyanam **apaciti.** Vayasā, guņehi ca jeṭṭhānam, gilānānañca tamtamkiccakaraṇam **veyyāvaccam**. Ayametesam visesoti āha "tatthā"ti-ādi. Cattāro paccaye datvā sabbasattānanti ca ekadesato ukkaṭṭhaniddeso, yam kiñci deyyadhammam datvā, puññam vā katvā "katipayānam, ekasseva vā patti hotū"ti pariṇāmanampi pattānuppadānameva. Tam na mahapphalam tanhāya parāmatthattā. Paresam

deseti hitapharaṇena muducittenāti ānetvā sambandhitabbaṁ. **Evan**ti evamimaṁ dhammaṁ sutvā bahussuto hutvā pare dhammadesanāya anuggaṇhissāmīti **hitapharaṇena muducittena dhammaṁ suṇāti.** Evañhissa savanaṁ attano, paresañca sammāpaṭipattiyā paccayabhāvato mahapphalaṁ bhavissatīti. **Sabbesan**ti sabbesampi dasannaṁ puññakiriyavatthūnaṁ. **Niyamalakkhaṇan**ti mahapphalabhāvassa niyāmakasabhāvaṁ. **Diṭṭhiyā ujubhāvenevā**ti "atthi, natthī"ti antadvayassa durasamussāritatāya "atthi dinnan"ti-ādi¹ nayappavattāya sammādiṭṭhiyā ujukameva pavattiyā. Dānādīsu hi yaṁ kiñci imāya eva sammādiṭṭhiyā parisodhitaṁ mahājutikaṁ mahāvipphāraṁ bhavati.

Purimeheva tīhīti pāļiyam āgateheva tīhi. Sīlamaye puññakiriyavatthumhi saṅgahaṁ gacchanti cārittasīlabhāvato. Dānamaye saṅgahaṁ gacchanti dānasabhāvattā, dānavisayattā ca. Kāmaṁ desanā dhammadānasabhāvato dānamaye saṅgahaṁ gacchatīti vattuṁ yuttā, kusaladhammāsevanabhāvato pana vimuttāyatanasīse ṭhatvā pavattitā viya savanena saddhiṁ bhāvanāmaye saṅgahaṁ gacchantīti vuttaṁ. "Diṭṭhijugataṁ bhāvanāmaye"ti keci, diṭṭhijugate eva ca attanā katassa puññassa anussaraṇaṁ, tassa ca paresaṁ atthāyapariṇāmanaṁ, guṇapasaṁsā, aññehi kariyamānāya puññakiriyāya, sammāpaṭipattiyā ca anumodanaṁ saraṇagamananti evamādayo puññavisesā saṅgahaṁ gacchanti diṭṭhijukammavaseneva tesaṁ ijjhanato. (38)

Parassa paṭipattiyā sodhanattho anuyogo codanā, sā yāni nissāya pavattati, tāni codanāvatthūni diṭṭhasutaparisaṅkitāni. Tenāha "codanākāraṇānī"ti. Diṭṭhenāti ca hetumhi karaṇavacanaṁ, diṭṭhena hetunāti attho. Kiṁ pana taṁ diṭṭhanti āha "vītikkaman"ti. Disvāti ca dassanahetūti ayamettha attho yathā "paññāya cassa disvā"ti. "Sutenā"ti-ādīsupi iminā nayena attho veditabbo. Parassāti parato, parassa vā vacanaṁ sutvā. Diṭṭhaparisaṅkitenāti diṭṭhānagatena parisaṅkitena, tathā parisaṅkitena vā vītikkamena. Sesapadadvayepi eseva nayo. Codeti vatthusandassanena vā

samvāsappaṭikkhepena vā sāmīcippaṭikkhepena vā. Imasmim pana atthe vitthāriyamāne atippapañco hotīti āha "ayamettha sankhepo"ti. Vitthāram pana icchantānam tassa adhigamupāyam dassento "vitthāro pana -pa-veditabbo"ti āha. (39)

Kāmūpapattiyoti kāmehi upapannatā, samannāgatāti attho. Samannāgamo ca tesam paṭisevanam, samadhigamo cāti āha "kāmūpasevanā kāmapaṭilābhā vā"ti. Paccupaṭṭhitakāmāti dutiyatatiyarāsīnam viya sayam, parehi ca animmitā. Uṭṭhānakammaphalūpajīvibhāvato pana tadubhayavasena paccupaṭṭhitā kāmā etesanti paccupaṭṭhitakāmā. Te pana tesam yebhuyyena nibaddhāni hontīti "nibaddhakāmā"ti vuttam. Catudevalokavāsinoti cātumahārājikato paṭṭhāya yāva tusitā devā. Vinipātikāti āpāyikā. Paranimmitā kāmā etesanti paranimmitakāmā.

pakatisevanavasenāti anumānato jānanam vadati, na paccakkhato. Vasam vattentīti yathārucipātabyatam āpajjanti. "Methunam paṭisevantī"ti idam pana kecivādapaṭisedhanattham vuttam. Tenāha "keci panā"ti-ādi. Te "yāmānam aññamaññam ālingitamattena, tusitānam hatthāmasanamattena, nimmānaratīnam hasitamattena, paranimmitavasavattīnam olokitamattena kāmakiccam ijjhatī"ti vadanti. "Itaresam dvinnam dvayamdvayasamāpattiyā vā"ti vadanti tādisassa kāmesu virajjanassa tesu abhāvato, kāmāñca uttaruttari paṇītapaṇītatarapaṇītatamabhāvato. Kevalam pana nissandābhāvo tesam vattabbo. Kāmakiccanti taṅkhaṇikapariļāhūpasamāvaham phassasukham. Kāmāti kāmūpabhogā. Pākatikā evāti heṭṭhimehi ekasadisā eva. Ekasaṅkhātanti ekarūpam samānarūpanti, samaññātam samānabhāvanti vā attho. (40)

Sukhapaṭilābhāti sukhasamadhigamā. Heṭṭhāti paṭhamajjhānabhūmito heṭṭhā manussesu, devesu vā. Paṭhamajjhānasukhanti kusalapaṭhamajjhānam. Bhūmivasenapi heṭṭhuparibhāvo labbhateva brahmakāyikesu, brahmapurohitesu vā kusalajjhānam nibbattetvā brahmapurohitesu, mahābrahmesu vā vipākasukhānubhavanassa labbhanato. Ettha ca dutiyatatiyajjhānabhūmivasena dutiyatatiyasukhūpapattīnam vuccamānattā paṭhamajjhānabhūmivaseneva

pathamajjhānasukhūpapatti vuttā. Tintāti temikā, jhānasukhena ceva jhānasamutthānapanītarūpaphutthakāyena ca panītā vittāti attho. Tenevāha "samantato tintā"ti-ādi. Yasmā kusalasukhato vipākasukham santataratāya panītataram, bahulanca pavattati, tasmā vuttam "idampi vipākajihānasukhameva sandhāva vuttan"ti. Tesanti ābhassarānam. Sappītikassa sukhassa ativiya ulārabhāvato tena ajjhotthatacittānam bhavalobho mahā uppajjati. Santamevāti vitakkavicārasankhobhapītiubbilāvivigamena ativiya upasantamyeva. Tathā santabhāveneva hi tam attano paccayehi padhānabhāvam nītatāya "panītan"ti vuccati. Tenāha "panītamevā"ti. Atappakena sukhapāramippattena sukhena samyuttāya tusāya pītiyā itā pavattāti tusitā. Yasmā te tato uttari sukhassa abhāvato eva na patthenti, tasmā vuttam "tato -pa- santutthā hutvā"ti. **Tatiyajjhānasukhan**ti tatiyajjhānavipākasukham. (41)

Satta-ariyapaññāti atthamakato patthāya sattannam ariyānam tesam tesam āvenikapaññā. Thapetvā lokuttaram paññam avasesā paññā nāma. Sabbāpi tebhūmikā paññā "sekkhā" tipi na vattabbā, "asekkhā" tipi na vattabbāti **nevasekkhānāsekkhā**, puthujjanapaññā. (42)

Yogavihitesūti paññāvihitesu paññāparināmitesu upāyapaññāya sampāditesu. Kammāyatanesūti ettha kammameva kammāyatanam, kammañca tam āyatanañca ājīvādīnanti vā kammāyatanam. Esa nayo sippāyatanesupi. Tattha ca duvidham kammam hīnanca vaddhakikammādi, ukkatthañca kasivānijjādi. Sippampi duvidham hīnañca nalakārasippādi, ukkatthañca muddagananādi. Vijjāva vijjātthānam, tam dhammikameva nāgamandalaparittaphudhamanakamantasadisam veditabbam. Tāni panetāni ekacce panditā Bodhisattasadisā manussānam phāsuvihāram ākankhantā neva aññehi kariyamānāni passanti, na vā katāni ugganhanti. Na karontānam sunanti, atha kho attano dhammatāya cintāya karonti. Paññavantehi attano dhammatāya cintāya katānipi aññehi ugganhitvā karontehikatasadisāneva honti. Kammassakatanti "idam kammam sattanam sakam, idam no sakan"ti evam jānanañānam. **Saccānulomitan**ti vipassanāñānam. Tañhi saccapativedhassa anulomanato "saccānulomikan"ti vuccati. Idānissa pavattanākāram dassetum "rūpam aniccanti

vā"ti-ādi vuttam. Tattha vā-saddena aniyamatthena dukkhānattalakkhanānipi gahitānevāti datthabbam nānantariyakabhāvato. Yañhi aniccam, tam dukkham. Yam dukkham, tadanattāti (sijjhanato)¹. **Yam evarūpan**ti yam evam hetthā nidditthasabhāvam. "Anulomikam khantin" ti-ādīni paññāvevacanāni. Sā hi hetthā vuttānam kammāyatanādīnam pañcannam kāranānam apaccanīkadassanena anulomanato, tathā sattānam hitacariyāya maggasaccassa, paramatthasaccassa ca nibbānassa avilomanato anulometīti ca anulomikā. Sabbānipi etāni kāranāni khamati sahati datthum sakkotīti khanti. Passatīti ditthi. Rocetīti ruci. Munātīti muti. Pekkhatīti pekkhā. Te ca kammāyatanādayo dhammā nijjhāyamānā etāya nijjhānam khamantīti dhammanijihānakkhanti. Parato asutvā patilabhatīti aññassa upadesavacanam asutvā sayameva cintento patilabhati. Ayam vuccatīti ayam cintāmayā paññā nāma vuccati. Sā panesā abhiññātānam Bodhisattānameva uppajjati. Tatthāpi saccānulomikañānam dvinnam eva bodhisattānam antimabhavikānam, sesapaññā sabbesampi pūritapāramīnam mahāpaññānam uppajjati.

Parato sutvā paţilabhatīti kammāyatanādīni parena kariyamānāni, parena katāni vā disvāpi parassa kathayamānassa vacanam sutvāpi ācariyasantike uggahetvāpi paṭiladdhā sabbā parato sutvā paṭiladdhanāmāti veditabbā. Samāpannassāti samāpattisamangissa, nidassanamattametam. Vipassanāmaggapaññā hi idha "bhāvanāpaññā"ti visesato icchitāti. (43)

Āvudham nāma paṭipakkhavimathanattham icchitabbam, rāgādisadiso ca paṭipakkho natthi, tassa ca vimathanam buddhavacanamevāti "sutameva āvudhan"ti vatvā "tam atthato tepiṭakam buddhavacanan"ti āha. Idāni tamattham vivaranto "tañhī"ti-ādim vatvā "sutāvudho"ti-ādinā² suttapadena samattheti. Tattha akusalam pajahatīti tadangādivasena akusalam pariccajati. Kusalam bhāvetīti samathavipassanādikusalam dhammam uppādeti, vaḍḍheti ca. Suddhamattānam pariharatīti tena akusalappahānena, tāya ca kusalabhāvanāya rāgādisamkilesato visuddham attabhāvam pavatteti.

Vivekaṭṭhakāyānanti gaṇasaṅgaṇikaṁ vajjetvā tato apakaḍḍhitakāyānaṁ. Svāyaṁ kāyaviveko na kevalaṁ ekākībhāvo, atha kho paṭhamajjhānādi nekkhammayogatoti āha "nekkhammābhiratānan"ti. Cittavivekoti kilesasaṅgaṇikaṁ pahāya tato cittassa vivittatā. Sā pana jhānavimokkhādīnaṁ vasena hotīti āha "parisuddhacittānaṁ paramavodānappattānan"ti. Upadhivivekoti nibbānaṁ. Tadadhigamena hi puggalassa nirupadhitā. Tenāha "nirupadhīnaṁ puggalānan"ti, visaṅkhāragatānaṁ adhigatanibbānānaṁ, phalasamāpattisamaṅgīnañcāti attho. Sutampi avassayaṭṭheneva āvudhaṁ vuttanti āha "ayampī"ti. Tathā hi vuttaṁ "tañhi nissāyā"ti. Kāmañcettha sutapavivekāpi paññāvaseneva yathā dhippeta-āvudhattasādhakā¹, paññā pana sutena, ekaccapavivekena vā vināpi idhādhippeta-āvudhattasādhanīti tato paññā sāmatthiyadassanatthaṁ visuṁ āvudhabhāvena vuttā. Tenāha "yassa sā atthi, so na kutocī"ti-ādi. (44)

Nāññātaṁ aviditaṁ dhammanti anamatagge saṁsāravaṭṭe na aññātaṁ aviditaṁ amatadhammaṁ, catusaccadhammameva vā jānissāmīti paṭipannassa iminā pubbābhogena uppannaṁ indriyaṁ. Yaṁ pāṭiyaṁ saṅgahavāre "nava indriyāni hontī"ti vuttaṁ, taṁ pubbābhogasiddhaṁ pavatti-ākāravisesaṁ dīpetuṁ vuttaṁ, atthato pana maggasammādiṭṭhi eva sāti āha "sotāpattimaggañāṇassetaṁ adhivacanan"ti. Aññindriyanti ājānanaka-indriyaṁ, paṭhamamaggena ñātamariyādaṁ anatikkamitvā tesaññeva tena maggena ñātānaṁ catusaccadhammānaṁ jānanaka-indriyanti vuttaṁ hoti. Tenāha "aññābhūtaṁ ājānanabhūtaṁ indriyan"ti. Ājānātīti añño, aññassa bhūtaṁ, ājānanavasena vā bhūtanti aññabhūtaṁ. Aññātāvīsūti jānitabbaṁ catu-ariyasaccaṁ ājānitvā ṭhitesu. Tenāha "jānanakiccapariyosānappattesū"ti, pariññādibhedassa jānanakiccassa parinitthānappattesu. (45)

Maṁsacakkhu cakkhupasādoti maṁsacakkhu nāma catasso dhātuyo, vaṇṇo, gandho, raso, ojā, sambhavo, saṇṭhānaṁ, jīvitaṁ, bhāvo, kāyappasādo, cakkhupasādoti evaṁ cuddasasambhāro maṁsapiṇḍo.

Kasiṇālokam vaḍḍhetvā tattha rūpadassanato "dibbacakkhu ālokanissitam ñāṇan"ti vuttam. Dibbacakkhupaññāvanimuttā eva lokiyapaññā paññācakkhūti ayamattho avuttasiddho dibbacakkhussa visum gahitattāti vuttam "paññācakkhu lokiyalokuttarapaññā"ti. (46)

Adhisīlam visiṭṭham sīlanti adhisīlam. Sikkhitabbatoti āsevitabbato. Adhisīlam nāma anavasesakāyikavācasikasamvarabhāvato, maggasīlassa padaṭṭhānabhāvato ca. Adhicittam maggasamādhissa adhiṭṭhānabhāvato. Adhipaññā maggapaññāya adhiṭṭhānabhāvato. Idāni nesam adhisīlādibhāvam kāraṇena paṭipādetum "anappannepi hī"ti-ādi vuttam. Tattha anuppanneti appavatte. Adhisīlameva nibbānādhigamassa paccayabhāvato. Samāpannāti ettha "nibbānam patthayantenā"ti padam ānetvā sambandhitabbam.

"Kalyāṇakārī kalyāṇam, pāpakārī ca pāpakam.

Anubhoti dvayampetam, anubandham hi kārakan"ti¹—

evam atīte, anāgate ca vaṭṭamūlakadukkhasallakkhaṇavasena samvegavatthutāya vimutti-ākaṅkhāya paccayabhūtā kammassakatāpaññā adhipaññā"ti vadanti. Lokiyasīlādīnam adhisīlādibhāvo pariyāyenāti nippariyāyameva tam dassetum "sabbam vā"ti-ādi vuttam. (47)

Pañcadvārikakāyoti pañcadvāresu kāyo phassādidhammasamūho. Kāyo ca so bhāvitabhāvena bhāvanā cāti kāyabhāvanā nāma. Yasmā khīṇāsavānam aggamaggādhigamanena sabbasamkilesā pahīnāti pahīnakālato paṭṭhāya sabbaso āsevanābhāvato natthi tesam bhāviniyāpi cakkhusotaviññeyyā dhammā, pageva kāļakā, tasmā pañcadvārikakāyo subhāvito eva hoti. Tena vuttam "khīṇāsavassa hi -pa- subhāvito hotī"ti. Na aññesam viya dubbalā dubbalabhāvakarānam kilesānam sabbaso pahīnattā. (48)

Vipassanā dassanānuttariyam aniccānupassanādivasena saṅkhārānam sammadeva dassanato. Maggo paṭipadānuttariyam taduttaripaṭipadāya abhāvato. Phalam vimuttānuttariyam akuppabhāvato. Phalam vā dassanānuttariyam divasampi

nibbānam paccakkhato disvā pavattanato. **Nibbānam vimuttānuttariyam** sabbasankhatavinissaṭattā. Dassana-saddam kammasādhanam gahetvā nibbānassa dassanānuttariyatā vuttāti dassento "tato uttaranhi daṭṭhabbam nāma natthī"ti āha. Natthi ito uttaranti anuttaram, anuttarameva anuttariyanti āha "uttamam jeṭṭhakan"ti. (49)

Sesoti vuttāvaseso pañcakanayena, catukkanayena ca tividho samādhi, iminā eva ca samādhittayāpadesena suttantesupi pañcakanayo āgato evāti veditabbam. Tattha yam vattabbam, tam paramatthamañjūsāyam visuddhimaggasamvaṇṇanāyam¹ vuttameva, tasmā tattha vuttanayeneva veditabbam. (50)

Āgacchati nāmam etasmāti āgamanam, tato **āgamanato. Saguņato**ti sarasato. **Ārammaņato**ti ārammaņadhammato. **Anattato abhinivisitvā**ti "sabbe sankhārā anattā"ti vipassanam paṭṭhapetvā. **Anattato disvā**ti paṭhamam sankhārānam "anattā"ti anattalakkhaṇam paṭivijjhitvā. **Anattato vuṭṭhātī**ti vuṭṭhānagāminivipassanāya anattākārato pavattāya maggavuṭṭhānam pāpuṇāti. **Asuññatattakārakānam kilesānam abhāvā**ti attābhinivesapaccayānam diṭṭhekaṭṭhānam kilesānam vikkhambhanato vipassanā suññatā nāma attasuññatāya yāthāvato gahaṇato. Nanu evam vipassanāya saguṇato suññatā, na āgamanatoti nippariyāyato natthīti? Saccametam nāmalābhe, na pana nāmadāneti nāyam doso. Atha vā suttantakathā nāma pariyāyakathā, na abhidhammakathā viya nippariyāyāti bhiyyopi na koci doso.

Yasmā saguņato, ārammaņato ca nāmalābhe saṅkaro hoti ekasseva nāmantaralābhasambhavato. Āgamanato pana nāmalābhe saṅkaro natthi nāmantaralābhābhāvato, asambhavato ca, tasmā "aparo"ti-ādi vuttaṁ. Nimittakārakakilesābhāvāti niccanimittādiggāhakapaccayānaṁ kilesānaṁ vikkhambhanato. Kāmañcāyaṁ vipassanā niccanimittādiṁ ugghāṭentī pavattati, saṅkhāranimittassa pana avisajjanatona nippariyāyato animittanāmaṁ labhatīti. Pariyāyena panetaṁ vuttaṁ. Tathā hi nippariyāyadesanattā abhidhamme maggassa animittanāmaṁ uddhaṭaṁ. Sutte ca—

"Animittañca bhāvehi, mānānusayamujjaha. Tato mānābhisamayā, upasanto carissasī"ti¹—

animittapariyāyo āgato. **Paņidhikārakakilesābhāvā**ti sukhapaṇidhiādipaccayānaṁ kilesānaṁ vikkhambhanato.

Rāgādīhi suññattāti samucchedavasena pajahanato rāgādīhi vivittattā. Rāgādayo eva **rāganimittādīni**. Purimuppannā hi rāgādayo parato uppajjanakarāgādīnam kāranam hoti. Rāgādayo eva tathā panidhānassa paccayabhāvato rāgapanidhi-ādayo. Nibbānam visankhārabhāveneva sabbasankhāravinissatattā rāgādīhi sunnam, rāgādinimittapanidhivirahitañcāti datthabbam. Ettha ca sankhārupekkhā sānulomā vutthānagāminivipassanā, sā suñnato vipassantī "suñnatā"ti vuccati, dukkhato passantī tanhāpanidhisosanato "appanihitā"ti. Sā maggādhigamāya āgamanapatipadāthāne thatvā maggassa "suññatam animittam appanihitan"ti nāmam deti. Āgamanato ca nāme laddhe sagunato ca ārammanato ca nāmam siddhameva hoti, na pana sagunārammanehi nāmalābhe sabbattha āgamanato nāmam siddham hotīti paripunnanāmasiddhihetuttā, "sagunārammanehi sabbesampi nāmattayayogo, na āgamanato"ti vavatthānakarattā ca nippariyāyato āgamanatova nāmalābho padhānam, na itarehi, pariyāyato pana tidhā nāmalābho icchitabboti atthakathāyam "tividhākathā"ti-ādinā ayam vicāro katoti datthabbam. (51)

Sucibhāvoti kilesāsucivigamena suddhabhāvo asamkiliṭṭhabhāvo. Tenāha "tiṇṇam sucaritānam² vasena veditabbo"ti. (52)

Munino etānīti **moneyyāni.** Yehi dhammehi ubhayahitamunanato **muni** nāma hoti, te evam vuttāti āha **"munibhāvakarā moneyyapaṭipadā dhammā"**ti. Tattha yasmā kāyena akattabbassa akaraṇam, kattabbassa ca karaṇam, "atthi imasmim kāye kesā"ti-ādinā³ kāyasankhātassa ārammaṇassa jānanam, kāyassa ca samudayato atthaṅgamato assādato ādīnavato nissaraṇato ca yāthāvato parijānanam,

^{1.} Khu 1. 329; Sam 1. 190 pitthesu.

^{2.} Sucaritānañca (Ka)

^{3.} Dī 2. 233; Ma 1. 72; Ma 3. 132, 133; Am 2. 285; Am 3. 343; Abhi 2. 200; Khu 1. 2; Khu 10. 63 piṭṭhesu.

tathā parijānanavasena pavatto vipassanāmaggo, tena ca kāye chandarāgassa pajahanam, kāyasankhāram nirodhetvā pattabbasamāpatti cāti sabbe ete kāyamukhena pavattā moneyya paṭipadā dhammā kāyamoneyyam nāma, tasmā tamattham dassetum "tividhakāyaduccaritassa pahānan"ti-ādinā pāḷi āgatā. Sesadvayepi eseva nayo. Tattha copanavācanceva saddavācanca ārabbha pavattā panñā vācārammaņe ñāṇam. Tassa vācāya samudayādito parijānanam vācāpariñnā. Ekāsītividham lokiyacittam ārabbha pavattanāṇam manārammaņe ñāṇam. Tassa samudayādito parijānanam manopariñnāti ayameva viseso. (53)

Ayanti ito sampattiyoti **āyo**, kusalānam dhammānam abhibuddhīti āha "**āyoti vuḍḍhī**"ti. Apenti sampattiyo etenāti **apāyo**, kusalānam dhammānam hānīti āha "**apāyoti avuḍḍhī**"ti. **Tassa tassā**ti āyassa ca apāyassa ca. **Kāraṇam upāyo** upeti upagacchati etena āyo, apāyo cāti. Tattha duvidhā vuḍḍhi anatthahānito, atthuppattito ca, tathā avuḍḍhi atthahānito, anatthuppattito ca. **Tesam pajānanā**ti tesam āyāpāyasaññitānam yathāvuttappabhedānam vuḍḍhi-avuḍḍhīnam yāthāvato pajānanā. **Kosallam** kusalatā nipuṇatā. Tadutayampi pāļivaseneva dassetum "**vuttañhetan**"ti-ādi vuttam.

Tattha idam vuccatīti yā imesam akusaladhammānam anuppattinirodhesu, kusaladhammānanca uppattibhiyyobhāvesu pannā, idam āyakosallam nāma vuccati. Idāni apāyakosallampi pāļivaseneva dassetum "tattha kataman"ti-ādi vuttam. Tattha idam vuccatīti yā imesam kusaladhammānam anuppajjananirujjhanesu, akusaladhammānanca uppattibhiyyobhāvesu pannā, idam apāyakosallam nāma vuccatīti. Etthāha—āyakosallam tāva pannā hotu, apāyakosallam katham pannā nāma jātāti evam mannāti "apāyuppādanasamatthatā apāyakosallam nāma"ti, tam pana tassa matimattam. Pannavā eva hi "mayham evam manasi karoto anuppannā kusalā dhammā nuppajjanti, uppannā nirujjhanti. Anuppannā akusalā dhammā uppajjanti, uppannā vaḍḍhantī"ti pajānāti, so evam nātvā anuppanne akusale dhamme na uppādeti, uppanne pajahati. Anuppanne kusale dhamme uppādeti, uppanne bhāvanāpāripūrim pāpeti. Evam apāyakosallampi

paññā evāti. **Sabbāpī**ti āyakosallapakkhikāpi apāyakosallapakkhikāpi. **Tatrupāyā**ti tatra tatra karaṇīye upāyabhūtā.

Tassa tikicchanatthanti accāyikassa kiccassa, bhayassa vā pariharaṇattham. Ṭhānuppattiyakāraṇajānanavasenevāti ṭhāne taṅkhaṇe eva uppatti etassa atthīti ṭhānuppattikam, ṭhānaso uppajjanakakāraṇam, tassa jānanavaseneva. (54)

Majjanākāravasena pavattamānāti attano vatthuno madanīyatāya madassa āpajjanākārena pavattamānā uṇṇatiyo. Nirogoti arogo. Mānakaraṇanti mānassa uppādanam. Yobbane ṭhatvāti yobbane patiṭṭhāya, yobbanam apassāyāti attho. Sabbesampi jīvitam nāma maraṇapabhaṅguram, dukkhānubandhañca, tadubhayam anoloketvā, pabandhaṭṭhitipaccayā sulabhatañca nissāya uppajjanakamado jīvitamadoti dassetum "ciram jīvin"ti-ādi vuttam. (55)

Adhipati vuccati jeṭṭhako, issaroti attho. Tato adhipatito āgataṁ ādhipateyyaṁ. Kiṁ taṁ? Pāpassa akaraṇaṁ. Tenāha "ettakomhī"ti-ādi. Tattha sīlādayo lokiyā eva daṭṭhabbā, tasmā vimuttiyāti lokiyavimuttiyā. Jeṭṭhakanti issaraṁ, garunti attho. Ettha ca attānaṁ, dhammañca adhipatiṁ katvā pāpassa akaraṇaṁ hiriyā vasena veditabbaṁ. Lokaṁ adhipatiṁ katvā akaranaṁ ottappassa vasena. (56)

Kathāvatthūnīti kathāya pavattiṭṭhānāni. Yasmā tehi vinā kathā nappavattati, tasmā "kathākāraṇānī"ti vuttam. Addhāna-saddassa attho heṭṭhā vutto eva, so panatthato dhammappavattimattam. Dhammā cettha khandhā eva, tabbinimuttā ca tesam gati natthīti āha "atītam dhammam, atītakkhandheti attho"ti. Ayanca addhā nāma disādi viya atthato dhammappavattim upādāya pañnattimattam, na upādā na bhūtadhammoti tamattham dassetum "apicā"ti-ādi vuttam. (57)

"Tamavijjhanaṭṭhena viditakaraṇaṭṭhenā"ti saṅkhepato vuttamatthaṁvivarituṁ **"pubbenivāsā"**ti-ādi vuttaṁ. **Pubbenivāsan**ti pubbe nivutthakkhandhe. **Taman**ti mohatamaṁ. **Vijjhatī**ti vihanati, pajahatīti attho. Teneva ca

paṭicchādakatamavijjhanena **pubbenivāsañca viditaṁ** pākaṭaṁ **karotīti vijjā**ti. **Tan**ti cutūpapātaṁ. (58)

Upapattidevavisesabhāvāvaho vihāroti katvā dibbo vihāro. Nanu evam aññamaññānampi dibbavihārabhāvo āpajjatīti? Na tāsam sattesu hitūpasamhārādivasena pavattiyā savisesam niddosaṭṭhena, seṭṭhaṭṭhena ca brahmavihārasamaññāya niruļhabhāvato. Suvisuddhito, paṭipakkhasamucchindanavasena araṇīyato pattabbato, ariyabhāvappattiyā vā anantaram ariyo. Ariyānam ayanti vā ariyo, vihāro. (59)

Sesam hettha vuttanayameva. (60)

Tikavannanā niţţhitā.

Catukkavannanā

306. **Pubbe**ti hetthā mahāsatipatthānavannanāyam. (1)

Yo chandoti yo chandiyanavasena chando. Chandikatāti chandabhāvo, chandikaraṇākāro vā. Katthukamyatāti kattukāmatā. Kusaloti cheko kosallasambhūto. Dhammacchandoti sabhāvacchando. Ayañhi chando nāma taṇhāchando, diṭṭhichando, vīriyachando, dhammacchandoti bahuvidho. Idha kattukamyatākusaladhammacchando adhippeto. Chandaṁ janetīti taṁ chandaṁ uppādeti. Taṁ pavattento hi janeti nāma. Vāyāmaṁ karotīti payogaṁ parakkamaṁ karoti. Vīriyaṁ ārabhatīti kāyikacetasikavīriyaṁ pavatteti. Cittaṁ upatthambhetīti teneva sahajātavīriyena cittaṁ ukkhipati. Padahatīti padhānaṁ vīriyaṁ karoti. Paṭipāṭiyā panetāni padāni uppādanāsevanābhāvanābahulīkammasātaccakiriyāhi yojetabbāni. Vitthāraṁ pariharanto "ayamettha saṅkhepo"ti-ādimāha. (2)

Chandam nissāyāti "chandavato cetosamādhi hoti, mayham evam hotī"ti evam chandam nissāya chandam dhuram jeṭṭhakam pubbangamam katvā pavatto samādhi chandasamādhi. Padhānabhūtāti padhānajātā, padhānabhāvam vā pattā. Sankhārāti catukiccasādhakam sammappadhānavīriyam vadati. Tehi

dhammehīti yathāvuttasamādhivīriyehi upetam sampayuttam. Iddhiyā pādanti nipphattipariyāyena ijjhanaṭṭhena, ijjhanti etāya sattā iddhā vuddhā ukkamsagatā hontīti iminā vā pariyāyena "iddhī"ti sankhyam gatānam upacārajjhānādikusalacittasampayuttānam chandasamādhipadhānasankhārānam adhiṭṭhānaṭṭhena pādabhūtam. Yasmā purimā iddhi pacchimāya iddhiyā pādo pādakam padaṭṭhānam hoti, tasmā "iddhibhūtam vā pādan"ti ca vuttam. Sesesupīti dutiya-iddhipādādīsu. Kāmañcettha janavasabhasuttepi iddhipādavicāro āgato, sopi sankhepato evāti āha "vitthāro pana -pa- dīpito"ti. (3)

307. **Diṭṭhadhammo** vuccati paccakkhabhūto attabhāvoti āha "imasmimyeva attabhāve"ti. **Sukhavihāratthāyā**ti nikkilesahāya nirāmisena sukhena viharaṇatthāya. **Phalasamāpattijhānānī**ti cattāripi phalasamāpattijhānāni. **Aparabhāge**ti āsavakkhayādhigamato aparabhāge. **Nibbattitajhānānī**ti adhigatarūpārūpajjhānāni. (5-1)

Sūriyacandapajjotamani-ādīnanti pajjotaggahanena padīpam vadati. Ādi-saddena ukkāvijjulatādīnam sangaho. Ālokoti manasi karotīti sūriyacandālokādim divā, rattiñca upaladdham yathāladdhavaseneva manasi karoti citte thapeti. Tathāva nam manasi karoti, yathāssa subhāvitālokakasinassa viya kasināloko yadicchakam yāvadicchakam. So āloko rattiyam upatitthati, yena tattha divāsaññam thapeti divā viya vigatathinamiddho hoti. Tenāha "yathā divā tathā rattin"ti. Yathā rattim āloko ditthoti yathā rattiyā candālokādi-āloko dittho upaladdho. Evameva divā manasi karotīti rattim ditthākāreneva divā tam ālokam manasi karoti citte thapeti. Apihitenāti thinamiddhapidhānena na pihitena. Anaddhenāti asañchāditena. **Sa-obhāsan**ti sañānobhāsam. Thinamiddhavinodana-ālokopi vā hotu kasinālokopi vā parikammālokopi vā, upakkilesāloko viya sabbāyam āloko ñāṇasamutthānovāti. Ñānadassanapatilābhatthāyāti dibbacakkhuñānapatilābhatthāya. Dibbacakkhuñānañhi rūpagatassa dibbassa, itarassa ca dassanatthena idha "ñanadassanan"ti adhippetam. "Ālokasañnam manasi

karotī"ti ettha vutta-āloko thinamiddhavinodana-āloko. Parikamma-ālokoti dibbacakkhuñāṇāya parikammakaraṇavasena pavattita-āloko. Tattha purimassa vasena "khīṇāsavassā"ti visesetvā vuttaṁ. Tassa hi thinamiddhaṁ suppahīnaṁ hoti, na aññesaṁ. Dutiyassa vasena "tasmiṁ vā āgatepī"ti-ādi vuttaṁ. Tattha tasminti dibbacakkhuñāṇe. Āgatepīti paṭiladdhepi. Anāgatepīti appaṭiladdhepi. Yasmā tathārūpassa pādakajjhānasseva vasena parikamma-ālokassa sambhavo, yato taṁ parisuddhapariyodātatādiguṇavisesupasañhitaṁ, tasmā āha "pādaka -pa-bhāvetīti vuttan"ti. (5-2)

Sattaṭṭhānikassāti "abhikkante paṭikkante sampajānakārī hotī"ti-ādinā¹ vuttassa sattaṭṭhānikassa. Satipi sekkhānaṁ pariññātabhāve ekantato pariññātavatthukā nāma arahanto evāti vuttaṁ "khīṇāsavassa vatthu viditaṁ hotī"ti-ādi. Vatthārammaṇaviditatāyāti vatthuno, ārammaṇassa ca yāthāvato viditabhāvena. Yathā hi sappapariyesanaṁ² carantena tassa āsaye vidite sopi vidito eva ca hoti mantāgadabalena tassa gahaṇassa sukarattā, evaṁ vedanāya āsayabhūte vatthumhi, ārammaṇe ca vidite ādikammikassapi vedanā viditā eva hoti salakkhaṇato, sāmaññalakkhaṇato ca tassā gahaṇassa sukarattā, pageva pariññātavatthukassa khīṇāsavassa. Tassa hi uppādakkhaṇepi ṭhitikkhaṇepi bhaṅgakkhaṇepi vedanā viditā pākaṭā honti. Tenāha "evaṁ vedanā uppajjantī"ti-ādi. Nidassanamattañcetaṁ, yadidaṁ pāḷiyaṁ vedanāsaññāvitakkaggahaṇanti dassento "ne kevalan"ti-ādimāha, tena avasesato sabbadhammānampi uppādādito viditabhāvaṁ dasseti.

Idāni na kevalam khaṇato eva, atha kho paccayatopi aniccāditopi na kevalam khīṇāsavānamyeva vasena, atha kho ekaccānam sekkhānampi vasena vedanādīnam viditabhāvam dassetum "apicā"ti-ādi vuttam. Tattha avijjāsamudayāti avijjāya uppādā, atthibhāvāti attho. Nirodhavirodhī hi uppādo atthibhāvavācakopi hotīti tasmā purimabhavasiddhāya avijjāya sati imasmim bhave

vedanāya uppādo hotīti attho. Avijjādīhi atītakālikādīhi tesam sahakāraṇabhūtāni uppādādīnipi¹ gahitānevāti veditabbam. Vedanāya pavattipaccayesu phassassa balavabhāvato so eva gahito "phassasamudayā"ti. Tasmim pana gahite pavattipaccayatāsāmaññena vatthārammaṇādīnipi gahitāneva hontīti sabbassāpi vedanāya anavasesato paccayato udayadassanam vibhāvitanti daṭṭhabbam. "Nibbattilakkhaṇan"tiādinā khaṇavasena udayadassanamāha. Uppajjati etasmāti uppādo, uppajjanam uppādoti paccayalakkhaṇam, khaṇalakkhaṇañca ubhayam ekajjham gahetvā āha "evam vedanāya uppādo vidito hotī"ti.

Aniccato manasi karototi vedanā nāmāyam anaccantikatāya ādi-antavatī udayabbayaparicchinnā khaṇabhaṅgurā tāvakālikā, tasmā "aniccā"ti aniccato manasi karoto. Tassā khayato, vayato ca upaṭṭhānam viditam pākaṭam hoti. Dukkhato manasi karototi aniccattā eva vedanā udayabbayapaṭipīlitatāya, dukkhamatāya, dukkhavatthutāya ca "dukkhā"ti manasi karoto bhayato bhāyitabbato tassā upaṭṭhānam viditam pākaṭam hotīti. Tathā aniccattā, dukkhattā eva ca vedanā attarahitā asārā nissārā avasavattinī tucchāti vedanam anattato manasi karoto suññato rittato asāmikato upaṭṭhānam viditam pākaṭam hoti. "Khayato"ti-ādi vuttasseva atthassa nigamanam. Tasmā vedanam khayato bhayato suññato jānātīti atthavasena vibhattipariṇāmo veditabbo. Avijjānirodhā vedanānirodhoti aggamaggena avijjāya anuppādanirodhato vedanāya anuppādanirodho hoti paccayābhāve abhāvato. Sesam samudayavāre vuttanayānusārena veditabbam. Idha samādhibhāvanāti sikhāppattā ariyānam vipassanāsamādhibhāvanā. Tassā pādakabhūtā jhānasamāpatti veditabbā. (5-3)

Vuttanayameva mahāpadāne². (5-4)

308. **Pamāṇaṁ aggahetvā**ti asubhabhāvanā viya padesaṁ aggahetvā. Ekasmimpi satte pamāṇā'ggahaṇena **anavasesapharaṇena**³. Natthi

^{1.} Upādādīnipi (Ka) 2. Dī 2. 30 pitthe. 3. Anavasesapharanavasena (Atthakathāyam)

etāsam gahetabbam pamāṇanti hi **appamāṇā**, appamāṇā eva **appamaññā**. (6)

Apassayitabbaṭṭhena apassenāni, idha bhikkhu yāni apassāya tisso sikkhā sikkhitum samattho hoti, tesam eva adhivacanam. Tāni panetāni paccayānam sankhāya sevitā adhivāsanakkhanti, vajjanīyavajjanam, vinodetabbavinodananca. Tenāha "sankhāyekam adhivāsetī"ti-ādi. Tattha sammadeva khāyati upaṭṭhāti paṭibhātīti sankhā, nāṇanti āha "sankhāyāti nāṇenā"ti. Sankhāya sevitā nāma yam sevato akusalā dhammā parihāyanti, kusalā dhammā abhivaḍḍhanti, tassa sevanāti āha "sevitabbayuttakameva sevatī"ti. Adhivāsanādīsupi eseva nayo. Anto pavisitunti abbhantare attano citte pavattitum na deti. (8)

Ariyavamsacatukkavannanā

309. **Vaṁsa-**saddo "piṭṭhivaṁsaṁ atikkamitvā nisīdatī"ti-ādīsu dvinnaṁ dvinnaṁ vopānasinaṁ sandhānaṭṭhāne ṭhapetabbadaṇḍake āgato.

"Vamso visālova yathā visatto, Puttesu dāresu ca yā apekkhā. Vamse kaļīrova asajjamāno, Eto care khaggavisāṇakappo"ti-ādīsu¹—

akaṇḍake. "Bherisaddo mudiṅgasaddo vaṁsasaddo kaṁsatāḷasaddo"ti-ādīsu tūriyavisese, yo "veṇū"tipi vuccati. "Abhinnena piṭṭhivaṁsena mato hatthī"ti-ādīsu hatthi-ādīnaṁ piṭṭhivemajjhe padese. "Kusavaṁsaṁ ṭhapessāmī"ti-ādīsu² kulavaṁbhe. "Vaṁsānurakkhako paveṇīpālato"ti-ādīsu³ guṇānupubbiyaṁ guṇānaṁ pabandhappavattiyaṁ. Idha pana catupaccayasantosabhāvanārāmatāsaṅkhātaguṇānaṁ pabandhe daṭṭhabbo. Tassa pana vaṁsassa kulanvayaṁ, guṇanvayañca nidassanavasena dassetuṁ "yathā hī"ti-ādi vuttaṁ. Tattha khattiyavaṁsoti khattiyakulanvayo. Eseva nayo sesapadesupi. Samaṇavaṁso pana samaṇatanti samaṇapaveṇī. Mūlagandhādīnanti ādi-saddena yathā sāragandhādīnaṁ saṅgaho, evamettha gorasādīnampi

^{1.} Khu 3. 9 pitthe Apadane.

^{2.} Dī 3. 154 pitthe.

^{3.} Visuddhi 1. 95; Dhammapada-Ttha 2. 244 pitthesu.

saṅgaho daṭṭhabbo. Dutiyena pana **ādi-**saddena kāsikavatthasappimaṇḍādīnaṁ. **Ariya-**saddo amilakkhūsupi manussesu vattati, yesaṁ pana nivāsanaṭṭhānaṁ "ariyaṁ āyatanan"ti vuccati. Yathāha "yāvatā ānanda ariyaṁ āyatanan"ti¹. Lokiyasādhujanesupi "ye hi vo ariyā parisuddhakāyakammantā -pa- tesamahaṁ aññataro"ti-ādīsu². Idha pana ye "ārakā kilesehī"ti-ādinā laddhanibbacanā paṭividdha-ariyasaccā, te eva adhippetāti dassetuṁ "ke pana te ariyā"ti pucchaṁ katvā "ariyā vuccantī"ti-ādi vuttaṁ.

Tattha ye mahāpanidhānakappato patthāya yāvāyam kappo, etthantare uppannā sammāsambuddhā, te tāva sarūpato dassetvā tadaññepi sammāsambuddhe, paccekabuddhe, buddhasāvake ca sangahetvā anavasesato ariye dassetum "apica"ti-ādi vuttam. Tattha yāva sāsanam na antaradhāyati, tāva satthā dharati eva nāmāti imameva bhagavantam, ye cetarahi buddhasāvakā, te ca sandhāya paccuppannaggahanam. Tasmim tasmim vā kāle te te paccuppannāti ce, atītānāgataggahaņam na kattabbam siyā. Idāni yathā bhagavā "dhammam vo bhikkhave desessāmi ādikalyānam majjhekalyānam pariyosānakalyānam sāttham sabyañjanam kevalaparipunnam parisuddham brahmacariyam pakāsessāmi, yadidam chachakkānī"ti chachakkadesanāya³ atthahi padehi vannam abhāsi, evam mahā-ariyavamsadesanāya ariyānam vamsānam "cattārome bhikkhave ariyavamsā aggaññā rattaññā vamsaññā porānā asamkinnā asamkinnapubbā na sankīyanti na sankīyissanti appatikutthā samanehi brāhmanehi viññūhī"ti⁴ yehi navahi padehi vannam abhāsi, tāni tāva ānetvā thomanāvaseneva vaņņento "te kho panete" ti-ādimāha. Aggāti jānitabbā sabbavamsehi setthabhāvato, setthabhāvasādhanato ca. Dīgharattam pavattāti jānitabbā rattaññūhi, buddhādīhi tehi ca tathā anutthitattā. Mamsāti jānitabbā buddhādīnam ariyānam vamsāti jānitabbā. Porāņāti purātanā. Na adhunuppattikāti na adhunātanā. Asamkinnāti na khittā na chadditā. Tenāha "anapanītā"ti. Na apanītapubbāti

^{1.} Dī 2. 74; Khu 1. 187 pitthesu.

^{3.} Ma 3. 327 pitthe.

^{2.} Ma 1. 20, 21 pitthesu.

^{4.} Am 1. 336 pitthe.

na chaḍḍitapubbā tissannaṁ sikkhānaṁ paripūraṇūpāyabhāvato na paricattapubbā. Tato eva idānipi na apanīyanti, anāgatepi na apanīyissanti. Ye dhammasabhāvassa vijānaneva viññū samitapāpasamaṇā ceva bāhitapāpa brāhmaṇā ca, tehi appaṭikuṭṭhā appaṭikkhittā. Ye hi na paṭikkositabbā, te aninditabbā agarahitabbā. Apariccajitabbatāya appaṭikkhipitabbā hontīti.

Santutthoti ettha yathādhippetasantosameva dassento "paccayasantosavasena santuttho"ti vuttam. Jhānavipassanādivasenapi idha bhikkhuno santutthatā hotīti. Itarītarenāti itarena itarena. Itara-saddo yam aniyamavacano, dvikkhattum vuccamano yam kinci-saddehi samanattho hotīti vuttam "yena kenacī"ti. Svāyam aniyamavācitāya eva yathā thūlādīnam aññataravacano, evam yathāladdhādīnampi aññataravacanoti tattha dutiyapakkhasseva idha icchitabhavam dassento "atha kho"tiādimāha. Nanu ca yathāladdhādayopi thūlādayo eva? Saccametam, tathāpi atthi viseso. Yo hi yathāladdhesu thūlādīsu santoso, so yathālābhasantoso eva, na itaro. Na hi so paccayamattasannissayo icchito, atha kho attano kāyabalasāruppabhāvasannissayopi. Thūladukādayo ca tayopi cīvare labbhanti. Majjhimo catupaccayasādhārano, pacchimo pana cīvare, senāsane ca labbhatīti datthabbam. "Ime tayo santose"ti idam sabbasangāhikavasena vuttam. Ye hi parato gilānapaccayam pindapāte eva pakkhipitvā cīvare vīsati, pindapāte pannarasa, senāsane pannarasāti samapannāsasantosā vuccanti, te sabbepi yathāraham imesu eva tīsu santosesu sangaham samosaranam gacchantīti.

Cīvaraṁ jānitabbanti "idaṁ nāma cīvaraṁ kappiyan"ti jātito cīvaraṁ jānitabbaṁ. Cīvarakkhettanti cīvarassa uppattikkhettaṁ. Paṁsukūlanti paṁsukūlacīvaraṁ, paṁsukūlalakkhaṇappattaṁ cīvaraṁ jānitabbanti attho. Cīvarasantosoti cīvare labbhamāno sabbo santoso jānitabbo. Cīvarapaṭisaṁyuttāni dhutaṅgāni jānitabbāni, yāni tosanto cīvarasantosena sammadeva santuṭṭho hotīti. Khomakappāsikakoseyyakambalasāṇabhaṅgāni khomādīni. Tattha khomaṁ nāma khomasuttehi vāyitaṁ khomapatacīvaraṁ,

tathā sesānipi. **Sānan**ti sāṇavākasuttehi katacīvaram. **Bhangan**ti pana khomasuttādīni sabbāni ekaccāni vomissetvā katacīvaram. "Bhangampi vākamayamevā"ti keci. Chāti gaņanaparicchedo. Yadi evam ito aññā vatthajāti natthīti? No natthi, sā pana etesam anulomāti dassetum "dukūlādīnī"ti-ādi vuttam. Ādi-saddena pattunnam, somārapattam, cīnapattam, iddhijam, devadinnanti etesam sangaho. Tattha dukūlam sānassa anulomam vākamayattā. Pattunnadese sañjātavattham pattunnam. "Pattunnam koseyyaviseso"ti hi amarakose vuttam. Somaradese, cīnadese ca jātavatthāni somāracīnapattāni. Pattuņņādīni tīņi koseyyassa anulomāni pānakehi katasuttamayattā. **Iddhijam** ehibhikkhūnam puññiddhiyā nibbattam cīvaram, tam khomādīnam aññataram hotīti tesam eva anulomañca. Devatāhi dinnam cīvaram devadinnam, tam kapparukkhe nibbattam jāliniyā devakaññāya anuruddhattherassa dinnavatthasadisam, tampi khomādīnamyeva anulomam hoti tesu añnatarabhāvato. Imānīti antogadhāvadhāranavacanam, imāni evāti attho. Buddhādīnam paribhogayogyatāya kappiyacīvarāni.

Idāni avadhāraņena nivattitāni ekadesena dassetum "kusacīran"ti-ādi vuttam. tattha kusatiņehi, aññehi vā tādisehi tiņehi katacīvaram kusacīram. Potakīvākādīhi vākehi katacīvaram vākacīram. Catukkoņehi tikoņehi vā phalakehi katacīvaram phalakacīram. Manussānam kesehi katakambalam kesakambalam. Cāmarīvāla-assavālādīhi katam vālakambalam. Makacitantūhi vāyito potthako. Cammanti migacammādi yam kiñci cammam. Ulūkapakkhehi ganthetvā katacīvaram ulūkapakkham. Bhujatacādimayam rukkhadussam, tirīṭakanti attho. Sukhumatarāhi latāvākehi vāyitam latādussam. Erakavākehi katam erakadussam. Tathā kadalidussam. Sukhumehi veļuvilīvehi katam veļudussam. Ādi-saddena vakkalādīnam sangaho. Akappiyacīvarāni titthiyaddhajabhāvato.

Aṭṭhannañca mātikānaṁ vasenāti "sīmāya deti, katikāya detī"ti-ādinā āgatānaṁ aṭṭhannaṁ cīvaruppattimātikāna vasena. Cīvarānaṁ

paṭilābhakkhettadassanatthañhi bhagavatā "aṭṭhimā bhikkhave mātikā"tiādinā mātikā ṭhapitā. Mātikāti hi mātaro cīvaruppattijanikāti. Sosānikanti susāne pahitakam. Pāpaṇikanti āpaṇadvāre patitakam. Rathiyanti puññatthikehi vātapānantarena rathikāya chaḍḍitacoļakam. Saṅkārakūṭakanti saṅkāraṭṭhāne chaḍḍitacoļakam. Sinānanti nhānacoļam, yam bhūtavejjehi sīsam nhāpetvā "kāļakaṇṇīcoļakan"ti chaḍḍetvā gacchanti. Titthanti titthacoļakam sinānatitthe chaḍḍitapilotikā. Aggidaḍḍhanti agginā daḍḍhappadesam. Tañhi manussā chaḍḍenti. Gokhāyitakādīni pākaṭāneva. Tānipi hi manussā chaḍḍenti.

Dhajam ussāpetvāti nāvam ārohantehi vā yuddham pavisantehi vā dhajayaṭṭhim ussāpetvā tattha baddham pārutacīvaram, tehi chaḍḍitanti adhippāyo.

Sādakabhikkhunāti gahapaticīvarassa sādiyanabhikkhunā. Ekamāsamattanti cīvaramāsasaññitam ekamāsamattam. Vitakketum vaṭṭati, na tato paranti adhippāyo. Sabbassāpi hi taṇhāniggahatthāya sāsane paṭipattīti. Pamsukūliko addhamāseneva karotīti aparapaṭibaddhattā paṭilābhassa. Itarassa pana parapaṭibaddhattā māsamattam anuññātam. Iti māsaddha -pa- vitakkasantoso vitakkanassa parimitakālikattā.

Mahātheram tattha attano sahāyam icchantopi garugāravena gāmadvāram "bhante gamissāmi" iccevamāha. Mahātheropissa ajjhāsayam ñatvā "ahampāvuso gamissāmī" ti āha. "Imassa bhikkhuno vitakkassa avasaro mā hotū" ti pañham pucchamāno gāmam pāvisi. Uccārapalibuddhoti uccārena pīļito. Tadā bhagavato dukkarakiriyānussaraņamukhena tathāgate uppannapītisomanassavegassa balavabhāvena kilesānam vikkhambhi tatthā tasmimyeva -pa- tīņi phalāni patto.

"Kattha labhissāmī"ti cintanāpi lābhāsāpubbikāti tathā "acintetvā"ti vuttam, "sundaram labhissāmi, manāpam labhissāmī"ti evamādicintanāya kā nāma kathā. Katham pana vattabbanti āha "kammaṭṭhānasīseneva gamanan"ti, tena cīvaram paṭicca kiñcipi na cintetabbamevāti dasseti.

Apesalo appatirūpāyapi pariyesanāya paccayo bhaveyyāti "**pesalaṁ bhikkhuṁ gahetvā**"ti vuttaṁ.

Āhariyamānanti susānādīsu patitakam vattham "ime bhikkhū pamsukūlapariyesanam carantī"ti natvā kenaci purisena tato ānīyamānam.

Evam laddham ganhantassāpīti evam paṭilābhasantosam akopetvāva laddham ganhantassāpi. Attano pahonakamattenevāti yathāladdhānam pamsukūlavatthānam ekapaṭṭadupaṭṭānam atthāya attano pahonakapamāneneva, avadhāranena uparipaccāsam nivatteti.

Gāme bhikkhāya āhiṇḍantena sapadānacārinā viya dvārapaṭipāṭiyā caraṇam **loluppavivajjanam** nāma cīvaraloluppassa dūrasamussāritattā¹.

Yāpetunti attabhāvam pavattetum.

Dhovanupagenāti dhovanayoggena.

Paṇṇānīti ambajambādipaṇṇāni.

Akopetvāti santosaṁ akopetvā. **Pahonakanīhārenevā**ti antaravāsakādīsu yaṁ kātukāmo, tassa pahonakaniyāmeneva yathāladdhaṁ thūlasukhumādiṁ gahetvā **karaṇaṁ**.

Timaṇḍalapaṭicchādanamattassevāti "nivāsanaṁ ce nābhimaṇḍalaṁ jāṇumaṇḍalaṁ, itaraṁ ce galavāṭamaṇḍalaṁ jāṇumaṇḍalan"ti evaṁ timaṇḍalapaṭicchādanamattasseva karaṇaṁ, taṁ pana atthato tiṇṇaṁ cīvarānaṁ heṭṭhimantena vuttaparimāṇameva hoti.

Avicāretvāti na vicāretvā.

Kusibandhanakāleti maṇḍalāni yojetvā sibbanakāle. **Sattavāre**ti sattasibbanavāre.

Kappabindu-apadesena kassaci vikārassa akaraṇam kappasantoso.

Sītapaṭighātādi atthāpattito sijjhatīti mukhyameva cīvaraparibhoge payojanam dassetum "hirikopīnapaṭicchādanamattavasenā"ti vuttam. Tenāha bhagavā "yāvadeva hirikopīnapaṭicchādanatthan"ti².

Vaṭṭati, na tāvatā santoso kuppati sambhārānam, dakkhiņeyyānañca alābhato.

Sāraņīyadhamme ṭhatvāti sīlavantehi bhikkhūhi sādhāraṇato paribhoge ṭhatvā.

"Itī"ti-ādinā paṭhamassa ariyavaṁsassa paṁsukūlikaṅgatecīvarikaṅgānaṁ, tesañca tassa paccayataṁ dassento iti ime dhammā aññamaññassa samuṭṭhāpakā, upatthambhakā cāti dīpeti. Esa nayo ito paratopi.

"Santuṭṭho hoti vaṇṇavādī"ti ettha catukkoṭikaṁ sambhavati, tattha catutthoyeva pakkho satthārā vaṇṇito thomitoti mahātherena tathā desanā katā. Eko santuṭṭho hoti, santosassa vaṇṇaṁ na katheti seyyathāpi thero nālako¹. Eko na santuṭṭho hoti, santosassa vaṇṇavādī seyyathāpi upanando sakyaputto². Eko neva santuṭṭho hoti, na santosassa vaṇṇaṁ katheti seyyathāpi thero lāludāyī³. Eko santuṭṭho ceva hoti, santosassa ca vaṇṇavādī seyyathāpi thero mahākassapo.

Anesananti ayuttam esanam. Tenāha "appatirūpan"ti, sāsane ṭhitānam na patirūpam asāruppam ayogyam. Kohaññam karontoti cīvaruppādanimittam paresam kuhanam vimhāpanam karonto. Uttasatīti taṇhāsantāsena uparūpari tasati. Paritasatīti parito tasati. Yathā sabbe kāyavacīpayogā tadatthā eva jāyanti, evam sabbabhāgehi tasati. Gadhitam vuccati gaddho, so cettha abhijjhālakkhaņo adhippeto. Gadhitam etassa natthīti agadhitoti āha "agadhito -pa- lobhagiddho"ti. Mucchanti taṇhāvasena muyhanam, tassa vā samussayam⁴ adhigatam. Anāpanno anupagato. Anotthatoti anajjhotthato. Apariyonaddhoti taṇhāchadanena acchādito. Ādīnavam passamānoti diṭṭhadhammikam, samparāyikañca dosam passanto. Gadhitaparibhogato nissarati etenāti nissaraṇam, idamatthikatā, tam pajānātīti nissaraṇapāñno. Tenāha "yāvadeva -pa-pajānanto"ti.

^{1.} Khu 1. 385 pitthe Suttanipāte vitthāro.

^{2.} Vi 1. 311, 317, 320; 323 piţṭhādīsu vitthāro.

^{3.} Theragāthā-Ttha 2. 258 pitthe vitthāro.

^{4.} Samassayam (Ka)

Nevattānukkamsetīti attānam neva ukkamseti na ukkhipati na ukkaṭṭhato dahati. "Ahan"ti-ādi ukkamsanākāradassanam. Na vambhetīti na tīṭayati nihīnato na dahati. Tasmim cīvarasantoseti tasmim yathāvutte vīsatividhe cīvarasantose. Kāmancettha vuttappakārasantosaggahaṇena cīvarahetu anesanāpajjanādipi gahitameva tasmim sati tassa bhāvato, asati ca abhāvato, vaṇṇavāditānattukkamsanā paravambhanāni pana gahitāni na hontīti "vaṇṇavāditādīsu vā"ti vikappo vutto. Ettha ca "dakkho"ti-ādi yesam dhammānam vasenassa yathāvuttasantosādi ijjhati, tam dassanam. Tattha "dakkho"ti iminā tesam samuṭṭhāpanapañnam dasseti, "analaso"ti iminā paggaṇhanavīriyam, "sampajāno"ti iminā pāṭihāriyapañnam, "paṭissato"ti iminā tattha asammosavuttim dasseti.

Piṇḍapāto jānitabboti pabhedato piṇḍapāto jānitabbo. Piṇḍapātakkhettanti piṇḍapātassa uppattiṭṭhānam. Piṇḍapātasantoso jānitabboti piṇḍapāte santoso pabhedato jānitabbo. Idha bhesajjampi pindapātagatikameva. Āharitabbato hi sappi-ādīnampi gahanam katam.

Piṇḍapātakkhettaṁ piṇḍapātassa uppattiṭṭhānaṁ. Khettaṁ viya khettaṁ. Uppajjati ettha, etenāti ca uppattiṭṭhānaṁ. Saṁghato vā hi bhikkhuno piṇḍapāto uppajjati uddesādivasena vā. Tattha sakalassa saṁghassa dātabbaṁ bhattaṁ saṁghabhattaṁ. Katipaye bhikkhū uddisitvā uddesena dātabbaṁ bhattaṁ uddesabhattaṁ. Nimantetvā dātabbaṁ bhattaṁ nimantanaṁ. Salākadānavasena dātabbaṁ bhattaṁ salākabhattaṁ. Ekasmiṁ pakkhe ekadivasaṁ dātabbaṁ bhattaṁ pakkhikaṁ. Uposathe dātabbaṁ bhattaṁ uposathikaṁ. Pāṭipadadivase dātabbaṁ bhattaṁ pāṭipadikaṁ. Āgantukānaṁ dātabbaṁ bhattaṁ āgantukabhattaṁ. Dhuragehe eva ṭhapetvā dātabbaṁ bhattaṁ dhurabhattaṁ. Kuṭiṁ uddissa dātabbaṁ bhattaṁ kuṭibhattaṁ. Gāmavāsī-ādīhi vārena dātabbaṁ bhattaṁ vārabhattaṁ. Vihāraṁ uddissa dātabbaṁ bhattaṁ vihārabhattaṁ. Sesāni pākatāneva.

Vitakketi "kattha nu kho aham ajja pindāya carissāmī"ti. "Kattha pindāya carissāmā"ti¹ therena vutte "asukagāme bhante"ti kāmametam

paṭivacanadānam, yena pana cittena "cintetvā"ti vuttam, tam sandhāyāha "ettakam cintetvā"ti. Tato paṭṭhāyāti vitakkamāļake ṭhatvā vitakkitakālato paṭṭhāya. "Tato param vitakkento ariyavamsā cuto hotī"ti idam tiṇṇampi ariyavamsikānam vasena gahetabbam, na ekacārikasseva. Sabbopi hi ariyavamsiko ekavārameva vitakketum labhati, na tato param. Paribāhiroti ariyavamsikabhāvato bahibhūto. Svāyam vitakkasantoso kammaṭṭhānamanasikārena na kuppati, visujjhati ca. Ito paresupi eseva nayo. Tenevāha "kammaṭṭhānasīsena gantabban"ti.

Gahetabbamevāti aṭṭhānappayutto eva-saddo. Yāpanamattameva gahetabbanti yojetabbam.

Etthāti etasmim piṇḍapātapaṭiggahaṇe. Appanti attano yāpanapamāṇatopi appam. Gahetabbam dāyakassa cittārādhanattham. Pamāṇenevāti attano yāpanappamāṇeneva appam gahetabbam. "Pamāṇena gahetabbam"ti ettha kāraṇam dassetum "paṭiggahaṇasmiñhī"ti-ādi vuttam. Makkhetīti viddhamseti apaneti. Vinipātetīti vināseti aṭṭhānaviniyogena. Sāsananti satthu sāsanam anusiṭṭhim. Na karoti nappaṭipajjati.

Sapadānacārino viya dvārapaṭipāṭiyā caraṇaṁ loluppavivajjanasantosoti āha "dvārapaṭipāṭiyā gantabban"ti.

Harāpetvāti adhikam apanetvā.

Āhāragedhato nissarati etenāti **nissaraṇaṁ.** Jighacchāya paṭivinodanatthaṁ kathā, kāyassa ṭhiti-ādipayojanaṁ pana atthāpattito āgatamevāti āha **"jighacchāya -pa- santoso nāmā"**ti.

Nidahitvā na paribhuñjitabbaṁ tadahupīti adhippāyo. Itarattha pana sikkhāpadeneva vāritaṁ. **Sāraṇīyadhamme ṭhitenā**ti sīlavantehi bhikkhūhi sādhāraṇabhogibhāve ṭhitena. (9-2)

Senāsanenāti sayanena, āsanena ca. Yattha yattha hi mañcādike, vihārādike ca seti, tam senam. Yattha yattha pīṭhādike āsati, tam āsanam. Tadubhayam ekato katvā "senāsanan"ti vuttam. Tenāha "mañco"ti-ādi. Tattha mañco masārakādi, tathā pīṭham. Mañcabhisi,

pīṭhabhisīti duvidhā bhisi. Vihāro pākāraparicchinno sakalo āvāso.

- "Dīghamukhapāsādo"ti keci. Aḍḍhayogoti dīghapāsādo.
- "Ekapassacchadanakasenāsanan"ti keci. **Pāsādo**ti caturassapāsādo.
- "Āyatacaturassapāsādo"ti keci. **Hammiyaṁ** muṇḍacchadanapāsādo. **Guhā**ti kevalā pabbataguhā. **Leṇaṁ** dvārabandhaṁ. **Aṭṭo** bahalabhittikaṁ gehaṁ, yassa gopānasiyo aggahetvā iṭṭhakāhi eva chadanaṁ hoti. "Aṭṭālakākārena kariyatī"tipi vadanti. **Māļo** ekakūṭasaṅgahito anekakoṇo patissayaviseso. "Vaṭṭākārena katasenāsanan"ti keci.

Piṇḍapāte vuttanayenevāti "sādako bhikkhu 'ajja kattha vasissāmī'ti vitakketī"ti-ādinā yathārahaṁ piṇḍapāte vuttanayena veditabbā, "tato paraṁ vitakkento ariyavaṁsā cuto hoti paribāhiro"ti, "senāsanaṁ gavesantenāpi 'kuhiṁ labhissāmī'ti acintetvā kammaṭṭhānasīseneva gantabban"ti ca evamādi sabbaṁ purimanayeneva. (9-3)

Kasmā panettha paccayasantosam dassentena mahātherena gilānapaccayasantoso na gahitoti? Na kho panetam evam daṭṭhabbanti dassento "gilānapaccayo pana piṇḍapāte eva paviṭṭho"ti āha, āharitabbatāsāmaññenāti adhippāyo. Yadi evam tattha piṇḍapāte viya vitakkasantosādayopi pannarasa santosā icchitabbāti? Noti dassento āha "tatthā"ti-ādi. Nanu cettha dvādaseva dhutaṅgāni viniyogam gatāni, ekam pana nesajjikaṅgam na katthaci viniyuttanti āha "nesajjikaṅgam bhāvanārāma-ariyavaṁsam bhajatī"ti. Ayañca attho aṭṭhakathāruļho evāti dassento "vuttampi cetan"ti-ādimāha.

"Pathavim pattharamāno viyā"ti-ādi ariyavamsadesanāya sudukkarabhāvadassanam mahāvisayatāya tassā desanāya. Yasmā nayasahassapaṭimaṇḍitā hoti ariyamaggādhigamāya vitthārato pavattiyamānā desanā yathā tam cittuppādakaṇḍe, ayañca bhāvanārāma-ariyavamsakathā ariyamaggādhigamāya vitthārato pavattiyamānā evam hotīti vuttam "sahassanayappaṭimaṇḍitam -pa- desanam ārabhī"ti. Paṭipakkhavidhamanato

abhimukhabhāvena ramaṇaṁ **āramaṇaṁ ārāmo**ti āha "abhiratīti attho"ti. Byadhikaraṇānampi padānaṁ vasena bhavati bāhiratthasamāso yathā "urasilomo, kaṇṭhekāloti āha "pahāne ārāmo assāti pahānārāmo"ti. Āramitabbaṭṭhena vā **ārāmo**, pahānaṁ ārāmo assāti pahānārāmoti evamettha samāsayojanā veditabbā. "Pajahanto ramatī"ti etena pahānārāmasaddānaṁ kattusādhanataṁ, kammadhārayasamāsañca dasseti. "Bhāvento ramatī"ti vuttattā bhāvanārāmoti etthāpi eseva nayo.

Kāmam "nesajjikangam bhāvanārāma-ariyavamsam bhajatī"ti vuttam bhāvanānuyogassa anucchavikattā, nesajjikangavasena pana nesajjikassa bhikkhuno ekaccāhi āpattīhi anāpattibhāvoti tampi saṅganhanto "terasannam dhutangānan"ti vatvā "vinayam patvā garuke thātabban"ti icchitattā sallekhassa apariccajanavasena patipatti nāma vinaye thitassevāti āha "terasannam -pa- kathitam hotī"ti. Kāmam suttā¹ bhidhammapitakesupi² tattha tattha sīlakathā āgatā eva, yehi pana gunehi sīlassa vodānam hoti, tesu kathitesu yathā sīlakathābāhullam vinayapitakam kathitam hoti, evam bhāvanākathābāhullam suttantapitakam, abhidhammapitakanca catutthena ariyavamsena kathitameva hotīti vuttam "bhāvanārāmena avasesam pitakadvayam kathitam hotī"ti. "So nekkhammam bhāvento ramatī"ti nekkhammapadam ādim katvā tattha desanāya pavattattā, sabbesampi vā samathavipassanāmaggadhammānam yathāsakampatipakkhato nikkhamanena nekkhammasaññitānam tattha āgatattā so pātho "nekkhammapālī"ti vuccatīti āha "nekkhammapāliyā kathetabbo"ti. Tenāha atthakathāyam "sabbepi kusalā dhammā nekkhammanti pavuccare"ti³. Dasuttarasuttantapariyāyenāti dasuttarasuttantadhammena, dasuttarasuttante⁴ āgatanayenāti vā attho. Sesadvayepi eseva nayo.

Soti jāgariyam anuyutto bhikkhu. Nekkhammanti kāmehi nikkhantabhāvato nekkhammasaññitam paṭhamajjhānūpacāram. "So abhijjham loke pahāyā"ti-ādinā⁶ āgatā paṭhamajjhānassa pubbabhāgabhāvanāti

^{1.} Dī 1. 3, 59 pitthādīsu.

^{2.} Abhi 2. 253 pitthe.

^{3.} Itivuttaka-Ṭṭha, 331 piṭṭhe.

^{4.} Dī 3. 227 pitthe.

^{5.} Abhi 2. 253, 261 pitthesu.

idhādhippetā, tasmā "abyāpādan" ti-ādīsupi evameva attho veditabbo. Yam panettha vattabbam, tam brahmajālaṭīkāyam¹ vuttanayena veditabbam. Sa-upāyāsānam hi aṭṭhannam samāpattīnam, aṭṭhārasannam mahāvipassanānam, catunnam ariyamaggānanca vasenettha desanā pavattāti.

"Ekam dhammam bhāvento ramati, ekam dhammam pajahanto ramatī"ti ca na idam dasuttarasutte āgataniyāmena vuttam, tattha pana "eko dhammo bhāvetabbo, eko dhammo pahātabbo"ti² ca desanā āgatā. Evam santepi yasmā atthato bhedo natthi, tasmā paṭisambhidāmagge nekkhammapāṭiyam³ āgatanīhāreneva "ekam dhammam bhāvento ramati, ekam dhammam pajahanto ramatī"ti vuttam. Esa nayo sesavāresupi. Yasmā cāyam ariyavamsadesanā nāma satthu paññattāva. Satthārā hi desitam desanam āyasmā dhammasenāpati sāriputtatthero saṅgāyanavasena idhānesi, tasmā mahā-ariyavamsasutte satthudesanānīhārena nigamanam dassento "evam kho bhikkhave bhikkhu bhāvanārāmo hotī"ti āha. Eseva nayo ito paresu satipaṭṭhāna⁴pariyāya-abhidhammaniddesapariyāyesupi. Kāmañcettha kāyānupassanāvaseneva saṅkhipitvā yojanā katā, ekavīsatiyā pana ṭhānānam vasena vitthārato yojanā veditabbā. "Aniccato"ti⁵ ādīsu yam vattabbam, tam visuddhimaggasamvaṇṇanāsu⁴ vuttanayena veditabbam. (9-4)

310. Samvarādīnam sādhanavasena padahati ettha, etehīti ca **padhānāni.** Uttamavīriyānīti seṭṭhavīriyāni visiṭṭhassa atthassa sādhanato. Samvarantassa uppannavīriyanti yathā abhijjhādayo na uppajjanti, evam satiyā upaṭṭhāpane cakkhādīnam pidahane analasassa uppannavīriyam. Pajahantassāti vinodentassa. Uppannavīriyanti tasseva pajahanassa sādhanavasena pavattavīriyam. Bhāventassa uppannavīriyanti etthāpi eseva nayo. Samādhinimittanti samādhi eva. Purimuppannasamādhi hi parato uppajjanakasamādhipavivekassa kāraṇam hotīti "samādhinimittan"ti vuttam.

Upadhivivekattāti khandhūpadhi-ādi-upadhīhi vivittatthā vinissaṭattā. **Taṁ āgammā**ti taṁ nibbānaṁ maggena adhigamahetu. Rāgādayo virajjanti ettha,

^{1.} Dī-Ṭī 1. 103, 104 piṭṭhesu.

^{3.} Khu 9. 26, 417 pitthesu.

^{5.} Visuddhi-Ţī 2. 394, 395 piṭṭhādīsu.

^{2.} Dī 3. 227 pitthe.

^{4.} Satipatthānasuttanta (Aṭṭhākathāyam)

etenāti vā **virāgo.** Evam **nirodhopi** daṭṭhabbo. Yasmā idha bojjhaṅgā missakavasena icchitā, tasmā "āramaṇavasena adhigantabbavasenavā"ti vuttam. Tattha adhigantabbavasenāti tamninnatāvasena.

Vossaggapariṇāminti vossajjanavasena pariṇāmitaṁ pariccajanavasena ceva pakkhandanavasena ca pariṇamanasīlaṁ. Tenāha "dve vossaggā"ti-ādi. Khandhānaṁ pariccajanaṁ nāma tappaṭibaddhakilesappahānavasenāti yenākārena vipassanā kilese pajahati, tenevākārena taṁnimittake, khandhe ca "pajahatī"ti vattabbataṁ arahatīti āha "vipassanā -pa- pariccajatī"ti. Yasmā vipassanā vuṭṭhānagāminibhāvaṁ pāpuṇanti ninnapoṇapabbhārabhāvena ekaṁsako nibbānaṁ "pakkhandatī'ti vattabbataṁ labhati, maggo ca samucchedavasena kilese, khandhe ca pariccajati, tasmā hathākkamaṁ vipassanāmaggānaṁ vasena pakkhandanapariccāgavossaggāpi veditabbā. Vossaggatthāyāti pariccāgavossaggatthāya ceva pakkhandanavossaggatthāya ca. Pariṇamatīti paripaccati. Taṁ pariṇamanaṁ vuṭṭhānagāminibhāvappattiyā ceva ariyamaggabhāvaṃca pāpuṇātī"ti. Sesapadesūti "dhammavicayasambojjhaṅgaṁ bhāvetī"ti-ādīsu sesasambojjhaṅgakoṭṭhāsesu. (10-3)

Bhaddakanti abhaddakānam nīvaraṇādipāpadhammānam vikkhambhanena rāgavidhamanena ekantahitattā, dullabhattā ca bhaddakam sundaram. Na hi aññam samādhinimittam evamdullabham, rāgassa ca ujuvipaccanīkabhūtam atthi. Anurakkhatīti ettha anurakkhanā nāma adhigatasamādhito yathā na parihāni hoti, evam paṭipatti, sā pana tappaṭipakkhavidhamanenāti āha "samādhī"ti-ādi. Aṭṭhikasaññādikāti aṭṭhikajjhānādikā. Saññāsīsena hi jhānam vadati. (10-4)

Ekapaţivedhavasena catusaccadhamme ñāṇanti catūsu ariyasaccesu ekābhisamayavasena pavattañāṇaṁ, maggañāṇanti attho.
Catusaccantogadhattā catusaccabbhantare nirodhadhamme¹ nibbāne ñāṇaṁ, tena phalañāṇaṁ vadahi. Yasmā maggānantarassa phalassa maggānuguṇā pavatti, yato taṁsamudayapakkhiyesu dhammesu paṭippassaddhippahānavasena pavattati, tasmā nirodhasaccepi yo maggassa sacchikiriyābhisamayo, tadanuguṇā pavattīti phalañāṇasseva dhamme ñāṇatā vuttā, na yassa kassaci nibbānārammanassa

ñāṇassa. Tena vuttaṁ "yathāhā"ti-ādi. Ettha ca maggapaññā tāva catusaccadhammassa paṭivijjhanato dhammeñāṇaṁ nāma hotu, phalapaññā pana kathanti codanā sodhitā hoti nirodhadhammaṁ ārabbha pavattanato. Duvidhāpi hi paññā aparappaccayatāya attapaccakkhato ariyasaccadhamme kiccato ca ārammaṇato ca pavattattā "dhammeñāṇan"ti veditabbā. Ariyasaccesu hi ayaṁ dhamma-saddo tesaṁ aviparītasabhāvattā, saṅkhatappavaro vā ariyamaggo, tassa ca phaladhammo. Tattha paññā taṁsahagatā dhamme ñāṇaṁ.

Anvayeñananti anugamanañanam. Paccakkhato disvati cattari saccani maggañānena paccakkhato pativijjhitvā. Yathā idānīti yathā etarahi pañcupādānakkhandhā dukkhasaccam, evam atītepi anāgatepi pañcupādānakkhandhā dukkhasaccamevāti ca sarikkhatthena vuttam. Esa nayo samudayasacce, maggasacce ca. Ayamevāti avadhārane. Nirodhasacce pana sarikkhattho natthi tassa niccattā, ekasabhāvattā ca. Evam tassa ñānassa anugatiyam ñānanti tassa dhammeñānassa "evam atītepī"ti-ādinā anugatiyam anugamane anvaye ñānam. Idam anvaye ñānanti yojanā. **Tenāhā**"ti-ādinā yathāvuttamattham pāliyā vibhāveti. **So**ti dhammañānam patvā thito bhikkhu. **Iminā dhammenā**ti dhammagocarattā gocaravohārena "dhammo"ti vuttena maggañānena, upayogatthe vā karanavacanam, iminā dhammena ñātenāti imam catusaccadhammam ñānena jānitvā thitena maggañānenāti attho. Ditthenāti dassanena saccadhammam passitvā thitena. **Pattenā**ti saccānam patvā thitena. **Viditenā**ti saccāni viditvā thitena. Pariyogālhenāti catusaccadhammam pariyogāhetvā thitenāti evam tāvettha Abhidhammatthakathāyam¹ attho vutto. Duvidhampi pana maggaphalañānam dhammeñānam. Paccavekkhanāya ca mūlam, kāranañca nayanayanassāti duvidhenāpi tena dhammenāti na na yujjati. Tathā catusaccadhammassa ñātatā, maggaphalasankhātassa vā dhammassa saccapativedhasampayogam gatattā nayanayanam hotīti tena iminā dhammena ñanavisayabhavena, ñanasampayogena va ñatenati ca attho na na yujjatīti. Atītānāgate nayam netīti atīte, anāgate ca nayam neti

harati peseti. Idam pana na maggañāṇassa kiccam, paccavekkhaṇañāṇakiccam, satthārā pana maggañāṇam atītānāgate nayanayanasadisam katam maggamūlakattā. Bhāvitamaggassa hi paccavekkhaṇā nāma hoti. Nayidam aññam ñāṇuppādanam nayanayanam, ñāṇasseva pana pavattivisesoti.

Paresam cetaso pariso ayanam paricchindanam pariyo, tasmim pariye. Tenāha "paresam cittaparicchede"ti. Avasesam sammutimhiñāṇam nāma "ñāṇan"ti sammatattā. Vacanatthato pana sammutimhi ñāṇanti sammutimhiñāṇam. Dhammeñaṇādīnam viya hi sātisayassa paṭivedhakiccassa abhāvā visayobhāsanasaṅkhātajānanasāmañnena "ñāṇan"ti sammatesu antogadhanti attho. Sammutivasena vā pavattam sammutimhiñāṇam sammutidvārena atthassa gahaṇato. Avasesam vā itarañāṇattayavisabhāgam ñāṇam tabbisabhāgasāmañnena sammutimhiñāṇamhi paviṭṭhattā sammutimhiñāṇam nāma hotīti. (11)

Kāmam sotāpattimaggañāṇādīni dukkhañāṇādīniyeva, ukkaṭṭhaniddesena panevamāha "arahattam pāpetvā"ti. Vaṭṭato niggacchati etenāti niggamanam, catusaccakammaṭṭhānam. Purimāni dve saccāni vaṭṭam pavattipavattihetubhāvato. Itarāni pana dve vivaṭṭam nivattinivattihetubhāvato. Abhinivesoti vipassanābhiniveso hoti lokiyassa ñāṇassa visabhāgūpagamanato. No vivaṭṭeti vivaṭṭe abhiniveso no hoti avisayabhāvato. Pariyattīti kammaṭṭhānatanti. Uggahetvāti vācuggatam katvā. Uggahetvāti vā pāḷito, atthato ca yathāraham savanadhāraṇaparipucchanamanasānupekkhanādivasena cittena uddham uddham gaṇhitvā. Kammam karotīti nāmarūpapariggahādikkamena yogakammam karoti.

Yadi purimesu dvīsu eva vipassanābhiniveso, tesu eva uggahādi, kathamidam catusaccakammaṭṭhānam jātanti āha "dvīsū"ti-ādi. Kāmam pacchimānipi dve saccāni abhiññeyyāni, pariññeyyatā pana tattha natthīti na vipassanābyāpāro. Kevalam pana anussavamatte ṭhatvā accantapaṇītabhāvato iṭṭham, ātappakanirāmisapītisañjananato kantam, uparūpari abhirucijananena manassa vaḍḍhanato manāpanti manasikāram pavatteti. Tenāha "nirodhasaccam nāmā"ti-ādi. Dvīsu saccesūti dvīsu saccesu

visayabhūtesu, tāni ca uddissa asammohapaṭivedhavasena. Pavattamāno hi maggo te uddissa pavatto nāma hotīti. Tīṇi dukkhasamudayamaggasaccāni. Kiccavasenāti asammuyhanavasena. Ekanti nirodhasaccam. Ārammaṇavasenāti ārammaṇakaraṇavasenapi asammuyhanakiccavasenapi tattha paṭivedho labbhateva. Dve saccānīti dukkhasamudayasaccāni. Duddasattāti daṭṭhum asakkuṇeyyattā. Oṭārikā hi dukkhasamudayā, tiracchānagatānampi dukkham, āhārādīsu ca abhilāso pākaṭo. Pīṭanādiāyūhanādivasenapi "idam dukkham, idamassa kāraṇan"ti yāthāvato ñāṇena ogāhitum asakkuṇeyyattā tāni gambhīrani. Dveti nirodhamaggasaccāni. Tāni saṇhasukhumabhāvato sabhāveneva gambhīratāya yāthāvato ñāṇena durogāhattā "duddasānī"ti. (12)

Sotāpattiyangādicatukkavannanā

311. Soto nāma ariyasoto purimapadalopena, tassa ādito sabbapaṭhamaṁ pajjanaṁ sotāpatti, paṭhamamaggapaṭilābho. Tassa aṅgāni adhigamūpāyabhūtāni kāraṇāni sotāpattiyaṅgāni. Tenāha "sotā -pa- attho"ti. Santakāyakammāditāya santadhammasamannāgamato, santadhammapavedanato ca santo purisāti sappurisā. Tattha yesaṁ vasena catusaccasampaṭivedhāvahaṁ saddhammassavanaṁ labbhati, te eva dassento "Buddhādīnaṁ sappurisānan"ti āha. Santo, sataṁ vā dhammoti saddhammo. So hi yathānusiṭṭhaṁ paṭipajjamāne apāyadukkhe, saṁsāradukkhe ca apatante dhāretīti evamādiguṇātisayayogavasena santo saṁvijjamāno, pasattho, sundaro vā dhammo, sataṁ vā ariyānaṁ dhammo, tesaṁ vā tabbhāvasādhako dhammoti saddhammo, "idha bhikkhu dhammaṁ pariyāpuṇātī"ti-ādinā¹ vuttā pariyatti. Sā pana mahāvisayatāya na sabbā sabbassa visesāvahāti tassa tassa anucchavikameva dassento āha "sappāyassa tepiṭakadhammassa savanan"ti. Yonisomanasikāro heṭṭhā vutto eva. Pubbabhāgapaṭipattiyāti vipassanānuyogassa. (13)

Aveccappasādenāti saccasampaṭivedhavasena buddhādīnam guṇe ñatvā uppannappasādena, so pana pasādo devādīsu kenacipi akampiyatāya

niccaloti āha "acalappasādenā"ti. Etthāti etasmim catukkattaye āhāracatukke. Lūkhapaņītavatthuvasenāti odanakummāsādikassa lūkhassa ceva paņītassa ca vatthuno vasena. Sā panāyam āhārassa oļārikasukhumatā "kumbhilānam āhāram upādāya morānam āhāro sukhumo"ti-ādinā¹ atthakathāyam vitthārato āgatā eva. (14 -pa- 17)

Ārammanatthitivasenāti ārammanasankhātassa pavattipaccayatthānassa vasena. Titthati etthati thiti, arammanameva thiti aramanatthiti. Tenevaha "rūpārammaṇan"ti-ādi. Ārammaṇattho cettha upatthambhanattho veditabbo, na visayalakkhanova. Upatthambhanabhūtam rūpam upetīti rūpūpāyam. Tenāha "rūpam upagatam hutvā" ti-ādi. Rūpakkhandham nissāya titthati tena vinā appavattanato. **Ta**nti rūpakkhandham nissāya thānappavattanam. Etanti "rūpūpāyan"ti etam vacanam. Rūpakkhandho gocaro pavattitthānam paccayo etassāti **rūpakkhandhagocaram**. Rūpam sahakārīkāranabhāvena patitthā etassāti **rūpappatittham**². Iti tīhi padehi abhisankhāraviñnānam patirūpakkhandhassa sahakārīkāranabhāvoyevettha vutto. Upasittam viya upasittam, yatha byanjanehi upasittam sinehitam odanam rucitam, parināmayogyañca, evam nandiyā upasittam sinehitam kammaviññānam abhirucitam hutvā vipākayogyam hotīti. Itaranti dosasahagatādi-akusalam, kusalañca upanissayakotiyā upasittam hutvāti yojanā. Evam pavattamānanti evam rūpūpāyanti desanābhāvena pavattamānam. Vipākadhammatāya vuddhim -pa- āpajjati. Tatthāpi nippariyāyaphalanibbattanavasena vuddhim, pariyāyaphalanibbattanavasena virulim, nissandaphalanibbattanavasena vepullam. Ditthadhammavedanīyaphalanibbattanena vā vuddhim, upapajjavedanīyaphalanibbattanavasena virulim, aparāpariyāyaphalanibbattanavasena **vepullam āpajjatī**ti yojanā. Ekantato vedanupāyādivasena patti nāma arūpabhaveyevāti āha "imehi panā"ti-ādi. Evañca katvā pāliyam katam vā-saddaggahanañca samatthitam hoti. "Rūpūpāyan"ti-ādinā yathā abhisankhāraviññānassa upanissayabhūtā rūpādayo gayhanti, evam tena nibbattetabbāpi te gayhantīti adhippāyena "Catukkavasena -pa- na vuttan"ti āha. Vipākopi hi

^{1.} Sam-Ttha 2. 22 pitthe.

dhammo vipākadhammaviññāṇam upagatam nāma hoti tathā nandiyā upasittattā. Tenāha "nandūpasecanan"ti. **Vitthāritāneva** siṅgālasutte. (18, 19)

Bhavati etena ārogyanti bhavo, gilānapaccayo. Parivuddho bhavo abhavo. Vuddhi-attho hi ayamakāro yathā "samvarāsamvaro¹ phalāphalan"ti² ca. Telamadhuphāṇitādīnīti ādi-saddena sappinavanītānam gahaṇam, telādīnam gahaṇamcettha nidassanamattam. Sabbassāpi gilānapaccayassa saṅgaho daṭṭhabbo. Atha vā bhavābhavoti khuddako ceva mahanto ca upapattibhavo veditabbo. Evañca sati "imesam panā"ti-ādivacanam samatthitam hoti. Bhavūpapattipahānattho hi visesato catuttha-ariyavamso. Taṇhuppādānanti taṇhuppattīnam, cīvarādihetu uppajjanakataṇhānanti attho. Padhānakaraṇakāleti bhāvanānuyogakkhaṇe. Sītādīni na khamatīti bhāvanāya pubbabhāgakālam sandhāya vuttam. Khamatīti sahati abhibhavati. Vitakkasamananti nidassanamattam. Sabbesampi kilesānam samanavasena pavattā paṭipadā. (20, 22)

Samādhijhānādibhedo dhammo pajjati paṭipajjīyati etenāti dhammapadam. Anabhijjhāva dhammapadam anabhijjhādhammapadam. Ayam tāva alobhapakkhe nayo, itarapakkhe pana anabhijjhāpadhāno dhammakoṭṭhāso anabhijjhādhammapadam. Akopoti adoso, mettāti attho. Suppaṭṭhitasatīti kāyādīsu sammadeva upaṭṭhitā sati. Satisīsenāti satipadhānamukhena. Samādhipadhānattā jhānānam "samāpatti vā"ti vuttam. Kāmam saviññāṇaka-asubhepi jhānabhāvanā alobhappadhānā hoti kāyassa jigucchanena, paṭikkūlākāraggahaṇavasena ca pavattanato, sattavidhauggahakosallādivasena panassā pavatti satipadhānāti tatiyadhammapadeneva nam saṅgaṇhitukāmo "dasa asubhavasena vā"ti āha. Hitūpasamhārādivasena pavattanato brahmavihārabhāvanā byāpādavirodhinī abyāpādappadhānāti āha "catubrahma -pa- dhammapadan"ti. Tattha adhigatāni jhānādīnīti yojanā. Gamanādito āhārassa paṭikkūlabhāvasallakkhaṇam saññāya thirabhāveneva hoti tassā thirasaññāpadaṭṭhānattāti āhāre

^{1.} Vi-Ttha 1. 18; Dī-Ttha 1. 20; Abhi-Ttha 1. 22 pitthesu. 2. Kaṅkhā-Ttha 283 pitthe.

paṭikkūlasaññāpi tatiyadhammapade eva saṅgahaṁ gatā. Āruppasamādhi-abhiññānaṁ adhiṭṭhānabhāvato kasiṇabhāvanā, sattavidhabojjhaṅgavijjāvimuttipāripūrihetuto ānāpānesu paṭhama-ānāpānabhāvanā visesato samādhipadhānāti sā¹ catutthadhammapadena saṅgahitā. Catudhātuvavatthānavasena adhigatānipi ettheva saṅgahetabbāni siyuṁ, paññāpadhānatāya pana na saṅgahitāni. (23)

Dhammasamādānesu paṭhamaṁ acelakapaṭipadā etarahi ca dukkhabhāvato, anāgatepi apāyadukkhavaṭṭadukkhāvahato. Acelakapaṭipadāti ca nidassanamattaṁ daṭṭhabbaṁ channaparibbājakānampi ubhayadukkhāvahapaṭipattidassanato. Dutiyaṁ -pa- brahmacariyacaraṇaṁ etarahi satipi dukkhe āyatiṁ sukhāvahattā. Kāmesu pātabyatā yathākāmaṁ kāmaparibhogo. Alabhamānassāpīti pi-saddena ko pana vādo labhamānassāti dasseti. (24)

Dussīlyādipāpadhammānam khambhanam paṭibandhanam khandhaṭṭho, so pana sīlādi evāti āha "guṇaṭṭho khandhaṭṭho"ti. Guṇavisayatāya khandhasaddassa guṇatthatā veditabbā. Vimuttikhandhoti paṭipakkhato suṭṭhu vimuttā guṇadhammā adhippetā, na avimuttā, nāpi vimuccamānāti tehi saha desanam āruļhā sīlakkhandhādayopi tayoti āha "phalasīlam adhippetam, catūsupi ṭhānesu phalameva vuttan"ti ca, eteneva cettha vimuttikhandhoti phalapariyāpannā sammāsaṅkappavāyāmasatiyo adhippetāti veditabbam. (25)

Upatthambhanaṭṭhena sampayuttadhammānaṁ tattha thirabhāvena pavattanato, eteneva ahirika-anottappānampi savisaye balaṭṭho siddho veditabbo. Na hi tesaṁ paṭipakkhehi akampiyaṭṭho ekantiko. Hirottappānañhi akampiyaṭṭho sātisayo kusaladhammānaṁ mahābalabhāvato, akusalānañca dubbalabhāvato. Tenāha bhagavā "abalā naṁ balīyanti, maddante naṁ parissayā"ti². Bodhipakkhiyadhammavasenāyaṁ desanāti "samathavipassanāmaggavasenā"ti vuttaṁ. (26)

Adhīti upasaggamattam, na "adhicittan"ti-ādīsu³ viya adhikārādiattham. Karaṇādhikaraṇabhāvasādhanavasena adhiṭṭhāna-saddassa attham dassento

^{1.} Tā (?) 2. Khu 1. 399; Khu 7. 9, 14; Khu 10. 6 pitthesu. 3. Khu 1. 41 pitthe.

"tena vā"ti-ādimāha. Tena adhitthānena titthanti attano sammāpatipattiyam gunādhikā purisā, te eva tattha adhitthāne titthanti sammāpattiyā, thānameva adhitthānameva sammāpatipattiyanti yojanā. **Pathamena** adhitthānena. Aggaphalapaññāti ukkatthaniddesoyam. Kilesūpasamoti kilesānam accantavūpasamo. Pathamena nayena adhitthānāni ekadesatova gahitāni, na nippadesatoti nippadesatova tāni dassetum "pathamena cā"ti-ādi vuttam. "Ādim katvā" ti etena jhānābhiññāpaññañceva maggapaññañca saṅganhāti. Vacīsaccam ādim katvāti ādi-saddena viratisaccam samganhāti. Tatiyena **ādi**-saddena kilesānam vītikkamapariccāgam, pariyutthānapariccāgam, hetthimamaggehi anusayapariccāgañca sanganhāti. "Vikkhambhitekilese"ti etena samāpattīhi kilesānam vikkhambhanavasena vūpasamam vatvā ādisaddena hetthimamaggehi kātabbam tesam samucchedavasena vūpasamam sanganhāti. Arahattaphalapaññā kathitā ukkatthaniddesatova, aññathā vacīsaccādīnampi gahanam siyā. Nibbānañca asammosadhammatāya uttamatthena saccam, sabbasamkilesapariccāganimittatāya cāgo, sabbasankhārūpasamabhāvato **upasamo**ti ca visesato vattabbatam arahatīti therassa adhippāyo. Pakatthajānanaphalatāya paññā, anavasesato kilesānam cajante ca vūpasante ca uppannattā **cāgo, upasamo**ti ca visesato aggaphalañanam vuccatīti thero āha "sesehi arahattaphalapaññā kathitā"ti. (27)

Pañhabyākaraṇādicatukkavaṇṇanā

312. Kāļakanti malīnam, cittassa apabhassarabhāvakaraṇanti attho. Tam panettha kammapathappattameva adhippetanti āha "dasa-akusalakammapathakamman"ti. Kaṇhābhijātihetuto vā kaṇham. Tenāha "kaṇhavipākan"ti. Apāyūpapatti, manussesu ca dobhaggiyam kaṇhavipāko. Ayam tassa tamabhāvo vutto. Nibbattanatoti nibbattāpanato. Paṇḍaranti odātam, cittassa pabhassarabhāvakaraṇanti attho. Sukkābhijātihetuto vā sukkam. Tenāha "sukkavipākan"ti. Saggūpapatti, manussesu sobhaggiyanca sukkavipāko. Ayam tassa jotibhāvo vutto. Ukkaṭṭhaniddesena pana "sagge nibbattanato"ti vuttam, nibbattāpanatoti attho. Missakakammanti kālena kanham, kālena sukkanti evam

missakavasena katakammam. "Sukhadukkhavipākan" ti vatvā tattha sukhadukkhānam pavatti-ākāram dassetum "missakakammañhī" ti-ādi vuttam. Kammassa kaṇhasukkasamaññā kaṇhasukkābhijātihetutāyāti apacayagāmitāya tadubhayaviddhamsakassa kammakkhayakarakammassa idha sukkapariyāyopi na icchitoti āha "ubhaya -pa- ayamettha attho" ti. Tattha ubhayavipākassāti yathādhigatassa ubhayavipākassa. Sampattibhavapariyāpanno hi vipāko idha "sukkavipāko" ti adhippeto, na accantaparisuddho ariyaphalavipāko. (29)

Pubbenivāso, sattānam cutūpapāto ca paccakkhakaraņena sacchikātabbā, itare paṭilābhena, asammohapaṭivedhavasena paccakkhakaraņena ca sacchikātabbā. Nanu ca paccavekkhaṇāpettha paccakkhato pavattatīti? Saccam paccakkhato pavattati sarūpadassanato, na pana paccakkhakaraṇavasena pavattati paccakkhakārīnam piṭṭhivattanato. Tenāha "kāyenā"ti-ādi. (30)

Ohanantīti heṭṭhā katvā hananti gamenti. Tathābhūtā ca adho sīdenti nāmāti āha "osīdāpentī"ti. Kāmanaṭṭhena kāmo ca so yathāvuttenatthena ogho cāti, kāmesu oghoti vā kāmogho. Bhavogho nāma bhavarāgoti dassetum "rūpārūpabhavesū"ti-ādi vuttam. Tattha paṭhamo upapattibhavesu rāgo, dutiyo kammabhavesu, tatiyo bhavadiṭṭhisahagato. Yathā rañjanatthena rāgo, evam ohanatthena "ogho"ti vutto. (31)

Yojentīti kammam vipākena, bhavādim bhavantarādīhi dukkhe satte yojenti ghaṭṭentīti yogā. Oghā viya veditabbā atthato kāmayogādibhāvato. (32)

Visamyojentīti paṭipannam puggalam kāmayogādito viyojenti. Samkilesakaraṇam yojanam yogo, ganthikaraṇam¹, sankhalikacakkalikānam viya paṭibaddhatākaraṇam vā ganthanam gantho, ayametesam viseso. Palibundhatīti nissaritum appadānavasena na muñceti vibandhati. Idamevāti attano yathā-upaṭṭhitam sassatavā dādikam vadati. Saccanti bhūtam. (33, 34)

Bhusam, daļhanca ārammaṇam ādīyati etehīti upādānāni. Yam pana tesam tathāgahaṇam, tampi atthato ādānamevāti āha "upādānānīti ādānaggahaṇānī"ti. Gahaṇaṭṭhenāti kāmanavasena daļham gahaṇaṭṭhena. Puna gahaṇaṭṭhenāti micchābhinivesanavasena daļham gahaṇaṭṭhena. Imināti iminā sīlavatādinā. Suddhīti samsārasuddhi. Etenāti etena diṭṭhigāhena. "Attā"ti paññāpento vadati ceva abhinivesanavasena upādiyati ca. (35)

Yavanti tāhi sattā amissitāpi samānajātitāya missitā viya hontīti yoniyo, tā pana attato aṇḍādi-uppattiṭṭhānavisiṭṭhā khandhānaṁ bhāgaso pavattivisesāti āha "yoniyoti koṭṭhāsā"ti. Sayanasminti pupphasantharādisayanasmiṁ. Tattha vā te sayitā jāyantīti sayanaggahaṇaṁ. Tayidaṁ manussānaṁ, bhummadevānañca vasena gahetabbaṁ. Pūtimacchādīsu kimayo nibbattanti. Upapatitā viyāti upapajjavasena patitā viya. Bāhirapaccayanirapekkhatāya vā upapatane sādhukārino opapātino, te eva idha "opapātikā"ti vuttā. Devamanussesūti ettha ye deve sandhāya devaggahanaṁ, te dassento "bhummadevesū"ti āha. (36)

Attano satisammosena āhāra'ppayogena maraṇato "paṭhamo khiḍḍāpadosikavasenā"ti vuttam. Attano, parassa ca manopadosavasena maraṇato "tatiyo manopadosikavasenā"ti vuttam. Neva attasañcetanāya maranti, na parasañcetanāya kevalam puññakkhayeneva maraṇato, tasmā catuttho -pa- veditabbo. (38)

Dakkhināvisuddhādicatukkavannanā

313. Dānasaṅkhātā **dakkhiṇā**, na deyyadhammasaṅkhātā. **Visujjhanā** mahājutikatā, sā pana mahāphalatāya veditabbāti āha "**mahapphalā hontī**"ti. (39)

Anariyānanti asādhūnam. Te pana nihīnācārā hontīti āha "lāmakānan"ti. Vohārāti sabbohārā abhilāpā vā, atthato tathāpavattā cetanā. Tenāha "ettha cā"ti-ādi. (41, 46)

Attantapādicatukkavaņņanā

314. Tesu **acelako**ti nidassanamattaṁ channaparibbājakānampi attakilamathaṁ anuyuttānaṁ labbhanato. (47)

Na sīlādisampannoti sīlādīhi guņehi aparipuņņo. (48)

Tamoti appakāsabhāvena tamobhūto. Tenāha "andhakārabhūto"ti, andhakāram viya bhūto jāto appakāsabhāvena, andhakārattam vā pattoti attho. Tamamevāti vuttalakkhaṇam tamameva. Param parato ayanam gati niṭṭhāti attho. "Nīce -pa- nibbattitvā"ti etena tassa tamabhāvam dasseti, "tīṇi duccaritāni paripūretī"ti etena tamaparāyanabhāvam appakāsabhāvāpattito. Tathāvidho hutvāti nīce -pa- nibbattetvā. "Ṭīṇi sucaritāni paripūretī"ti etena tassa jotiparāyanabhāvam dasseti pakāsabhāvāpattito. Itaradvaye vuttanayānusārena attho veditabbo. (49)

Ma-kāro padasandhimattam "aññamaññan"ti-ādīsu¹ viya. Catūhi vātehīti catūhi disāhi utthitavātehi. Parappavādehīti paresam ditthigatikānam vādehi. "Akampiyo"ti vatvā tattha kāraņamāha "acalasaddhāyā"ti, maggenāgatasaddhāya. Patanubhūtattāti ettha dvīhi kāraņehi patanubhāvo veditabbo adhiccuppattiyā, pariyutthānamandatāya ca. Sakadāgāmissa hi vattānusārimahājanassa viya kilesā abhinham na uppajjanti, kadāci karahaci uppajjanti. Uppajjamānā ca vattānusārimahājanassa viya maddantā abhibhavantā na uppajjanti, dvīhi pana maggehi pahīnattā mandā mandā tanukākārā uppajjanti. Iti kilesānam patanubhāvena gunasobhāya gunasoraccena sakadāgāmī samanapadumo nāma. Rāgadosānam abhāvāti gunavikāsavibandhānam sabbaso rāgadosānam abhāvena. Khippameva pupphissatīti aggamaggavikasanena nacirasseva anavasesagunasobhāpāripūriyā pupphissati. Tasmā anāgāmī samanapundarīko nāma. "Pundarīkan'ti hi rattakamalam vuccati. Tam kira lahum pupphissati. 'Paduman'ti setakamalam, tam cirena pupphissatī'ti vadanti. **Ganthakārakilesānan**ti cittassa baddhabhāvakarānam uddhambhāviyakilesānam sabbaso abhāvā

samaņasukhumālo nāma samaņabhāvena paramasukhumālabhāvappattito. (50)

Catukkavannanā niţţhitā.

Niţţhitā ca paţhamabhāṇavāravaṇṇanā.

Pañcakavannanā

315. Saccesu viya ariyasaccāni khandhesu upādānakkhandhā antogadhāti khandhesu lokiyalokuttaravasena vibhāgam dassetvā itaresu tadabhāvato "upādānakkhandhā lokiyāvā"ti āha. (2)

Gantabbāti upapajjitabbā. Yathā hi kammabhavo paramatthato asatipi kārake paccayasāmaggiyā siddho "taṁsamaṅgināsantānalakkhaṇena sattena kato"ti voharīyati, evaṁ upapattibhavalakkhaṇāgatiyo paramatthato asatipi gamake taṁtaṁkammavasena yehi tāni kammāni "katānī"ti vuccanti, tehi "gantabbā"ti voharīyanti. Yassa uppajjati, taṁ brūhanto eva uppajjatīti ayo, sukhaṁ. Natthi ettha ayoti nirayo. Tato eva assādetabbaṁ ettha natthīti "nirassādo"ti āha. Avīci-ādi-okāsepi nirayasaddo niruļhoti āha "sahokāsena khandhā kathitā"ti. Sūriyavimānādi-okāsavisesepi loke deva-saddo niruļoti āha "catutthe okāsopī"ti. (4)

Āvāseti visaye bhummam. Peto vā ajagaro vā hutvā nibbattati laggacittatāya, hīnajjhāsayatāya ca. Tehi tehi kāraņehi ādīnavam dassetvā yathā aññe na labhanti, evam karoti attano visamanissitatāya, balavanissitatāya ca. Vaṇṇamacchariyena attano eva vaṇṇam vaṇṇeti, paresam vaṇṇo¹ "kim vaṇṇo eso"ti tam tam dosam vadati. Paṭivedhadhammo ariyānamyeva hoti, te ca tam na maccharāyanti macchariyassa sabbaso pahīnattāti tassa asambhavo evāti āha "pariyattidhamme"ti-ādi. "Ayam imam dhammam uggahetvā aññathā attham viparivattetvā nassessatī"ti dhammānuggahena na deti. "Ayam imam dhammam uggahetvā

uddhato unnaļo avūpasantacitto apuñnam pasavissatī"ti **puggalānuggahena na deti. Na tam** adānam **macchariyam** macchariyalakkhaņasseva abhāvato. (5)

Cittam nivārentīti jhānādivasena uppajjanakam kusalacittam nisedhenti tathāssa uppajjitum na denti. **Nīvaraņappatto**ti nīvaranāvattho. "Arahattamaggavajjho"ti etena bhavarāgānusayassapi nīvaranabhāvam anujānāti, tam vicāretabbam. Kimettha vicāretabbam? "Āruppe kāmacchandanīvaranam patieca thinamiddhanīvaranan"ti¹ ādivacanato nayidam "pariyāyena vuttan"ti sakkā vattum sabbesampi tebhūmakadhammānam kāmanīyatthena kāmabhāvato bhavarāgassapi kāmacchandabhāvassa icchitattā. Tasmā "kāmacchando nīvaranappatto"ti bhavarāgānusayamāha. So hi arahattamaggavajjho. "Yā tasmim samaye cittassa akalyatā"ti² ādivacanato **thinam cittagelaññam.** Tathā "yā tasmim samaye vedanākkhandhassā"ti³ ādivacanato **middham** khandhattayagelaññam. Ettha ca cittagelaññena cittasseva akalyatā, khandhattayagelaññena pana rūpakāyassapi thinamiddhassa niddāhetuttā. Tathā uddhaccanti uddhaccassa arahattamaggavajjhatam upasamharati tathāsaddena, na ubhayatam. Na hi tassa tādisī ubhayatā atthi. Yam pana keci vadanti "puthujjanasantānavutti sekkhasantānavuttī"ti, tam idha anupayogi sekkhasantānavuttino eva cettha adhippetattā. (6)

Tehīti samyojanehi. "Orambhāgiyāni uddhambhāgiyānī"ti visesam anāmasitvā "samyojanānī"ti sādhāraṇato paduddhāro idāni vuccamānacatukkānucchavikatāvasena, kassacipi kilesassa avikkhambhitattā kathañcipi avinipāteyyatāmutto kāmabhavo ajjhattaggahaṇassa visesapaccayattā imesam sattānam abbhantaraṭṭhena anto nāma. Rūpārūpabhavo tabbipariyāyato bahi nāma. Tathā hi yassa orambhāgiyāni samyojanāni appahīnāni, so ajjhattasamyojano vutto, yassa tāni pahīnāni, so bahiddhāsamyojano, tasmā anto asamucchinnabandhanatāya, bahi ca pavattamānabhavangasantānatāya antobaddhā bahisayitā nāma. Nirantarappavattabhavangasantānavasena hi sayitavohāro. Kāmam nesam bahibandhanampi asamucchinnam, antobandhanassa pana thūlatāya evam

vuttam. Tenāha "tesañhi kāmabhave bandhanan"ti. Iminā nayena sesadvayepi attho veditabbo. Asamucchinnesu ca orambhāgiyasamyojaniyesu laddhappaccayesu uddhambhāgiyasamyojanāni agaṇanūpagāni hontīti. Ariyānamyeva vasenettha catukkassa uddhaṭattā labbhamānāpi puthujjanā na uddhaṭā. (7, 8)

Sikkhākoṭṭhāsoti sikkhitabbabhāgo. Pajjati sikkhā etenāti **sikkhāpadaṁ**, sikkhāya adhigamupāyoti. **Āgatāyeva**, tasmā tattha āgatanayeneva veditabbāti adhippāyo. (9)

Abhabbatthanadipancakavannana

316. **Desanāsīsamevā**ti desanāpadeso eva, tasmā **sotāpannādayopi abhabbā**. Yadi evam kasmā tathā desanāti āha **"puthujjanakhīṇāsavānan"**tiādi. (10)

Nātibyasane yesam nātīnam vināso, tesam hitasukham viddhamseti, tasmā byasatīti¹ byasanam. Bhogabyasanepi eseva nayo. Rogabyasanādīsu pana "yassa rogo"ti-ādinā yojetabbam. Neva akusalāni asamkiliṭṭhasabhāvattā. Na tilakkhaṇāhatāni abhāvadhammattā. Itaram pana vuttavipariyāyato akusalam, tilakkhaṇāhatañca. (11)

Gunehi samiddhabhāvā sampadā. (12)

Vatthusandassanāti yasmim vatthusmim tassa āpatti, tassa sarūpato dassanā. Āpattisandassanāti yam āpattim so āpanno, tassā dassanā. Samvāsapaṭikkhepoti uposathapavāraṇādisamvāsassa paṭikkhipanam akaraṇam. Sāmīcipaṭikkhepo abhivādanādisāmīcikiriyāya akaraṇam. Codayamānenāti codentena. Cuditakassa kāloti cuditakassa puggalassa codetabbakālo. Puggalanti codetabbam puggalam. Upaparikkhitvāti "ayam cuditakalakkhaṇe tiṭṭhati, na tiṭṭhatī"ti vīmamsitvā. Ayasam āropeti "ime mam abhūtena abbhācikkhantā anayabyasanam āpādentī"ti bhikkhūnam ayasam uppādeti. (15)

Padhāniyangapancakavannanā

317. Padahatīti **padahano**, bhāvanamanuvutto yogī, tassa bhāvo bhāvanānuyogo padahanabhāvo. Padhānamassa atthīti padhāniko, kakārassa ya-kāram katvā "padhāniyo" ti vuttam. "Abhinīhārako patthāya āgatattā"ti vuttattā paccekabodhisattasāvakabodhisattānampi paṇidhānato pabhuti āgatā saddhā āgamanasaddhā eva, ukkatthaniddesena pana "sabbaññubodhisattānan"ti vuttam. Adhigamato samudāgatattā aggamaggaphalasampayuttāpi adhigamanasaddhā nāma, yā sotāpannassa angabhavena vutta. Acalabhavenati patipakkhena anabhibhavaniyatta niccalabhāvena. **Okappanan**ti okkantitvā pakkhanditvā adhimuccanam. Pasāduppatti pasādanīye vatthusmim pasīdanameva. Suppatividdhanti sutthu patividdham, yathā tena pativedhena sabbañnutannānam hatthagatam ahosi, tathā patividdham. Yassa buddhasubuddhatāya saddhā acalā asampavedhī, tassa dhammasudhammatāya, samghasuppatipannatāya ca saddhā na tathāti atthānametam anavakāso. Tenāha bhagavā "yo bhikkhave buddhe pasanno, dhamme so pasanno, samghe so pasanno"ti-ādi. Padhānavīriyam ijihati "addhā imāya patipadāya jarāmaraņato muccissāmī"ti sakkaccam padahanato.

Appa-saddo abhāvattho "appa-saddassa -pa- kho panā"ti-ādīsu viyāti āha "arogo"ti. Samavepākiniyāti yathābhuttamāhāram samākāreneva paccanasīlāya. Daļham katvā paccantī hi gahaņīghorabhāvena pittavikārādivasena rogam janeti, sithilam katvā paccantī mandabhāvena vātavikārādivasena. Tenāha "nātisītāya nāccuņhāyā"ti. Gahaņītejassa mandatikkhatāvasena sattānam yathākkamam sītuņhasahagatāti āha "atisītagahaņiko"ti-ādi. Yāthāvato accayadesanā attano āvikaraṇam nāmāti āha "yathābhūtam attano aguṇam pakāsetā"ti. Udayatthagāminiyāti saṅkhārānam udayam, vayañca paṭivijjhantiyāti ayamettha atthoti āha "udayañcā"ti-ādi. Parisuddhāyāti nirupakkilesāya. Nibbijjhitumsamatthāyāti tadaṅgavasena avasesam pajahitum samatthāya. Tassa tassa dukkhassa khayagāminiyāti yam dukkham imasmim ñāṇe anadhigate pavattāraham, adhigate na pavattati, tam sandhāya vadati. Tathā hesa yogāvacaro "cūļasotāpanno"ti vuccati. (16)

Suddhāvāsādipañcakavaņņanā

318. "Suddhā āvasimsū"ti-ādinā addhattayepi tesam suddhāvāsapariyāyo abyabhicārīti dasseti. Kilesamalarahitāti nāmakāyaparisuddhim vadanto eva rūpakāyaparisuddhimpi atthato dasseti. Tenāha "anāgāmikhīṇāsavā"ti. (17)

Āvuno majihanti avihādīsu vattha vattha uppanno, tattha tattha āyuno majjham anatikkamitvā. Antarāvāti tassa antarāva orameva. Majjham upahaccāti āyuno majjham aticca. Tenāha "atikkamitvā"ti. Appayogenāti anussahanena. Akilamantoti akilanto. Sukhenāti akicchena. Uddham vāhibhāvena uddhamassa tanhāsotam, vattasotamcāti **uddhamsoto**, uddham vā gantvā patilabhitabbato uddhamassa maggasotanti uddhamsoto. Akanittham gacchatīti **akanitthagāmī**. **Sodhetvā**ti tattha tattha uppajjanto te te devaloke sodhento viya hotīti vuttam "cattāro devaloke sodhetvā"ti. Tattha tattha vā uppajjitvā puna anuppajjanārahabhāveneva tatopi gacchanto devūpapatti bhavasaññite attano khandhaloke bhavarāgamalam visodhetvā vikkhambhetvā. Ayañhi avihesu kappasahassam vasanto arahattam pattum asakkunitvā atappam gacchati, tatthāpi dve kappasahassāni vasanto arahattam pattum asakkunitvā sudassam gacchati, tatthāpi cattārikappasahassāni vasanto arahattam pattum asakkunitvā sudassim gacchati, tatthāpi atthakappasahassāni vasanto arahattam pattum asakkunitvā akanittham gacchati, tattha vasanto aggamaggam adhigacchati. (18)

Cetokhilapañcakavannanā

319. **Cetokhilā** nāma atthato vicikicchā, kodho ca, te pana yasmim santāne uppajjanti, tassa kharabhāvo kakkhaļabhāvo hutvā upatiṭṭhanti, pageva attanā sampayuttacittassāti āha "cittassa thaddhabhāvo"ti. Yathā lakkhaṇapāripūriyā gahitāya sabbā satthurūpakāyasirī gahitāva nāma hoti, evam sabbaññutāya sabbā dhammakāyasirī gahitā eva nāma hotīti tadubhayavatthukameva kaṅkham dassento "sarīre kaṅkhamāno"ti-ādimāha. Ātapati kileseti

ātappam, sammāvāyāmoti āha "ātappāyāti vīriyakaraṇatthāyā"ti.

Punappunam yogāyāti bhāvanam punappunam yuñjanāya. Satatakiriyāyāti bhāvanāya nirantarappayogāya. "Paṭivedhadhamme kaṅkhamāno"ti ettha katham lokuttaradhamme kaṅkhā pavattatīti? Na ārammaṇakaraṇavasena, anussavākāraparivitakkaladdhe parikappitarūpe kaṅkhā pavattatīti dassento āha "vipassanā -pa- vadanti, taṁ atthi nu kho natthīti kaṅkhatī"ti. Sikkhāti cettha pubbabhāgasikkhā veditabbā. "Kāmañcettha visesuppattiyā mahāsāvajjatāya ceva saṁvāsanimittaghaṭṭanāhetu abhiṇhuppattikatāya ca 'sabrahmacārīsū'ti kopassa visayo visesetvā vutto, tato aññatthāpi pana kopo 'na cetokhilo'ti na sakkā viññātun"ti keci. Yadi evaṁ vicikicchāyapi ayaṁ nayo āpajjati, tasmā yathārutavaseneva gahetabbaṁ. (19)

Cetasovinibandhādipañcakavaṇṇanā

320. Pavattitum appadānavasena kusalacittam vinibandhantīti cetaso¹ vinibandhā. Tam pana vinibandhantā muṭṭhigāham gaṇhantī viya hontīti āha "cittam bandhitvā"ti-ādi. Kāmagiddho puggalo vatthukāme viya kilesakāmepi assādeti abhinandatīti vuttam "vatthukāmepi kilesakāmepī"ti. Attano kāyeti attano karajakāye, attabhāve vā. Bahiddhārūpeti paresam kāye, anindriyabaddharūpe ca. Udaram avadihati upacinoti paripūretīti udarāvadehakam. Seyyasukhanti seyyāya sayanavasena uppajjanakasukham. Samparivattakanti samparivattetvā. Paṇidhāyāti taṇhāvasena paṇidahitvā. Iti pañcavidhopi lobhaviseso eva cetovinibandho vuttoti veditabbo. (20)

Lokiyāneva kathitāni rūpindriyānamyeva kathitattā.

Paṭhamadutiyacatutthāni lokiyāni parittabhūmakattā. Tatiyapañcamāni kāmarūpaggabhūmikattā, kāmarūpārūpaggabhūmikattā ca.

Lokiyalokuttarāni kathitānīti ānetvā yojanā.

"Samathavipassanāmaggaphalavasenā" ti vattabbam.

"Samathavipassanāmaggavasenā"ti vuttam. (21, 22, 23)

Nissaraniyapañcakavannanā

321. Nissarantīti **nissaranīyā**ti vattabbe rassam katvā niddeso. Kattari hesa anīya-saddo yathā "niyyānikā"ti. Tenāha "nissatā"ti. Kuto pana nissatāti? Yathāsakampatipakkhato. Nijjīvatthena **dhātuyo**ti āha "attasuññasabhāvā" ti. Atthato pana dhammadhātumanoviññāṇadhātuvisesā. Tādisassa bhikkhuno kilesavasena kāmesu manasikāro nāma natthīti āha "vīmamsanatthan"ti. "Nekkhammanissitam idani me cittam, kim nu kho kāmavitakkopi uppajjatī"ti vīmamsantassāti attho. **Pakkhandanam** nāma anuppaveso, so pana tattha natthīti āha "na pavisatī"ti. Pasādam nāma abhirucisantitthanam, vimuccanam adhimuccananti tam sabbam pakkhipanto vadati "pasādam nāpajjatī"ti-ādi. Evambhūtam panassa cittam tattha katham titthatīti āha "yathā panā"ti-ādi. Tanti pathamajjhānam. Assāti bhikkhuno. Cittam pakkhandatīti parikammacittena saddhim jhānacittam ekatthavasena ekajjham gahetvā vadati. Gocare gatattāti attano ārammane eva pavattattā. Ahānabhāgiyattāti thitibhāgiyattā, visesabhāgiyattā vā. Sutthu vimuttanti vikkhambhanavimuttiyā sammadeva vimuttam. Cittassa, kāyassa ca hananato vighāto, dukkham. Paridahanato parilāho, kāmadaratho. Na vedayati anuppajjanato. Nissaranti tatoti nissaranam. Ke nissaranti? Kāmā. Evañca katvā kāmānanti kattari sāmivacanam sutthu yujjati. Yadaggena kāmā tato "nissatā" ti vuccanti, tadaggena jhānampi kāmato "nissatan" ti vattabbatam labhatīti vuttam "kāmehi nissatattā"ti. Evam vikkhambhanavasena kāmanissaranam vatvā idāni samucchedavasena accantatova nissaraṇam dassetum "yo panā"ti-ādi vuttam. (24-1)

Sesapadesūti sesakoṭṭhāsesu. Ayaṁ pana visesoti visesaṁ vadantena "taṁ jhānaṁ pādakaṁ katvā"ti-ādiko avisesoti vatvā dutiyatatiyavāresu sabbaso anāmaṭṭho, catutthavāre pana ayampi visesoti dassetuṁ "accantanissaraṇe cettha arahattaphalaṁ yojetabban"ti vuttaṁ. (24-2-4)

Yasmā arūpajjhānam pādakam katvā aggamaggam adhigantvā arahatte thitassa cittam sabbaso rūpehi nissaṭam nāma hoti. Tassa hi phalasamāpattito

vuṭṭhāya vīmaṁsanatthaṁ rūpābhimukhaṁ cittaṁ pesentassa idamakkhātanti samathayānikānaṁ vasena heṭṭhā cattāro vārā kathitā, idaṁ pana sukkhavipassakassa vasenāti āha "suddhasaṅkhāre"ti-ādi. Puna sakkāyo natthīti uppannanti idāni me sakkāyappabandho natthīti vīmaṁsantassa uppannaṁ. (24-5)

Vimuttāyatanapañcakavannanā

322. Vimuttiyā vattadukkhato vimuccanassa āyatanāni kāranāni vimuttāyatanānīti āha "vimuccanakāraṇānī"ti. Pāli-attham jānantassāti "idha sīlam āgatam, idha samādhi, idha paññā"ti-ādinā tam tam pāļi-attham yāthāvato jānantassa. **Pālim jānantassā**ti tadatthajotanam pālim yāthāvato upadhārentassa. **Tarunapītī**ti sañjātamattā mudukā pīti jāyati. Katham jāyati? Yathādesitadhammam upadhārentassa tadanucchavikameva attano kāyavacīmanosamācāram parigganhantassa somanassappattassa pamodalakkhanam pāmojjam jāyati. **Tutthākārabhūtā balavapītī**ti purimuppannāya pītiyā vasena laddhāsevanattā ativiya tutthākārabhūtā kāyacittadarathapassambhanasamatthāya passaddhiyā paccayo bhavitum samatthā balappattā pīti jāyati. Yasmā nāmakāye passaddhe rūpakāyopi passaddho eva hoti, tasmā "nāmakāyo patipassambhati" icceva vuttam. Sukham patilabhatīti vakkhamānassa cittasamādhānassa paccayo bhavitum samattham cetasikam nirāmisam sukham paţilabhati vindati. "Samādhiyatī"ti ettha na yo koci samādhi adhippeto, atha kho anuttarasamādhīti dassento "arahatta -pa- samādhiyatī"ti āha. "Ayañhī"ti-ādi tassā desanāya tādisassa puggalassa yathāvuttasamādhipatilābhassa kāranabhāvavibhāvanam. Tassa vimuttāyatanabhāvo. Osakkitunti nayitum. Samādhiyeva samādhinimittanti kammatthānapāli-ārulho samādhiyeva parato uppajjanakabhāvanāsamādhissa kāranabhāvato samādhinimittam. Tenāha "ācariyasantike"ti-ādi. (25)

Vimutti vuccati arahattam sabbaso kilesehi paṭippassaddhivimuttīti katvā. Paripācentīti sādhenti nipphādenti. Aniccānupassanāñāņe nissayapaccayabhūte uppannasaññā, tena ñāṇena sahagatāti attho.

sesesupi eseva nayo. Yam panettha vattabbam, tam visuddhimaggasamvannanāyam¹ vuttanayena veditabbam. (26)

Pañcakavaṇṇanā niṭṭhitā.

Chakkavannanā

323. Attānam adhi ajihattā, adhi-saddo samāsavisaye adhikārattham, pavatti-atthañca gahetvā pavattatīti attānam, adhikicca uddissa pavattā ajihattā, ajjhattesu bhavāni ajihattikānīti niyakajjhattesupi abbhantarāni cakkhādīni vuccanti, tāni pana yena ajjhattabhāvena "ajjhattikānī"ti vuccanti, tamattham pākatam katvā dassento "ajjhattajjhattikānī"ti āha. Saddatthato pana ajjhattajjhattajjhattajjhattikāni yathā "venayiko"ti² datthabbam. **Tato ajjhattajjhattato**ti tato ajjhattajjhattato, yāni ajjhattikāni vuttāni. Ajjhattikānañhi patiyogīni bāhirāni ajjhattadhammānam viya bahiddhādhammā. "Ajjhattikānī"ti hi saparasantānikāni cakkhādīni vuccanti, tathā rūpādīni "bāhirānī"ti. Ajjhattāni pana sasantānikā eva cakkhurūpādayo, tato aññeva bahiddhāti. "Viññānasamūhā"ti ettha yadipi tesam viññānānam samodhānam natthi bhinnakālikattā, cittena pana ekajjham abhisamyūhanavasena samūhatā vuttā yathā "vedanākkhandho"ti³. **Cakkhupasādanissitan**ti cakkhupasādam nissāya paccayam labhitvā uppannam kusalākusalavipākaviñnānam cakkhuviñnānatāsāmañnena ekajjham katvā vuttam. Cakkhusannissito samphasso, na cakkhudvāriko. Ime dasa samphasseti ime pasādavatthuke dasa vipākasamphasse thapetvā. Eteneva nayenāti etena phasse vutteneva nayena. tanhāchakke tanham ārabbha pavattāpi taṇhā **dhammataṇhā**ti veditabbā. (1-pa- 8)

Appaţissayoti appaţissavo, va-kārassa ya-kāram katvā niddeso. Garunā kismiñci vutte gāravavasena paţissavanam **paṭissavo**, paṭissavabhūtam, tamsabhāgañca yam kiñci gāravam, natthi etasmim paṭissavoti **appaṭissavo**, gāravarahito. Tenāha "anīcavuttī"ti. yathā cetiyam uddissa katam

^{1.} Visuddhi-Tī 1. 79, 343 pitthesu.

^{2.} Ma 1. 193; Am 3. 20; Vi 1. 3 pitthesu.

^{3.} Abhi 2. 1 pitthe.

satthu katasadisam, evam cetiyassa purato katam satthu purato katasadisamevāti āha "parinibbute panā"ti-ādi. Sakkaccam na gacchatīti ādaram gāravam uppādetvā na upasankamati. Yathā sikkhāya ekadese kopite, agārave ca kate sabbā sikkhā kuppati, sabbattha ca agāravam katam nāma hoti samudāyato samvarasamādānam avayavato bhedoti. Evam ekabhikkhusmimpi -pa- agāravo katova hoti. Anādariyamattenapi sikkhāya aparipūriyevāti āha "apūrayamānova sikkhāya agāravo nāmā"ti. Appamādalakkhaṇam sammāpaṭipatti. Duvidhanti dhammāmisavasena duvidham. (9)

Somanassūpavicārāti somanassasahagatā vicārā adhippetā, upasaddo ca nipātamattanti āha "somanassasampayuttā vicārā"ti. Tathā hissa abhidhamme¹ "cāro vicāro -pa- upavicāro"ti niddeso pavatto.

Somanassakāraṇabhūtanti sabhāvato, saṅkappatopi somanassassa uppattiyā paccayabhūtam. Kāmam parittabhūmakā vitakkavicārā aññamaññamaviyogino, kiriyābhedato pana paṭhamābhinipātatāya vitakkassa byāpāro sātisayo. Tato param vicārassāti tam sandhāya "vitakketvā"ti pubbakālakiriyāvasena vatvā "vicārena paricchindatī"ti vuttam. Laddhapubbāsevanassa vicārassa byāpāro paññā viya hoti. Tathā hi "vicāro vicikicchāya paṭipakkho"ti peṭake vuttam. "Diṭṭhisāmaññagato"ti ettha yāya diṭṭhiyā puggalo diṭṭhisāmaññam gato vutto, sā paṭhamamaggasammādiṭṭhi kosambakasutte adhippetoti āha "kosambakasutte paṭhamamaggo kathito"ti. Idhāti imasmim sutte. Catūsupi maggesu sammādiṭṭhi diṭṭhiggahaṇena gahitāti āha "cattāropi maggā kathitā"ti. (11, 14-5)

Vivādamūlachakkavaņņanā

325. **Kodhano**ti kujjhanasīlo. Yasmā so appahīnakodhatāya vigatakodhano nāma na hoti, tasmā "kodhena samannāgato" ti āha. Upanāho etassa atthi, upanayhanasīloti vā **upanāhī. Vivādo** nāma uppajjamāno yebhuyyena paṭhamaṁ dvinnaṁ vasena

uppajjatīti vuttam "dvinnam bhikkhūnam vivādo"ti. So pana yathā bahūnam anatthāvaho hoti, tam nidassanamukhena dassento "kathan"ti-ādimāha. Abbhantaraparisāyāti parisabbhantare.

Paraguṇamakkhanāya pavattopi attano kārakaṁ gūthena paharantaṁ gūtho viya paṭhamataraṁ makkhetīti **makkho**, so etassa atthīti **makkhī**. Palāsatīti palāso, parassa guṇe ḍaṁsitvā viya apanetīti attho, so etassa atthīti **palāsī**. Palāsīpuggalo hi dutiyassa dhuraṁ na deti, samaṁ pasāretvā tiṭṭhati. Tenāha "yugaggāhalakkhaṇena palāsena samannāgato"ti. "Issukī"ti-ādīnaṁ padānaṁ attho heṭṭhā vuttanayattā suviññeyyova. kammapathappattāya micchādiṭṭhiyā vasenettha micchādiṭṭhi veditabbāti āha "natthikavādī ahetukavādī akiriyavādī"ti. (15)

Nissaraniyachakkavannanā

326. Hāpetvāti kusalacittam parihāpetvā pavattitumeva appadānavasena. Abhūtam byākaraṇam byākaroti "mettā hi kho me cetovimutti bhāvitā"tiādinā¹ attani avijjamānam guṇabyāhāram byāharati. Cetovimutti-saddam apekkhitvā "nissaṭā"ti vuttam. Puna byāpādo natthīti idāni mama byāpādo nāma natthi² sabbaso natthīti ñatvā. (17-1)

"Animittā"ti vatvā yesam nimittānam abhāvena arahattaphalasamāpattiyā animittatā, tam dassetum "sā hī"ti-ādi vuttam. Tattha rāgassa nimittam, rāgo eva vā nimittanti rāganimittam. Ādi-saddena dosanimittādīnam sangaho daṭṭhabbo. Rūpavedanādisankhāranimittam rūpanimittādi. Tesaññeva niccādivasena upaṭṭhānam niccanimittādi. Tayidam nimittam yasmā sabbena sabbam arahattaphale natthi, tasmā vuttam "sā hi -pa- animittāti vuttā"ti. Nimittam anusaratīti tam nimittam anugacchati ārabbha pavattati. (17-5)

Asmimānoti "asmī"ti pavatto attavisayo māno. Ayam nāma aham asmīti rūpalakkhaņo, vedanādīsu vā añnataralakkhano ayam nāma

attā aham asmi. "Asmī"ti māno samugghātīyati etenāti asmimānasamugghāto, arahattamaggo. Puna asmimāno natthīti tassa anuppattidhammatāpādanam kittento samugghātattameva vibhāveti. (17-6)

Anuttariyādichakkavannanā

327. Natthi etesam uttarāni visiṭṭhānīti anuttarāni, anuttarāni eva anuttariyāni yathā anantameva ānantariyanti āha "anuttariyānīti anuttarānī"ti. Dassanānuttariyam nāma anuttaraphalavisesāvahattā. Esa nayo sesesupi. Satta vidha ariyadhanalābhoti sattavidhasaddhādilokuttaradhanalābho. Sikkhattayapūraṇanti adhisīlasikkhādīnam tissannam sikkhānam paripūraṇam. Tattha paripūraṇam nippariyāyato asekkhānam vasena veditabbam. Kalyāṇaputhujjanato paṭṭhāya hi satta sekkhā tisso sikkhā pūrenti nāma, arahā pana paripuṇṇasikkhoti. Iti imāni anuttariyāni lokiyalokuttarāni kathitāni. (18)

Anussatiyo eva diṭṭhadhammikasamparāyikādihitasukhānam kāraṇabhāvato ṭhānānīhi anussatiṭṭhānāni. Evaṁ anussaratoti yathā buddhānussati visesādhigamassa ṭhānaṁ hoti, evaṁ "itipi so bhagavā"tiādinā¹ buddhaguṇe anussarantassa. Upacārakammaṭṭhānanti paccakkhato upacārajjhānāvahaṁ kammaṭṭhānaṁ, paramparāya pana yāva arahattā lokiyalokuttaravisesāvahaṁ. (19)

Satatavihārachakkavannanā

328. Niccavihārāti sabbadā pavattanakavihārā. Ṭhapetvā hi samāpattivelam, bhavangavelanca khīnāsavā imināva chaļangupekkhāvihārena sabbakālam viharanti. Cakkhunā rūpam disvāti nissayavohārena vuttam. Sasambhārakathā hesā yathā "dhanunā vijjhatī"ti². Tasmā nissayasīsena nissitassa gahaṇam daṭṭhabbanti āha "cakkhuviññāṇena disvā"ti. Iṭṭhe arajjantoti iṭṭhe ārammaṇe rāgam anuppādento maggena samucchinnattā. Neva sumano hoti gehasitapemavasenapi. Na dummano pasādañnathattavasenapi. Asamapekkhaneti iṭṭhepi aniṭṭhepi majjhattepi ārammaṇe na

samam na sammā ayoniso gahane. Yo akhīnāsayānam moho uppajjati, tam anuppādento maggeneva tassa samugghātitattā. Ñānupekkhāvaseneva upekkhako viharati majjhatto. Ayañcassa patipattivepullappattiyā, paññavepullappattiyā vāti āha "satiyā"ti-ādi. Chalangupekkhāti chasu dvāresu pavattā satisampajaññassa vasena chāvayavā upekkhā. Nānasampayuttacittāni labbhanti tehi vinā sampajānatāya asambhavato. Mahācittānīti aṭṭhapi mahākiriyacittāni labbhanti. Satatavihārāti ñānuppattipaccayarahitakālepi pavattibhedanato. **Dasacittānī**ti attha mahākiriyacittāni hasituppādavotthabbanacittehi saddhim dasa cittāni labbhanti, Arajjanādussanavasena pavatti tesampi sādhāranāti. "Upekkhato viharatī"ti vacanato chalangupekkhāvasena āgatānam imesam satatavihārānam "somanassam katham labbhatī"ti codetvā "āsevanato labbhatī"ti sayameva pariharatīti. Kiñcāpi khīnāsavo itthānitthepi ārammane majjhatte viya bahulam upekkhako viharati attano parisuddhapakatibhāvāvijahanato, kadāci pana tathā cetobhisankhārābhāve yam tam sabhavato ittham arammanam, tattha yāthāvasabhāvaggahanavasenapi arahato cittam somanassasahagatam hutvā pavattateva, tañca kho pubbāsevanavasena. Tenāha "āsevanato labbhatī"ti. (20)

Abhijātichakkavaņņanā

329. "Abhijātiyo"ti ettha abhi-saddo upasaggamattam, na atthavisesajotakoti āha "jātiyo"ti. Abhijāyatīti etthāpi eseva nayo. Jāyatīti ca antogadhahetu-atthapadam, uppādetīti attho. Jātiyā, tamnibbattakakammānanca kanhasukkapariyāyatāya yam vattabbam, tam heṭṭhā vuttameva. Paṭippassambhanavasena kilesānam nibbāpanato nibbānam sace kanham bhaveyya yathā tam dasavidham dussīlyakammam. Sace sukkam bhaveyya yathā tam dānasīlādikusalakammam. Dvinnampi kanhasukkavipākānam. Arahattam adhippetam "abhijāyatī"ti vacanato. Tam kilesanibbānante jātattā nibbānam yathā rāgādīnam khayante jātattā rāgakkhayo dosakkhayo mohakkhayoti. (21)

Nibbedhabhāgiyachakkavannanā

Nibbedho vuccati nibbānaṁ maggañāṇena nibbijjhitabbaṭṭhena, paṭivijjhitabbaṭṭhenāti attho. **Nirodhānupassanāñāṇe**ti nirodhānupassanāñāṇe nissayapaccayabhūte uppannā **saññā**, tena sahagatāti attho. (22)

Chakkavannanā niţţhitā.

Sattakavannanā

330. Sampattipaṭilābhaṭṭhenāti sīlasampatti-ādīnaṁ sammāsambodhipariyosānānaṁ sampattīnaṁ paṭilābhāpanaṭṭhena, sampattīnaṁ vā paṭilābho sampattipaṭilābho, tassa kāraṇaṁ sampattipaṭilābhaṭṭhena. Tenevāha "sampattīnaṁ paṭilābhakāraṇato"ti. Saddhāva ubhayahitatthikehi dhanāyitabbaṭṭhena dhanaṁ saddhādhanaṁ. Etthāti etesu dhanesu. Sabbaseṭṭhaṁ sabbesaṁ paṭilābhakāraṇabhāvato, tesañca saṁkilesavisodhanena mahājutikamahāvipphārabhāvāpādanato. Tenāha "paññāya hī"ti-ādi. Tattha paññāya ṭhatvāti kammassakatāpaññāya patiṭṭhāya sucaritādīni pūretvā saggūpagā honti. Tattha ceva pāramitā paññāya ca ṭhatvā sāvakapāramiñāṇādīni paṭivijjhanti. (1)

Samādhim parikkharonti abhisankharontīti **samādhiparikkhārā**, samādhissa sambhārabhūtā sammādiṭṭhi-ādayo. Idha pana sahakārīkāraṇabhūtā adhippetāti āha "**samādhiparivārā**"ti. (3)

Asataṁ asādhūnaṁ dhammā tesaṁ asādhubhāvasādhanato. Asantāti asundarā gārayhā. Tenāha "lāmakā"ti. "Vipassakasseva kathitā"ti vatvā tassa vipassanānibbattiṁ dassetuṁ "tesupī"ti-ādi vuttaṁ. Catunnampi hi saccānaṁ visesena dassanato maggapaññā sātisayaṁ "vipassanā"ti vattabbā, taṁsamaṅgī ca ariyo vipassanakoti. (4, 5)

Sappurisānam dhammāti sappurisānamyeva dhammā, na asappurisānam. Dhammānudhammapaṭipattiyā eva hi dhammaññu-ādibhāvo, na pāṭidhammapaṭhanādimattena. Bhāsitassāti suttageyyādibhāsitassa ceva tadaññassa ca attatthaparatthabodhakassa padassa. Atthakusalatāvasena attham jānātīti

atthaññū. Attānam jānātīti yāthāvato attano pamāṇajānanavasena attānam jānāti. Paṭiggahaṇaparibhogamattaññutāhi eva pariyesanavissajjanamattaññutāpi bodhitā hontīti "paṭiggahaṇaparibhogesu"icceva vuttam. Evañhi tā anavajjā hontīti. Yogassa adhigamāyāti bhāvanāya anuyuñjanassa. Atisambādhanti atikhuddakam atikhapaññassa tāvatā kālena tīretum asakkuṇeyyattā. Aṭṭhavidham parisanti Khattiyaparisādikam aṭṭhavidham parisam. Bhikkhuparisādikam catubbidham Khattiyaparisādikam manussaparisamyeva puna catubbidham gahetvā aṭṭhavidham vadanti apare. "Imam me sevantassa akusalā dhammā parihāyanti, kusalā dhammā abhivaḍḍhanti, tasmā sevitabbo, vipariyāyato tadañño asevitabbo"ti evam sevitabbāsevitabbam puggalam jānātīti puggalaññū. Evam tesam puggalānampi bodhanam ukkaṭṭham, nihīnam vā jānāti nāma. (6)

331. "Niddasavatthūnī"ti "ādi-saddalopenāyam niddeso"ti āha "niddasādivatthūnī"ti. Natthi dāni imassa dassāti niddaso. Pañhoti ñātum icchito attho. Puna dasavasso na hotīti tesam matimattanti dassetum "so kirā"ti kira-saddaggahaṇam. "Niddaso"ti cetam desanāmattam, tassa nibbīsādibhāvassa viya ninnavādibhāvassa ca icchitattāti dassetum "na kevalañcā"ti-ādi vuttam. Gāme vicarantoti gāme piṇḍāya vicaranto.

Na idam titthiyānam adhivacanam tesu tannimittassa abhāvā. Sāsanepi sekkhassāpi na idam adhivacanam, kimangam pana puthujjanassa. Yassa panetam adhivacanam, yena ca kāraņena, tam dassetum "khīnāsavassetan" ti-ādi vuttam. Appaṭisandhikabhāvo hissa paccakkhato kāranam. Paramparāya itarāni, yāni pāliyam āgatāni.

Sikkhāya sammadeva ādānam sikkhāsamādānam, tam panassā pāripūriyā veditabbanti āha "sikkhattayapūraņe"ti. Sikkhāya vā sammadeva ādito paṭṭhāya rakkhaṇam sikkhāsamādānam, tañca atthato pūraṇe paricchinnam arakkhaṇe sabbena sabbam abhāvato, rakkhaṇe ca paripūraṇato. Bahalacchandoti daļhacchando. Āyatinti anantarānāgatadivasādikālo

adhippeto, na anāgatabhavoti āha "anāgate punadivasādīsupī"ti. Sikkham paripūrentassa tattha niviṭṭha-atthitā avigatapematā, tebhūmakadhammānam aniccādivasena sammadeva nijjhānam dhammanisāmanāti āha "vipassanāyetam adhivacanan"ti. Taṇhāvinayaneti virāgānupassanādivipassanāñaṇānubhāvasiddhe taṇhāvikkhambhane. Ekībhāveti gaṇasaṅgaṇikākilesasaṅgaṇikāvigamasiddhe vivekabhāve. Vīriyārambheti sammappadhānavīriyassa paggaṇhane, taṁ pana sabbaso vīriyassa paribrūhanaṁhotīti āha "kāyikacetasikassavīriyassa pūraṇe"ti. Sati yañceva nepakkabhāve cāti satokāritāya ceva sampajānakāritāya ca. Satisampajaññabaleneva vīriyārambho ijjhati. Diṭṭhipaṭivedheti sammādiṭṭhiyā paṭivijjhane. Tenāha "maggadassane"ti. Saccasampaṭivedhe hi ijjhamāne maggasammādiṭṭhi siddhā eva hoti. (7)

Asubhānupassanāñāņeti dasavidhassa, ekādasavidhassāpi vā asubhassa anupassanāvasena pavattañāņe. Idañhi dukkhānupassanāya paricayañāṇaṁ. Ādīnavānupassanāñāņeti saṅkhārānaṁ aniccadukkhavipariṇāmatāsaṁsūcitassa ādīnavassa anupassanāvasena pavattañāṇe. Appahīnaṭṭhenāti maggena asamucchinnabhāvena. Anusentīti¹ santāne anu anu sayanti. Kāraṇalābhe hi sati uppannārahā kilesā santāne anu anu sayitā viya honti, tasmā te tadavatthā "anusayā"ti vuccanti. Thāmagatoti thāmappatto. Thāmagamanañca aññehi asādhāraṇo kāmarāvādīnaṁ eva āveṇiko sabhāvo daṭṭhabbo. Tathā hi vuttaṁ abhidhamme "thāmagatānusayaṁ pajahatī"ti. Kāmarāgo eva anusayo kāmarāgānusayo. Ye pana "kāmarāgassa anusayo kāmarāgānusayo rāma koci atthi. Yadi "tassa bījan"ti vadeyyuṁ, tampi tabbinimuttaṁ paramatthato na upalabbhatevāti. Eseva nayo sesesupi. (8, 13)

Adhikaranasamathasattakavannanā

Adhikarīyanti etthāti **adhikaraṇāni.** Ke adhikarīyanti? Samathā. Kathaṁ adhikarīyantīti? Samanavasena, tasmā te tesaṁ samanavasena pavattantīti

āha "adhikaraṇāni samentī"ti-ādi. Uppannānam uppannānanti uṭṭhitānam uṭṭhitānam. Samathatthanti samanattham.

"Aṭṭhārasahi vatthūhī"ti lakkhaṇavacanametaṁ yathā "yadi me byādhī dāheyyuṁ dātabbamidamosadhan"ti, tasmā tesu aññataraññatarena vivadantā "aṭṭhārasahi vatthūhi vivadantī"ti vuccanti. Upavadanāti akkoso. Codanāti anuyogo.

Adhikaraṇassa sammukhāva vinayanato **sammukhāvinayo**. Sannipatitaparisāya dhammavādīnam yebhuyyatāya yebhuyyasikakammassa karaṇam **yebhuyyasikā**. **Ayan**ti ayam yathāvuttā catubbidhā sammukhatā **sammukhāvinayo nāma**.

Saṁghasāmaggivasena sammukhībhāvo, na yathā tathā kārakapuggalānaṁ sammukhātā. Bhūtatāti tacchatā. Saccapariyāyo hi idha dhamma-saddo "dhammavādī"ti-ādīsu¹ viya.Vineti etenāti vinayo, tassa tassa adhikaraṇassa vūpasamanāya bhagavatā vuttavidhi, tassa vinayassa sammukhatā vinayasammukhatā. Tenāha "yathā taṁ -pa- sammukhatā"ti. Yenāti yena puggalena. Vivādavatthusaṅkhāte atthe paccatthikā atthapaccatthikā. Saṁghasammukhatā parihāyati sammatapuggaleheva vūpasamanato.

Nanti vivādādhikaraṇam. "Na chandāgatim gacchatī"ti-ādinā vuttam pañcangasamannāgatam. Guļhakādīsu alajjussannāya parisāya guļhako salākaggāho kātabbo, lajjussannāya vivaṭako, bālussannāya sakaṇṇajappako. Yassā kiriyāya dhammavādino bahutarā, sā yebhuyyasikāti āha "dhammavādīnam yebhuyyatāyā"ti-ādi.

"Catūhi samathehi sammatī"ti idam sabbasangāhikavasena vuttam. Tattha pana dvīhi dvīhi eva vūpasamanam daṭṭhabbam. Evam vinicchitanti sace āpatti natthi, ubho khamāpetvā, atha atthi, āpattim dassetvā ropanavasena vinicchitam. Paṭikammam pana āpattādikaraṇasamathe parato āgamissati.

Na samaṇasāruppaṁ **assāmaṇakaṁ**, samaṇehi akatthabbaṁ, tasmiṁ. **Ajjhācāre** vītikkame sati.

Paţicaratoti paţicchādentassa. Pāpussannatāya pāpiyo, puggalo, tassa kattabbakammam tassapāpiyasikam. Sammukhāvinayeneva vūpasamo natthi paṭiññāya tathārūpāya, khantiyā vā vinā avūpasamanato.

Etthāti āpattidesanāya. Paṭiññāte āpannabhāvādike karaṇaṁ kiriyā "āyatiṁ saṁvareyyāsī"ti, parivāsadānādivasena ca pavattaṁ vacīkammaṁ **paṭiññātakaraṇaṁ**.

Yathānurūpanti "dvīhi samathehi catūhi tīhi ekenā"ti evam vuttanayena yathānurūpam. Etthāti imasmim sutte, imasmim vā samathavicāre. Vinicchayanayoti vinicchaye nayamattam. Tenāha "vitthāro panā"ti-ādi. Samantapāsādikāyam vinayaṭṭhakathāya¹ vutto, tasmā vuttanayeneva veditabboti adhippāyo. (14)

Sattakavannanā nitthitā.

Niţţhitā ca dutiyabhāṇavāravaṇṇanā.

Atthakavannanā

333. **Ayāthāvā**ti na yāthāvā. Aniyyānikatāya **micchāsabhāvā.** Viparītavuttikatāya **yāthāvā.** Niyyānikatāya **sammāsabhāvā** aviparītavuttikā. (1-2)

334. Kucchitam sīdatīti kusīto da-kārassa ta-kāram katvā. Yassa dhammassa vasena puggalo "kusīto"ti vuccati, so kusītabhāvo idha kusītasaddena vutto. Vināpi hi bhāvajotanam saddam bhāvattho viññāyati yathā "paṭassa sukkan"ti, tasmā kusītabhāvavatthūnīti attho. Tenāha "kosajjakāraṇānīti attho"ti. Kammam nāma samaṇasāruppam īdisanti āha "cīvaravicāraṇādī"ti. Vīriyanti padhānavīriyam, tam pana cankamanavasena karaṇe "kāyikan"tipi vattabbatam labhatīti āha "duvidhampī"ti. Pattiyāti pāpuṇanattham. Osīdananti bhāvanānuyoge sankoco. Māsehi ācitam nicitam viyāti māsācitam, tam maññe.

Yasmā māsā tintāvisesena garukā honti, tasmā "yathā tintamāso" ti-ādi vuttam. Vutthito hoti gilānabhāvāti adhippāyo. (4)

- 335. **Tesan**ti ārambhavatthūnam. **Imināva nayenā**ti iminā kusītavatthūsu vutteneva nayena. "Duvidhampi vīriyam ārabhatī"ti-ādinā, "idam paṭhamanti idam handāham vīriyam ārabhāmīti evam bhāvanāya abbhussahanam paṭhamam ārambhavatthū"ti-ādinā ca attho veditabbo. Yathā tathā paṭhamam pavattam abbhussahanamhi upari vīriyārambhassa kāraṇam hoti. Anurūpapaccavekkhaṇāsahitāni hi abbhussahanāni, tammūlakāni vā paccavekkhanāni attha ārambhavatthūni veditabbāni. (5)
- 336. Āsajjāti yassa deti, tassa āmodanahetu tena samāgamanimittam. Tenāha "ettha āsādanam dānakāranam nāmā"ti. Bhayāti bhayahetu. Nanu bhayam nāma laddhukāmatā¹ rāgādayo viya cetanāya avisuddhikaram, tam kasmā idha gahitanti? Na idam tādisam corabhayādim sandhāya vuttanti dassetum "tatthā" ti-ādi vuttam. Adāsi meti yam pubbe katam upakāram cintetvā dīyati, tam sandhāya vuttam. Dassati meti paccupakārāsīsāya yam dīyati, tam sandhāya vadati. Sāhu dānanti "dānam nāmetam panditapaññattan"ti sādhusamācāre thatvā deti. Alankāratthanti upasobhanattham. Parivāratthanti parikkhārattham. Dānañhi datvā tam paccavekkhantassa pāmojjapītisomanassādayo uppajjanti, lobhadosaissāmaccherādayo vidūrī bhavanti. Idāni dānam anukūladhammaparibrūhanena, paccanīkadhammavidūrībhāvakaranena ca bhāvanācittassa upasobhanāya ca parikkhārāya ca hotīti "alankārattham, parivāratthañca detī"ti vuttam. Tenāha "dānañhi cittam mudukam karotī"tiādi. **Muducitto hoti** laddhā² dāyake "iminā mayham sangaho kato"ti, dātāpi laddhari. Tena vuttam "ubhinnampi cittam mudukam karotī"ti.

Adantadamananti adantā anassavāpissa dānena dantā assavā honti vase vattanti. Adānam dantadūsakanti adānam pana pubbe dantānam assavānampi vighātuppādanena cittam dūseti. Unnamanti dāyakā, piyamvadā ca paresam

garucittīkāraṭṭhānatāya. **Namanti** paṭiggāhakā **dānena**, **piyavācāya** laddhasaṅgahā saṅgāhakānaṁ.

Cittālaṅkāradānameva uttamaṁ anupakkiliṭṭhatāya, suparisuddhatāya, guṇavisesapaccayatāya ca. (6)

337. Dānapaccayāti dānakāraṇā, dānamayapuññassa katattā upacitattāti attho. Upapattiyoti manussesu devesu ca nibbattiyo. Ṭhapetīti ekavārameva anuppajjitvā yathā uparūpari tenevākārena pavattati, evam ṭhapeti. Tadeva cassa adhiṭṭhānanti āha "tasseva vevacanan"ti. Vaḍḍhetīti brūheti, na hāpeti. Vimuttanti adhimuttam, ninnam poṇam pabbhāranti attho. Vimuttanti vā visiṭṭham. Nippariyāyato uttari nāma paṇītam majjhepi hīnamajjhimavibhāgassa labbhanatoti vuttam "uttari abhāvitanti tato upari¹ maggaphalatthāya abhāvitan"ti. Samvattati tathā paṇihitam dānamayacittam. Yam pana pāḷiyam "tañca kho"ti-ādi vuttam, tam tatrūpapattiyā vibandhakāradussīlyābhāvadassanaparam daṭṭhabbam, na dānamasassa puññassa kevalassa tamsamvattanatādassanaparanti daṭṭhabbam. (7, 1)

Samucchinnarāgassāti samucchinnakāmarāgassa. Tassa hi siyā brahmaloke upapatti, na samucchinnabhavarāgassa. Vītarāgaggahaņena cettha kāmesu vītarāgatā adhippetā, yāya brahmalokūpapatti siyā. Tenāha "dānamattenevā"ti-ādi. Yadi evam dānam tattha kimatthiyanti āha "dānam panā"ti-ādi. Dānena muducittoti baddhāghāte verīpuggalepi attano dānasampaticchanena mudubhūtacitto. (7, 8)

Parisīdati parito ito cito ca samāgacchatīti parisā, samūho. (8)

Lokassa dhammāti sattalokassa avassambhāvī dhammā. Tenāha "etehi mutto nāma natthī"ti-ādi. Yasmā te lokadhammā aparāparam kadāci lokam anupatanti, kadāci te loko, tasmā tañcettha attham dassento "aṭṭhime"ti suttapadam² āhari. Ghāsacchādanādīnam laddhi lābho, tāni eva vā laddhabbato lābho. Tadabhāvo alābho.

Lābhaggahaṇena cettha tabbisayo anurodho gahito, alābhaggahaṇena virodho. Yasmā lohite sati tadupaghātavasena pubbo viya anurodhe sati virodho laddhāvasaro eva hoti, tasmā vuttam "lābhe āgate alābho āgato evā"ti. Esa nayo yasādīsupi. (9)

Atthakavannanā nitthitā.

Navakavannanā

340. Vasati tattha phalam tannimittakatāya pavattatīti **vatthu**, kāraṇanti vutto vāyamattho. Tenāha "āghātavatthūnīti āghātakāraṇānī"ti. Kopo nāmāyam yasmim vatthusmim uppajjati, na tattha ekavārameva uppajjati, atha kho punapi uppajjatevāti vuttam "bandhatī"ti. Atha vā yo paccayavisesena uppajjamāno āghāto savisaye baddho viya na vigacchati, punapi uppajjeyyeva, tam sandhāyāha "āghātam bandhatī"ti. Tam panassa paccayavasena nibbattanam uppādanamevāti vuttam "karoti uppādetī"ti. (1)

Taṁ kutettha labbhāti ettha tanti kiriyāparāmasanaṁ, padajjhāhārena ca attho veditabboti dassento "taṁ anatthacaraṇaṁ mā ahosī"ti-ādimāha. Kena kāraṇena laddhabbaṁ niratthakabhāvato. Kammassakā hi sattā, te kassa ruciyā dukkhitā, sukhitā vā bhavanti, tasmā kevalaṁ tasmiṁ mayhaṁ kujjhanamattamevāti adhippāyo. Atha vā taṁ kopakaraṇaṁ ettha puggale kuto labbhā paramatthato kujjhitabbassa, kujjhanakassa ca abhāvato. Saṅkhāramattañhetaṁ, yadidaṁ khandhapañcakaṁ. Yaṁ "satto"ti vuccati, te saṅkhārā ittarakālā khaṇikā, kassa ko kujjhatīti attho. Lābhā nāma ke siyuṁ aññatra anuppattito. (2)

341. Sattā āvasanti etesūti **sattāvāsā.** Nānattakāyānānattasaññī-ādibhedā sattanikāyā. Yasmā te te sattanikāyā tappariyāpannānam sattānam tāya eva tappariyāpannatāya ādhāro viya vattabbatam arahanti samudāyādhāratāya avayavassa yathā "rukkhe"

sākhā"ti, kasmā "sattānaṁ āvāsā, va sanaṭṭhānānīti attho"ti vuttaṁ. Suddhāvāsāpi sattāvāsova "na so bhikkhave sattāvāso sulabharūpo, yo mayā anāvutthapubbo iminā dīghena addhunā aññatra suddhāvāsehi devehī"ti vacanato. Yadi evaṁ kasmā idha na gahitāti tattha kāraṇamāha "asabbakālikattā"ti-ādi. Vehapphalo pana catutthaṁyeva sattāvāsaṁ bhajatīti daṭṭhabbaṁ. (3)

342. **Opasamiko**ti vaṭṭadukkhassa upasamāvaho, taṁ pana vaṭṭadukkhaṁ kilesesu upasantesu upasamati, na aññathā, tasmā **"kilesūpasamakaro"**ti vuttaṁ. Takkaraṁ sambodhaṁ gametīti **sambodhagāmī.**

Yasmim devanikāye dhammadesanā na viyujjati savanasseva abhāvato, so pāļiyam "dīghāyuko devanikāyo"ti adhippetoti āha "asaññabhavam vā arūpabhavam vā"ti. (4)

- 343. Anupubbato viharitabbāti **anupubbavihārā. Anupaṭipāṭiyā**ti anukkamena. **Samāpajjitabbavihārā**ti samāpajjitvā samaṅgino hutvā viharitabbavihārā. (5)
- 344. **Anupubbanirodhā**ti anupubbena anukkamena pavattetabbanirodhā. Tenāha **"anupaṭipāṭiyā nirodhā"**ti. (6)

Navakavaņņanā niţţhitā.

Dasakavannanā

345. Yehi sīlādīhi sammannāgato bhikkhu dhammasaraṇatāya dhammeneva nāthati īsati abhibhavatīti **nātho**ti vuccati, te tassa nāthabhāvakarā dhammā "**nāthakaraṇā**"ti vuttāti āha "**sanāthā -pa-patiṭṭhākarā dhammā**"ti. Tattha **attano patiṭṭhākarā**ti yassa nāthabhāvakarā, tassa attano patiṭṭhāvidhāyino. Appatiṭṭho anātho, sappatiṭṭho sanāthoti patiṭṭhattho¹ nāthattho. (1-1)

Kalyāṇaguṇayogato kalyāṇāti dassento "sīlādiguṇasampannā"ti āha. Mijjanalakkhaṇā mittā etassa atthīti mitto, so vuttanayena kalyāṇo assa atthīti tassa atthitāmattam kalyāṇamittapadena vuttam. Assa tena sabbakālam avijahitavāsoti tam dassetum "kalyāṇasahāyo"ti vuttanti āha "tevassā"ti-ādi. Tevassāti te eva kalyāṇamittā assa bhikkhuno. Saha ayanatoti saha vattanato. Asamodhāne cittena, samodhāne pana cittena ceva kāyena ca sampavanko. (1-3)

Sukham vaco etasmim anukūlagāhimhi ādaragāravavati puggaleti suvaco. Tenāha "sukhena vattabbo"ti-ādi. Khamoti khantā, tamevassa khamabhāvam dassetum "gāļhenā"ti-ādi vuttam. Vāmatoti micchā, ayoniso vā gaņhāti. Paṭippharatīti paṭāṇikabhāvena tiṭṭhati. Padakkhiṇam gaṇhātīti sammā, yoniso vā ganhāti. (1-4)

Uccāvacānīti vipulakhuddakāni. Tatrupagamanīyāti tatra tatra mahante, khuddake ca kamme sādhanavasena upāyena upagacchantiyā, tassa tassa kammassa nipphādanena samatthāyāti attho. Tatrupāyāyāti vā tatra tatra kamme sādhetabbe upāyabhūtāya. (1-5)

Dhamme assa kāmoti dhammakāmoti byadhikaraṇānampi bāhirattho samāso hotīti katvā vuttam. Kāmetabbato vā piyāyitabbato kāmo, dhammo, dhammo kāmo assāti dhammakāmo. Dhammoti pariyattidhammo adhippetoti āha "tepiṭakam buddhavacanam piyāyatīti attho"ti.
Samudāharaṇam kathanam samudāhāro, piyo samudāhāro etassāti piyasamudāhāro. Sayañcāti ettha ca-saddena "sakkaccan"ti padam anukaḍḍhati, tena sayañca sakkaccam desetukāmo hotīti yojanā.
Abhidhammo sattappakaraṇāni adhiko abhivisiṭṭho ca pariyattidhammoti katvā. Vinayo ubhatovibhangā vinayanato kāyavācānam. Abhivinayo khandhakaparivārā visesato ābhisamācārikadhammakittanato.
Ābhisamācārikadhammapāripūrivaseneva hi ādibrahmacariyakadhammapāripūrī. Dhammo eva piṭakadvayassāpi pariyattidhammabhāvato. Maggaphalāni abhidhammo nibbānadhammassa abhimukhoti katvā. Kilesavūpasamakāraṇam pubbabhāgiyā tisso sikkhā sankhepato

vivaṭṭanissito samatho, vipassanā ca. **Bahulapāmojjo**ti balavapāmojjo. (1-6)

Kāraņattheti nimittatthe. Kusaladhammanimittam hissa vīriyārambho. Tenāha "tesam adhigamatthāyā"ti. Kusalesu dhammesūti vā nipphādetabbe bhummam yathā "cetaso avūpasame ayonisomanasikārapadatthānan"ti. (1-8)

346. Sakalaṭṭhenāti nissesaṭṭhena, anavasesapharaṇavasena cettha sakalaṭṭho veditabbo, asubhanimittādīsu viya ekadese aṭṭhatvā anavasesato gahetabbaṭṭhenāti attho. Tadārammaṇānaṁ dhammānanti taṁ kasiṇaṁ ārabbha pavattanakadhammānaṁ. Khettaṭṭhenāti uppattiṭṭhānaṭṭhena. Adhiṭṭhānaṭṭhenāti pavattiṭṭhānabhāvena. Yathā khettaṁ sassānaṁ uppattiṭṭhānaṁ vaḍḍhiṭṭhānañca, evametaṁ jhānaṁ taṁsampayuttānaṁ dhammānanti, yogino vā sukhavisesānaṁ kāraṇabhāvena. "Paricchinditvā"ti idaṁ uddhaṁ adhoti etthāpi yojetabbaṁ. Paricchinditvā eva hi sabbattha kasiṇaṁ vaḍḍhetabbaṁ. Tena tena vā kāraṇenāti tena tena upari-ādīsu kasiṇavaḍḍhanakāraṇena. Yathā kinti āha "ālokamiva rūpadassanakāmo"ti. Yathā dibbacakkhunā uddhaṁ ce rūpaṁ daṭṭhukāmo, uddhaṁ ālokaṁ pasāreti, adho ce, adho, samantato ce rūpaṁ daṭṭhukāmo samantato ālokaṁ pasāreti, evamayaṁ kasinanti attho.

Ekassāti pathavīkasiṇādīsu ekekassa. Aññabhāvānupagamanatthanti aññakasiṇabhāvānupagamanadīpanattham, aññassa vā kasiṇabhāvānupagamanadīpanattham, na hi aññena pasāritakasiṇam tato aññena pasāritakasiṇabhāvam upagacchati, evampi nesam aññakasiṇasambhedābhāvo veditabbo. Na aññam pathavī-ādi. Na hi udake thitaṭṭhāne sasambhārapathavī atthi. Añño kasiṇasambhedoti āpokasiṇādinā saṅkaro. Sabbatthāti sabbesu sesakasiṇesu. Ekadese aṭṭhatvā anavasesapharaṇam pamāṇassa aggahaṇato appamāṇam. Teneva hi nesam kasiṇasamaññā. Tathā cāha "tañhī"ti-ādi. Cetasā pharantoti bhāvanācittena ārammaṇam karonto. Bhāvanācittañhi kasiṇam parittam vā vipulam vā sakalameva manasi karoti, na ekadesam.

Kasiņugghāṭimākāse pavattaviññāṇaṁ pharaṇa-appamāṇavasena "viññāṇakasiṇan"ti vuttaṁ. Tathā hi taṁ "viññāṇañcan"ti vuccati. Kasiṇavasenāti yathā-ugghāṭitakasiṇavasena. Kasiṇugghāṭimākāse uddhaṁadhotiriyatāveditabbā. Yattakañhi ṭhānaṁ kasiṇaṁ pasāritaṁ, tattakaṁ ākāsabhāvanāvasena ākāso hotīti, evaṁ yattakaṁ ṭhānaṁ ākāsaṁ hutvā upaṭṭhitaṁ, tattakaṁ sakalameva pharitvā viññāṇassa pavattanato āgamanavasena viññāṇakasiṇepi uddhaṁadhotiriyatā vuttāti āha "kasiṇugghāṭimākāsavasena tattha pavattaviññāṇe uddhaṁadhotiriyatā veditabbā"ti.

Akusalakammapathadasakavannanā

347. Pathabhūtattāti tesam pavattanupāyattā maggabhūtattā. Methunasamācāresūti sadārasantosaparadāragamanavasena duvidhesu methunasamācāresu. Tepi hi kāmetabbato kāmā nāma. Methunavatthūsūti methunassa vatthūsu tesu sattesu. Micchācāroti gārayhācāro. Gārayhatā cassa ekantanihīnatāya evāti āha "ekantanindito lāmakācāro"ti. Asaddhammādhippāyenāti asaddhammasevanādhippāyena.

Sagottehi rakkhitā gottarakkhitā. Sahadhammikehi rakkhitā dhammarakkhitā. Sassāmikā sārakkhā. Yassā gamane raññā daṇḍo ṭhapito, sā saparidaṇḍā. Bhariyābhāvatthaṁ dhanena kītā dhanakkītā. Chandena vasantī chandavāsinī. Bhogatthaṁ vasantī bhogavāsinī. Paṭatthaṁ vasantī paṭavāsinī. Udakapattaṁ āmasitvā gahitā odapattakinī. Cumbaṭaṁ apanetvā gahitā obhatacumbaṭā. Karamarānītā dhajāhaṭā. Taṅkhaṇikā muhuttikā. Abhibhavitvā vītikkame micchācāro mahāsāvajjo, na tathā dvinnaṁ samānacchandahāya. "Abhibhavitvā vītikkamane satipi maggenamaggapaṭipatti-adhivāsane purimuppannasevanābhisandhipayogābhāvato micchācāro na hoti abhibhuyyamānassā"ti vadanti. Sevanacitte sati payogābhāvo appamāṇaṁ yebhuyyena itthiyā sevanapayogassa abhāvato. Tasmiṁ asati puretaraṁ sevanacittassa upaṭṭhāpanepi tassā micchācāro na siyā, tathā purisassapi sevanapayogābhāveti. Tasmā attano ruciyā pavattitassa vasena tayo, balakkārena

pavattitassa vasena tayoti sabbepi aggahitaggahanena "cattāro sambhārā"ti vuttam.

Upasaggavasena atthavisesavācino dhātusaddāti "abhijjhāyatī"ti padassa "parabhaṇḍābhimukhī"ti-ādinā attho vutto. Tattha tanninnatāyāti tasmim parabhaṇḍe lubbhanavasena ninnatāyāti ayamettha adhippāyo veditabbo. Abhipubbo vā jhā-saddo lubbhane niruļho daṭṭhabbo. Upasaggavasena atthavisesavācino eva dhātusaddā. Adinnādānassa appasāvajjamahāsāvajjatā brahmajālavaṇṇanāyaṁ¹ vuttāti āha "adinnādānaṁ viya appasāvajjā, mahāsāvajjā cā"ti. Tasmā "yassa bhaṇḍaṁ abhijjhāyati, tassa appaguṇatāya appasāvajjatā, mahāguṇatāya mahāsāvajjatā"ti-ādinā appasāvajjamahāsāvajjavibhāgo veditabbo. Attano pariṇāmanaṁ cittenevāti veditabbaṁ.

Hitasukham byāpādayatīti yo nam uppādeti, tassa yam pati cittam uppādeti, tassa tassa sati samavāye hitasukham vināseti. Pharusavācāya appasāvajjamahāsāvajjatā brahmajālavaṇṇanāyam vibhāvitāti āha "pharusavācā viyā"ti-ādi. Tasmā "yam pati cittam byāpādeti, tassa appaguṇatāya-appasāvajjo, mahāguṇatāya mahāsāvajjo"ti-ādinā tadubhayavibhāgo veditabbo. "Aho vatā"ti iminā parassa accantāya vināsacintanam dīpeti. Evañhissa dāruṇappavattiyā kammapathappavatti.

Yathābhuccagahaṇābhāvenāti yāthāvagahaṇassa abhāvena aniccādisabhāvassa niccādito gahaṇena. Micchā passatīti vitatham passati. "Samphappalāpo viyā"ti iminā āsevanassa mandatāya appasāvajjatam, mahantatāya mahāsāvajjatam dasseti. Gahitākāraviparītatāti micchādiṭṭhiyā gahitākāraviparītabhāvo. Vatthunoti tassa ayathābhūtasabhāvamāha. Tathābhāvenāti gahitākāreneva viparītākāreneva. Tassa diṭṭhigatikassa, tassa vā vatthuno upatthānam "evametam, na ito aññathā"ti.

Dhammatoti sabhāvato. **Koṭṭhāsato**ti phassapañcamakādīsu cittaṅgakoṭṭhāsesu ye koṭṭhāsā honti, tatoti attho.

Cetanādhammāti cetanāsabhāvā.

"Paṭipāṭiyā sattā"ti ettha nanu cetanā abhidhamme kammapathesu na vuttāti paṭipāṭiyā sattannaṁ kammapathabhāvo na yuttoti? Na, avacanassa aññahetukattā. Na hi tattha cetanāya akammapathappattattā¹ kammapatharāsimhi avacanaṁ, kadāci pana kammapatho hoti, na sabbadāti kammapathabhāvassa aniyatattā avacanaṁ. Yadā pana kammapatho hoti, tadā kammapatharāsisaṅgaho na nivārito.

Etthāha—yadi cetanāya sabbadā kammapathabhāvābhāvato aniyato kammapathabhāvoti kammapatharāsimhi avacanam, nanu abhijihādīnampi kammapathabhāvam appattānam atthitāya aniyato kammapathabhāvoti tesampi kammapatharāsimhi avacanam āpajjatīti? Nāpajjati kammapathatātamsabhāgatā hi tesam tattha vuttattā. Yadi evam cetanāpi tattha vattabbā siyāti? Saccametam, sā pana pānātipātādikāvāti pākato tassā kammapathabhāvoti na vuttam siyā. Cetanāya hi "cetanāham bhikkhave kammam vadāmi², tividhā bhikkhave kāyasancetanā akusalam kāyakamman"ti³ vacanato kammabhāvo pākato, kammamyeva ca sugatiduggatīnam, taduppajjanasukhadukkhānanca pathabhāvena pavattam "kammapatho"ti vuccatīti pākato tassā kammapathabhāvo. Abhijjhādīnam pana cetanāsamīhanabhāvena sucaritaduccaritabhāvo, cetanājanitabhāvena⁴ sugatiduggatitaduppajjanasukhadukkhānam pathabhāvo cāti na tathā pākato kammapathabhāvoti te eva tena sabhāvena dassetum abhidhamme cetanā kammapathabhāve na vuttā, atathājātiyattā vā cetanā tehi saddhim na vuttāti datthabbam. Mūlam patvāti mūladesanam patvā, mūlasabhāvesu dhammesu desiyamānesūti attho.

"Adinnādānam sattārammaṇan"ti idam "pañcasikkhāpadā parittārammaṇā evā"ti imāya pañhapucchakapāļiyā⁵ virujjhati. Yañhi pāṇātipātādidussīlyassa

^{1.} Akammapathattā (Mūlatī 1. 81 pitthesu)

^{2.} Am 2. 363; Abhi 4. 290 pitthesu.

^{3.} Abhi 4. 290 pitthe.

^{4.} Cetanājanitatambandhatibhāvena (Anutī 1. 90 pitthesu)

^{5.} Abhi 2. 305 pitthe.

ārammaṇam, tadeva tamveramaṇiyā ārammaṇam. Vītikkamitabbavatthuto eva hi viratīti. Sattārammaṇanti vā sattasankhātasankhārārammaṇam, tameva upādāya vuttanti na koci virodho. Tathā hi vuttam sammohavinodaniyam "yāni sikkhāpadāni ettha 'sattārammaṇānī'ti vuttāni, tāni yasmā sattoti sankham gate sankhāreyeva ārammaṇam karontī"ti¹. Esa nayo ito paresupi. Visabhāgavatthuno "itthī puriso"ti gahetabbato "sattārammaṇo"ti eke. "Eko diṭṭho, dve sutā"ti-ādinā samphappalāpena diṭṭhasutamutaviññātavasena. Tathā abhijjhāti ettha tathā-saddo "diṭṭhasutamutaviññātavasenā"ti idampi upasamharati, na sattasankhārārammaṇatam eva dassanādivasena abhijjhāyanato. "Natthi sattā opapātikā"ti² pavattamānāpi micchādiṭṭhi tebhūmakadhammavisayā evāti adhippāyenassā sankhārārammaṇatā vuttā. Katham pana micchādiṭṭhiyā sabbe tebhūmakadhammā ārammaṇam hotīti? Sādhāraṇato. "Natthi sukatadukkaṭānam kammānam phalam vipāko"ti³ pavattayamānāya atthato rūpārūpāvacaradhammāpi gahitā eva hontīti.

Sukhabahulatāya rājāno hasamānāpi "ghātethā"ti vadanti, hāso pana nesam attavūpasamādi-aññavisayoti āha "sanniṭṭhāpaka -pa- hotī"ti. Majjhattavedano na hoti, sukhavedanova ettha sambhavatīti. Musāvādo lobhasamuṭṭhāno sukhavedano vā siyā majjhattavedano vā, dosasamuṭṭhāno dukkhavedano vāti musāvādo tivedano. Iminā nayena sesesupi yathāraham vedanābhedo veditabbo.

Dosamohavasena dvimūlakoti sampayuttamūlameva sandhāya vuttam. Tassa hi mūlaṭṭhena upakārakabhāvo. Nidānamūle pana gayhamāne "lobhamohavasenapī"ti vattabbam siyā. Āmisakiñjakkhahetupi pāṇam hananti. Tenevāha "lobho nidānam kammānam samudayāyā"ti-ādi⁴. Sesesupi eseva nayo. (3)

^{1.} Abhi-Ttha 2. 369 pitthe.

^{3.} Dī 1. 51; Ma 2. 63 piṭṭhādīsu.

^{2.} Dī 1. 51 pitthe.

^{4.} Am 1. 133 pitthe.

Kusalakammapathadasakavannanā

Pāṇātipātā -pa- veditabbāni lokiyalokuttaramissakavasenettha kusalakammapathānam desitattā. Verahetutāya verasaññitam pāṇātipātādipāpadhammam maṇati "mayi idha ṭhitāya kathamāgacchasī"ti tajjantī viya nīharatīti veramaṇī, viramati etāyāti vā "viramaṇī"ti vattabbe niruttinayena "veramaṇī"ti vuttam. Samādānavasena uppannā virati samādānavirati. Asamādinnasīlassa sampattato yathā-upaṭṭhitavītikkamitabbavatthuto virati sampattavirati. Kilesānam samucchindanavasena pavattā maggasampayuttā virati samucchedavirati. Kāmañcettha pāṭiyam viratiyeva āgatā, sikkhāpadavibhaṅge¹ pana cetanāpi āharitvā dassitāti tadubhayampi gaṇhanto "cetanāpi vattanti viratiyopī"ti āha. Anabhijjhā hi mūlam patvāti kammapathakoṭṭhāse "anabhijjhā"ti vuttadhammo mūlato alobho kusalamūlam hotīti evamettha attho daṭṭhabbo. Sesapadadvayepi eseva nayo.

Dussīlyārammaṇā tadārammaṇajīvitindriyādi-ārammaṇā kathaṁ dussīlyāni pajayantīti taṁ dassetuṁ "yathā panā"ti-ādi vuttaṁ. Pajahantīti veditabbā pāṇātipātādīhi viramaṇavaseneva pavattanato. Atha tadārammaṇabhāve, na so tāni pajahati. Na hi tadeva ārabbha taṁ pajahituṁ sakkā tato avinissatabhāvato.

Anabhijjhā -pa- viramantassāti abhijjham pajahantassāti attho. Na hi manoduccaritato virati atthi anabhijjhādīheva tappahānasiddhito. (4)

Ariyavāsadasakavaņņanā

348. Ariyānam eva vāsāti **ariyavāsā** anariyānam tādisānam asambhavato. **Ariyā**ti cettha ukkaṭṭhaniddesena khīṇāsavā gahitā, te ca yasmā tehi sabbakālam avirahitavāsā eva, tasmā vuttam "**ariyā eva vasimsu vasanti vasissantī**"ti. Tattha **vasimsū**ti nissāya vasimsu. Pañcaṅgavippahīnattādayo hi ariyānam apassayā. Tesu

pañcaṅgavippahānapaccekasaccapanodana-esanāsamavayavissajjanāni "saṅkhāyekaṁ paṭisevati, adhivāseti, parivajjeti, vinodetī"ti vuttesu apassenesu vinodanañca maggakiccāneva, itare maggeneva samijjhanti. (5-1)

Ñāṇādayoti ñāṇañceva taṁsampayuttadhammā ca. Tenāha **"ñāṇanti vutte"**ti-ādi. Tattha vattabbaṁ hetthā vuttameva. (5-2)

Ārakkhakiccam sādheti sativepullappattattā. "Carato"ti-ādinā niccasamādānam dasseti, tam vikkhepābhāvena daṭṭhabbam. (5-3)

Pabbajjupagatāti yam kiñci pabbajjam upagatā, na samitapāpā. Bhovādinoti jātimattabrāhmaņe vadati. Pāṭekkasaccānīti tehi tehi diṭṭhigatikehi pāṭiyekkam gahitāni "idameva saccan"ti¹ abhiniviṭṭhāni diṭṭhisaccādīni. Diṭṭhigatānipi hi "idameva saccan"ti¹ gahaṇam upādāya "saccānī"ti voharīyanti. Tenāha "idamevā"ti-ādi. Nīhaṭānīti attano santānato nīharitāni apanītāni. Gahitaggahaṇassāti ariyamaggādhigamato pubbe gahitassa diṭṭhigāhassa. Vissaṭṭhabhāvavevacanānīti ariyamaggena sabbaso pariccāgabhāvassa adhivacanāni. (5-5)

Natthi etāsam vayo vekalyanti **avayā**ti āha **"anūnā"**ti, anavasesāti attho. **Esanā**ti heṭṭhā vuttakāmesanādayo. (5-6)

Maggassa kiccanipphatti kathitā rāgādīnam pahīnabhāvadīpanato. (5-9)

Paccavekkhaṇāya phalaṁ kathitanti paccavekkhaṇamukhena ariyaphalaṁ kathitaṁ. Adhigate hi aggaphale sabbaso rāgādīnaṁ anuppādadhammataṁ pajānāti, tañca pajānanaṁ paccavekkhaṇañāṇanti. (5-10)

Asekkhadhammadasakavannanā

Phalañca te sampayuttadhammā cāti **phalasampayuttadhammā**, ariyaphalasabhāvā sampayuttā dhammāti attho. **Phalasampayuttadhammā**ti phaladhammā ceva tamsampayuttadhammā cāti evamettha attho veditabbo. **Dvīsupi ṭhānesu paññāva kathitā** sammā dassanaṭṭhena **sammādiṭṭhi**, sammā jānanaṭṭhena **sammāñāṇan**ti ca. Atthi hi dassanajānanānam savisaye pavattiākāraviseso,

svāyam heṭṭhā dassito eva. **Phalasamāpattidhammā**ti phalasamāpattiyam dhammā, phalasamāpattisahagatadhammāti attho.

Ariyaphalasampayuttadhammāpi hi sabbaso paṭipakkhato vimuttatam upādāya "vimuttī"ti vattabbatam labhanti. Kenaci pana yathā asekkhā phalapaññā dassanakiccam upādāya "sammādiṭṭhī"ti vuttā, jānanakiccam upādāya "sammāñāṇan"tipi vuttā eva, evam ariyaphalasamādhi samādānaṭṭham upādāya "sammāsamādhī"ti vutto, vimuccanaṭṭham upādāya "sammāvimuttī"tipi vutto. Evañca katvā "anāsavam cetovimuttin"ti dutiyavimuttiggahaṇañca samatthitam hotīti. (6)

Dasakavannanā niţţhitā.

Pañhasamodhānavannanā

Samodhānetabbāti samāharitabbā.

349. Okappanāti balavasaddhā. Āyatim bhikkhūnam avivādahetubhūtam tattha tattha bhagavatā desitānam atthānam saṅgāyanam saṅgīti, tassa ca kāraṇam ayam suttadesanā tathā pavattattāti vuttam "saṅgītipariyāyanti sāmaggiyā kāraṇan"ti. Samanuñño satthā ahosi "paṭibhātu tam sāriputta bhikkhūnam dhammim kathā"ti ussāhetvā ādito paṭṭhāya yāva pariyosānā suṇanto, sā panettha bhagavato samanuññatā "sādhu sādhū"ti anumodanena pākaṭā jātāti vuttam "anumodanena samanuñño ahosī"ti. Jinabhāsito nāma jāto, na sāvakabhāsito. Yathā hi rājayuttehi likhitapaṇṇam yāva rājamuddikāya na lañjitam hoti, na tāva "rājapaṇṇam"ti saṅkhyam gacchati, lañjitamattam pana rājapaṇṇam nāma hoti. Evamevam "sādhu sādhu sāriputtā"ti-ādi anumodanavacanasamsūcitāya samanuññāsaṅkhātāya jinavacanamuddāya lañjitattā ayam suttanto jinabhāsito nāma jāto āhaccavacano. Yam panettha atthato na vibhattam, tam suviññeyyamevāti.

Sumaṅgalavilāsiniyā dīghanikāyaṭṭhakathāya Saṅgītisuttavaṇṇanāya līnatthappakāsanā.

11. Dasuttarasutta

350. Āvuso bhikkhaveti sāvakānam ālapananti sāvakānam āmantanavasena ālapanasamudācāro, na kevalam "bhikkhave"ti, so pana buddhānam ālapanam. Tenāha "buddhā hī"ti-ādi. Satthusamudācāravasena asamudācāro evettha satthu uccaṭṭhāne ṭhapanam. Sampati āgatattā katthaci na nibaddho vāso etesanti anibaddhavāsā, antevāsikā. Kammaṭṭhānam gahetvā sappāyasenāsanam gavesantā yam kiñci disam gacchantīti disāgamanīyā. Idāni tamattham vitthārato dassetum "buddhakāle"ti-ādi vuttam.

Asubhakammaṭṭhānanti ekādasavidhaṁ asubhakammaṭṭhānaṁ. Tatthāpi puggalavemattataṁ ñatvā tadanurūpaṁ tadanurūpameva deti. Mohacaritassapi kāmaṁ ānāpānassatikammaṭṭhānaṁ sappāyaṁ, kammaṭṭhānabhāvanāya pana bhājanabhūtaṁ kātuṁ sammohavigamāya paṭhamaṁ uddesaparipucchādhammassavanadhammasākacchāsu niyojetabboti vuttaṁ "mohacaritassa -pa- ācikkhatī"ti. Saddhācaritassa visesato purimā cha anussatiyo sappāyā, tāsaṁ pana anuyuñjane ayaṁ pubbabhāgapaṭipattīti dassetuṁ "pasādanīyasuttante"ti-ādi vuttaṁ. Ñāṇacaritassāti buddhicaritassa, tassa pana maraṇassati, upasamānussati, catudhātuvavatthānaṁ, āhārepaṭikūlasaññā visesato sappāyā, tesaṁ pana upakāradhammadassanatthaṁ "aniccatādi -pa- kathetī"ti vuttaṁ. Tatthevāti satthu santike eva. Temāsikaṁ paṭipadanti tīhi māsehi sanniṭṭhāpetabbaṁ patipadaṁ.

Ime bhikkhūti imissā dhammadesanāya bhājanabhūtā bhikkhū. "Evaṁ āgantvā gacchante pana bhikkhū"ti idaṁ "buddhakāle"ti-ādinā taduddesikavasena vuttabhikkhū sandhāya vuttaṁ, na "ime bhikkhū"ti anantaraṁ vuttabhikkhū. Tenāha "pesetī"ti. Apalokethāti āpucchatha. "Paṇḍitā"ti-ādi sevanabhajanesu kāraṇavacanaṁ. "Sotāpattiphale vinetī"ti-ādi yebhuyyavasena vuttaṁ. Āyasmā hi dhammasenāpati bhikkhū yebhuyyena sotāpattiphalaṁ pāpetvā vissajjeti "evamete niyatā sambodhiparāyaṇā"ti. Āyasmā pana mahāmoggallāno "sabbāpi bhavūpapatti jigucchitabbāvā"ti bhikkhū yebhuyyena uttamatthaṁyeva pāpeti.

Sāvakehi vinetum sakkuneyyā sāvakaveneyyā nāma na sāvakeheva vinetabbāti dassento āha "sāvakavenevvā nāmā"ti-ādi. Dasadhā mātikam thapetvāti ekakato patthāya yāva dasakā dasadhā dasadhā mātikam thapetvā vibhattoti dasuttaro. Dasuttaro gatotipi dasuttaroti¹ ekakato patthāya yāva dasakā dasahi uttaro adhiko hutvā gato pavattotipi dasuttaro. **Ekekasmim** pabbeti ekakato patthāya yāva dasakā dasasu pabbesu ekekasmim pabbe. Dasa dasa pañhāti "katamo dhammo bahukāro. Appamādo kusalesu dhammesū"ti-ādinā dasa dasa pañhā. Visesitāti vissajjitā. Dasuttaram pavakkhāmīti desiyamānam desanam nāmakittanamukhena patijānāti vannabhananattham. **Pavakkhāmī**ti pakārehi vakkhāmi. Tathā hettha paññāsādhikānam pañcannam pañhasatānam vasena desanā pavattā. **Dhamman**ti idha **dhamma-**saddo pariyattipariyāyo "idha bhikkhu bhikkhu dhammam pariyāpunātī"ti-ādīsu² viya. Suttalakkhano cāyam **dhammo**ti āha "dhammanti suttan"ti. Svāyam dhammo yathānusittham patipajjamānassa nibbānāvaho. Tato eva vattadukkhasamucchedāya hoti, sa cāyamassa ānubhāvo sabbesam khandhānam pamocanupāyabhāvatoti dassento "nibbanappattiya"ti-adimaha. Tena vuttam "nibbanappattiya"ti-adi.

Uccam karontoti udaggam uļāram paņītam katvā dassento, paggaņhantoti attho. **Pemam janento**ti bhattim uppādento. Idanca desanāya paggaņhanam buddhānampi āciņņamevāti dassento "**ekāyano**"ti-ādimāha.

Ekadhammavannanā

- 351. (Ka) **Kāra**-saddo upa-saddena vināpi upakārattham vadati "bahukārā bhikkhave mātāpitaro puttānan"ti-ādīsu³ viyāti āha **"bahukāroti** bahūpakāro"ti.
- (Kha) Vaḍḍhane vutte nānantariyatāya uppādanam vuttameva hotīti "bhāvetabboti vaḍḍhetabbo"ti vutto. Uppādanapubbikā hi vaḍḍhanāti.

^{1.} Dasa suttanto gatotipi dasuttaroti (Ka) 2. Am 2. 76 pitthe. 3. Am 1. 63 pitthe.

Nanu ca "eko dhammo uppādetabbo"ti uppādanampettha visum gahitamevāti? Aññavisayattā tassa nāyam virodho. Tathā hi "eko dhammo pariññeyyo"ti tīhipi pariññāhi pariññeyyatam vatvāpi "eko dhammo pahātabbo"ti pahātabbatā vuttā.

- (Ga) **Tīhi pariññāhī**ti ñātatīraņapahānapariññāhi.
- (Gha) **Pahānānupassanāyā**ti pajahanavasena pavattāya anupassanāya. Missakavasena cetam anupassanāgahaṇam daṭṭhabbam.
 - (Na) Sīlasampadādīnam parihānāvaho parihānāya samvattanako.
 - (Ca) Jhānādivisesam gametīti visesagāmī.
- (Cha) **Duppaccakkhakaro**ti anupacitañāṇasambhārehi paccakkhaṁ kātuṁ asakkuṇeyyo.
 - (Jha) Abhijānitabboti abhimukham ñānena jānitabbo.

Sabbattha mātikāsūti dukādivasena vuttāsu sabbāsu mātikāsu. Ettha ca Āyasmā dhammasenāpati te bhikkhū bhāvanāya niyojetvā uttamatthe patitthāpetukāmo pathamam tāva bhāvanāya upakāradhammam uddesavasena dassento "eko dhammo bahukāro" ti vatvā tena upakārakena upakattabbam dassento "eko dhammo bhāvetabbo"ti āha. Ayanca bhāvanā vipassanāvasena icchitāti āha "eko dhammo pariññeyyo"ti. Pariññā ca nāma yāvadeva pahātabbapajahanatthāti āha "eko dhammo pahātabbo"ti. Pajahantena ca hānabhāgiyam nīharitvā visesabhāgiye avaṭṭhātabbanti āha "eko dhammo hānabhāgiyo, eko dhammo visesabhāgiyo"ti. Visesabhāgiye avatthānañca duppativijjhanena, duppativijjhapativijjhanañce ijjhati, nipphādetabbanipphādanam siddhameva hotīti āha "eko dhammo duppativijjho, eko dhammo uppādetabbo"ti. Tayidam dvayam abhiññeyyādijānanena hotīti āha "eko dhammo abhiññeyyo"ti. Abhiññeyyañce abhiññātam, sacchikātabbam sacchikatameva hotīti. Ettāvatā ca nitthitakiccova hoti, nāssa uttari kiñci karanīyanti evam tāva mahāthero ekakavasena tesam bhikkhūnam patipattividhim uddisanto imāni dasa padāni iminā anukkamena uddisi.

(Ka) Evam aniyamato uddiṭṭhadhamme sarūpato niyametvā dassetum "katamo eko dhammo"ti-ādinā desanam ārabhi. Tena vuttam "iti āyasmā sāriputto"ti-ādi. Esa nayo dukādīsu. Veļukāroti veno. So hi veļuvikārehi kilañjādikaraņena "veļukāro"ti vutto. Anto bahi ca sabbagatagaṇṭhim nīharaņena niggaṇṭhim katvā. Ekekakoṭṭhāseti ekakādīsu dasasu koṭṭhāsesu ekekasmim koṭṭhāse.

Sabbatthakam upakārakanti sabbatthakameva sammā paṭipattiyā upakāravantam. Idāni tamattham vitthārato dassetum "ayañhī"ti-ādi vuttam. Vipassanāgabbham gaṇhāpaneti yathā upari vipassanā paripaccati tikkhā visadā hutvā maggena ghaṭeti, evam pubbabhāgavipassanāvaḍḍhane. Atthapaṭisambhidādīsūti atthapaṭisambhidādīsu nipphādetabbesu, tesam sambhārasambharaṇanti attho. Esa nayo ito paresupi. Ṭhānāṭṭhānesūti ṭhāne aṭṭhāne ca jānitabbe. Mahāvihārasamāpattiyanti mahatiyam jhānādivihārasamāpattiyam. Vipassanāñāṇādīsūti ādi-saddena manomayiddhi-ādikāni saṅgaṇhāti. Aṭṭhasu vijjāsūti sambaṭṭhasutte¹ āgatanayāsu aṭṭhasu vijjāsu.

Teneva bhagavā thometīti yojanā. Nanti appamādam.

Thāmasampannenāti ñāṇabalasamannāgatena. **Dīpetvā**ti "evampi appamādo kusalānaṁ dhammānaṁ sampādane bahupakāro"ti pakāsetvā. Yaṁ kiñci anavajjapakkhikaṁ atthaṁ appamāde pakkhipitvā kathetuṁ yuttanti dassetuṁ "yaṁ kiñcī"ti-ādi vuttaṁ.

(Kha) Kāyagatāsatīti rassam akatvā niddeso, niddesena vā etam samāsapadam daṭṭhabbam. "Aṭṭhikāni puñjakitāni terovassikāni -pa- pūtīni cuṇṇikajātānī"ti² evam pavattamanasikāro "cuṇṇikamanasikāro"ti vadanti. Apare pana bhaṇanti "cuṇṇika-iriyāpathesu pavattamanasikāro"ti. Ettha uppannasatiyāti etasmim yathāvutte ekūnatimsavidhe ṭhāne uppannāya satiyā. Sukhasampayuttāti nippariyāyato sukhasampayuttā, pariyāyato pana catutthajjhāne upekkhāpi "sukhan"ti vattabbatam labhati santasabhāvattā.

- (Ga) Paccayabhūto ārammaṇādivisayopi¹ ārammaṇabhāvena vaṇo viya āsave paggharati, so sampayogasambhavābhāvepi saha āsavehīti **sāsavo.** Tathā upādānānaṁ hitoti **upādāniyo.** Itarathā pana paccayabhāvena vidhi paṭikkhepo.
 - (Gha) Asmīti mānoti "asmī"ti pavatto māno.
- (Ca) **Vipariyāyenā**ti "anicce aniccan"ti-ādinā nayena pavatto pathamanasikāro.
- (Cha) Idha pana vipassanānantaro maggo "ānantariko cetosamādhī"ti adhippeto. Kasmā? Vipassanāya anantarattā, attano vā pavattiyā anantaram phaladāyakattā. Saddatthato pana anantaram phalam anantaram, tasmim anantare niyuttā, tam vā arahati, anantarapayojanoti vā ānantariko.
- (Ja) **Phalan**ti phalapaññā. **Paccavekkhaṇapaññā adhippetā** akuppārammaṇatāya.
- (Jha) Attano phalam āharatīti **āhāro**, paccayoti āha "**āhāraṭṭhitikāti paccayaṭṭhitikā**"ti. **Ayam eko dhammo**ti ayam paccayasankhāto eko dhammoti paccayatāsamañnena ekam katvā vadati. **Ñātapariñnāya abhiñnāyā**ti² nātapariñnāsankhātāya abhinnāya.
- (Ña) **Akuppā cetovimuttīti arahattaphalavimutti** akuppabhāvena ukkamsagatattā. Aññathā sabbāpi phalasamāpattiyo akuppā eva paṭipakkhehi akopanīyattā.

Abhiññāyāti "abhiññeyyo"ti ettha laddha-abhiññāya. Pariññāyāti etthāpi eseva nayo. Pahātabbasacchikātabbehīti pahātabbasacchikātabbapadehi. Pahānapariññāva kathitā pahānasacchikiriyānaṁ ekavāratāya pariññāya saheva ijjhanato. Sacchikātabboti visesato phalaṁ kathitaṁ. Ekasmiṁyeva sattame eva pade labbhati, phalaṁ pana anekesupi padesu labbhati paṭhamaṭṭhamanavamadasamesu labbhanato.

Yasmā tam nippariyāyato dasame eva labbhati, itaresu pariyāyato, tasmā "labbhatī evā"ti sāsankam vadati.

Sabhāvato vijjamānāti yena bahukārādisabhāvena desitā, tena sabhāvena paramatthato upalabbhamānā. Yāthāvāti aviparītā.

Tathāsabhāvāti tamsabhāvā. Na tathā na hontīti avitathattā tathāva honti. Tato eva vuttappakārato aññathā na hontīti pañcahipi padehi tesam dhammānam yathābhūtameva vadati. Sammāti ñāyena. Yam pana ñātam, tam hetuyuttam kāraṇayuttameva hotīti āha "hetunā kāraṇenā"ti. Okappanam janesīti jinavacanabhāvena abhippasādam uppādesi.

Ekadhammavannanā niţţhitā.

Dvedhammavannanā

352. (Ka) "Sabbatthā"ti idam "sīlapūraṇādīsū"ti etena saddhim sambandhitabbam. "Sīlapūraṇādīsu sabbattha appamādo viya upakārakā"ti etena satisampajaññānampi appamādassa viya sabbattha upakārakatā pakāsitā hoti atthato nātivilakkhaṇattā tato tesam. Sati-avippavāso hi appamādo, so ca atthato sabbattha avijahitā sati eva, sā ca kho ñāṇasampayuttā eva daṭṭhabbā itarāya tathārūpasamatthatābhāvato.

(Kha) Tesam pañcasatamattānam bhikkhūnam pubbabhāgapaṭipattivasena desitattā pubbabhāgā kathitā.

(Cha) Ayonisomanasikāro samkilesassa mūlakāraṇabhāvena pavatto hetu, paribrūhanabhāvena pavatto paccayo. Yonisomanasīkārepi eseva nayo. Yathā ca sattānam samkilesāya visuddhiyā ca paccayabhūtā ayonisomanasikāro yonisomanasikāroti "ime dve dhammā duppaṭivijjhā"ti ettha nīharitvā vuttā, evam imehi dhammā nīharitvā vattabbāti dassento "tathā"ti-ādimāha. Tattha asubhajjhānādayo cattāro visamyogā nāma

kāmayogādipaṭipakkhabhāvato. **"Evaṁ pabhedā"**ti iminā "avijjābhāgino dhammā, vijjābhāgino dhammā, kaṇhā dhammā, sukkā dhammā"ti¹ evamādīnaṁ saṅgaho datthabbo.

- (Jha) Paccayehi samecca sambhuyya katattā pañcakkhandhā saṅkhatā dhātu. Kenaci anabhisaṅkhatattā nibbānaṁ asaṅkhatā dhātu.
- (Ña) Tisso vijjā vijjanaṭṭhena², viditakaraṇaṭṭhena ca **vijjā. Vimuttīti arahattaphalaṁ** paṭipakkhato sabbaso vimuttattā.

Abhiññādīnīti abhiññāpaññādīni. Ekakasadisāneva purimavāre viya vibhajja kathetabbato. Maggo kathitoti ettha "maggova kathito"ti evamattham aggahetvā "maggo kathitovā"ti evamattho gahetabbo "anuppāde ñāṇan"ti iminā phalassa gahitattā. Sacchikātabbapade phalam kathitanti etthāpi "phalameva kathitan"ti aggahetvā "phalam kathitamevā"ti attho gahetabbo vijjāggahaṇena tadaññassa saṅgahitattā. Esa nayo ito paresupi evarūpesu thānesu.

Dvedhammavannanā niţţhitā.

Tayodhammavannanā

353. (Cha) Soti anāgāmimaggo. Sabbaso kāmānam nissaraņam samucchedavasena pajahanato. Āruppe arahattamaggo nāma arūpajjhānam pādakam katvā uppanno aggamaggo. Puna uppattinivāraņatoti rūpānam uppattiyā sabbaso nivāraņato. Nirujjhanti sankhārā etenāti nirodho, aggamaggo. Tena hi kilesavaṭṭe nirodhite itarampi vaṭṭadvayam nirodhitameva hoti. Tassa pana nirodhassa pariyosānattā aggaphalam nirodho''ti vattabbatam labbhatīti āha "arahattaphalam nirodhoti adhippetan''ti. "Arahattaphalena hi nibbāne diṭṭhe''ti idam arahattamaggena nibbānadassanassāyam nibbattīti katvā vuttam. Evañca katvā "arahattasankhātanirodhassa paccayattā''ti idampi vacanam samattitam hoti.

(Ja) **Atītaṁsārammaṇan**ti atītakoṭṭhāsārammaṇaṁ ñāṇaṁ, atītā khandhāyatanadhātuyo ārabbha pavattanakañāṇanti attho.

"Maggo kathitovā"ti avadhāraṇam daṭṭhabbam, tathā "sacchikātabbe phalam kathitamevā"ti.

(Ña) **Āsavānam khaye ñāṇan**ti ca āsavānam khayante ñāṇanti adhippāyo, aññathā maggo kathito siyā.

Tayodhammavannanā niţţhitā.

Cattarodhammavannana

354. (Ka) Dārumayam cakkam **dārucakkam**, tathā **ratanacakkam**, āṇaṭṭhena dhammo eva **dhammacakkam**, iriyāpathānam aparāparappavattito **iriyāpathacakkam**, tathā **sampatticakkam** veditabbam.

Anucchavike deseti puññakiriyāya, sammāpaṭipattiyā anurūpadese. Sevanaṁ kālena kālaṁ upasaṅkamanaṁ. Bhajanaṁ bhattivasena payirupāsanaṁ. Attano sammā ṭhapananti attano cittasantānassa yoniso ṭhapanaṁ saddhādīsu nivesananti āha "sace"ti-ādi. Idamevettha pamāṇanti idameva pubbekatapuññatāsaṅkhātaṁ sampatticakkaṁ ettha etesu sampatticakkesu pamāṇabhūtaṁ itaresaṁ kāraṇabhāvato. Tenāha "yena hī"ti-ādi. So eva ca katapuñño puggalo attānaṁ sammā ṭhapeti akatapuññassa tadabhāvato. Paṭhamo lokiyova, tatthāpi kāmāvacarova. Idhāti imasmiṁ Dasuttarasutte. Pubbabhāve lokiyāvāti maggassa pubbabhāge pavattanakā lokiyā eva. Tattha kāraṇaṁ vuttameva.

- (Ca) Kāmayogavisamyogo anāgāmimaggo, diṭṭhiyogavisamyogo sotāpattimaggo, itare dve arahattamaggoti evam anāgāmimaggādivasena veditabbā.
- (Cha) **Paṭhamassa jhānassa lābhin**ti yvāyam appaguṇassa paṭhamassa jhānassa lābhī, tam. **Kāmasahagatā saññāmanasikārā samudācarant**īti tato

vuṭṭhitaṁ ārammaṇavasena kāmasahagatā hutvā saññāmanasikārā samudācaranti codenti tudenti. Tassa kāmānupakkhandānaṁ saññāmanasikārānaṁ vasena so paṭhamajjhānasamādhi hāyati parihāyati, tasmā "hānabhāgiyo samādhī"ti vutto. Tadanudhammatāti tadanurūpasabhāvo. "Sati santiṭṭhatī"ti idaṁ micchāsatiṁ sandhāya vuttaṁ. Yassa hi paṭhamajjhānānurūpasabhāvā paṭhamajjhānaṁ santato paṇītato disvā assādayamānā apekkhamānā abhinandamānā nikanti hoti, tassa nikantivasena so paṭhamajjhānasamādhi neva hāyati, na vaḍḍhati, ṭhitikoṭṭhāsiko hoti, tena vuttaṁ "ṭhitibhāgiyo samādhī"ti.

Avitakkasahagatāti avitakkam dutiyajjhānam santato panītato manasi karoto ārammanavasena avitakkasahagatā saññāmanasikārā. Samudācarantīti pagunapathamajjhānato vutthitam dutiyajjhānādhigamatthāya codenti tudenti, tassa upari dutiyajjhānupakkhandānam saññāmanasikārānam vasena so pathamajjhānasamādhi visesabhūtassa dutiyajjhānassa uppattipadatthānatāla "visesabhāgiyo samādhī"ti vutto. Nibbidāsahagatāti tameva pathamajjhānalābhim jhānato vutthitam nibbidāsankhātena vipassanāñānena sahagatā. Vipassanāñāṇañhi jhānaṅgesu pabhedena upatthahantesu nibbindati ukkanthati, tasmā "nibbidā"ti vuccati. Samudācarantīti nibbānasacchikaranatthāya codenti tudenti. Virāgūpasañhitoti virāgasankhātena nibbānena upasanhito. Vipassanānānanhi "sakkā iminā maggena virāgam nibbānam sacchikātun"ti pavattito "virāgūpasañhitan"ti vuccati, tamsampayuttā saññāmanasikārāpi virāgūpasañhitā eva nāma. Tassa tesam saññamanasikaranam vasena so pathamajjhanasamadhi ariyamaggapativedhassa padatthānatāya "nibbedhabhāgiyo samādhī"ti vutto. Sabbasamāpattiyoti dutiyajjhānādikā sabbā samāpattiyo. Attho veditabboti hānabhāgiyādi-attho tāva vitthāretvā veditabbo.

Maggo kathito catunnam ariyasaccānam uddhaṭattā. **Phalam** kathitam sarūpeneva.

Cattārodhammavannanā nitthitā.

Pañcadhammavannanā

355. (Kha) "Pañcaṅgīko sammāsamādhī"ti samādhi-aṅgabhāvena paññā uddiṭṭhāti pītipharaṇatādivacanena hi tameva vibhajati. Tenāha "pītiṁ pharamānā uppajjatī"ti-ādi. "So imameva kāyaṁ vivekajena pītisukhena abhisandetī"ti-ādinā¹ nayena pītiyā, sukhassa ca pharaṇaṁ veditabbaṁ. Sarāgavirāgatādivibhāgadassanavasena paresaṁ ceto pharamānā. Ālokapharaṇeti kasiṇālokassa pharaṇe sati teneva ālokena pharitappadese. Tassa samādhissa rūpadassanapaccayattā paccavekkhaṇañāṇaṁ paccavekkhaṇanimittaṁ².

Pītipharaṇatā sukhapharaṇatāti ārammaṇe ṭhatvā catutthajjhānassa uppādanato tā "pādā viyā"ti vuttā. Cetopharaṇatā ālokapharaṇatāti taṁtaṁkiccasādhanato tā "hatthā viyā"ti vuttā. Abhiññāpādakajjhānaṁ samādhānassa sarīrabhāvato "majjhimakāyo viyā"ti vuttaṁ. Paccavekkhananimittaṁ² uttamaṅgabhāvato "sīsaṁ viyā"ti vuttaṁ.

(Ja) Sabbaso kilesadukkhadarathapariļāhānam vigatattā lokiyasamādhissa sātisayamettha sukhanti vuttam "appitappitakkhaņe sukhattā paccuppannasukho"ti. Purimassa purimassa vasena pacchimam pacchimam laddhāsevanatāya santatarapaṇītatarabhāvappatti³ hotīti āha "purimo purimo -pa- sukhavipāko"ti.

Kilesapaṭippassaddhiyāti kilesānaṁ paṭippassambhanena laddhattā. Kilesapaṭippassaddhibhāvanti kilesānaṁ paṭippassambhanabhāvaṁ. Laddhattā pattattā tabbhāvaṁ upagatattā. Lokiyasamādhissa paccanīkāni nīvaraṇapaṭhamajjhānanikanti-ādīni niggahetabbāni, aññe kilesā vāretabbā, imassa pana arahattasamādhissa paṭippassaddhasabbakilesattā na niggahetabbaṁ, vāretabbañca atthīti maggānantaraṁ, samāpattikkhaṇe ca appayogena adhigatattā, ṭhapitattā ca aparihānavasena vā ṭhapitattā na saṅkhāraniggayhavārivāvaṭo⁴. "Sativepullappattattā"ti etena appavattamānāyapi

^{1.} Ma 1. 344 pitthe. 2. Paccavekkhaṇānimittam (Ka) 3. ...bhāvappattam (?)

^{4.} Nasasankhāraniggayhavāritagato (Pāliyam, Atthakathāyanca.)

satiyā satibahulatāya **sato** eva nāmāti dasseti,

"yathāparicchinnakālavasenā"ti etena paricchindanasatiyā satoti dasseti. Sesesu ñāṇaṅgesu. Pañcañāṇikoti ettha vuttasamādhimukhena pañca ñāṇāneva uddiṭṭhāni, niddiṭṭhāni ca.

Maggo kathito indriyasīsena sammāvāyāmādīnam kathitattā. Phalam kathitam asekkhānam sīlakkhandhādīnam kathitattā.

Pañcadhammavaṇṇanā niṭṭhitā.

Chadhammavannanā

356. Maggo kathitoti ettha vattabbam hettha vuttameva.

Sattadhammavannanā

357. (Ña) Hetunāti-ādi antavantato, anaccantikato, tāvakālikato, niccapaṭikkhepatoti evamādinā hetunā. Nayenāti "yathā ime saṅkhārā etarahi, evaṁ atīte anāgate ca aniccā saṅkhatā paṭiccasamuppannā khayadhammā vayadhammā virāgadhammā nirodhadhammā"ti atītānāgatesu nayananayena. Kāmaṁ khīṇāsavassa sabbesaṁ saṅkhārānaṁ aniccatādi sudiṭṭhā suppaṭividdhā, taṁ pana asammohanavasena kiccato, vipassanāya pana ārammaṇakaraṇavasenāti dassento āha "vipassanāñāṇena sudiṭṭhā hontī"ti. Kilesavasena uppajjamāno pariļāho vatthukāmasannissayo vatthukāmāvassayo cāti vuttaṁ "dvepi sapariļāhaṭṭhena aṅgārakāsu viyā"ti. Ninnassevāti¹ ninnabhāvasseva. Anto vuccati lāmakaṭṭhena taṇhā. Byantaṁ vigatantaṁ bhūtanti byantībhūtanti āha "niratibhūtaṁ², nittaṇhanti attho"ti. Idha sattake. Bhāvetabbapade maggo kathito bojjhaṅgānaṁ vuttattā.

Paṭhamabhāṇavāravaṇṇanā niṭṭhitā.

^{1.} Ninnassa (Aṭṭhakathāyaṁ) 2. Niyatibhūtaṁ (Aṭṭhakathāyaṁ), vigatantībhūtaṁ (?)

Atthadhammavannanā

- ādibrahmacariyikā yathā "vinayo eva venayiko"ti¹, tassā ādibrahmacariyikāya. Kā pana sāti āha "paññāyā"ti. Sikkhattayasaṅgahassāti adhisīlasikkhādisikkhattayasaṅgahassa. Upacārajjhānasahagatā taruṇasamathapaññāva udayabbayānupassanāvasena pavattā taruṇavipassanāpaññā². Ādibhūtāyāti paṭhamāvayavabhūtāya, desanāvasena cetaṁ vuttaṁ. Uppattikāle pana natthi maggadhammānaṁ ādimajjhapariyosānatā ekacittuppādapariyāpannattā ekajjhaṁyeva uppajjanato. Pemanti daṭhabhatti, taṁ pana vallabhavasena pavattamānaṁ gehasitasadisaṁ hotīti "gehasitapeman"ti vuttaṁ. Garukaraṇavasena pavattiyā garu cittaṁ etassāti garucitto, tassa bhāvo garucittabhāvo, garumhi garukāro. "Kilesā na uppajjantī"ti vatvā tattha kāraṇamāha "ovādānusāsaniṁ labhatī"ti. Garūnañhi santike ovādānusāsaniṁ labhitvā yathānusiṭṭhaṁ paṭipajjantassa kilesā na uppajjantī. Tenāha "tasmā"ti-ādi.
- (Cha) **Petā**ti petamahiddhikā. **Asurānan**ti devāsurānam. Petāsurā pana petā evāti tesam petehi sangaho avuttasiddhova. **Āvāhanam gacchantī**ti sambhogasamsaggamukhena peteheva asurānam sangahaņe kāraṇam dasseti.
- (Ja) Appicchassāti ni-icchassa. Abhāvattho hettha appasaddo "appaḍaṁsamakasavātātapā"ti-ādīsu³ viya. Paccayesu appiccho paccayaappiccho, cīvarādipaccayesu icchārahito. Adhigama-appicchoti jhānādiadhigamavibhāvane icchārahito. Pariyatti-appicchoti pariyattiyaṁ bāhusaccavibhāvane icchārahito. Dhutaṅga-appicchoti dhutaṅgesu appiccho dhutaṅgavibhāvane icchārahito. Santaguṇanigūhanenāti attani saṁvijjamānānaṁ jhānādiguṇānañceva bāhusaccaguṇassa ca dhutaṅgaguṇassa ca nigūhanena chādanena. Sampajjatīti nippajjati sijjhati. No mahicchassāti mahatiyā icchāya samannāgatassa, icchaṁ vā mahantassa no sampajjati anudhammassāpi anicchanato.

^{1.} Vi-Ṭṭha 1. 106 piṭṭhe.

^{2.} Taruṇasamathavipassanāpaññā (Aṭṭhakathāyaṁ)

^{3.} Am 3. 268 pitthe.

Pavivittassāti pakārehi vivittassa. Tenāha "kāyacitta-upadhivivekehi vivittassā"ti. "Aṭṭha-ārambhavatthuvasenā"ti etena bhāvanābhiyogavasena ekībhāvova idha "kāyaviveko"ti adhippeto, na gaṇasaṅgaṇikābhāvamattanti dasseti. Kammanti yogakammaṁ.

Sattehi, kilesehi ca saṅgaṇanaṁ samodhānaṁ saṅgaṇikā, sā āramitabbaṭṭhena ārāmo etassāti saṅgaṇikārāmo, tassa. Tenāha "gaṇasaṅgaṇikāya cevā"ti-ādi. Āraddhavīriyassāti paggahitavīriyassa, tañca kho upadhiviveke ninnatāvasena "ayaṁ dhammo"ti vacanato. Esa nayo ito paresupi. Vivaṭṭasannissitaṁyeva hi samādhānaṁ idhādhippetaṁ, tathā paññāpi. Kammassakatāpaññāya hi patiṭṭhato kammavasena "bhavesu nānappakāro anattho"ti jānanto kammakkhayakarañāṇaṁ abhipattheti, tadatthañca ussāhaṁ karoti. Mānādayo sattasantānaṁ saṁsāre papañcenti vitthārentīti papañcāti āha "nippapañcassāti vigatamānataṇhādiṭṭhipapañcassā"ti.

Maggo kathito sarūpeneva.

Navadhammavannanā

359. (Kha) Visuddhinti ñānadassanavisuddhim, accantavisuddhimeva vā. **Catupārisuddhisīlan**ti pātimokkhasamvarādinirupakkilitthatāya catubbidhaparisuddhivantam sīlam. Pārisuddhipadhāniyanganti puggalassa parisuddhiyā padhānabhūtam angam. Tenāha "parisuddhabhāvassa padhānangan"ti. Samathassa visuddhibhāvo vodānam pagunabhāvena paricchinnanti āha "attha pagunasamāpattiyo"ti. Vigatupakkilesañhi "pagunan"ti vattabbatam labbhati, na sa-upakkilesam hānabhāgiyādibhāvappattito. Sattaditthimalavisuddhito nāmarūpaparicchedo ditthivisuddhi. Paccayapariggaho addhattayakankhāmalavidhamanato kankhāvitaranavisuddhi. Yasmā nāmarūpam nāma sappaccayameva, tasmā tam parigganhantena atthato tassa sappaccayatāpi pariggahitā eva hotīti vuttam "ditthivisuddhīti sappaccayam nāmarūpadassanan"ti. Yasmā pana nāmarūpassa paccayam parigganhantena tīsu addhāsu kankhāmalavitaranapaccayākārāvabodhavaseneva hoti, tasmā "paccayākārañāṇan"ti-ādi vuttam yathā kankhāvitaraṇavisuddhi "dhammatthitiñānan"ti vuccati. Maggāmagge ñānanti maggāmagge vavatthapetvā thitañānam.

Ñāṇanti idha taruṇavipassanā kathitā tesam bhikkhūnam ajjhāsayavasena "ñāṇadassanavisuddhī"ti vuṭṭhānagāminiyā vipassanāya vuccamānattā. Yadi "ñāṇadassanavisuddhī"ti vuṭṭhānagāminivipassanā adhippetā, "paññā"ti ca arahattaphalapaññā, maggo pana kathanti? Maggo bahukārapade virāgaggahaṇena gahito. Vakkhati hi "idha bahukārapade maggo kathito"ti¹.

(Cha) Cakkhādidhātunānattanti

cakkhādirūpādicakkhuviññāṇādidhātūnam vemattatam nissāya.

Cakkhusamphassādinānattanti

cakkhusamphassasotasamphassaghānasamphassādisamphassavibhāgam. Saññānānattanti ettha rūpasaññādisaññānānattampi labbhateva, tam pana kāmasaññādīggahaṇeneva gayhati. Kāmasaññādīti ādi-saddena byāpādasaññādīnam gahaṇam. Saññānidānattā papañcasankhānam "saññānānattam² paṭicca saṅkappanānattan"ti vuttam, "yam saṅkappeti, tam papañcetī"ti vacanato "saṅkappanānattam paṭicca chandanānattan"ti vuttam. Chandanānattanti ca taṇhāchandassa nānattam. Rūpapariļāhoti rūpavisayo rūpābhipatthanāvasena pavatto kilesapariļāho. Saddapariļāhoti etthāpi esevanayo. Kileso hi uppajjamāno appattepi ārammaṇe patto viya pariļāhova uppajjati. Tathābhūtassa pana kilesachandassa vasena rūpādipariyesanā hotīti āha "pariļāhanānattatāya rūpapariyesanādinānattam uppajjatī"ti. Tathā pariyesantassa sace tam rūpādi labbheyya, tam sandhāyāha "pariyesanādinānattatāya rūpapaṭilābhādinānattam uppajjatī"ti.

(Ja) Maraṇānupassanāñaṇeti maraṇassa anupassanāvasena pavattañāṇe, maraṇānussatisahagatapaññāyāti attho. Āhāraṁ pariggaṇhantassāti gamanādivasena āhāraṁ paṭikkūlato pariggaṇhantassa. Ukkaṇṭhantassāti nibbindantassa katthacipi asajjantassa.

Dasadhammavannanā

360. (Jha) **Nijjarakāraņānī**ti pajahanakāraņāni. Imasmim **abhiññā**pade maggo kathīyatīti katvā "**ayam heṭṭhā -pa- puna gahitā**"ti vuttam. Tathā hi vakkhati "idha-abhiññāpade maggo kathito"ti³. Kiñcāpi nijjiṇṇā

^{1.} Dī-Ṭṭha 3. 248 piṭṭhe.

^{2.} Kāmasaññādinānattam. Kāmāsaññānidānattam (Ka)

^{3.} Dī-Ttha 3. 249 pitthe.

micchādiṭṭhīti ānetvā sambandhitabbaṁ. Yathā micchādiṭṭhi vipassanāya nijjiṇṇāpi na samucchinnāti samucchedappahānadassanatthaṁ puna gahitā, evaṁ micchāsaṅkappādayopi vipassanāya pahīnāpi asamucchinnatāya idha puna gahitāti ayamattho "micchāsaṅkappo"ti-ādīsu sabbapadesu vattabboti dasseti "evaṁ sabbapadesu nayo netabbo"ti iminā.

Ettha cāti "sammāvimuttipaccayā ca aneke kusalā dhammā bhāvanāpāripūrim gacchantī"ti etasmim pāļipade. Ettha ca samucchedavasena, paṭippassaddhivasena ca paṭipakkhadhammā sammadeva vimuccanam sammāvimutti, tappaccayā ca maggaphalesu aṭṭha indriyāni bhāvanāpāripūrim upagacchantīti maggasampayuttānipi saddhādīni indriyāni uddhaṭāni. Maggavasena hi phalesu bhāvanā pāripūrī nāmāti. Abhinandanaṭṭhenāti ativiya sinehanaṭṭhena. Idañhi somanassindriyam ukkamsagatasātasabhāvam sampayuttadhamme sinehantam tementam viya pavattati. Pavattasantati-ādhipateyyaṭṭhenāti vipākasantānassa jīvane adhipatibhāvena. "Evan"ti-ādi vuttasseva atthassa nigamanam.

Addhena saha chaṭṭhāni pañhasatāni, paññāsādhikāni pañhasatānīti attho.

Ettha ca āyasmā dhammasenāpati "dasasu nāthakaraṇadhammesu patiṭṭhāya dasa kasiṇāyatanāni bhāvento dasa āyatanamukhena pariñām paṭṭhapetvā pariññeyyadhamme parijānanto dasa micchatte, dasa akusalakammapathe ca pahāya dasa kusalakammapathesu ca avaṭṭhito dasasu ariyāvāsesu āvasitukāmo dasasaññā uppādento dasanijjaravatthūni abhiññāya dasa asekkhadhamme adhigacchatī'ti tesam bhikkhūnam ovādam matthakam pāpento desanam niṭṭhapesi. Pamodavasena paṭiggaṇhanam abhinandananti āha "sādhu sādhūti abhinandantā sirasā sampaṭicchimsū"ti. Tāya attamanatāyāti tāya yathādesitadesanāgatāya pahaṭṭhacittatāya, tattha yathāladdha-atthavedadhammavedehīti attho. Imameva suttam āvajjamānāti imasmim sutte tattha tattha āgate abhiññeyyādibhede dhamme abhijānanādivasena samannāharantā. Saha paṭisambhidāhi -papatiṭṭhahimsūti attano upanissayasampannatāya, therassa ca desanānubhāvena

yathāraddham vipassanam ussukketvā paṭisambhidāparivārāya abhiññāya saṇṭhahimsūti.

Sumangalavilāsiniyā dīghanikāyaṭṭhakathāya Dasuttarasuttavaṇṇanāya līnatthappakāsanā.

Nitthitā ca pāthikavaggatthakathāya līnatthappakāsanā.

Pāthikavaggaṭīkā niṭṭhitā.

Nigamanakathāvaṇṇanā

Therānam Mahākassapādīnam vamso paveņī anvayo etassāti **theravamsanvayo**, tena, catumahānikāyesu theriyenāti attho.

Dasabalassa sammāsambuddhassa guņagaņānam paridīpanato dasabalaguņagaņaparidīpanassa. Ayañhi āgamo brahmajālādīsu, mahāpadānādīsu, sampasādanīyādīsu ca tattha tattha visesato buddhaguņānam pakāsanavasena pavattoti. Tathā hi vuttam ādito "saddhāvahaguņassā"ti¹.

Mahātthakathāya sāranti dīghanikāyamahā-atthakathāyam atthasāram.

Ekūnasaṭṭhimattoti thokam ūnabhāvato matta-saddaggahaṇam.

Mūlakaṭṭhakathāsāranti pubbe vuttam dīghanikāyamahāaṭṭhakathāsārameva puna nigamanavasena vadati. Atha vā mūlakaṭṭhakathāsāranti porāṇaṭṭhakathāsu atthasāram, tenetam dasseti "dīghanikāyamahā-aṭṭhakathāyam atthasāram ādāya imam Sumangalavilāsinim karonto sesamahānikāyānampi mūlakaṭṭhakathāsu idha viniyogakkhamam atthasāram ādāyayeva akāsin"ti.

"Mahāvihāravāsīnan"ti² ca idam purimapacchimapadehi saddhim sambandhitabbam "mahāvihāravāsīnam samayam pakāsayantim, mahāvihāravāsīnam mūlakaṭṭhakathāsāram ādāyā"ti ca. Tena puññena. Hotu sabbo sukhī lokoti kāmāvacarādivibhāgo sabbopi sattaloko yathāraham bodhittayādhigamanavasena sampattena nibbānasukhena sukhito hotūti sadevakassa lokassa accantasukhādhigamāya attano puññam pariṇāmeti.

(Parimāṇato sādhikaṭṭhavīsasahassanavutibhāṇavārā niṭṭhitāti. Parimāṇato sādhikaṭṭhavīsasahassamattaganthena dīghanikāyaṭīkā racitācariyadhammapālena.

^{1.} Dī-Ṭṭha 1. 1 piṭṭhe.

^{2.} Mahāvihāre nivāsinam (Aṭṭhakathāyam)

Micchādiṭṭhādicorehi, sīlādidhanasañcayaṁ. Rakkhaṇatthāya sakkaccaṁ, mañjūsaṁ viya kāritanti)¹.

Niṭṭhitā sumaṅgalavilāsiniyā dīghanikāyaṭṭhakathāya līnatthappakāsanā.

Dīghanikāyaṭīkā niṭṭhitā.

Pāthikavaggaṭīkāya

$Sa\dot{m}va\dot{n}\dot{n}itapad\bar{a}na\dot{m}~anukkama\dot{n}ik\bar{a}$

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Akaṭṭhapāko	46	Atto	230
Akaṭṭhe	155	Aṭṭhitakiriyatā	183
Akampanañāṇaṁ	181	Aḍḍhayogo	230
Akasiralābhī	81	Aṇḍakā	179, 180
Akilamanto	248	Atikkamanti	134
Akopo	238	Aticārinī	200
Akkhadhuttā	133	Atinipuṇā	119
Akkharaṁ	48	Atimānī	19
Akkhasoṇḍo	133	Ativāheti	107
Akkhānaṁ	133	Atuṭṭhākāraṁ	7
Aggakoṇḍā	109	Attakilamathānuyogam	80
Aggaññaṁ	3, 11	Attadīpā	24
Aggarasāni	31	Attamanatā	179
Aggidaḍḍhaṁ	225	Attā	160
Acaṇḍikkaṁ	179	Attādhipateyyā	173
Acalaṭṭhitā	40	Atthakāraņā	135
Acchanti	48	Atthacariyā	110
Acchādanānam	118	Atthaddho	145
Acchenti	48	Atthantaro	117
Ajjavaṁ	176	Atthapaccatthikā	260
Ajjhattikāni	252	Atthapațisambhidā	53
Ajjhappattā	25	Atthānusāsanīsu	117
Aññatitthiyā	15	Atriccham	200
Aññindriyaṁ	211	Adukkhalābhī	81
Añño	211	Addhā	192
Aṭṭakā	164	Addhikajanassa	15

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Adhammarāgassa	29	Anupubbavihārā	265
Adhikaraṇāni	259	Anuppiyam	135
Adhiciṇṇaṁ	87	Anumajjantā	51
Adhijegucche	17	Anumānam	58
Adhipaññatti	98	Anuyuñjitabbato	69
Adhibhavati	104	Anurūpena	140
Adhimutto	108	Anulomikā	210
Adhivāsanakhanti	177	Anusenti	259
Adhisīlam	212	Anussavo	59
Adhunuppattikā	222	Anesanam	227
Adhosaṅkhapādo	112	Anolīnavuttitā	183
Anacchariyattā	84	Antarakappo	31
Anatthasamyuttam	80	Antaravirahitā	40
Anattho	134	Antalikkhacarā	42
Anaddhena	218	Anto	193
Anayo	12	Antovaṅkapādatā	109
Anariyam	80	Anvayeñāṇaṁ	234
Anavaññātena	111	Anvayo	61
Anasanam	33	Apakkami	4
Anāvayham	160	Apaciti	206
Anikkhittachandatā	183	Apacitisahagatam	206
Aniñjam	204	Apatthaddhā	25
Anibaddhavāsā	275	Apadānam	47
Anuṭṭhānasīlo	134	Apanūdano	108
Anuttaram	213	Apanūditā	107
Anuttarāni	255	Aparapajā	143
Anuttariyam	64, 213	Aparicchedam	93
Anupariyāyo	61	Apassenāni	221
Anupasamasamvattanam	87	Apāyo	215
Anupubba-uggatavattitam	112	Apihitena	218

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Apuñño	204	Amittatāpanā	119
Appaṭikkūlakāvaho	35	Ayanato	266
Appaţikkūlasaññī	79	Ayo	12, 244
Appațivānitā	183	Araññavanapatthāni	15
Appațisaraņo	88	Araññārāmā	164
Appaṭissayo	252	Araham	39
Appațissavo	252	Ariyavāsā	272
Appatiṭṭhatāya	37	Ariyena	14
Appattam	96	Ariyo	217
Appamāṇā	221	Alampateyyā	31
Appamādo	69	Alaṅkāratthaṁ	262
Apphuṭaṁ	54	Alasakena	5
Abodhitatthā	89	Alāyitaṁ	46
Abbhanumodanam	206	Allīnatarāni	91
Abyāpādo	186	Avakkhipati	18
Abhavo	238	Avaruddhā	160
Abhi-ācikkhanti	12	Avasakkitam	27
Abhikkantena	148	Avigatapematā	259
Abhikkhaṇam	86	Avijjā	172
Abhiceto	81	Aviditanibbānā	12
Abhijānāti	66	Avivayham	160
Abhijānitabbo	277	Avihimsā	186
Abhiñño	58	Avihimsāya	106
Abhiniviṭṭhā	40	Asamkiņņā	222
Abhiniveso	235	Asantuṭṭhitā	183
Abhirūpe	148	Asamadhurehi	80
Abhivissajjesi	118	Asambhinnam	16
Abhiharati	21	Asahānadhammatam	120
Amaccā	29	Assaramānā	25

Padānukkamo	Piṭṭhaṅko	Padānukkamo	Piṭṭhaṅko
[A]		[Ā]	
Assāso	16	Āsabhī	59
Ahāyi	46	Āsayo	9
[Ā]		Āsevanā	183
Ākappena	14	Āhāraṭṭhitikā	167
Ākiritvā	155	Āhāro	279
Āgantukabhattaṁ	228	Āhunaṁ	199
Āgamanato	213	[I-Ī]	
Ājīvato	22		235
Āṇākhettaṁ	82	Iṭṭhaṁ	
Ādiccabandhunam	154	Itthisoṇḍā	133
Ādicco	153	Iddhiyā	148
Ādibrahmacariyaṁ	16	Ibbhe	37
Ādeyyavāco	123	Iriyati	14
Ādesanāni	67	Īsakampi	27
Ādhānaṁ	20	[U]	
Ādhipateyyam	216	Ukkaṁsati	18
Ānantariko	279	Ukkaṇṭhantassa	288
Ānuyantā	40	Ukkuṭikapādatā	109
Āpattikkhandhā	174	Ukkuṭikāsanaṁ	112
Ābādhakariṁ	123	Ukkhipati	18
Ābhujitvā	52	-	150
Āyataṁ	32	Uggaņhātu	
Āyo	215	Uggahajānanam	179
Ārammaṇaṭṭhiti	237	Ucchuvappam	158
Ālayaṭṭhena	101	Ujukam	43
Ālayabhūtaṁ	106	Uṭṭhānavīriyasampanno	145
Āvajjantā	51	Uttaruttaram	62
Āvijjhitvā	9	Uttāsabahulo	116
Āvilakkhi	121	Udakarahado	153
Āsado	200	Udayo	192

Padānukkamo	Piṭṭhaṅko	Padānukkamo	Piṭṭhaṅko
[U]		[U]	
Udarāvadehakam	249	Ubbhatakam	163
Uddesabhattam	228	Uram	26
Uddhamsoto	248	Ussukī	19
Uddhaṅgamanīyā	112		17
Uddhāpam	61	[E]	
Unnatakāyena	109	Ekamsena	8
Unnamati	14	Ekako	170
Upagamanīyā	266	Ekato	82
Upacitam	104	Ekappahārena	45
Upaṭṭhānena	141	Ekabuddhadharanī	84
Upatāpenti	61	Ekībhāve	259
Upatthambheti	217	Ekuddeso	84
Upaddavā	134	Eṇijaṅghalakkhaṇaṁ	112
Upanāhī	19, 253		112
Upanijjhāyatam	47	[0]	
Upapannatarāni	91	Okappanam	247
Upavattati	122	Okappanasaddhā	120
Upavadanā	260	Oṇameyya	84
Upasamharati	79	Odapattakinī	268
Upasaggā	134	Opap a tino	242
Upādānāni	242	Opasamiko	265
Upādāniyo	279	Obhatacumbaṭā	268
Upādhī	78	Orașo	40
Upāyattā	193		
Upāyapadhānam	183	Orodheyyāma	16
Uposathakammam	106	Osakkeyyāma	32
Uposathikam	228	Osāritam	85
Uppattiṭṭhānaṁ	228	Osīdanaṁ	261
Ubbādhanāya	120	Ohananti	241
Ubbegabahulo	116	Ohārito	39

Padānukkamo	Piṭṭhaṅko	Padānukkamo	Piṭṭhaṅko
[Ka]		[Ka]	
Kakkhaļam	22	Kāruññaṁ	84
Kaṅkhati	196	Kāļakaṁ	240
Kaṇhaṁ	63, 240	Kāļakavasena	127
Kaṇhavipāko	240	Kāļasīho	9
Kanhe	37	Kicchati	189
Kattukamyatā	217	Kiñcanā	198
Kadariyo	134	Kittivaṇṇaharā	144
Kantam	235	Kiliṭṭhaṁ	61
Kappitakesamassu	149	Kilissanti	128
Kampeyya	84	Kilesavimuttiñāņe	77
Kammam	70	Kilesasanganikam	77
Kammakilesā	128	Kisathūlena	84
Kammanto	133	Kukkuravatiko	4
Kammavācā	175	Kuṭibhattaṁ	228
Kammassakatam	209	Kuttena	14
Kammassakatāñāṇaṁ	182	Kumbhathūnam	133
Kammāyatanam	209	Kulasampannā	36
Kali	125	Kusalo	217
Kalyāṇamitto	174	Kusīto	261
Kākakkhi	121	Kesarasīho	9
Kākassarā	123	Kojavaṁ	107
Kāṇo	121	Koñcasakuņehi	159
Kāmakiccam	208	Kotthu	10
Kāmataṇhā	188	Kodhasāmantā	180
Kāmarāgānusayo	259	Kopam	6
Kāmavitakko	185	Kosallam	215
Kāmasaṅkappo	187		213
Kāmūpapattiyo	208	[Kha]	
Kāmesanā	190	Khattiyavamso	221
Kāraṇamahantattā	85	Khanti	210

Padānukkamo	Piṭṭhaṅko	Padānukkamo	Piṭṭhaṅko
[Kha]		[Ga - Gha]	
Khandhapaññatti	98	Gottarakkhitā	268
Khamati	238	Goyuttehi	9
Khamo	266	Ghananivāsatam	33
Khayeñāṇaṁ	183	[Ca]	
Khiḍḍāpadosikam	12	Cakkam	200
Khipitabbam	47	Catukkondiko	4
Khilā	125	Caraṇam	112
Khīṇattā	39	Caleyya	84
Khuracakkadharam	199		240
Khemattā	90	Cāgo	240
[Ga]		Cātuyāmo Cārittaṁ	30
Ganakā	29	Cittaviveko	211
Gaṇasaṅgaṇikaṁ	76		8
Gandhabbā	34	Cittutrāsabhayam	109
Gabbhokkamanesu	66	Cirayapanāya	36
Gamanasamatthāya	77	Cūļapāsādā Cetasovinibandhā	
Garucitto	286	Cetasovimbandna	249
Gahaṇaṭṭhena	242	[Cha]	
Gahapatinecayikā	8	Chandavāsinī	268
Gihibyañjanena	93	Chandikatā	217
Gihivinayam	127	Chādentam	84
Gihivinayo	146	Chinnaṭṭhānaṁ	61
Guṇato	123	Chinnabhinnako	133
Guttadvāro	76	[Ja]	
Gumbagumbā	47	Jaggito	139
Guhā	230	Janghapesanikā	112
Gūļhajivhā	123	Janā	151
Gedhajāto	19	Jayaṁ	133
·		l ~	2

Padānukkamo	Piṭṭhaṅko	Padānukkamo	Piṭṭhaṅko
[Ja]		[Ta]	
Jalaṁ	137, 148	Tamo	243
Jātikhettam	82	Tikicchanattham	216
Jātijarāmaraņiyā	22	Tiṇasīho	9
Jātibhayam	182	Tittham	225
Jāyati	256	Tidivapuravarena	124
Jino	133	Tintā	209
Jūtakaro	133	Tucchapurisa	2
Jeguccham	17	Tusitā	209
[Jha - Ña]		[Tha]	
Jhānanikanti	188	Thaddho	19
Ñāṇavādena	7	Thambharahito	145
Ñatibyasane	246	Thiraggahano	103
Ñayappaṭipanno	89	Thiravīriyena	80
Ñāyo	89	Thiro	90
[Ṭha]		Thusam	46
Ţhāti	66	Thūpam	87
Ţhānam —	128	[Da]	
Ţhānāṭṭhānatā	176	Dakkhiṇā	242
Ţhānuppattikā	61	Dakkhineyyo	200
Țhiti	192, 237	Dantakūtaṁ	19
[Ta]		Damanādīhi	28
Takko	59	Davā	54
Tacappattā	21	Dassanena	14
Tapam	20	Dānaṁ	103
Tapanissitako	17	Dānapaccayā	263
Tapo	17	Dānamayaṁ	205
Tapojigucchā	17	Dārucakkam	282
Tandīkato	84	Diṭṭhadhammo	81

Padānukkamo	Piṭṭhaṅko	Padānukkamo	Piṭṭhaṅko
[Da]		[Dha]	
Diṭṭhi	210	Dhanakkītā	268
Diṭṭhijugataṁ	206	Dhamamānam	60
Ditthipativedhe	259	Dhamma-āṇam	147
Dinno	62	Dhammadānayaññam	112
Diyyanavasena	103	Dhammanijjhānakkhanti	210
Divā	45	Dhammanvayena	58
Disāgamanīyā	275	Dhammapaṭisambhidā	53
Dīpo	24	Dhammabhūto	41
Dukkham	80, 173	Dhammamayattā	41
Dukkhatā	194	Dhammarakkhitā	268
Dukkhanibbattakam	89	Dhammikavamse	139
Dukkhamam	80	Dhammo	61, 74
Duddasattā	236	Dhātukusalatā	178
Duppaccakkhakaro	277	Dhāraṇatthaṁ	91
Dummano	95	Dhāraṇasamatthāya	77
Dussapāvāriko	52	Dhutanga-appiccho	286
Desanāmayam	206	Dhurabhattam	228
Dovacassatā	174	Dhorayho	80
Dovacassāyam	178	Dhovanupagena	226
Dosam	7	[Na]	
Dvangulakappo	149	Nadīviduggam	32
Dvayakārī	49	Namassa	146
Dvayagāminī	8	Nameyya	84
Dvijivhā	123	Nāṭaputtiyā	87
Dvejjhajātā	87	Nānādijagaņāyutā	159
Dvedhikajātā	87	Nāmayati	177
· ·	07	Nāļikā	46
[Dha]		Nikāmalābhī	81
Dhajālu	34	Niggamanam	235
Dhajāhaṭā	268	Nigghoso	15

Padānukkamo	Piṭṭhaṅko	Padānukkamo	Piṭṭhaṅko
[Na]		[Na]	
Nighamsanam	60	Nissaraņam	229
Nicayam	137	Nissaraņapañño	227
Nicayo	8	Nissaraņīyā	250
Niccakappam	149	Nissāradā	152
Niccapupphitā	159	Nekkhammam	231
Niccalaggahaņo	103	Netā	146
Nittandī	76	Nemi-abhimukham	27
Nidamsesi	111	Nomuttapaţibh a no	77
Nidassanam	201	Nhātakilesattā	151
Niddose	27	[Do]	
Nipphādessati	89	[Pa] Paṁsukūlaṁ	223
Nibaddhavāsam	160		
Nibaddhavāsino	150	Pakkhikam	228
Nibbuyhamānāya	47	Paccatāļesi	26
Nibbedhikapaññā	117	Paccatthiko	105
Nimantanam	228	Paccanīkadiṭṭhi	30
Niyyāti	3, 89	Paccantimam	61
Niyyānaṭṭhena	65	Paccaya-appiccho	286
Niyyāniko	64	Paccayo	170
Nirantarapūrito	33	Paccāmitto	105
Nirayagāminīyā	190	Paccupaţţhitakāmā	208
Nirayo	244	Paccupādi	25
Niruttipațisambhidā	53	Pajahanattham	99
Nirodho	188	Pajahantassa	232
Nillajjatā	173	Pañcakāmaguņiko	188
Nivātavutti	145	Pañhuddhāro	88
Nivāpo	16	Paññatti	48
Niviṭṭhā	40	Paññāvāhī	74
Nivutthavasena	101	Paṭav ā sinī	268
Nivesenti	140	Pați-esanto	159

Padānukkamo	Piţţhaṅko	Padānukkamo	Piṭṭhaṅko
[Pa]		[Pa]	
Paṭikuṭati	103	Pannasakhā	134
Paţikkūle	79	Pabbanti	29
Pațicarato	261	Pamāņena	84
Paţiññātakaraṇaṁ	261	Paranimmitakāmā	208
Paṭinissaggī	20	Paravādabhindanam	23
Paṭipadā	83	Parāmasati	189
Paţibhānapaţisambhidā	53	Parikammam	159
Paṭibhogiyā	122	Paricārenti	80
Paṭivānaṁ	87	Pariṇamati	233
Paṭivānarūpā	87	Paripācenti	251
Paṭivānī	183	Paribāhiro	229
Pațivicinitv a	119	Paribbājikāya	80
Paṭisanthāro	180	Paribhāsanti	37
Paṭihananaṁ	201	Pariyatti-appiccho	286
Paṭihāro	90	Pariyādiyamāno	77
Pațihiro	90	Pariyesitam	95
Paṇidhāya	249	Parisuddhapariv a ro	124
Paṇihit ā	68	Palibundhati	241
Paṇītapaṇītaṁ	63	Pavivittassa	287
Paṇḍaraṁ	240	Pavisati	66
Paṇḍupalāsaṁ	107	Pasaṁsanīy ā	146
Paṇḍusīho	9	Pasaṭaṁ	121
Paṇṇāni	226	Pasādasaddhā	120
Paņhikoņḍā	109	Pasāriyati	103
Pattānuppadānam	206	Pahāsi	124
Padahati	217	Pākārasandhi	61
Padahanabhāvo	247	Pāṭipadadivase	43
Padahitabbato	69	P a ṭipadikaṁ	228
Padhānāni	232	Pāṭihiro	90
Pantāni	15	Pāṇātipāto	184

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Pāṇissaraṁ	133	Pokkharasātakā	159
Pātabyatam	47	Pothujjanikam	80
Pādāpacce	37	Porī	180
Pāpaṇikam	225	[Pha]	
Pāpiccho	19	Phaṇahatthakā	109
Pāmokkho	111	·	73
Pāramiñāṇaṁ	60	Phuṭṭhanto	
Pārijuññam	137	Phuṭṭhā	23
Pārisajjā	29	[Ba]	
Pāvāro	52	Baddhajivhā	123
Pāsādo	230	Balavalobhattā	30
Piṭakasampadānam	59	Bahivaṅkapādatā	109
Piṭṭhapāyasam	109	Bahujanappamaddanam	123
Piṇḍīkataṁ	104	Bahussuto	205
Pipāsā	133	Bīraṇatthambakam	5
Piyadassano	121	Buddhadhammā	197
Piyavadū	111	Bodhijam	94
Pisuṇavācassa	122	Bodhipakkhiyānam	50
Pīṇitaṁ	92	Byantībhūtam	285
Puññakiriyā	205	Byasanam	12
Puñño	202	Byāpādayati	269
Puthudisā	127	Brahmacariyavāsam	39
Punappunam	146	Brahmacariyassa	191
Pubbaṅgamatā	121	Brahmajā	37
Pūrenteneva	27	Brahmadāyādā	37
Pūvasurā	130	Brahmanimmitā	37
Pekkhā	210		5,
Petā	286	[Bha]	
Pemam	286	Bhakkhasam	4
Pemanīyo	123	Bhaṇḍanam	87